







Ahmet Rifat: İngilizce dersleri  
ve coğrafya. 1. c.

کتابخانه کتب خطی و نسخ خطی  
کتابخانه کتب خطی و نسخ خطی

903

A 35

وقوعات مشهوره و غریبه نك کیفیات مهمه سنی و برر صورته کسب اشتہار  
ایدن ذوات واقوام و بلدانك احوال نارنجیہ سنی و مؤلفات و مخترعات ایله  
اثر سائرہ نك اصحاب و مواقع و ازمانی جامعدر

حروف ہجا ترتیبی اوزره

جلد 1

1

اشبو برنجی جلد 1 حرفہ مخصوص

مرتب و صاحب امتیازی دیوان محاسبات اعظم سندھ  
احمد رفعت افندی

معارف نظارت جلیله سنك رخصتیلہ

استانبول

باب عالی جوارنده ابوالسعود جادہ سنده ۷۲ نومرولی  
(محمود) بکک مطبعہ سنده طبع اولندی

۱۲۹۹



## مقدمه


بدیع الدهور والا کوان تقدست ذاته عن الشیبه و النقصان حضرتلرینه  
 جد بی پایان و علت غائیة خلقت جهان اولان نبی آخر الزمان حضرتلرینه  
 صلاة فراوان تقدیمندن و نجه امالی ترقی معارفه مصروف اولان پادشاهمز  
 غازی سلطان ( عبد الحمید ) خان ثانی افندمز حضرتلرینک توافر عمر و اقبال  
 و تزیاد شوکت و اجلال تاجداریلری ادعیة مفروضه سنی ادا و و تمییدن صکره  
 اشبو ( لغات تاریخیه و جغرافیة بی ) مع العجز ترتیبه باشلابوب اشبو بیک ایکوز  
 طقسان طقوز سنه هجریه سی او آخرنده اکیاله موفق اولدم بونده زمان آدم  
 علیه السلامدن شمدی به قدر جریان ایدن و قوعات مشهوره و غریبه نك کیفیات  
 مهمه سی و برر صورتله کسب اشهار ایدن ذوات و اقوام و بلدانک احوال  
 تاریخیه سی و بعض آثارک اصحاب و مواقع و ازمانی حروف هجا ترتیبی اوزره  
 مندرج اولدیغندن مراجعت بیوره جق ذوات کرامک ممنون اوله جققرینی  
 و تصادف ایده جکلری خطا و نقصانمزی تصحیح و اکیاله همت بیوره جققرینی  
 امید ایلدم .

### ( اخطار )

اشبو لغات تاریخیه و جغرافیة هر کله نك ابتدا کی حروف اربعه سی اوزرینه  
 ترتیب اولنوب ماعداسیله ایکی کله ارسنده اولان الف لاملر ترتیبه ادخال  
 اولنماشدر و ابتدای خلقت آدم علیه السلامدن میلادعیسی علیه السلامه  
 د کین چکن مدت و قوعاتیمچون تاریخ خلقت و میلاددن هجرت نبویه علیه  
 اکل التحیه به د کین چکن مدت و قوعاتیمچون تاریخ میلاد و اندن صکره سیمچون  
 هم تاریخ میلاد و هم تاریخ هجرت کوسترلمش و تاریخ خلقته ( خ ) و تاریخ  
 میلاده ( م ) و تاریخ هجرت به ( ه ) اشارتلی ترقیم اولنماشدر .

ومنه الهدایة والتوفیق

۲۲۷  
فیس



# بِسْمِ اللَّهِ الرَّحْمَنِ الرَّحِيمِ

## حرف الف

﴿ ائمه ﴾ — دين مبینی اقامه ایله خلیفه رسول الله و امام المسلمین عنوانه نائل اولان جناب ( ابوبکر الصدیق ) و ( عمر الفاروق ) و ( عثمان ذی النورین ) و ( علی المرتضی ) رضوان الله تعالی علیهم اجمعین حضراتنه چار یارکزین و خلفاء راشدین دیدکاری کبی ائمه اربعه دخی دیرلر .

امامتی جناب علی المرتضی و اولاد کرامنه منحصر طوتانلردن ( اثنی عشریه ) دنیلان فرقه اصحابی ( امام علی ) و مخدوم عالیبری ( حسن و حسین ) و ( زین العابدین علی بن حسین ) و ( محمد الباقر بن زین العابدین ) و ( جعفر الصادق بن محمد الباقر ) و ( موسی کاظم بن جعفر الصادق ) و ( علی الرضا بن موسی کاظم ) و ( محمد الجواد بن علی الرضا ) و ( علی الهادی بن محمد الجواد ) و حسن العسکری بن علی الهادی ) و ( محمد المهدی بن حسن العسکری ) رضوان الله علیهم اجمعین حضراتنه ( ائمه اثنی عشر ) دیوب بونلردن ایلروسنه کتمزلر . و ( اسماعیلیه ) دنیلان فرقه اصحابی جعفر الصادق حضرتلرینه قدر اثنی عشریه ایله برابر کیدوب اندن صکره امام موسی کاظم حضرتلرینک یرینه بیوک برادری ( اسماعیل ) و اندن صکره ( محمد المکتوم بن اسماعیل ) و اندن صکره ( جعفر المصدق بن محمد المکتوم ) و اندن صکره ( محمد الحیب بن جعفر المصدق ) و اندن صکره ( عبیدالله المهدی بن



محمد الحبيب) حضرتانی امام طانورلر. و (رزایمه) فرقه سی دخی امامت جناب علی المرتضادن اوغلی (محمد الحنفیه) یه واندن اوغلی (ابی هاشم) ه واندن وصیت ایله (علی بن عبدالله بن عباس) ه واندن (محمد بن علی) یه واندن ینه وصیت ایله اوغلی (ابراهیم) ه انتقال ایتدی دیرلر. اشبو ابراهیم خلفای عباسیه تک برنجیسی اولان (سفا ح) ک قرنداشیدر ابامسلم خراسانی خلقی ابتدا بوکایعت ایتدیرمشیدی. اعتقاد کلمه سنده اسماعیلیه و رزایمه فرقه لرینه و سائرلر ینک اسملرینه دخی مراجعت بیوریله.

مجتهد فی الدین اولان امام (ابوحنیفه) و (محمد الشافعی) و (مالک بن انس) و (احمد بن حنبل) حضرتاته دخی (ائمه اربعه) دیرلر.

§

﴿آئوزرت﴾ — لایث حکمدارلرندن یعنی ملوک بطالسه مصریه دن بردانک اسمیدر بونک کندو قزیله ازدواجندن حاصل اولان اوغلی (فیلوپاتور) (۵۳۷۲ خ) تاریخنده یعنی میلادک ایکیوز یکریمی ایکی سنه مقدمنده باباسنی بغیرحق اعدام ایدرک تخته اوتوردقندن صکره سلطنتنی تأمین ایچون والدهسنی و تزوج ایتدیکی قز قرنداشنی دخی اعدام وزیر حایه سنده یشایان یهودیلری فوق الغایه ازعاج ایلدیکندن ظالم و غدار نامنی الدی و عاقبت کندوسیده ایتدیکنی بولدی.

§

﴿آئول﴾ — اسکی یونانیرک روز کار آلهی اعتقاد ایتدکلری شخص موهومک اسمیدر. جاهیر یونانیسه دن (ایتاکی) حکمداری (اولیس) بونک بر بیوک خشنودیتنی قزانوب ترووا محاربه سندن عودت ایدرکن هدیه اوله رق بر قاچ طلوم روز کارینی آلدیغی و دکره آچلدقندن صکره سفینه ده بولنانلر بیلیه رک طلوملری آچدکلری کبی بر فورتنه چیقوب اولیسک سفینه سندن ماعداسنی غرق ایتدیکی خرافات یونانیه دندر.

§

﴿آییون﴾ — سیروز نهر ینک بحره منصب اولدیغی محل جووارنده

اسکی برشهرک اسمیدر میلاددن مقدم آتله لولرله محاربه ایدن برعجم قوماندانک بوشهرده مغلوب اولوب دشمنه تسلیم اولماق ایچون اولاد و عیال و مال و منالیله کندوسنی آتشد احرارق و امحا و نامنی عالده ابقا ایلدیکی توارینجده مقیددر.

§

﴿ آب ﴾ — لسان عبرانی و سریانیده ماه اغستوسدر لکن عبرانیلر و سریانیلر ابتدای سنه بی (تسری) یعنی تشرین اول اعتبار ایتدکلرندن انلره کوره اغستوس یاخود (آب قریه) اون برنجی و تاریخ شمسیء فرنکی حسابنجه ابتدای سنه کانون ثانی اولدیغندن سکزنجی و تاریخ رومی حسابنجه یعنی اسکی رومالیرجه مارتدن اعتباراً التجی آی صایلور. (اغستوس) کله سنه دخی نظر یوریه.

نصاری اقایم ثلثه دن اقنوم اوله (آب) دیرلر مرادلری پدر معناسنه اولان ادر و همزه نك مدی لغت سریانییه اتباعاً سائر پدرلردن تمیز ایچوندور. (آب حیاة) بعض اقواله کوره حضر والیاس علیهما السلامک ظلماتنده ایچوب الی یوم القیام برحیات اولدقلری صودر و اصطلاحات صوفیهده حضر بسط قلبدن کنایه اولدیغی کبی آب حیاة دخی علم لدن معناسنه برمثالدر (آب حیوان) و (آب حضر) دخی دینور و بعضاً عشق آلهدن دخی کنایه اولور.

ابن بطوطه قولنجه چینده (سیر) نامیله معروف اولان بر نهره (آب حیاة) دخی دیرلر ایمش و بونهرک منبعی خان بالق شهری جوارنده کی میمون طاغلی و بجره منصب اولدیغی محل زیتون قصبه سی ایمش.

(آب زلال) ایرانده شستر قصبه سی جوارنده بر نهردر و صوی غایت خفیف و لطیف و صفوق اولدیغیچون بونامی المشر یونانیلر بونهره مقدا (اولیوس) دیرلر ایدی.

(آب روان) یاخور چشمهء روان طبرستانده برطاغدن نبعان ایدن صودر بعض ایرانیلرک اعتقادینه کوره برآدم بو صویک منبعنه سسلنور ایسه درحال کسیلور و اوآدم اورادن کتمدکجه آقاز ایمش.

(آب خورشید) اسکی شمس پرست عملسی لسانجہ حیاة دیمکدر زیرا  
بونر تجلی روحی فیض شمسدن عبارت زعم ایدرلر ایدی.

§

﴿آباء﴾ — حکما عناصره امهات دیدکلری کبی افلاک وانجمه دخی  
(آباء) دیرلر وبو تسمیه ایله علویات وسفلیاتک علیت ومعلولیت طریقله  
یکدیگرینه ارتباطنی مسئلهسنه قوت ویرمک استرلر واقعا متکلمین دخی اشبو  
ارتباطی انکار ایتزلر لکن تعلیلده قائل اولزلر.  
سیارات سبعة یی ار باب و مدبرات عالم اعتقاد ایدن یاخود مدبرات عالم  
دیدکلری روحانلرک واسطه تدبیر وتأثری ظن ایلین ار باب عزایم وخواص  
دخی سیارات مذکوره یه (آباء) وعناصره امهات دیرلر.  
نصاری حواریونه یتشمش اولان و دین (عیسی) علیه السلامی مباحثه  
ومکاتبه ایله نشر ایدن رسوللره وایکنجی عصر میلادیدن اون اوچنجی عصر  
میلادی یه قدر کلیسانک رأیی اوزره عامل و خادم اولان ییوک پاپاسلره (آباء)  
تعبیر ایدرلر.

§

﴿آباد﴾ — خرابک ضدی معمور معناسنه در انک ایچون هندستانک  
بعض شهرلرینه (الله آباد) (احمدآباد) (جلال آباد) تسمیه اولندی مکة  
مکرمه یه دخی (آباد) دیانلر واردر.  
در سعادتده کی کاغدخانه مسیره سنه سعد آباد تسمیه سی صحیح دکدر صحیحی  
(سعید آباد) در زیر کاغدخانه یی وچاغلینلری صدر اسبق سعید پاشا  
(۱۷۴۰ م و ۱۱۵۳ هـ) تاریخنده فرانسه ده کوردیکی (ورسای) چاغلینلرینه  
تقلیداً یایدیرمش وانک نامنه نسبتله شهرت بولش ایدی.

§

﴿آبار﴾ — آوار کله سنه نظر بیوریله.

§

﴿آبازه﴾ — یاخود (آبازیا) قافقاسیه نک جهت جنوبیسنده و قره  
دکز ایله قوبان نهری آره سننده مسکون بر قبیله نک یاخود او قبیله نک ساکن

اولدیغی اراضینک اسمیدر . بونلرک بطون چراکسه دن معدود اولدقلرنده شبهه یوغیسه ده لسان وعادات و اخلاقری بشقه در ابازه لر اراضی مذکوره نك جنوب و شمال جهتلرنده بیوک و کوچک ناملریله ایکی یه تقسیم اولنورلر باشلیجه شهرلری ( صخوم ) و ( جاسچیرا ) و ( کاکره ) و ( پیچوندا ) در ونفوس ذکور موجوده لر ی بعد الهجره قرق اللی بیک راده سنده در .

بونلر در دنجی عصر میلادیده اول حوالی خلقیله برابر روما دولتی جایه سندن قورتیلوب ( ۱۸۲۹ م و ۱۲۴۵ ه ) تاریخنه قدر گاه کندو حاللرنده و گاه کرجستان و دولت عثمانیه و ایرانیه جایه لرنده یشادیلر ایسه ده هیچ بروقت روسیه نك مداخلات و تهدیداتندن قورتیله مدیلر و بر چوغی ( ۱۲۸۴ م و ۱۲۹۴ ه ) تاریخلرنده ممالک عثمانیه یه هجرت ایدوب قالا نلری روسیه جایه سنی قبوله مجبور اولدیلر .

روسیه لیلر ابازه ممالکنه ( انخازیا ) دیرلر و یونانلر ( آخای ) تعبیر ایدرلر .

§

﴿ آبازه محمد پاشا ﴾ — وزیرای دولت علیه دن مشهور بر ذاتدر . بو ذات ارضروم والیسی ایکن در سعادتده یکچیریلرک سلطان ( عثمان خان ) حضرتلرینی شهید ایتد کربینی خبر آلدیغی کبی اوراده بولنان یکچیریلری کاملاقتل و قلعه طویچیلرینی طرد ایدوب شهید مشارالیه ک قاننی دعوا ایچون استانبوله کیده جکنی اعلان ایلدی و باشنه طویلا دیغی عساکر کثیره ایله انقره یه طوغری یوریدی و در سعادتدن اخذ و ازاله سنه مأموراً اعزام اولنان جغاله زاده محمود پاشادخی بزچوق یکچیری و اناطولی عسکر یله انقره ده قارشولوب در سعادتده هجومی منع ایلدیسسه ده اخذ و ازاله سنه موفق اوله مدی و ایکی سنه صکره یعنی ( ۱۶۲۲ م و ۱۰۳۲ ه ) تاریخنده قیصریه ده قصوری غفو اولنوب بو صورتله جمعیتی طاغیدلدی .

( آبازه حسن پاشا ) دیاربکر والیسی ایکن مغایر عبودیت حال و حرکته بولندیغندن ( ۱۶۴۹ م و ۱۰۵۹ ه ) تاریخنده اوزرینه عسکر کوندریلوب اخذ و اعدام اولمشدر . بو ذات مقدا ترکان و یوده سی ایکن دخی بر قاچ کره دولت علیه یه عصیان ایتشیدی .

﴿ اباضیه ﴾ — خوار جدن بر فرقه باطله اصحابك اسمیدر . رئیسری  
 طرابلس غرب بر بریلندن ( عبده بن اباض المری ) ایدی بونلر ( ۱۵۳ هـ )  
 تاریخنده افریقیه ولایتنه هجوم و خلیفه منصور طرفندن والی بولنان ذاتی  
 مغلوب و پریشان ایتدکن صکره جمعیتلی بیویوب اوچ شعبه یه منقسم اولدیلر  
 بو شعبه لر دن یالکز ( ابو حاتم ) اداره سنده اولان بر شعبه ده سکسان بیک سواری  
 وار ایدی ( ابو عاد ) و ( ابو قره ) شعبه لری دخی بشقه . اعتقاد کلمه سنده  
 ۴۷ فرقه یه نظر بیور یله .

§

﴿ ابامسلم ﴾ — اسمی ( عبد الرحمن ) مولدی ( خراسان ) تاریخ وفاتی  
 ( ۷۵۴ م و ۱۳۷ هـ ) — دولت امویه بی محو و دولت عباسیه بی تشکیله سبب  
 اولان ذاتدر بوزات احاد ناسدن ایکن ( مرو ) شهرنده ساکن اولاد عباسدن  
 امام ابراهیمک نقباسنه انتساب ایدرک انلر طرفندن قرا و قصباتی طولاشوب  
 اهالی بی امام مومی الیه بیعت ایچون تشویقه مأمور اولدی و ایفای مأموریت  
 ایتمکده ایکن ملوک امویه دن مروان الحماری کیفیتی خبر آوب مأمور  
 مخصوص ارسالیله امام مومی الیه ایدام ایتدیر دیسه ده ابامسلمی ایشندن  
 آلیقویه مدی و ابامسلم در حال دعوتی متوفای مومی الیهک حیره ده مختفی بولنان  
 برادری ( ابو العباس سفاح ) نامنه چوروب و طویلادیغی عساکر کلیه ایله  
 خراسانی اوروب مروان الحماری طرفندن اوتوران والی بی قاچیردی و اول  
 اثاده ( سفاح ) دخی حیره دن انباره کلوب هرکس بیعت ایتدی و ابامسلمک  
 اردوسی ( زاب ) نهری جوارنده شام عسکرینی بوزدی و مروان الحماری  
 شام شریفه و اوراده دخی طوره میوب دهاکیرولره فرار ایلدیکندن ( سفاح )  
 ( ۷۴۹ م و ۱۳۲ هـ ) تاریخنده سلطنتی اعلان ایلدی .

ابامسلم بو خدمتنه مکافات اولق اوزره خراسان والیکنی احراز ایشسه ده  
 بش سنه دن زیاده معمر اولماش و عاقبت خلیفه منصورک سیف غدربله  
 اعدام اولنوب غوغای جهانندن قورتلشدز . ( ابو العباس و مروان )  
 کلمه لرینه دخی مراجعت بیور یله .

§

﴿ آپامینونداس ﴾ — یونانستانده ( تب ) یا خود ( تیوه ) جمهوری

قدما واركاندن بر مشهور جزالدر. بولنديغى محاربه لرده هيچ مغلوبيت كورميان اشبو قهرمان (۳۴۷۲ خ) تاريخنده يعنى ميلادك ايكيك يوز يكرمى ايكي سنه مقدمنده اسپارت جمهوريله ايتديكى محاربه ده بر آغرياره آلدیغندن قوماندایى بر اغوب سويكى ضابطانى جادرينه جلب و مظفريت كندو طرفلنده واقع اولديغنى بالتحقيق اظهار ممنونيت ايتد كندنصره قارشوسنده آصيلي اولان قالغان و قلیچنه اشارت ايدرك ( بن شمدي به قدر شوسلاحلرم سایه سنده اصلامغلوب اولمىسزین كیده یورم بو کون بنم آخر عمرم ظن اولمسون زیرا شرف و اقبالم بو کون احتمال تغیردن قورتيله جق يعنى نامم قهرمانقله قاله جقدر اشته سزه تيويه مظفر واسپارتى مقهور ومدمر براغيورم بونلر بنم نام وشجاعتمى ابدأ اونوتدیرمزلر ) ديوب و اولادى اولمديغنه تأسفله بر آه چكوب آخرته كتدى .

بو قهرمان همان بالجملة فضائلى جامع و وطن و ملتنه فوق الغايه محب اولديغى و هر كسك خشنوديتنى قرانديغى حالده ينه غرض و نفسانيتدن قورتيله ماش و مقدا و قوعبولان بر محاربه يي نيچون درت آي قدر اوزاتدك ديواعدامنه حكم اولمش و كوجله يقايى قورتاره بيلش ايدى .

§

﴿آبان بن سعيد بن العاص﴾ رضى الله تعالى عنه — شجعان اصحاب كرامندندر ( ۶۳۴ م و ۱۳ هـ ) تاريخنده شام فتحنده نيجه قهرمانقلر اجرا ايتد كندنصره بر مسموم اوق اصابتيله ياره لنديغندن قرنداشلى اردوكاهه كتوروب باشندن عمده سنى چيقارمق استدكرنده آنى چيقارمين زیرا روحك دخى برابر چيتمسى مقرر ديدى و دكله ميوب چيقاردقلى كبي كوزلرينى سمايه ديكهرك و پرمغيله شهادت كتورهرك و ( هذا ما وعد الرحمن و صدق المرسلون ) ايت كريمه سنى تلاوت ايليهرك تسليم روح ايلدى و زوجه سى مشاراليهك بو صورته شهادتنى خبر آلدیغى كبي ذاتا يك مشهوره كانكش اولديغندن ميدان محاربه يه چيقوب خيلى اعدا تلفيله اخذ تاره موفق اولدى .

§

﴿آبان بن عثمان﴾ بن عفان الاموى — مدينه منوره قهاسندندر

ملوك امويه دن ( عبد الملك ) بن مروان بونی ( ۶۹۵ م و ۷۶ هـ ) تاریخنده  
مدینه منوره والیسی تعیین ایش و اون سنه صکره عزل اولمش ایدی .

§

﴿ آبان بن عبد الحمید ﴾ — مشاهیر شعرای عربنددر و مبدأ خلق و امر  
دنیا حقنده بر کوزل قصیدهسی و علم منطقدن ( ذات الحلال ) نامنده بر  
منظومهسی و بر امکه حقنده بر چوق مدحیدهسی واردر و ( کلیله و دمنه )  
کتابنی منظوماً شو صورتده تحریر الملشدر .

( هذا کتاب ادب و محنه )

( وهو الذی یدی کلیله و دمنه )

( فیه احتمالات و فیه رشد )

( وهو کتاب وضعته الهند ) الی نهایته

§

﴿ ابجد ﴾ — مبتدیله حروف هجایی تعلیمدن صکره ترکیباتی او کرتک  
ایچون وضع اولمش سکز عدد کله در . بعضیبری بونلری فنیکه لیلرک یا خود  
عبرانیلرک حروفی ظن ایتدیله و بعضیبری ابجده اخذ ایتدی و هوزه رکوب  
ایتدی و حطی به طوردی و کله سویلدی و سغفصه چابک او کرندی و قرشته  
عالم اولدی و تحذه حافظ اولدی و ضغفه کامل اولدی معناسنی و یردیله  
و بعضیبری دخی ( ابجد ) ابو جادک غلطیدر و ابو جاد ( شعیب ) علیه  
السلامک امتی اولان اصحاب ( ایکه ) رؤساسندن بری و هوز و سغفص  
و قرشت رفقاسی و کله جمله سنک رئیس ایدی حتی یوم ظله ده امت مرقومه  
هلاک اولدیغی زمان مرقوم کله دخی هلاک اولدیغندن قزی

کله قد هد رکنی سید القوم اتا هم

هلاکه وسط المحله الختف ناراً وسط ظله

جعلت ناراً علیهم

دار هم بالضمحله

مرثیه سنی سویلدی دیدیلر . ووفق مراقیلیری دخی یکریمی سکرز حرفدن عبارت اولان اشبو ابجد حروفنی عجیب برصورتده ترکیب واستعمال ایدرلر شویله که حروف مذکورہ بی دردر دردر ( ابجد ) ( هوزح ) ( طیکل ) ( منسع ) ( فصقر ) ( شتخ ) ( ذضغ ) برلشدیروب وهر برینی بر کوکبه یعنی ابجد حرفلرینی زخله وهوزج حرفلرینی مشتری به و طیکل حرفلرینی مریحه ومنسع حرفلرینی شمسه وفصقر حرفلرینی زهره به و شتخ حرفلرینی عطاردہ وذضغ حرفلرینی قره نسبت ایدوب برنجی حرفلرینی عناصر اربعدن ناری وایکنجی حرفلرینی هوئی و اوچنجی حرفلرینی مائی ودردنجی حرفلرینی خاکی طانورلر وقواعد مخصوصه لری اوزره وقلرنده وعزیمتلرنده قوللانورلر .

اسلافک حروف عربیہ بی ذکر اولنان رؤسا یاخود ملوک مدین اسملرنک حروفی عددنجه وضع و ترتیب ایتدیکی و بعد زمان ( ٹخذ ) و ( ضغ ) حرفلری دخی بولنوب تردیف اولندیغی و اشبو حروف اخیرہ به ( روادف ) اطلاق ایدلدیکی دخی بعض کتابلرده کورلشدر .

§

﴿ ابدال ﴾ — مصالح عبادتہ تصرف ایچون من عندالله مظهر خلافت اولان ذوات کرامک اسمیدر بولنر قرقی شام شریفده و او توی اقطار سائرده اولق اوزره یتش نفردن عبارت اولوب دائماً امر خدا ایله معامله ایدرلر و ایچلرندن بری وفات ایتدکده یرینه صلحای امتدن برینی انتخاب ایلرلر ایمش ( ان ابدال امتی لم یدخلوا الجنة بالاعمال بل دخلوها برحمة الله وسخاوة الانفس وسلامة الصدور والرحمة للمسلمین ) حدیث شریفی ذوات مشارالیه مک حال و شانلرینی پک کوزل بیلدیرمش اولدیغندن بشقه تعریفه حاجت یوقدر .

( ۹۶۲ م و ۳۵۱ هـ ) تاریخنده مقتولاء وفات ایدن ابو الطیب عبد الواحد بن علینک فن لغتده تألیف ایتدیکی کتاب دخی ( ابدال ) نامنده ایدی .

§

﴿ ابدال مراد ﴾ — ( اورخان غازی ) حضرت لریله بروسه فتحنده بولنان اعزہ کرامدنر و ترہہ سی بروسه ده شاقق جبلده شهره ناظر بر محلدہ در .



بو ذات عالیقدرک بر بحث اوزرینه قزل قور آتشی پموق ایچنه قویوب  
 مظنه کرامدن ( دوغلی بابا ) حضرتلرینه کوندردیکی وتربه سنک موقعی  
 مسیرکاه اولق حسیله کلنردن بر سرخوش مشار الیهک صندوقه سی  
 اوزرینه بندیکی جهته طاغدن آشاغی آتیلوب نعشی بروسه اووه سنده  
 بولندیغی بروسه جه متواتردر .

§

﴿ ابدال موسی ﴾ — اورخان غازی حضرتلریله بروسه قنخنده بولنان  
 اولیاء اللمدن بر مبارک ذاتدر وتربه سی بروسه شهری ایچنده مشهور  
 بر زیارتکلهدر وکرامات علیه لرندن اوله رق حال حیاتنده کیمش اولدیغی  
 قرمزی پابوچی حالا تربه سنده بو کون دیکلمش کبی طور مقده در .

§

﴿ ابراکادابرا ﴾ — مجهول المعنی بر لفظ سریانیدر . وقتیله بونی زرده  
 ترتیب اوزره یازوب جا خسته لکنه او غریانلرک بوینه آصارلر و شفا  
 مأمولیه طقوز کون طور دیردقدن صکره قبل طلوع الشمس چیقاروب شرق  
 جانبنه آقان بر صویه اتارلر ایدی .

ا ب ر ا ک ا د ا ب ر ا  
 ا ب ر ا ک ا د ا ب ر  
 ا ب ر ا ک ا د ا ب  
 ا ب ر ا ک ا د ا  
 ا ب ر ا ک ا د  
 ا ب ر ا ک ا  
 ا ب ر ا ک  
 ا ب ر ا  
 ا ب ر  
 ا ب  
 ا

﴿ ابراهيم خليل الله ﴾ — اولوالعزم پيغمبران ديشاندىندر (۳۴۷۲ خ)

تاريخنده يعنى ميلادك ايكى يك يوز يكرمى ايكى سنه مقدمنده ارض كلدانده واقع اورفه شهرى جوارنده (كوئا) نام محلده دنيايه كلدى وسنى تيمشه بالغ اولدوقده من طرفاه مأمور اولديغى اوزره اهالى بي دين حقه دعوته وپرستش ايتدكلى اجرام سماويه نك مخلوقيتنى واه عظيم الشان حضرتلر نك وحدانيت وكبريائى بيان وتفهميه باشلادى واهالى كوردكلى بونجه معجزات باهره ونصايح جليله قارشو مشاراليهك الحادينه حكم ايدرك كيفيتى نمروده خبر ويروب آلدقلى مساعدده اوزرينه آتسه آتمق استديلر سده نار بعنايه اه مبدل كلزار اولديغندن موفق اوله مديلر وحضرت (ابراهيم) دخى آرتقى اورالده طور ميوب اولاد وعيال ودرتيوزدن متجاوز خدمه ومنسوباتيله (حران) قصبه سنه هجرت وپدرى (تارح) ك وفاتنه دكين اوراده اقامت ايلدى واندىن برقاچ سنه صكره قحط مناسبتيله مصره كيدوب ينه ارض كنعانه كلدى ويكنى (لوط) عليه السلامى (سدوم) نواحيسنه كوندروب كندوسى (مامبرى) صحراسنده (حبرون) نام محلده قالدى ومتعلقاتى بيننده منعقد مقاوله بي تخطر وتطهر ايچون امر ختاني اجرا بيوردى و (۳۵۵۸ خ) تاريخنده يعنى ميلادك ايكبىك اوتوزالتى سنه مقدمنده جاريه سى هاجردن حضرت (اسماعيل) ومؤخرأً زوجه سى جناب ساره دن عقيم اولديغى حالده حضرت (اسحق) عليها السلام دنيايه كلدى وحضرت ساره هاجرى قسقانوب تبعيدىنى مراد واصرار ايلديكندن حضرت ابراهيم ناچار هاجر ايله اوغلى حضرت اسماعيل كوتوروب مكه مكرمه نك اولديغى محله براقدى وبرمدت صكره كورمك ايچون كيدوب بركده كعبه مكرمه بي ياپدى و (۳۶۴۷ خ) تاريخنده يعنى ميلادك يك طقوز يوز قرق يدى سنه مقدمنده يوز تيمش بش ياشنده اولديغى حالده وفات ايدوب خليل الرحانده واقع مغاره يه دفن اولدى.

حضرت ابراهيم عليه السلامك سلسله نسي طقوز بطنده (ارفخشد) بن سامه واصل اولور وكندوسى اوچ قومك جدى صايلور برنجيسى مخدوم عاليلى حضرت (اسحق) ك اوغلى حضرت (يعقوب) عليه السلامدن تشعب

ایدن (بنی اسرائیل) ایکنجیسی مخدوم عالیلری حضرت (اسماعیل) علیه السلام مکہ مکرمہ ده (جرهم) قبیله سندن آلدیغی قزدن تولدوتشعب ایدن (عرب مستعربه) اوچنجیسی اخیراً قبائل ترکدن آلدیغی قطورا نام قزدن تولدوتشعب ایدن (مادیلر) درکه حضرت ابراهیم حیاتنده بونلری یعنی قطورادن اولان اولادینی اموال کثیره اعطاسیله شرق طرفنه کوندرمشیدی.

(اورفه) کله سنه دخی نظر بیوریه.

§

﴿ ابرهیم بن ادهم ﴾ کنیه سی (ابواسحق) مولدی (بلخ) تاریخ وفاتی (۷۷۸ م و ۱۶۲ ه) — مشارالیه بلخ ابنای ملوکنندن اولدیغی حالده ترك آرزوی سلطنتله زمره اولیای کرامه داخل اولمش برذات ستوده سماتدره. آوده طاوشان قوغالار ایکن یاخود غایت مکلف بریتاق ایچنده یاتوب زمره صالحینه التحاق طریقنی دوشینور ایکن هدایت الهیه ایریشوب ارشاد بیورلدیغندن همان عیال ومنالنی ترك ایدرک راه حقه سلوک ایلدی و برابر مدت بلخ طاغلرنده ازوا وطقوز سنه نیشابورده برمغاره ده عبادات و طاعاتله تحصیل رضا ایلدکن صکره مکہ مکرمه یه کلدی و امام باقر و امثالی ذوات کرام ایله کوزشدی و برآرق تدارک طیب ایچون شام شریفده باغ بکجیلکی ایتدی واک صکره لازقیه ده وفات ایدوب (جبله ادهمی) دنیلان محله دفن اولندی. رحمة اه علیه

حضرت مشارالیهک بلخده رحم مادرده بر اقدیغی مخدومی بیویوب پدرینی کورمک آرزوسیه ووالده سی و برچوق خدم و حشمیه مکہ مکرمه یه کلشیدی بابا اوغل بربرینی هیچ کورمدیکی حالده حضرت ابراهیم اشای طوافده چوجغی طانیوب مریدلرینه اه اعلم بوچوجق بنم اوغلم اولق کرکدر زیرا کوکلم پک زیاده میل ایتدی دیسیله مریدلر کیدوب چوجغی کتوردیلر وچوجق باباسنی کوردیکی کبی فوق الغایه برمسرتله ایاقلرینی تقبیل ایتدکن صکره یاننه اوتوردی وارتق اوکسوزلکه تحمل ایده میهرک و والده سیله برابر کلدیکی و برلکده عودت رجاسنده اولدیغی کمال سوز و کداز ایله سویلدیسه ده

پدرندن مأمولی کبی التفات وجواب آلهمدی و آرهدن براز مدت یچد کدن  
 صکره ابراهیم بن ادهم حضرتلری کمال حزن ایله الیرینی قالدیروب ( ای خالق  
 انس و جان حالم سکا عیاندر بو چوجوق کو کلمده بریر طوته جق اولور ایسه  
 عاقبتم خسراندر سندن امیدم لطف واحساندر ) دیو دعا ایسدیکی کبی  
 چوجوق رحمت رحمانه واصل اولدی. دیگر برروایتیه کوره ابراهیم بن ادهم  
 حضرتلری بلخده دنیایه کلیوب والدهسی ادای حج ایچون مکّه مکرمه یه  
 کلدیکی زمان دنیایه کتورمش و اثنای طوافده ( یار بی بو چوجغنی زمره  
 صالحینه الحاق امله ) دیو دعا ایتمشدر.

§

﴿ ابراهیم بن ثابت ﴾ — کنیهسی ( ابو اسحق ) مولدی ( بغداد ) تاریخ  
 وفاتی ( ۹۷۹ م و ۳۶۹ هـ ) مشار الیه زمانک شیخ الشیوخی ایدی مجملرندن  
 بوی نصیحت طلب ایلدکده از لده سنک ایچون قونیلان سنه بی اختیار سکا  
 معارضه وقتدن خیر لودر و صکره پشیان اوله جغک ایشی ایشلک بیلهرک  
 ضرری قبولدر بیوردی.

§

﴿ ابراهیم الحلبي ﴾ — علمای ذوی الاحترامدندر شام شریفده و مصرده  
 علم تفسیر و حدیث و فقهی تحصیل و تکمیل ایتد کدن صکره درسعاده کلوب  
 سلطان محمد جامع شریفنه خطیب اولدی و منیه المصلی اوزرینه ایکی شرح  
 یازدی و ( ملتقی الابحر ) و ( طبقات الحنفیه ) کبی خیلی کتاب تألیف ایتدی  
 ایوم مشهور اولان کتاب الحلبي منیه المصلینک شرح صغیریدر. بوذات  
 دائما خانه سنده عبادات و تألیفات ایله مشغول اولوب کسه ایله کوروشمز  
 و جامع شریفه کیدرکن راست کلنره مر حبادن بشقه سوز سولنر ایدی.  
 سنی طقسانی متجاوز اولدیغی حالده ( ۱۵۲۹ م و ۹۵۶ هـ ) تاریخنده وفات  
 ایدوب ادرنه قپوسی خارجه دفع اولتمشدر.

راغب پاشا خواجهسی دیمکله مشهور مصنفیندن ( سیر جلبي ) مؤلفی  
 مصطفی الحلبي بشقه در.

§

﴿ ابراهیم حقی ﴾ — فضلی مشایخ کرامند در بوذات از ضرورم سنجانی داخلنده (حسن قلعه) نام قصبه ده دنیا به کلوب سعرد قضا سنده (تلو) قریه سنده ارشاد عباد ایله مشغول اولان مشایخ قادریه دن عاشق باه شیخ (اسماعیل) افندی حضرت ترینه انساب وانلرک همتلریله علوم ظاهره و باطنه بی تحصیل ایلدی و شیخ مشار الیهک و فائندن صکره رینه خلیفه اولدی و فضل و کمالی تألیفه موفق اولدیغی (معرفنامه) سیله عالمه کوستردی. وفاتی (۱۷۷۲ م و ۱۱۸۶ ه) تاریخنده و قبری قریه مذکوره ده واقع زاویه سی خطیره سنده در.

§

﴿ ابراهیم بن داود القصار ﴾ — کینه سی (ابو اسحق) مسقط رأسی (رقه) تاریخ وفاتی (۹۳۷ م و ۳۲۶ ه) مشار الیه سادات صوفیه دن جنید اقرانی بریر فانی اولدیغی حالده شام شریفده قصارلق ایله کینوب کسه به حالی سولیز و دائماً فقر او درویشان ایله برلشوب ماعدا کسه لرله کورشمز ایدی. محبلرندن برذاتک سؤالنه جواباً (قیمت کل انسان بقدر همته فان کان همته الدنيا فلا قيمة له وان كانت همته رضی اه عنه فلا يمكن الاستدراك قیمته وبالوقوف علیها) بیورمشدر. او چنجی عصر هجریده کلان (جدون القصار) و دردنچی عصر هجریده کلان (عبداه القصار) دخی مشایخ صوفیه نك اولولرندن ایدی.

§

﴿ ابراهیم الدسوقی ﴾ — کرامات ظاهره و مقامات فاخره اصحابندن بر مبارک ذاتدرو طریقت علیة (دسوقیه) نك پیریدرو قرشی الاصلدر مریدلرینه دائماً وعظ و نصیحت ایدوب مشرع و نظیف و عقیف اولسانلر اولادم دخی اولسه بدن دکدر بیورر ایدی. (۱۲۳۵ م و ۶۳۳ ه) تاریخنده دنیا به کلوب (۶۷۶ ه) تاریخنده وفات ایتمشدر.

§

﴿ ابراهیم الکورانی ﴾ — سادات نقشبندیه دندر. و علم تصریفدن (تکمیل التعریف) نامنده بر کتابی و فن عروضدن قصیرینک شرح اندلیسیه سنه

بر شرحی و عوامل جرجانیسه به بر شرح مکملی وارد در . و صغیر و کبیر  
تألیفاتی یوزه بالغ اولشدر . تاریخ وفاتی ( ۱۶۸۹ م و ۱۱۰۱ ه )

§

﴿ ابراهیم التیمی ﴾ — کبار اولیاء الیهنددر . بو ذات بیت مکرم

حضورنده ذکر و تسبیحه مشغول ایکن کندوسنه حضر علیه السلام  
واسطه سیله ( مسبعات عشره ) اهدا بیورلدی ورؤیاسنده علیه الصلاة  
و السلام افندمزی کوروب مسبعات عشره نك خواصنی سؤال ایتمکله ادعیه  
سائریه رجحانی امرینی آلدی .

§

﴿ ابراهیم الزیاب ﴾ — کبار اولیاء الیهنددر . بر کون بر جنازه ایله

کیدنرک زیاده سیله آعلامقده اولدقرینی کوردکده ( بهی کندی عاقبتندن  
خبردار اولیان آدملر بو میت ملک الموتی کورمک و اولوم آجیسنی طامق  
وسؤ خاتمہ دن امین اولمق کبی اوچ داهیه عظیمه دن قورتلشدر سز انک  
ایچون آغلیه جغکزه کندوکز ایچون اغلایک دیدی و بو کلام چوق کسه یه  
تأثیر ایدوب باعث صلاحری اولدی .

§

﴿ ابراهیم خان ﴾ بن سلطان احد اول — دولت عثمانیه ده اون سکرنجی

پادشاهدرو ولادت ( ۱۶۱۵ م و ۱۰۲۴ ه ) جلوسی ( ۱۶۳۹ م و ۱۰۴۹ ه )  
وفاتی ( ۱۶۴۸ م و ۱۰۵۸ ه ) تاریخنده در . مشار ایله حضر تلیرنک زمان  
سلطننلرنده کرید فتحنه مباشرت و حانیه و رسمو قلعه لری استیلا اولندی  
وقندیه و آزاق قلعه لری تحت محاصره یه آلدی و قزاقلر دولت علیه  
جایه سنی قبول ایتدی لکن مرکز سلطنتنده اولان بعض معاملات اهالی یه  
ظلم و غدر صورتنده کورندیکندن سوز ایاغه دوشدی و یکچیریلر ایله معتبران  
علما و اهالی فاتح جامع شریفنه طویلانوب صدر اعظم احد پاشانک ازاله سنی  
رکاب همایونه عرض ایتدکلری حالده بر تأثیرینی کوره مدکلرندن ایشی جبره  
بندیردیلر و پاشای مومی الیهی کیرلندیکی یردن اخراج و اعدام ایتدکدنصکره  
سلطان ( ابراهیم ) حضر تلیرنی دخی خلع ایدرک یرینه یدی یاشنده اوغلی  
سلطان ( محمد خان ) ی چیقاردیلر و بر قاج کون صکره طرفدارلرینک بعض

تثبثاتی حس ایتد کلرندن بیچاره سلطان (ابراهیم) حضر تلرینی دخی دار نعیه کوندر دیلر و سرای همایونه زیاده جه چاتمش و امور دولته قارشمقده بولنمش اولان جنجی خواجه بی میخالیجه کوندروب اوراده اولدر دیلر .

§

﴿ ابراهیم بن اغلب ﴾ — اغلب لرك برنجی حکمداریدر بوذات خلفای عباسیه دن (هارون الرشید) زمانده یعنی (۸۰۰ م و ۱۸۴ ه) تاریخنده نیم استقلال ایله افریقیه والیلکنه تعیین اولنوب اخلاقی مغربده بنی اغلب نامیله یوز اون اوچ سنه سلطنت سورمش و ایچلرندن بعضیسی نفوذینی تونس و مصره قدر یورتمش و بعد الانقراض ملکری فاطمیره یکمشدر .

§

﴿ ابراهیم پاشا ﴾ — فاتح اگری سلطان محمدخان حضر تلرینک وزرای عظامندندر . بوذات ابتدا بوسنده دن دوشیرمه اوله رق کلوب اندرون همایونه قبول اولنمش و اوراده فن فروسیت و سلحشوری و سائره تحصیل و بر طاق مراتب قطع ایدرک رتبه وزارتی احراز ایتمش و مصر والیسی ایکن عصیان ایدن درزی طائفه سنی قهر و تنکیله صرف مقدر و غیرت ایلدیکندن استانبوله چاغریلوب (۳۰۰۰۰۰) آلتون مهر ایله عایشه سلطان تزویج اولنمشدر . مومی ایله (۱۵۹۴ م و ۱۰۰۳ ه) تاریخنده رکاب همایون قائمقامی و برسنه صکره صدر اعظم اولدی و اگری سفرنده ملازم رکاب پادشاهی اولوب روز فیروز فتحده التفاته نائلیتی مأمول ایکن شیخ الاسلام خواجه سعدالدین افندیکن سوقیله بلاایجاب عزل اولنوب قرق کون صکره خرمنلی نام موقعه تکرار نصب اولندی و (۱۵۹۹ م و ۱۰۰۶ ه) تاریخنده تاتار خان ماجراسی اوزرینه ینه عزل اولوب برسنه صکره بتکرار مقام صدارته کتورلدی و سنه مزبورده سرعسکرلک عنوانی دخی اخذ ایدرک بچارستانک ایچرولر ینه قدر یوریوب اعدایه فوق الغایه دهشت و یردی واردوی همایونی هیچ بروقته کورلماش صورتده اموال غزا ایله مالامال ایتدی . مومی ایله (۱۶۰۰ م و ۱۰۰۹ ه) تاریخنده لوجه حصارینی وقایره قلعه سنی فتح ایدرک بلغراد مشتاسنه عودت ایتدکده رهرو سمیت عدم اولمش و نعشی استانبوله کتوریله رک شهزاده جامع شریفی حرمنه دفن اولنمشدر .

مومی الیه بش سنه امتداد ایدن زمان صدارتنده صدق حسن وانواع مظفریته  
مظهر یتله کسب ممدوحیت ایتمش ایسه ده چندان ادخار امواله حریص  
اولدیغندن جامع ومدرسه کبی بر اثر یاپوب براغه مامشدره .

§

﴿ ابراهیم پاشا ﴾ بن خلیل پاشا — سلطان (بایزید) وزراسندنروایکی  
سنه دن عبارت اولان زمان صدارتنده (اینه بختی) محار باتیله مشغول اولوب  
(۱۶۹۹ م و ۹۰۵ هـ) تاریخنده اوراده وفات ایتمشدره . اوزون چارشو  
باشنده ووالده خانی آرقه سنده واقع جامع شریف ایله سراجخانه باشنده کی  
چفته حامی بو ذات یاپدیردی .

§

﴿ ابراهیم پاشا ﴾ — سلطان (سلیمان خان اول) وزراسندن بر مشهور  
ذاتدره . بوذاتک روم ایلی بکر بکیلیکی انضمامیله مقام صدارته کتورلمسی  
مصر والیسی احمد پاشانک حسد ونوعما عصیان وخیانتنه سبب اولدیغندن  
ابراهیم پاشا کیدوب مصر امورینه نظام ویردی وعودتنده سلطان سلیمان  
حضر تلی سوار اولدیغی قدرغیه واروب مراسم خوش امدی اجرا سیله  
ومؤخر اییلان دوکونه بالذات تشریف ایله التفات پیوردی ومشهور (مهاج)  
سفرنده سردار اوله رق (وارادین) وامثالی برچوق قلعه لری فتح ایتدی  
ودر سعادتیه عودتنی متعاقب اناطولیده عصیان ایدن (قلندر اوغلی) و(وقابض  
ملحد) و(قره قاضی) نام اشقیانک اوزر لرینه کیدوب انلر کدخی غائله لرینی  
بتوردیکی جهتله سردارلق عنوانی احسان پیورلدی وشهزادکانک سورختانلری  
ائتاده سلطان سلیمان حضر تلی پاشای مومی الیه خطاباً (ابراهیم سنک  
دوکونکمی مکلف ایدی یوخسه بنکی می) پیوردقده بنم دوکونم دهامکلف  
ایدی دیمسسیله پادشاه مفعلانیه او یله ایسه اثبات ایتلیسک پیور مسنه جواباً  
اوت بنم دوکونمه ذات شاهانه لری کبی برقهرمان زمان تشریف وتلطیف  
پیورمشدر مدعای اثباته بوندن بیوک برهانی می اولور دیدکده پادشاه  
فوق الغایه ممنون ومحظوظ اولدی و(۱۵۳۰ م و ۹۳۷ هـ) تاریخنده  
وقوعبولان المانیا محاربه سنده مشهود اولان خدمات مقبوله سنه مکافاة اوسک  
قربنده واقع نیچه وبوغراد قلعه لری تملیک پیورلدی واوچ سنه صکره بغداد



سفرینه کیدرکن وانی و تبریزی آلدی و دائماً حرمت ایتدیکی و بابام دیدیکی  
دفتردار اسکندر چلبی بی بغداد بازارنده صلب ایتدی و بوسفرکی موقیتی  
اوزرینه دخی طرف شاهانه دن (سرعسکرسلطان) عنوانی احسان بیوردی.  
مرویدرکه بر کیجه سلطان سلیمان حضرتلی رؤیاسنده اسکندر چلبی بی  
برالنده قایش و دیگر النده برقرمه اولدیغی و جبهه سی نوره مستغرق بولندیغی  
حالده کورر و سلطان مشار الیه خطاباً بهی ظالم بونجه خدمات مقبوله می  
نسیان و برمفسدک سوزینه اعتماد ایدرک بنی نیچون اولدورتدک دیو اوزرینه  
یوریمسیله مشار الیه فریاد ایدرک او یانوب کمال تأثرله مغدوریتنی اکلار  
والرینی قالدیروب (آلهی ابراهیم بو بیکناهی بکا نصل اولدورتدک ایسه  
سنده ییلنه وارمقسزین جزاکی بوله سک) دیو بدعا ایدر و حقیقه بر سنه یه  
وارمقسزین یعنی (۱۵۳۵ م و ۹۴۲ ه) تاریخنده ابراهیم پاشا دخی اعدام  
اولنوب غلطه ده واقع جان فدا تکیه سی قربنه دفن اولنور. دولت  
علیه ده پاشای مومی الیه کی شرف و استقلال قزاقمش هیچ بروزیر کلامشدر.

§

﴿ ابراهیم پاشا ﴾ — سلطان اجدثالث زماننده اون ایکی سنه صدارت  
ایتمش و نائل صهریت اولمش برذاتدر سلطان مشار الیه حضرتلی ایران  
سفرینه کتمک اوزره برقاچ دفعه حاضرلنوب ینه تأخیر ایلدیکندن هرکس  
بوأخیری ابراهیم پاشادن ییله رک صدر اعظم پادشاهمزمی تپرورلکه  
آلیشدیردی دیمکه باشلامشرا ایدی آرهدن چوق یکمکسزین ایرانلیلرک تبریز  
و همدان و کرمان ولایاتنی استردادی خبری درسعاده منعکس اولدیغی کی  
یکچیریلر قول کتخداسی ارنود (موصلی) و ضابطاندن پاطورنه (خلیل)ک  
تشویقیله ایاقلنوب سرای همایونه هجوم و پاشای مومی الیهی طلبده اصرار  
ایلدیلر. و نصیحتله فلانله دفعری ممکن اوله مدیغندن پاشای مومی الیهی  
ایچروده احناق ایدرک آلائی کوشکندن سواقغه آتدیلر. و یکچیریلر پاشانک  
جسدینی پاره پاره ایدرک سواقلرده سورکد کلرینه قناعت ایتوب ادبسلکی  
آرتردقنندن سلطان مشار الیه حضرتلی دخی استغفایه مجبور اولدی.  
وقعه مذکوره (۱۷۳۰ م و ۱۱۴۳ ه) تاریخنده وقوعبولمش و پاشای مومی الیه

شهباده جامعی قارشوسنده و درکار آرسنده یاپدیردیغی جامع شریف و دار الحدیث خطیره سنه دفن اولمشدر.

بعض مورخین پاشای مومی الیهک نفس وهواسنه مغلوبیت وسفاهتنی بدرجه یه قدر تصدیق ایده یورلر ایسده ایران سفرینی تأخیره موافقتی و محاربات سائر یه نهایت ویرمسنی بطائث و قباحت عد ایتیمورلر و بلکه امتداد ایدن محاربات ایله قوای دولته مارض اولان ضعف و فتورک ازاله سیچون برتدیر حسنه صایب یورلر. هر نه حال ایسه بونک بویله سفاهتله شهرت بولسنه (۱۱۳۲ هـ) تاریخنده ذات شاهانه یه چراغان بئجه سنده ویردیگی ضیافت و کاغذخانه یی تنظیم ایچون ایتدیگی مصرف سبب اولمشدر. زیرا اولوقته قدر امثالی کورلیان اشبو بئجه تزیناتنی خلق چوق کوردی واندن صکره رجا دولت و کبرای ملت بئجه و دائره تزیناتنه قالمیشوب بعض سفها دخی ایشی افراط درجه سنه واردردی و بردانه لاله صوغانک بشیک غروشه آلتوب ساتلدیغی ایشیدلدی.

رمضان شریفده چفته مناره لرده ماهیه قورلسی دخی پاشای مومی ایله زمانده احداث اولمشدر.

پاشای مومی الیهک اعدامندن صکره کاغذخانه دره سی سوا حئلنده انک تشویقیه یابلمش اولان صیفیه لک احراقیچون استانبول قاضیسی افندینک اعلام ویرمسی و صکره مرجه هدمنه قرار ویرلسی دخی وقوعات غریبه دندر.

§

﴿ ابراهیم پاشا ﴾ — مصر والیسی محمد علی پاشانک اوغلی و سرعسکریدر (۱۸۱۸ م و ۱۲۳۴ هـ) تاریخنده حجاز و حرمین الشریفین و حوالیسنی تهدید ایدن معهود و هایلیری اورالردن دفع ایتک شرطیله عهده سنه حجاز و حرمین الشریفین والیکی توجیه یورلدیغندن مصردن بر مکمل اردو ایله کیدوب و هایلیری پریشان ودرعیه یه قدر تعقیب ایدرک ریئسلی (عبده) بن مسعودی ودرت نفر اوغلر یله بعض منسوباتی اخذ و مصر واسطه سیله در سعاده ارسال ایلدی و (۱۸۲۵ م و ۱۲۴۱ هـ) تاریخنده مصر دو تناسیله موره سفرینه کلوب مسولنک محاصره سنده دولت علیه دو تناسنه بر از یاردم ایتدیسه ده قبودان دریا بولنان خسرو پاشا ایله مصر والیسی محمد علی

پاشانك بربرلينه اولان خصومت قديمه سی جدی اعانه یه میدان براقدی و ایکی سنه صکره وقوعبولان (ناوارین) وقعه سنده دونماسی دولت علیه دونماسیله برابر محترق اولدیغندن ابراهیم پاشا عساکر بریه سنی آلوب مصره عودت ایلدی و (۱۸۳۲ م و ۱۲۴۸ هـ) تاریخنده پدری طرفندن دولت علیه علیه سوق اولندیغندن کیدوب عکا وانطاکیه قلعه لرینی و شام شریفی آلدی و حصده حسین پاشا اردوسنی و قونیه ده سردار اکرم رشید پاشا اردوسنی بوزوب رشید پاشایی اسیر ایتدکن صکره کوتاهیه یه قدر کلدی و (۱۸۳۹ م و ۱۲۵۵ هـ) تاریخنده (زیب) محاربه سنی قزانوب سردار اکرم حافظ پاشایی دخی طوتدی و (۱۸۴۸ م و ۱۸۶۵ هـ) تاریخنده پدرینک شعورینه خلل کلک جهتیه حسب الوراثه مصر والیسی اولدیسه ده یتیم برکوندن زیاده معمر اوله مدی.

§

﴿ ابراهیم الموصلی ﴾ — خلفای عباسیه دن (مهدی) و (هارون الرشید) زمانلرنده موسیقی شناسقله کسب اشتهار ایتش برذاتدر اکثر اوقاتده مشار الیهمابونی حضورینه چاغیروب غنی و اشعار و صحبتیه تلذذ ایدرلر و یک چوق عطیه لر و جاریه لر و بربرلر ایدی برکون قوناغنک قبولینی سدو هیچ برکسه نك قبول اولنماسنی تنبیه ایدرک ایچروده جاریه لرلیه اکلنور و کندی زوفیچون چالوب چاغیرر ایکن او طه سنه برمشکل شیخ کیرر و ابراهیم تعجب ایدرک کیم اولدیغنی وزه دن کلدیکنی و نصل کیردیکنی سؤال ایلدکده شیخ بزم زه دن کیردیکم سکا لازم دکل قیو جیلرده ده قصور یوق بن شیطانم و استدیکم یردن کیرمکه مأذونم سزک غناده شهرتکزی ایشندیکم ایچون کادم لطف ایدوب برازشی او قورسه کز ممنون اولورم دیر و ابراهیم کلل دهشتله عودینی انه آلوب بعض ایات او قودقن صکره شیطان دخی عودی آلوب برچوق نعمات اجرا ایدر و سن بو مقامی ایشتامشسکدر بوکا (ماهور) دیرلر بوندن صکره سندخی او قویه ییلورسک دیوب کوزدن نهان اولور (ابراهیمک) بو حکایه بی هارون الرشیدی اکلندیرمک ایچون اویدورمش اولسی دخی مأمولدر. عراق طرفنده مشهور اولان (ابراهیمی)

مقامی بونکدر و وفاتی (۸۰۳ م و ۱۸۸ هـ) تاریخنده در . اوغلی اسحق  
موصلی دخی شعر و غناده پدردن اشغی دکل ایدی .

§

﴿ ابراهیم بک ﴾ — مصر کولنری رؤساسندن بر مشهور ذاتدر  
مومی الیه چرکسی الاصل اولدیغی حالده مصرده تحصیل نفوذ و اعتبار ایدرک  
رؤسای سائرہی حکمی آلتنه آلدی و بر آرہلق اقراندن مراد بکک رقابتیہ  
اعتباردن دوشدیسده آرہدن چوق یکمکسزین ینہ اعادہیہ موفق اولدی  
و فرانسز لر مصرہ ہجوم ایتدیکی زمان (عریش) اوہسندہ مدافعہ ایدرک  
کولنرک شجاعتنی کوستردی لکن بعض اسبابہ مبنی صوکنی کتورہ مدیکی  
جہتلہ محاربہ اخیرہی جنرال (قلوبر) قزاندی .

(۱۸۰۵ م و ۱۲۲۰ هـ) تاریخنده مصر والیلکنی استحصال ایدن محمد علی پاشا  
سائر کولنرلہ برابر بونک دخی نفوذینی کسر و تہدید ایدرک (نوبہ) یہ قدر  
قاچر مش و (۱۸۱۵ م و ۱۲۳۱ هـ) تاریخنده اورادہ وفات ایتشد .

§

﴿ ابرخوس ﴾ — قدمای علمای ہیئتدن بر ذاتدر و مسقط رأسی ردوس

اولوب میلاددن ۱۲۸ سنہ مقدم وفات ایتشد . ساعات لیل و نہاری و شمس  
و قرک حرکات مختلفہ سیلہ بونلرک و سیارات سائرہنک ارضدن بعدلری موازنہ سنی  
ابتدا میدانہ چیقاران بودر و اشبو بعدلری تعیین ایچون بر آلت ایجاد ایتش  
و کندوسندن صکرہ الی یوز سنہک خسوف و کسوفک اوقاتنی خہر  
و یرمشدر و بوفنہ و فنون سائرہیہ دائر خیلی آثاری وارد .

§

﴿ ابروق ﴾ — دیار رومده بر محکک اسمیدر ابوبکر ہروینک افادہ سنہ  
کورہ بوراسی غایت عجیب و اسلام و خرسیتیان طرفزدن مشترکاً زیارت  
و حرمت اولنور بر محل ایمش مومی الیہ بن دخی کتدم و برطاغ اتکنده  
واقع حصار قپوسندن ایچرو کیروب یرالتندن کیدرک بر واسع محلہ چیقدم  
اورادہ برکول و اطرافندہ چقجی خانہلری و بر مسجد و بر کلیسا و متعدد  
مغارہلر و درونلرنده آدم اسکیتلری وار ایدی و کیسنگ وجودندہ  
مزراق و قلیج یارہسی و کیسنگ نقصان اعضاسی کورینور و بعضیسی

دیواره طیانمش ایاق اوزری طورر و بعضیسی اوتورر و برقادین چوجغه  
مه ویرر و اوتوران برچوجفك ایاقزنده خناحس اولنور ایدی مکر  
روملر بونلری کندولرندن اولمق اوزره اعتقاد ایدرلر و مسلمانلر حضرت  
عمر رضی اه عنه زمانده کی غازیلردن ظن ایلرلر و چله سنك صبراً وفات  
ایتدکلرینه ذاهب اولوزلر ایش دیدی.

محل مز بورك حرکت ارض یاخود وولقان سسیله باتمش برحفرة جسمیه  
ایدوکی اکلاشیله یور ایسهده زرده اولدیغی بیلنه میور واقعا قونیه ایله  
اقسرای آراسنده واقع اسبکشان ناحیه سنده ( ابروق ) نامنده برقریه و بو  
قریه نك جوارنده برکول و اثار عتیقه وار ایسهده او یله مغاره لر واسکلتر  
اولدیغی ایشیدلماشدر و مع مافیله مرور زمان ایله سد و غیب اولدیغی دخی  
مستبعد دکلدرد.

§

﴿ ابرهه ﴾ — ملوک تباعده دن مشهور ( ذوالقرنین صعب ) ك اوغلی  
و سلطنته خلفیدر یمن چوللزنده یولجیلر یولنی شاشیرمامق و سفره کیدوب  
عودت ایدرکن یولی بولمق ایچون طاش دیرکلر دیکدیردیکندن ( ذوالمنار )  
لقبیه شهرت بولمیش ایدی بونك زمان سلطنتی میلاددن بیک طقسان درت  
سنه مقدم تخمین اولنیور لکن تاریخلرده کوریلان ( ابرهه الرایش ) دخی  
بومیدر بشقه میدر بیلنه میور.

§

﴿ ابرهه الاشرم ﴾ یاخود ( ابرهه بن صباح الاشرم ) — یمن  
پادشاهلرندن برذاتدر یمنده وقوعبولان بریبوك اختلالی باصدیرمق ایچون  
زیر جایه سنده اولدیغی حبش نجاشیسندن بالاستمداد یتمش بیک عسکر  
کتوردوب ایشنی کوردیسهده عسا کر مرقومه نك قوماندانی اولان ( ارباط )  
ایله آرهلرینه برودت کیردیکندن اسکی راحتنی بوله مدی و بر معارضه  
اٹاسنده ارباط بونك یوزینی بیرتدیغندن نامی ( ابرهه الاشرم ) قالدی  
و مؤخرأ ارباط کوله لر ی واسطه سیله قتل اولندیغی جهتله ابرهه رقابتدن  
قورتلدیسهده نجاشی اشبو قتل ماده سنی ابرهه دن بیله رك کیتلو عسکر ایله  
واروبانی دخی قتل ویمنی خراب ایده چکنه و قعاسنی قیروب قاننی ایچه چکنه

میں ایتدیکندن ایش دها زیادہ مشکلاتہ دوشدی و ابرہہ درحال ارباطک  
 قفاسنی بر مقدار طپراق وقان و برچوق ہدیہ لرایہ نجاشی یہ کوندروب برائت  
 ذمتنی بیان واسترحام ایلدیکندن قصوری عفو وین حکومتندہ ابقا اولندی .  
 اشبو ابرہہ صنعادہ نجاشینک نامنہ برجسیم کایسا یاپدیروب ( قلیس ) تسمیہ  
 اتمش و بوندن بویلہ اہالیء حجازک کعبہ مکرمہ زیارتنی براغوب اشبو کایسای  
 زیارت ایتلمرینی و ہرسنہ مکدہہ قوریلان پنایرک صنعادہ قوراسنی امر ایش  
 ایدی بوامر اہالیء مکرمہ یہ پک آغر کلوب اجرا ایدہ مدکلرندن و ایچلرندن  
 بر قاج جسور صنعایہ کیدوب کایسای مذکورى تلویث و تحقیر ایلدکلرندن  
 ابرہہ حد تلنوب کعبہ نک ہدم و محوینی و اہالیء مر قومہ نک تأدینی قوردی  
 و ( ۵۷۰ م ) تاریخندہ کلیتلو عسکر واون اوچ عدد معلّم فیل ایلہ مکہ  
 اوزرینہ یوریدی و بر قاج محلدہ مقابلہ ایدن قبائلہ غلبہ ایدرک مکہ صحرا سنہ  
 ایندی و علیہ الصلاة والسلام افندمزک جدی و قبیلہ قریشک رئیس اولان  
 ( عبدالمطلب ) کعبہ مکرمہ نک محافظہ سنی جناب حقہ براغوب اسالی ایلہ  
 طاغلرہ چکلدی و ابرہہ فیلرینی عسکرینک اوکنہ قاتہرق اپجرو هجوم  
 ایدرکن من طرفاہ ظہور ایدن ابایل حجارہء سجیل ایلہ مقابلہ ایلدیکندن  
 مضمحل و پریشان اولدی و ابرہہ فرار ایتک استدیسہدہ یولی بولہ مدیغندن  
 ید اسارتندہ اولان ( نفیل المکی ) دن دلالت رجا ایدوب ( این المفر و الالہ  
 الطالب . و الاشرم المغلوب لیس الغالب ) جوابنی آلدی و عقیندہ  
 اکادخی بر طاش طوقمغلاہ بلاسنی بولدی . بو طاشلر قنغی بردشمنہ طوقنیور  
 ایسہ درحال وجودندہ چیچک علتی کبی بر اثر حاصل اولور و انک  
 سرایتیلہ بر قاج دقیقہ ظرفندہ دوشر اولور ایدی .  
 ابن خلدونک افادہ سنہ کورہ ( ۷۹۶ م و ۱۸۰ ھ ) تاریخندہ کلان برین  
 ملکک لقی دخی ( ابرہہ ) ایمش .

§

﴿ ابریم ﴾ — نو بہدہ نیل شرقی ساحلندہ واصواندن یوزیکرمی میل

بعد مسافہدہ بر ناحیہء صغیرہ در بوراسی دولت علیہ نک طوغریدن  
 طوغری بہ تحت ادارہ سنہہ ایکن بر ( سالیانہ ) یعنی مرکز لوا ایدی و فراغنہ

زماندن قالمش اولان قلعه‌سی غایت متین وحوالیسی منبع وامین اولدیغندن  
وقتیله شدید جزایه مستحق اولنلری بورایه کوندرلر ایدی شمدی هواسی  
غایت وخمیدر واهالیسی ایکی اوچ بیکنن زیاده دکلدنر. نام عتیقی  
( بریمس ) یاخود ( روا ).

§

﴿ اِپسالون ﴾ یاخود ( ایشالوم ) — حضرت ( داود ) علیه السلام  
اوغلیدر ( امنون ) نامنده برقرنداشنی قتل و فرار ایلدیکندن پدری  
ارقه‌سندن عسکر کوندروب افراییم طاغنده اوزون صاحلری اغاچ دالترینه  
طولاشدیغی حالده طوتیردی و بر روایتده تعقیبنه مأمور اولان ( موأب ) ک  
النده کندو حربه‌سیله قتل اولندی.

قدس شریفک جنوب شرقیسنده وادی یهوشه بافاظه الیوم موجود اولان  
برخراب ومرتفع تر بهیه ( اِپسالون ) تر بهسی دیرلر ايسه‌ده قنغی اِپسالونک  
تر بهسی اولدیغی معلوم دکلدنر.

§

﴿ اَبشیر پاشا ﴾ — دولت عثمانیه وزراسندندر بوذات‌والی بولندیغی  
یرلرده برقاچ دفعه عصیان ایدوب ینه عفو اولمش و بعض خصوصندن  
طولای یکیچیریلرک عداوتنی قزائمش ایدی ( ۱۶۵۳ م و ۱۰۶۴ هـ ) تاریخنده  
صدارته تعیین اولندیغی کبی اولکسندن زیاده عظمت پیدا وشام شریفدن  
درسعاده کلنجیه قدر یولرده تصادف ایتدیکی سرسریلری محروم اولدقلری  
تیارلرینی اعاده وعدیله جلب وقپو خلقنه علاوه ایدرک جمعیتی فرق الی بیکه  
ابلاغ ایلدیکندن درسعاده بولنان رجال دولت ویکچیریلر قوجونمغه ونیتی  
نه ایدوکنی دوشونمکه باشلادیلر وغایت آغر حرکت ایتسندن و برآن اول  
تشریفلری مقتضیدر دیو یازدقلری کاغدره هیچ بر جواب ویرمیوب  
استغنی بوزمدیغندن عاداتا قورقدیلر ونهایت کلوب مقامنه اوتوردیغنک  
ایکنجی آینده یکیچیریلر صدر سابق مراد پاشانک تحریکیله حاضرلدقلری  
قنه‌بی او یاندریوب ابشیر پاشایی و طرفداری اولان شیخ الاسلام  
( ابوسعید ) افندی بی استه میر دیدیلر وپک چوق غلغله و شماتله پاشای  
مومی الیهی قتل و ابوسعید افندی بی نفی ایتدیروب مراد پاشایی مقام صدارته

اوتورتدیلر ویدی آی صکره سپاهیلرله برابرینه ایاقلنوب آت میدانندن اون سکز کشینک اعدا میچون سرای همایونه خبر کوندر دیلر وعاقبت بوسوزلرینی دخی یوریدوب اندن صکره طاغدیلر. اشبو اون سکز کشینک ایچنده حرم همایونندن بعض کسه لر ودار السعاده اغاسی دخی وار ایدی.

§

﴿ آبغار ﴾ — اوزروان کله سنه نظر نیور یله.

§

﴿ آباخان ﴾ — یاخود (آباخان) — معهود هلا کونک اوغلیدر (۱۲۶۴ مو ۶۶۳ هـ) تاریخنده پدرینک وفاتیهلده تخته جلوس ایتدیکی کبی فن انشاده مهارتی مشهور و مسلم اولان (شمس الدین جوین) ی وزیر اعظم یاپدی وعدل وحقانیتی التزام ایدرک پدرینک مظالم و تعدیاتی ایچمه اونوتدیردی وصاحب الادوار (عبدالمؤمن) وخطاط مشهور (یاقوت المستعصمی) کبی ارباب معارف وادبایی جلب وحققرنده حرمت و رعایت ایتدیکنندن اطرافدن یک چوق علما وفضلا کلوب مستغرق لطف واحسانی اولدی.

§

﴿ آیل ﴾ — یونانستانک اسکی رساملرندندر مرقوم (۵۲۶۰ خ) تاریخنده یعنی میلادک اوچیوز اوتوزدرت سنه مقدمنده شهرت بولوب ماکیدونیا حکمداری اسکندر رومینک دائره سننده امرار وقت ایلدی و حکمدار مومی الیهک و (افرویدی) نک رسملرینی یا یوب اخلافنه یادکار براقدی. اشبور رسملر شمدی مفقوددر.

§

﴿ ابن ابی الاصبع ﴾ العداوانی — کینه سی ابو بکر زکی الدین . مسقط رأسی مصر تاریخ وفاتی (۱۲۵۶ م و ۶۵۴ هـ) — بو ذات فن شعروانشا وادبده زمانک امامی ایدی فنون مذکوره یه دائر خیلی تصنیفاتی وارد و فن بدیعدن (تحریر التحبیر) و (بدیع القرآن) و (الجواهر والسوانح) نام کتابلر جمله تألیفاتندر.



اشعارندن بری .

من یدم الدنيا بظلم فانی

بطریق الانصاف اتنی علیها

وعظتنا بكل شیء لوانا

حین جادت بالوعظ من مصطفیها

نصحتنا فیما نر النصح نصحا

حین ابدت لاهلها مالیدیها الی اخره

§

﴿ ابن ابی داود ﴾ — دولت عباسیه ده و خلیفه مأمون و معتصم

و واثق و متوکل زمانلرنده قاضی الفضاة رتبه سنی احراز ایتمش بر ذاتدر  
و بونک امور سیاسیة و تدابیر ملکیده مهارتنه و علم و فضل و بلاغتنه دیه جک  
یو غیسه ده صکره دن طریق اعتراله سلوک ایله خلفای مشارالیهی اضلال  
ایتمسی و میدانه بر خلق قرآن مسئله سی چیقاروب ملت اسلامیه بی تفرقه یه  
دوشورمسی و بو اغورده نیجه بیک صلحای اهل سنتی تحقیر و اعدام ایلمسی  
بادیء قدح و مذمتی اولمشدر . بو خائن قرآن کریم مخلوق قدر دیمیانلری  
رسماً حضورینه جلب و هر برینی بر صورتده تحقیر ایتمدیکی صره ده ائمه  
اربعه دیندن ( احمد بن حنبل ) حضرتلرینی دخی کتوردوب جانلر طیانمز  
درجه ده ضرب و ازعاج ایتمش و سبب موتی اولمشدر ( احمد بن حنبل  
کلمه سنه نظریوریه ) بر دفعه حضورینه علمادن الی باغلی بر پیر کتوردکلرنده  
اکا دخی خلق قرآن و رؤیت مسئله لرنده اعتقاد باطلنی تکلیف ایلوب پیر  
دخی بو سزک دیدیککز مسئله لری حضرت پیغمبر یلسوبده امتنه خبر  
ویرمامشی ابتدا بو سؤاله جواب رجا ایدرم دیدکده ابن ابی داود پیغمبران  
کرامه جهل اسنادی جائز اوله میه جفندن ناچار بیلور ایدی دیدی و پیر دخی  
مادامکه بیلور ایدی نیچون امتنه خبر ویرمدی دیمسیله ابن ابی داود حبیط  
اولدی و خلیفه کوله رک مجلسدن قالدی کندی و پیر دخی بر مقدار عطیه  
احسانیه دفعه ایلدی .

§

﴿ ابن ائیر ﴾ — جزری کلمه سنه نظر بیوربله .

§

﴿ ابن اسرا ﴾ — اسپانیا خاخالمرندن بر عالم یهودیدر بونک علم طب وهیئت وفلسفه وشعر و صرف ونحوه ید طولاسی اولدیغندن مسلمانر فاضل دیو چاغیرلر ویهودیلر بر مفسد مترجم طانورلر ایدی . کتب دینیة اسرائیلیه دن بر کتاب شرح ایتمش و کرهیه دأر بر رساله قلمه المشدر .

§

﴿ ابن باجة ﴾ المسموم — اندلسده چیقان حکمای اسلامیه نك الك صوکیدر قرطبه ده دنیایه کلوب بعدالتحصیل فاسه هجرت و ابو بکر صحراوی به ویحیی بن یوسف ابن تاشقینه یکرهی سنه وزارت ایتدی و علوم ریاضیه و کلام و اخلاقده تألیف ایتدیکی کتابلر بین العرب پک زیاده شهرت بولدی . زماننده موجود اولان اطبا و کتاب بونک شهرت و اقبالنه حسد ایتدکرنندن ( ۱۱۳۸ م و ۵۳۳ ه ) تاریخنده تسمیم ایتشدر و ( تلاحین ) و ( کتاب الکیمیا ) کبی بر قاچ اثری دها واردر .

§

﴿ ابن بطوطة ﴾ — ادبای امتدن و سیاحین عربدن بر ذاتدر مغربده واقع ( طنجه ) شهرنده دنیایه کلوب بعدالتحصیل مصر و ایران و سوریه ممالکنی و دیار عرب و چین و تانارستان و هندستان و بجزر محیط هندی جزایرندن بعضیلرینی و افریقا و اسپانیا ایچرولرینی کزوب مشهوداتی تحریر ایتمش و سنی یتمش التیه بالغ اولدیغنی حالده ( ۱۳۷۸ م و ۷۸۰ ) تاریخنده وفات ایتشدر . بلاد شرقیه ده شهرتی شیخ شمس الدین ابو عبدالله ایدی .

§

﴿ ابن بیطار ﴾ — اندلس اطبای مشهوره سنندندر و اسمی عبدالله بن حیددر . اندلسده واقع ( مالقه ) شهرنده دنیایه کلوب بعدالتحصیل شام شریفه هجرت ایتدی و دیار رومده خیلی سیاحت ایدوب اعتبارینی درجه علیایه چیقاردی و تألیفاتی اطبایه حجت قاطعه طانیدردی و حروف هجا ترتیبی اوزره بر تاریخ عمومی یازوب سلطان صلاح الدین

ایوبی به تقدیم ایلدکده مستغرق لطف واحسانی اولدی . هله فن نباتاته اولان کمالی تصدیقکرده ارباب فندر ووفاتی ( ۱۲۴۸ م و ۶۴۶ ه ) تاریخنده در و ( کتاب الافعال العجیبه والخواص الغریبه ) و ( جامع الادویه المفرده ) و ( تذکره ابن بیطار ) جمله اثارندندر .

§

﴿ ابن جریر ﴾ — صاحب التفسیر امام طبری حضرتلرینک کتیه سیدر ( امام ) کلمه سنه نظر بیوریه .

§

﴿ ابن جریر ﴾ القرشی الاموی البصری — اسلامده ابتدا کتاب تصنیف ایدن علمای ذوی الاحترامندندر و تفسیر شریفی واحادیث نبویه بی جامع کتابی پک معتبردر امام جعفر صادق وامام ابو حنیفه رحیم الله حضرتایله ملاقات ومصاحبت ایتدی ومکه مکرمده خیلی زمان امرار وقت ایدوب ( ۷۹۱ م و ۱۴۴ یاخود ۱۴۹ ه ) تاریخنده آخرته انتقال ایلدی . شعرای عربدن بر ( ابن جریر ) دها واردر واسمی علیدر .

§

﴿ ابن حاجب ﴾ — مشاهیر علمای عربندندر واسمی عثمان . کتیه سی ابو عمرو مسقط رأسی صعید مصردر . پدری ملوک ابویسه مصریه دن امیر عزالدینک حاجبی اولدیغی حالده کندوسی کنج یاشنده تحصیل علومه هوس ایدرک از وقت ایچنده اکلانه موفق اولمش وخیلی زمان قاهرده فاضلیه مدرسه سنده وبر مدت شام شریفده جامع امویه ده تدریس ایله اشتغال ایدرک علامه عنوان جلیل الشانی قزانمشدر . علم تصریفدن ( کافیه ) و ( شافیه ) و علم اصولدن . ( منها ) کتابلرینی بو ذات تألیف ایتدی وشا کردلرینک اثنای مصاحبته وقوعبولان سؤالرینه ویردیکی جوابلر مؤخرأ تدوین اولنه رق ( امالی ابن حاجب ) تسمیه اولندی بو کتاب هر فنی ومتنوع مسائلی جامع بر اثر جلیل اولدیغندن بین العلماء مشهور ومعتبردر ولسان عربیده مستعمل اولان مؤنث سماعیلری نظماً بیان ایتمشدر وبونلردن بشقه دهبا پک چوق تألیفاتی واردر . مشارالیهک کنج یاشنده

سیاسة قتل اولنديغی روایت اولنیور ایسهده یتیش یاشنده ایکن (۱۲۴۸ م و ۶۶۶ هـ) تاریخنده اسکندر یهده خسته لنوب وفات ایلدیکی دهها موثوقدر.

§

﴿ ابن حجر العسقلانی ﴾ الشافعی — مشاهیر علمای عربدندر واسمی احمد بن علی بن محمددر مومی الیه مصر قاهره دن نشأت وبعد التحصیل شام شریف و حجاز مالکنه عزیمت ایدوب اورالده خیلی زمان علم حدیث مطالعه وتدریس یله مشغول و بین العلماء والا کابر مظهر احترام وقبول اولدی وتالیفات جلیله سی غایه الغایه معتبر طوتلدی. (فتح الباری فی شرح البخاری) نام کتاب مستطاب جهله تالیفاتندنر ویتیش طقوز یاشنده اولدیغی حالده (۱۴۴۸ م و ۸۵۲ هـ) تاریخنده وفات ایتشدرد. مذهب شافعیدن فتاوی صاحبی (ابن حجر الهیثمی) بشقه.

§

﴿ ابن خزیمه ﴾ الحافظ — مشاهیر فقهاً شافعیه دندر واسمی ابو بکر بن محمد ومسقط رأسی نیشابوردرد. علم فقه وحدیثده عصرینک فریدی و علمای عراقک قره العینی ایدی (فقه حدیث) کتابی اوچ جلد اوزرینه در و یوز قرقدن متجاوز تالیفاتنی واردرد ووفاتی (۹۲۳ م و ۳۱۱ هـ) تاریخنده در.

§

﴿ ابن خلدون ﴾ — فن تاریخده ابداع ایلدیکی مسلك بهین ایله شهر تشعار برفاضل ذوی الاعتباردر بو ذات تونسده دنیایه کلوب فاس واندلسده بعض علوم نافعه تحصیل ایتدکنن و بیوک و کوچک برقاچ مأموریت ویردکننصرکه مصره هجرت ایلدی ومصر حکمداری سلطان (برقوق) یك کوزل قبول ومالکی قاضیلکنی توجیه ایلدیکندن برمدت دخی بوخدمته وسلطان مشارالیهک مشاوری مقامنده بولندی و (۱۴۰۰ م و ۸۰۳ هـ) تاریخنده سلطان مشار ایله برابر تیمورلنکک اوزرینه کیدوب شام شریفده تیمورلنکه اسیر دوشدی وهرتقدر تیمورلنکک دخی مظهر التفاتی اوله رق یانندن ایرماق استدیسهده بو التفات ابن خلدونک ایشنه الیرمدیکندن برتقریب مصره قاچوب ینه اولکی کبی بیوک وکوزل مأموریتله کیردی. فاضل

مومی الیهک ترتیب ایلدیکی تاریخ (۱۸۶۷ م و ۱۲۸۴ هـ) تاریخنده مصرده  
یدی جلد اوزرینه طبع اولمش و موسیو (دوسلان) دخی فرانسزجه  
ترجه سنی طبع ایتدیرمشدر. ابن خلدونک اسمی عبد الرحمن بن محمددر  
و تاریخ وفاتی (۱۴۰۵ م و ۸۰۸ هـ) در.

§

﴿ ابن خلدکان ﴾ — مورخین مشهوره دندر و اسمی احمد شمس الدین  
بن محمددر. بوذات اریبلده دنیاه کلوب خیلی زمان موصل و حلب و شام  
طرفلرنده تحصیل علومدن صکره مصرده و مؤخرأ سوریه ده برمدت قاضیلک  
و صکره مدرسلک ایتدی. بونک (ابن خلدکان) نامیله معروف اولان  
(وفیات الاعیان) نام تاریخ نفیسی (۱۶۷۶ م و ۱۰۸۷ هـ) تاریخنده ردوسی  
زاده محمد افندی معرفتیه عربجه دن ترکیه یه ترجه اولمشدر.

§

﴿ ابن دقیق ﴾ — محدثین کرامدندر و اسمی محمد بن علی و لقبی  
تقی الدیندر. بوذات اسانیددن مجرد و احکامه متعلق متون احادیث  
نبویه بی جمع ایدرک (المام فی حدیث الاحکام) نامنده بر کتاب تألیف ایتدیسه ده  
اکمالنه موفق اوله مدی. کتاب مزبور نقصانیله برابر بین العلماء مقبول  
و معتبردر و وفاتی (۱۳۰۲ م و ۷۰۲ هـ) تاریخنده در.

§

﴿ ابن الرشید ﴾ — (ابو الولید) کله سنه نظر بیور یله.

§

﴿ ابن زیدون ﴾ احمد بن عبده بن غالب بن زیدون الخزومی —  
مشاهیر ادبای عربدندر اندلسده واقع قرطبه شهرنده دنیاه کلوب بعد  
التحصیل اندلس طوائف ملوکندن ابن الخزم بن جمهوره کاتب اسرار  
و ندیم خاص اولدی و بعده حسادک سعایتیله حبس اولنوب برمدت زندانده  
قالدی و شفاعت و استرحامله خلاص ممکن اوله میه جغنی اکلادقده بر تقرب  
قاچوب اشیلیه حکمدارینه التجا و اوراده رتبه وزارتی احراز ایلدی  
و فصاحت و ظرافتی و نظم و نثرده بلاغتی جهتیله (بخری المغرب) عنوانی

آلدى . مرتب ديوانى ورسائل كشيده سى واردر ووزير ابو عامر  
يازديغى رساله پك مشهور و بين الادبا معتبردر چونكه ابو عامر بونك علاقه  
ومشاعره ايتديكى (ولادة) نامنده بر قز ايله الفتة قالمش . يغندن بور - اله انلرى  
بر برندن تبريد و قزى كندو طرفنه جلب ايچون قزك آغزندن يازلمش ايدى  
مؤخرأ رساله مذكوره (ابن نباتة المصرى) معرقيله شرح ايديلوب  
(سرح العيون) تسميه اولنمش وبوشرح (۱۸۶۲ م و ۱۲۷۸ هـ) تاريخنده  
مصر مطبعه سنده طبع ايدلمشدر

ابن زيدون رساله مذكوره يه شويله بدأ ايدر  
اما بعد ايها المصاب بعقله . المورط بجهله . البين سقطه . الفاحش  
غلطه . العائر في زيل اغتراره . الاعمى عن شمس نهاره . الساقط  
سقوط الذباب على الشراب . المتهافت تهافت الفراش في الشهاب .  
فان العجب اكدب . و معرفة المرء نفسه اصوب . وانك راسلتنى مستهدياً  
من صلتى ما صفرت منه ايدى امثالك . متصدياً من خلتي لما قرعت دونه  
انوف اشكالك . مرسلأ خليلتك مرتاده . مستعملاً عشيتك قواده .  
كاذبأ نفسك انك ستنزى عنها الى . وتخلف بعدها على . الى آخره  
ابن زيدون التمش طقوز ياشنده اولديغى حالده اشيبليه ده (۱۰۷۰ م و ۴۶۳ هـ)  
تاريخنده وفات ايتمشدر .

§

﴿ابن سراقه﴾ ابو عبده محمى الدين محمد بن محمد الانصارى — ققهاء  
مالكيه دن وفضلاى امتدن بر اديب ليبيدر اندلسده واقع شاطبه ده دنيايه  
كلوب قاهره ده (۱۲۶۳ م و ۶۶۲ هـ) تاريخنده و طفسان ياشنده وفات ايلدى .

بو بيت انكدر

الى كم امنى النفس مالاتناه

فيذهب عمرى والامانى لاتقضى

وقدمرلى خمس وعشرون حجة

ولم ارض فيها عيشتى فتى ارضى

واعلم انى والثلاثون مدتى  
وخير مغانى الملهو اوسعها ركضا

فما ذا عسى فى هذه الخمس ارتجى  
ووجدى الى اوب من العشر قد افضى

§

﴿ ابن سَكَيْت ﴾ يعقوب بن اسحق — علماء لغتدندر خلفای

عباسیه دن متوکل بونک ثناسنی ایشیدوب حضورینه جلب واعتقاد  
واقصدارینی تجربه ایچون ( بنم ایکی اوغلم سکا حضرت حسن و حسین  
رضی اه عنهمادن - و کیلیدر ) دبو سؤال ایتدکده ( ابن سکیت ) واه العظیم  
امام علی کرم اه وجهه ورضی اه عنه حضرتلرینک خادمی اولان ( قنبر )  
یله بکا سندن سو کیلیدر . دیسیله متوکل غضبه کلوب بیچاره بی لسانی  
ارقه سندن چکدرک اعدام ایتدردی . ابن سکیتک ( اصطلاح المنطق )  
یاخود ( اصلاح المنطق ) نامنده برکتابی واردر . ووفاتی ( ۸۵۸ م و ۲۴۴ هـ )  
تاریخنده در .

دیگر روایتیه کوره ( ابن سکیت ) خلیفه متوکلک اوغلی معتر ایله مؤیدک  
خواجده سی ایدی متوکلک ذکر اولنان سؤالنه جواب اولمق اوزره حضرت  
حسن و حسین رضی اه عنهما بی ثنا ایدوب معتر ایله مؤیددن بحث ایتدیکچون  
متوکل قارننه باصدیروب خانه سنه کوندردی و ایرتسی کون خانه سنده وفات  
ایلدی .

§

﴿ ابن سیرین ﴾ محمد — بصره علماسندن وقفهاء تابعیندندر پدری

انس بن مالک حضرتلرینک غلامی ایدی بر خاتوندن اوتوز ارکک واون برقر  
اولادی دنیا یه کلوب یالکز عبده نامنده براوغلی معمر اولشدر و تعبیر رؤیاده  
مهارتی علوم سائرده اولان مهارتندن اشاعی دکدر و حسن بصری  
حضرتلریله کوریشوب ( ۷۲۸ م و ۱۱۰ هـ ) تاریخنده وفات ایتشدر .

§

﴿ ابن سینا ﴾ — حکمای اسلامیه دندر ( ابوعلی ) کله سنه نظر بیوریله .

§

﴿ ابن شریح ﴾ — ائمه شافعیه دندر و مسقط رأسی اولان بغدادده  
( باز اشهب ) لقبیله شهرت بولوب ( ۹۱۸ م و ۳۰۶ هـ ) تاریخنده وفات  
المشدر.

مومی ایله شیرازده قاضی ایکن پک چوق تألیفاته موفق اولدی ومدت حیاتنده  
تألیف ایتدیکی کتابلرک عددینی درتیوزه ابلاغ ایتدی . ابتدا باب مناظره یی  
کشاد و طالبه تعلیم و افاده طریقی ارائه ایدن بودر . دائماً مذهب شافعیه یی  
مذاهب سائره اوزرینه ترجیحله اوغراشور ایدی .

§

﴿ ابن صمه ﴾ — کبار اولیاء الیهندندر . مشار ایله برکون ساکن اولدیغی  
( رقه ) قصبه سنده نفسیله محاسبه ایدرکن سنک التمشه یتیم اولدیغی  
وبوقدر سنه نك ایامی یکریمی بریک بشیوزه واردیغی وهرکون ایچون یالکر  
برکناه حساب اولنسه ایشک زهرله واره جغنی و اوکناهلرک عذاب و عقابنه  
نصل تحمل ایده جکنی دوشینوب و برصیحه اوروب تسلیم روح ایلدی .

§

﴿ ابن طباطبا ﴾ — امام حسین بن علی المرتضی رضی اه عنه  
احفادندندر . کوفه اهل سینک والی ولایت حسن بن سهل علیهنده بعض  
تشبثاتی حس ایدرک ( ابو السرایا السری ) نامنده برشخص ایله رقه دن  
خروجه قرار ویردی و ( ۸۱۴ م و ۱۹۹ هـ ) تاریخنده کلیملو عسکر  
ایله کلوب کوفه یی استیلا ایتدی و حسن بن سهلک کوندردیکی اون بیک  
سوار یی کوفه لیلرله برابر بوزدی و صکره ابوالسرایا ابن طباطبانک کوفه لیلر  
طرفندن حسن قبولنی چکه مدیکندن و اخذ اولنان غنائم ایچون یینلرنده بعض  
مرتبه قیل و قال تحدث ایلدیکندن بیچاره یی مسموماً اعدام ایدوب یرینه ینه  
احفاد جناب حسیندن محمد بن محمد نامنده برچوجغی قودی .

شعرا ی عراق دن ابو حسن بن محمدک لقبی دخی ( طباطبا ) در بوذاتک اصفهانده  
پک چوق شهرتی وار ایدی والیوم احفاد واعقاب یی ذکا و فطانتله مشهوردر  
و ایچلرندن پک چوق علما کلشدر و وفاتی ( ۹۳۳ م و ۳۲۲ هـ ) تاریخنده در

§



﴿ ابن عباس ﴾ رضی اہ عنہ — صحابی بن الصحابی بن عمر رسول اللہ صلی اللہ علیہ وسلم و اسمی عبدہ و مسقط رأسی مکہ مکرمہ در۔ علیہ الصلاة والسلام افندمن حق مشارالہ (اللہم فقہہ فی الدین) دیو دعا بیوردقزلندن فضل و کالی درجہ علیاہ و اصل اولوب (حبر الامة) عنوانی آلدی و اقطار و امصار دن کلان طلبہ علوم حضراتنی نیجه زمان تدریس و بو صورتہ علوم جلیہ اسلامیہ نک قسم اعظمی نشرہ موفق اولدی و (ابن مسعود) رضی اہ عنہ حضرتلری دخی مشارالہ حقندہ نعم ترجمان القرآن بیوردی مشارالہ حضرتلری یتیم بر یاشنده ایکن (۶۸۷ م و ۶۸ هـ) تاریخندہ وفات ایشدر۔

§

﴿ ابن عبدون ﴾ محمد بن عبد المجید القہری — وزرای ملوک بنی افسندن و ادبای عربنددر۔ شعر و کتابت و معانی حدیث و فنون سائرہ زمانک فریدی ایدی قلائد العقیانده یک چوق شناسی و بعض آثاری کورلشدر و ملوک بنی افسس حقندہ سویلدیکی قصیدہ رائیہ سی معانی کثیرہ پی و احوال ملوک سائرہ بی جامع بر نوع تاریخ اولدیغندن شایان مطالعہ در و وفاتی (۱۱۲۶ م و ۵۲۰ هـ) تاریخندہ در۔

قصیدہ مذکورہ یہ شویله بدأ ایدر

الدهر یفجع بعد العین بالاثر

فا البکاء علی الاشباح والصور

انہاک انہاک لا آلوک معذرة

عن نومة بین ناب الیث والظفر

فلا یغرنک من دیناک نومتها

فا صناعة عینہا سوی السهر

تسر بالشیء لکن کی تغربہ

کالایم نارالی الجانی من الزهر

تصنیفات و اشعار کثیرہ صاحبی دیگر (ابن عبدون) دخی زمانی ادباسندن ایدی

بونک ابوحنیفه قولی اوزره محرر اولان (کتاب الاعتلال) ی و طقسان جزئی شامل بولنان (کتاب الاحتجاج) ی اثار مرغوبه دندر و وفاتی (۹۱۱ م و ۲۹۹ هـ) تاریخده در.

§

﴿ ابن عساکر ﴾ — ثقة الدین کله سنه نظر پوریه .

§

﴿ ابن عطاء ﴾ — کبار مشایخ صوفیه دندر واسمی احمد کینه سی ابوالعباس مسقط رأسی بغداد در مشارالیه حضرت (جنید) ک شرف صحبتیه واصل سر منزل مقصود اولسی و قرآن کریمی زبان اشار الله تفسیر ابتدی و غایت نازک و ظریف و علوم ظاهره و باطنیه بی جامع بر حرد عقیف اولدیغندن چوق شا کرد یتشدیردی . حلاج منصور حضرتلرینک اعدامی کونی مشار الیهک لهنده سوز سویلدیکندن (۹۲۱ م و ۳۰۹ هـ) تاریخده وزیر حامدک امریه دیشلری سوکیله رک و او دیشلری برر برر باشنه قاقیله رق اعدام اولمشدر . (رحمة الله علیه)

فحولیندن تاج الدین ابوالفضلک کینه سی دخی (ابن عطاء) در و بوذات دخی حکایات صالحینی جامع عطایه نامیله بر کتاب یازمش و (۱۳۰۹ م و ۷۰۹ هـ) تاریخده وفات ایتشدر .

§

﴿ ابن علقمی ﴾ مؤید الدین محمد — خلفای عباسیه دن مستعصم باللهک وزیر اعظمیدر . بونک علم و درایت و فطانتنه بر دیه جک اولدیغی کبی شیطنت و خیانتنه دخی نهایت یوغیدی و کندوسی رافضی المذهب اولدیغندن دائماً سنیرک علیهنده بولنور و روافضی حایه و سنیرلر اوزرینه تحریص ایدر و بو خصوصدن طولایی بالدفعات ظهور ایدن اختلالرده سنیرک روافضه غلبه سندن ناشی انلره و ولی نعمتی اولان مستعصمه دیش بیلر ایدی بناء علیه نفوذ سلطنتک شیعیلره انتقالی چاره سنی دوشونه رک کندوسی بالاستقلال والی اولق شرطیله ممالک عراقیه نک ایران ملکی هلاکویه تسلیمه قرار و یروب کیفیتی خفياً مومی الیه اشعار و بو باده تسهیلات کوستره چکنی وعد

ایلدی وهلا کو دخی مع الممنونیه ایکوز بیک عسکر ایله کلوب بر از  
مخاربه دن صکره بغداد خارجه اردوسنی قوردی وابن علقمی خلیفه  
مستعصمه هلاکو ایله مصالحه ممکندر رخصتکز اولور ایسه کیدر بر چاره سنی  
بولورم دیهرک کیدوب بر بشاشت فوق العاده ایله کلدی وهلا کونک  
مرادی سزک قزیکزی اوغلنه عقددن عبارت ایمش ان شالله عقددن صکره  
مصالحه یی دخی پیارز دیمسیله بیچاره مستعصم اینتوب موافت ایلدی  
وابن علقمی درحال وکلا وامرای دولتی طویلابوب نکاح ایچون هلا کونک  
اردو کاهنه کوتوردی وهلاکو دخی خائن مرقوم ایله اولجه قرارلشدیردیغی  
وجهله نکاحه بدل جله سنک جاننه قیوب عسکر یله برابر بغداده کیردی  
وقرق کون قتل عام ایدوب اشراف بغدادک کافه سنی قلیچدن کچوردی.

بو وقعه (۱۲۵۸ م و ۶۵۶ هـ) تاریخده وقوعبولمش ویالکز بغداد درونده  
اوچیوز بیک کشینک قانی دوکولمش وقوجه دولت عباسیه منقرض اولوب  
سلطنت مغولره کچمشدر وخائن مرقوم دخی مأمولی کبی والیدکه  
نائل اوله میوب وبقیه السیوف بیچارکانک انکسار و دشنامندن سو قاغه  
چیقه میوب بر قاچ آی ظرفنده وغم وغصه ایچنده کبرمش کتمشدر.

§

﴿ ابن عیسی ﴾ — ارباب معارفدن بر ذاتدر سلطان (سلیم خان)  
ثانی حضر تلی شهزاده لکی آوانده صاروخانده ایکن بونی وطن اصلیبی  
اولان اقتصاردن جلب وعلوم ونصایحندن استفاده بیورر ایدی حتی  
مشارالیه حضر تلینه اداب ملوکه متعلق ومقامات اولیاء وتوجه وتأثیرات  
وریاضات وخواص اسما و اصول وفق کبی علمی جامع اون فصل اوزرینه  
و (نوریه) نامیله بر کتاب تصنیف واهدا ایتشدر. ابن عیسانک علم  
وفق وخواصده فوق الغایه مهارتی وبر مسلك مخصوصی وار ایدی.

§

﴿ ابن عبدالبر ﴾ — اندلس فحول علماسندندر واسمی یوسف لقبی  
جال الدین مسقط رأسی قرطبه در. بوذات عصرینک علامه سی اولدیغی حالده  
زمان کندویه خیانت ایتدیکندن (معتضد بالله) ک یاننده عسرتله وقت کچوردی

(الانتفاً للمذاهب الثلاثة) و (الانفصاص فيما بين العلماء من الاختلاف) و (جامع العبر) و (الدرر في اختصار المغازی والسير) و (التغطاً بمحدث الموطأ) و (كتاب الاستيعاب في أسماء الصحابة) و امثالی یکرمی بر عدد تألیفاتی وارد و بونلرک ایچندن (الكافی فی فروع المالکیه) نام کتابی اون بش جلددر و وفاتی (۱۰۷۰ م و ۴۶۳ هـ) تاریخنده در .

§

﴿ابن الفارض﴾ — كبار اولیاء الیهنددر و مسقط رأسی مصر اسمی عمر کنیه سی ابو حفصدر . بوذات عالیقدرک درجه کالی حقایق علوم دینیہ و معارف یقینیہ ی و احوال سیر سلوکی جامع اولان و یدیسوز الی بیتدن عبارت بولنان قصیده تائیہ سندن اکلشیلور مشارالیہ بوقصیده شریفه ی تکمیل ایتدکنصکره عالم معناده علیه الصلاة والسلام افندمزہ تقدیم ایتدی وانلر دخی ممنون اولهرق (نظم السلوک) تسمیه بیوردی ویا ابن الفارض سنک انتسابک کیمدر دیو سؤالرینه بنم انتسابم بنی سعده در جوانی ویردکده علیه الصلاة والسلام افندمز (لابل انت منی ونسبک متصل بی) بیوردی .

قصیده مذکوریه شویله بدأ ایدر

بیت

سقتنی حیا الحب راحتہ مقلتی  
وکأسی محیا من عن الحسن جلت

بوندن بشقه بر قصیده تائیہ صغراسی و برده مکمل و مرتب دیوانی وارد و بالاده بیان اولنان قصیده تائیہ کبراسنه مولانا عبدالرحمن جامی حضرتلرینک فارسی العبارة یازدیغی شرح بین المتصوفین غایت مقبول و معتبردر و داود قیصری و فرغانی حضرتلرینک یازدقلمی شرحلر دخی مکمل اولوب فرغانینک شرحی طبع اولمشدر .

مصر اهالیسی (ابن الفارض) حضرتلرینک پک چوق کراماتی کوردی

و ( ١٢٣٤ م و ٦٣٢ هـ ) تاریخنده وفات ایتدکده ظهور ایدن عجایبات هر کسی حیرته قودی .

§

﴿ ابن القاص ﴾ — فقهاً شافعیه دندر و مسقط رأسی طبریه اسمی احمد کینه سی ابوالعباسدر . مشارالیه علم شریفی بغدادده ابن شریحدن تحصیل ایدوب قاضیک ایله طبرستانه کتدی و اوراده خیلی زمان نشر و تألیفاتله مشغول اولدی و ( ٩٤٦ م و ٣٣٥ هـ ) تاریخنده طرسوسده وعظ و نصیحت و جناب پروردکارک عظمت و کبریاسندن بحث و حکایت ایدرکن ظهور ایدن وجد و استغراق اثناسنده یره دوشوب وفات ایلدی . فروع فقهیه دن ( تلخیص ) و مذهب شافعی اوزره ( ادب القاضی ) و ( کتاب المواقی ) و فروع شافعیه دن ( مفتاح ) کبی خیلی تألیفاتی واردر .

§

﴿ ابن قضیب البان ﴾ — بونامله شهر شعار اولان ذوات کرامک المعروفی ( عباده بن سید محمد ) الحجازیدر و بونک معروفیتی دخی علیه الصلاة والسلام افندمرک شناسی حقنده یاعمش اولدیغی قصیده مشهوره دندر و وفاتی ( ١٥٩٧ م و ١٠٠٦ هـ ) تاریخنده در .

قصیده مذکوره یه شویله باشلار

بیت

اهلاً بنشر من مهب زرود

احیاً فؤاد العاشق المنجود

وروی شذا خبر العتیق فقجرت

منه عیون الدمع فوق خدودی

ونما قم لنا باسرار الهوی

من حیث منزلة الطباء الغید

تلك المعاهد جادها صوب الحیا

و سری النسیم بظلمها الممدود

§

﴿ ابن کمال ﴾ — شمس الدین کله سنه نظر بیوریه .

§

﴿ ابن مجه ﴾ — علمای عراقدن و محدثین کرآمدندر و مولدی قزوین اسمی حافظ محمد کینه سی ابو عباده در . احادیث نبویه تحقیق و تحریر بیچون بغداد و بصره و کوفه و مکه و مدینه و شام و (ری) ممالکنی طولاشوب دین مینه پک بیوک خدمت ایندی و کتب سته دن ( سنن ابن ماجه ) نامیله معروف اولان کتاب مستطابی و بر تفسیر و بر تاریخ یازدی و التمش درت یاشنده اولدیغی حالده ( ۸۸۶ م و ۲۷۳ هـ ) تاریخنده وفات ایندی .

§

﴿ ابن مقفع ﴾ — رؤسای زنادقه دندر و مسقط رأسی ( مرو ) اسمی عبداللهدر . مرقوم مجوسی ایکن علم و حکمتله شهرت بولوب صکره اسلامه کلدی لکن عقلی علمنه مغلوب اولدیغندن زندقه و الحاددن قور تیله مدی و ابامسلم وفات ایند کدن صکره اکا موضوع اولان روح اصلی بنم جسدیمه حلول ایتشدر شمعی الوهیت بنده در دیه رک بر طاقم جهلابی باشنه طویلایوب خراسانده مییضه مذهبنی میدانه چیقاردی و بصره و الیسی مرقومک بو هذیانلرینی وجعیتنی خبر آلدقده ذاتاً ایتدیکی استهزاردن طولابی مغبر خاطر اولدیغندن ( ۷۷۵ م و ۱۵۹ هـ ) تاریخنده خلیفه منصورک مساعده سیله عسکر کوندر و ب جعیتنی طاغندی و کندوسنی طوتوب لرینی و یاقرینی قطع و تنور ایچنده احراقه اعدام ایلدی یاخود ابن مقفع اله کچه جکنی اکلا دقده اولاد و عیالیله کندوسنی آتشدن یاقدی .

چاه نخشب صاحبی ( ابن مقفع ) دخی بو حریف اولیق کر کدر کویا طاشکند ایله سمرقند آره سنده واقع ( نخشب ) نام قصبه جوارنده بر قیو حفر ایدوب سحر و یا شعبه بازی ایله درونندن ضیای قره مشابه بر ضیا ظهور ایتدیرمش و بو ضیا قیونک ایکی فرسخ قدر اطرافنه منتشر اولمش ایدی دیرلر بو حکایه شاعرلره بر سرمایه در . کیله و دمنه کتابنی فارسیدن عربی یه ترجمه ایدن بودر .

§

﴿ ابن ملک ﴾ — فحولین علماندندر و اسمی عزالدین و پدرینک اسمی

عبداللطيفدر . بو ذات آدين اوغلى محمد بکه برمدت خواجه لک ايدوب  
 او ائنده نشر دن و تصنيفات دن دخى **کيرو قالمدى** و ( مجمع البحرين )  
 و ( مشارق الانوار ) و علم اصول دن ( منار الانوار ) اوزرينه شرح لر يازدئى .  
 علوم حکميه يه واقف و سوء اعتقاد ايله متهم اولان ( ابن ملک ) دخى بونک  
 قرنداشيدرو اولکى ابن ملکک قبرى تيره ده در .

§

﴿ ابن النجم ﴾ — اشباه کله سنه نظر بيوريله .

§

﴿ ابواسحق ﴾ کارزونى — مشايخ صوفيه دن در واسمى ابراهيم بن  
 شهريار در . بو ذات عليه الصلاة والسلام افندمزى عالم معناده کوروب  
 تصوف دن سؤال ايتديکمه ( التصوف ترك الدعاوى و کتمان المعاني ) بيوردى  
 و توحيد دن سؤال ايتديکمه ( کل ماهجس ببالک او خطر فى خيالك فالله  
 سبحانه بخلاف ذلك التوحيد ان تنزهه عن الشک والشرك والتعطيل ) بيوردى  
 ديدى و مریدلر ينک بر سؤالنه ( عفلک ادناسى دنيايى و اعلاسى ذت  
 حق دن غيرک فکربنى ترکدر جوابنى ويردى تاريخ وفاتى ( ۱۰۳۴ م و ۴۲۶ هـ ) در .

§

﴿ ابواسحق ﴾ — نيشاور علماس دن و فقهاى شافعيه دن در واسمى  
 ابراهيم بن محمد در . بو ذات عاليقدرک علم اصول و کلامه شهرتى افاقى طوتمش  
 اولديغ دن زمانى علماسنک اکثريسى کلورلر و علوم مذکور ه دن درس آلورلر  
 ايدى . عبارات کتب کلاميه آره . نده مسطور اولان ( استاد ) لفظ دن  
 مراد بو ذات در و اصول دين ورد ملحدن حقه نده بش جلدى جامع ( جامع  
 حلى ) نامنده بر کتابى وارد و وفاتى ( ۱۰۲۷ م و ۴۱۸ هـ ) تاريخ نده در .

§

﴿ ابواسحق ﴾ فيروز آبادى — بغداد علماس دن و فقهاء شافعيه دن در  
 واسمى ابراهيم بن على در . مشارايله بغداد ده نظام الملك مدرسه سنده مدرس  
 ايکن پک چوق عالم يتشديدى و خيلى کتاب تاليف ايتدى و فضل و کمالنى  
 هر کسه تصديق ايتديره رک ( شيخ الاسلام ) عنواننى الدى . ( کتاب المهذب )

و (کتاب التنبیه) و اصول فقهدن (کتاب الممع شرحی) و علم خلافتدن (کتاب نکت) و علم جدلدن (کتاب المعونه) بونکدر و خطیب عراقی کتاب المهذبى اوزرینه اون جلدی جامع برکوزل شرح یازمشدر.

§

﴿ ابو الاسود الدؤلی ﴾ الکفانی — تابعیندنبر امام علی کرم اه وجهه ورضی اه عنه حضرتلرینک اشارتیه علم نحوی بوذات وضع و ترتیب ایلدی سببى شو صورته بیان ایدرلرکه ابو الاسود قزینی کورمک ایچون بصره یه عزیمت ایدوب اثنای مصاحبتده قزی (یا ابت ما اشد الحز) دیدی و لفظ اشدی رفعله سونلیدیکی ایچون باباسی الك حرارتلی وقت قنغی وقتدر دیو سؤال ایده یورظنیه (شهر الناجر) یعنی تموز آیدر دیدی و قزی خیر مرادم سندن سؤال دکل سکا خبر ویرمکدر دیمسیله ابو الاسود اعرابه خطاسی اولدیغنی اکلابوب عودتده حضرت علی به افاده بو خطالر اعجامله اختلاطن ایلرو کلدیکنی وزمان اوزادقچه لسان عرب اندن کیده جکنی بیان ایلدکده حضرت علی تصدیق و (انح یا ابالاسود) بیوردی و ابو الاسود اشارت جلیله لری اوزره (ان الکلام کله لایخرج عن اسم و فعل و حرف جاء لمعنی) کلامنی برصحیفه یه یازدی. بو کلام امام سیویهک کتابنک ابتداسیدر و ابو الاسود (۶۸۸ م و ۶۹ هـ) تاریخنده وفات ایتمشدر.

§

﴿ ابو البقاء ﴾ — بغداد علماسندنبر و مولدی بغداد اسمی عبده بن حسین در. مشارالیه ایکی کوزی اعما اولدیغنی حالده کیچه کوندز تعلیم و تدریسدن خالی اولمز و بغداد و حوالیسندن و اوزاق و یقین مملکتلردن کلان طلبه نک کثرتی مناسبتیه درسنده اوتوره حق یر بولمز ایدی و برفندن کتاب تألیفنه مباشرت ایده جکی زمان اوفنه متعلق اولان کتابلری یانه کتوردوب دیلدیکنی برشاگردینه اوقودیر وانندن اقتباس و یاخود معارضه ایتدیکی معناری سویلر و موجود اولان شاگردانی یازوب برکتاب پیار ایدی.

(اعراب الحدیث) و (اعراب القرآن) و (شرح الايضاح لابی علی)



(شرح اللع) و (كتاب الیاب فی النجوم) و (شرح المفصل للزمخشری) و شرح مقامات الحریریہ) و امثالی پك چوق تألیفاتی وارد و وفاتی (۱۲۱۹ م و ۶۱۶ هـ) تاریخندہ در.

§

﴿ ابو بکر الصدیق ﴾ رضی اہ عنہ — خلفای راشدین حضراتنك برنجیسیدر و اسم عالیری عبداہ بن عثمان القربشی کنیہ لری ان قحافہ مولد سنہ لری مکہ مکرمہ در . پادشاہ زینتسرای کنج تجرید و شہنشاہ دولتسزای کنج تفرید اولان حضرت مشار الیہ قبل الاسلام دخی علم تاریخ و تحقیق نسب عرب و تعبیر رؤیادہ ماهر بوجود جلیل القدر ایدی صکرہ اسلامہ کلان رجالک برنجیلکی شرفنہ و عنوان معالی ارتسام یار غاریہ و (انت عتیق من النار) بشارت سنہ سنہ دخی نائل اولدی و ہجرت نبویہ نك طفوزنجی سنہ سنہ جانب سنی الجوانب نبوین عہدہ سنہ امارة الحاج توجیہ بیورلدی و بوسنہ مکہ دہ سورہ (براءة) قرائت اولنہ رق تجدید عہود اجرا ایدلدی و حضرت پیغمبر افندمن ارتحال داربقا بیوردیغی کون حضرت عمر رضی اہ عنہ کمال اسف و جلال واستغراقدن ناشی یامؤمنین حضرت محمد سمایہ رفع بیورلدی ہرکیم فوت اولدی دیر ایسہ شو قلمجلہ اعدام ایدرم دیدیکنی متعاقب حضرت ابو بکر الصدیق (و اما محمد الارسول قدخلت من قبلہ الرسل افان مات او قتل انقلبتم علی اعقابکم) الی آخرہ آیت کریمہ سنی او قودیغی کبی حضرت عمر کلامدن رجوع و تصدیق بیوردی و حضرت ابو بکرک خلافتی جزئی باختلافدن صکرہ جملہ مؤمنین طرفندن قبول و رسم بیعت اجرا اولندی و زمانندہ تنبی ایدن اسود عنسی و مسیلہ الیامی و سجاج و طلیحہ الاسدی و امثالی مفسدلو و ہنوز ذہنلرندہ اسلام تقرر ایتیمان و زکات اموالی و یرمامک ایچون بعض منافقین طرفندن تشویق اولنوب ارتداد ایتک استیان بدوی جاہلر حرباً تادیب و اصلاح اولندی و (۶۳۳ م و ۱۳ هـ) تاریخندہ وقوعبولان مشہور (یرموک) محاربه سی قزانلدی و اوراق پریشان اوزرنندہ بحر اولان قرآن کریم جمع و تدوین ایدلدی . حضرت ابو بکر الصدیق حضرت فخر کاشاتدن ایکی یاش کوچک اولدیغی و التمش اوچ یاشندہ

بولنديغى حالده هجرت نبويه نك اون او چنجى سنه سنده مسموماً وفات ايتمش  
و كيجه روضه مطهره داخلنه دفن اولمشدر. بعضيلر تسميم ايدن  
بريهودى ايدى ديرلر و بعضيلر تسميم اولنمىدى يكره مى بش كون قدر جا  
علتندن ياتوب اندن وفات ايلدى ديديلر هر نه حال ايسه حضرت مشاراليه  
شمس تابان احمددين پرتونشار اولان ضيائى فضيلت و ثباتك مظهر جليل  
القدرى ايدى.

عقيب خلافت سنيه لرنده او قودينغى خطبه نك بر ققره سى شويلاه در ( والله  
ما كنت حريصاً على الامارة يوماً و ليلة قط و لا كنت فيها راغباً و لا سألتها  
الله قط فى سر و علانيته و مالى فى الامارة من راحة ).

وفات ايدركن صوك كلاملى شودر ( توفى مسلماً و الحقى بالصالحين ).  
اسود و مسئلة و يرموك كلمه لرينه دنخى مراجعت بيوريلاه .

§

﴿ ابوبكر ﴾ — شيراز اتابكلرندن محبوب القلوب بر ذاتر مدت  
سلطنتى اولان اوتوز سكر سنه ظرفنده هر امورىنى ميزان عدل و حقانيته تطبيقا  
اجرا ايلديكندن هر كس خشنود و راضى اولدى و اطرافدن كلوب ممالك  
فارسه طويلنان ارباب هنر و معارفك جيب و كيسه لرى لطف و احسانله طولدى  
و ( ١٢٦٣ م و ٦٦٢ هـ ) تاريخنده وفاتنه باى وكدا اغلاميان قالمىدى .  
شيخ سعدى مرحوم كستاننى بونك نامنه يامشدر .

§

﴿ ابوبكر الباقلانى ﴾ — باقلانى كلمه سنه نظر بيوريلاه .

§

﴿ ابوبكر البيهقى ﴾ — بيهقى كلمه سنه نظر بيوريلاه .

§

﴿ ابوبكر رازى الجصاص ﴾ — امام كلمه سنه نظر بيوريلاه .

§

﴿ ابوبكر رازى الحكيم ﴾ — طب ايله حكمتى جمع ايتمش بر وجود  
نادر الامثالدر بوذات كنجلكنده مسقط رأسى اولان ريده سساز چالار

تغنی ایدر ایدی صکره صقال ایله بیق آره سندن چیقان صدا صفا ویرمز دیه رک  
انی براغوب تحصیل علومه هوس ایدی و برآره لوق ری مارستانه و مؤخرأ  
مکتفی زماننده بغداد خسته خانه سنه مدیر اولدی و اکمال علوم و معارف ایچون  
شام و مصر و اندلسه کتدی و خیلی زمان صکره بغداده عودت و کسب  
شهرت ایدوب چوق کسه لره درس ویردی و خیلی کتاب تألیف ایدی.  
او توجلدی جامع اولان ( کتاب الحاوی ) و اون جلدی جامع اولان  
( کتاب المنصوری ) و ( کتاب الجامع ) و ( کتاب الاعصاب ) و ( مختصر  
منطق ارسطو ) و ( کتاب السداسیات ) و ( کتاب سیرت الخلفاء ) و علم طبدن  
یکرمی التی باب اوزرینه ( کتاب الفاخر ) بو نکدر و چیچک و قزامق  
علتلی ایچون یازدیغی رساله اورو پالسانه ترجمه اولمشدر .

خسته یه اغدییه ایله علاج ممکن اولدیغی حالده ادویه ایله علاج ایتمک  
و ادویه مفرده ایله علاج ممکن اولدیغی حالده ادویه مرکبه ایله علاج ایتمک  
مناسب دکدر دیر ایدی .

ابو بکر رازی تألیف ایتدیکی اثبات صناعت الکیما کتابینی صالح بن  
منصور السامانی به تقدیم ایلدیکی زمان صالح کتاب مذکورده مندرج  
صنایعک فعلا اثباتنی امر و ابو بکر دخی اورته یه برچوق مشکلات قویوب  
نهایت مقتدر اوله میه جغنی بیان ایلدیکنندن ضرب و دفع ایلدی و بو ضربدن  
بیچاره نك کوزلرینه صوایندی .

مشاهیر ابدادن برذات ابو بکر رازی به خلق سنک اوچ فنده مهارتکی  
ادما ایده یور حالبوکه بن او فترده سنی جاهل بوله یورم برنجیسی  
اگر سن علم کییاده ماهر اولیدک زوجه ک اون التون ایچون حبس اولمزدی  
ایکنجیسی اگر سن علم نجومه واقف اولیدک هر زمان طالعک معکوس  
اولمزدی او چنجیسی اگر سن علم طبه مالک اولیدک کوزلریکه علاج ایدر ایدک  
دیدی . و فاتی ( ۹۲۳ م و ۳۱۱ هـ ) تاریخنده در .

§

﴿ ابو بکر الرواق ﴾ — کبار مشایخ صوفیه دندر و مسقط رأسی  
( ترمذ ) اسمی محمد بن عمر در . مشارالیه ک علوم ظاهره و باطنده کمالی  
و کتب سماویه نك کافه سنه و قوفی و شعر و انشاده مهارتی تصدیق کرده

خواص و عوام ایدی . ابوالقاسم الحکیم اگر جناب مصطفیان صکره  
 صلی الله علیه وسلم پیغمبر کلمک جائز اولیدی علم و حکمتی و خلیقه شفقتی و عدل  
 و مرحمتی مناسبتیه ( ابوبکر الرواق ) کلوردی بیورمشدر . بردفعه  
 احوال جمعیت انسانیه پی تعریف و اوچ صنفه تقسیم ایتد کدنصکره اگر  
 امر اصنفه فساد کیررسه رعیه ننگ کسبی فاسد اولور و اگر علما صنفه فساد  
 کیررسه ورزش شریعت و اطاعت فاسد اولور و اگر فقرا و درویشان  
 صنفه فساد کیررسه طبایع ناس فاسد اولور و امرانگ فسادی ظلمه و علانگ  
 فسادی طمع ایله و فقرا و درویشانگ فسادی ریایله و قوعب و لوردیدی .  
 بوذات مسند صاحبی ابو عیسیای ترمذینک طایبی زاده سیدر و بر مکمل دیوانی  
 وارد و وفاتی ( ۸۵۴ م و ۲۴۰ هـ ) تاریخنده در .

§

﴿ ابوبکر سوسی ﴾ — کبار مشایخ صوفیه دندر و اسمی محمد بن ابراهیمدر .

شام شریفده رمله فصبه سننده ارشاد عبادله مشغول ایکن اره صره برمغنی  
 اولسه ده بزه بعض ایات او قوسه دیرایدی بر کیمه احباسندن بری لطیفه  
 اوله رق شو جو ارده برمغنی وار لکن نوجوان و مطر بدرا کر آرزو بیوریلور  
 ایسه جلب ایده لم دیدکده شیخ کتورک دیمسیله مطرب مرقومی سرخوش  
 اولدیغی حالده کتور دیلر و اوغلان شیخک حضورنده . القوم اخوان  
 صدق نسب . من الموده لم یعدل به سبب . تراضعوا درة الصهباء یلنهم .  
 و اوجبوا الرضیع الکأس ما یحب . یتلرینی او قومسیله مجلسده اولنرخوش  
 حال اولدیلر سه ده صکره اوغلانگ باشی دونوب شیخک سجاده سنه غشیان  
 ایتمسی اوزرینه فنا حالده صیقلدیلر و اوغلانی شیخک امریله سجاده یه  
 صاروب بر کناره قودیلر اوغلان صباحلین آیلوب اخشامکی حال و رزالته  
 و ضرب و تکدیره بدل و قوعبولان عفو و انماضه واقف اولدیغی کبی  
 همان شیخک ایاققرینه قیانوب توبه و انابت ایلدی و از وقت ایچنده  
 زمرة صالحینه داخل و مقصود حقیقی یه واصل اولدی . شیخ مشار  
 الیهک وفاتی ( ۹۹۶ م و ۳۸۶ هـ ) تاریخنده در .

§

﴿ ابو بكر شبلی ﴾ — كبار اولياء الלהندندر ومسقط رأسی بغداد  
 اسمی جعفر بن یونس در . بو ذات عالیقدرك پدری خلیفہ نك حاجی  
 یعنی چاوش باشیسی اولدیغی حالده کندوسی شیخ الشیوخ حضرت  
 ( جنید ) ه انتساب ایدوب انك حسن نظر و توجهیله واصل سر منزل  
 مقصود اولدی و حضرت جنید بونك حقهده ( هر قومك بر تاجی واردر  
 بزم قومك تاجی دخی شبلیدر ) بیوردی . حضرت شبلی بر کون  
 بازار دن پكر كن بر آدمك اون خیار بر اچه یه دیو باغیره رق خیار صا دیغنی  
 ایشدكده خیارك اونى بر اچه یه اولنجه شرارك حال و قیمتی نیجه اولور  
 دیه رك ارقه سنه دونوب مریدلرینه الیكزده کی سرمایة و قته رعایت  
 ایدیكز زیرا یارین الیكزده قاله جق اودر و ابدی انكله صحبت  
 ایتسه كز كر كدر دیدی .

حضرت شبلیك آداب شریعت مطهره یه اعتناسی فوق الغایه ایدی  
 و دائماً ( مضی زمن والناس یستشفعون لی فهل لی الی لیلی الغداة دلیل )  
 بیتنی اوقور ایدی .

سكسان یدی یاشنده اولدیغی حالده ( ۹۴۵ م و ۳۳۴ ه ) تاریخنده بغدادده  
 وفات ایتشدر و اصلی مصرلی اولدیغی دخی مرویدر .

§

﴿ ابو بكر طرسوسی ﴾ — كبار مشایخ صوفیه دندر و اسمی علی بن  
 احددر . مشار الیه مكة مكرمه ده مدت مدیده مجاورت و كمال اتقا ايله  
 تدارك زاد آخرته همت و هر كسه حسن توجه و نصیحت ایلدیكچون  
 ( طاووس الحرمین ) عنوان شریفنه نائل و ( ۹۸۴ م و ۳۷۴ ه ) تاریخنده  
 رحمت رحانه واصل اولشدر .

§

﴿ ابو بكر بن العربی ﴾ — مشاهیر علمای عربدندر و مولدی اندلس  
 اسمی محمد بن عبدالله در . بو ذات ابتدا اندلسده و صكره مصر و اسکندریه  
 و شام و مكة مكرمه ده تحصیل علوم ایدوب اشیلیهده قاضی اولدی  
 و ادیب و ثاقب الذهن و صاحب العهد بر ذات اولدیغیچون هر كسك حسن

توجهنی قزاندی و اشبیلیه اوزرینه کندو مالندن برسور بنا ایتدی  
 ومؤخراً قاضیلکدن اعراض ودقایق علومه حصر افکار ایدرک مرتبه سنی  
 درجه عال العاله چیقاردی و پک چوق کتاب تألیف ایلدی .  
 ( کتاب القبس فی شرح موطأ مالک بن انس ) و ( ترتیب المسالك فی شرح  
 موطأ مالک ) و ( انوار الفجر ) و ( احکام القرآن ) و ( عارضة الاحوزی )  
 و ( مراقی الزلف ) و ( کتاب الخلافات ) و ( نواهی الدواهی ) و  
 ( سراج المریدین ) و ( قانون التأویل ) و یکریمی جلدی جامع ( کتاب  
 الانصاف فی مسائل الخلاف ) بونکدر و بونلردن بشقه یکریمی اوتوز جلد  
 کتابی دهها واردر و یتمش یاشنده اولدیغی حالده فاسده وفاتی ( ۱۱۴۸ م  
 و ۵۴۳ هـ ) تاریخنده در .

§

﴿ ابو بکر الواسطی ﴾ الفرغانی — مشایخ صوفیه دندر . بودخی  
 حضرت جنیدک قدمای اصحابندن ایدی . احوال مریدانی بکنیبوب  
 ( سادات صوفیه نک و قتيله بر طاقم اشارات جلیله سی وار ایدی صکره  
 بو اشارات حرکاته و حرکات دخی کیده رک یالکز حسراته مبدل اولدی )  
 بیورمشدر . تاریخ وفاتی ( ۹۲۳ م و ۳۲۰ هـ ) تاریخنده در .

§

﴿ ابو بکر المطوعی ﴾ — قدمای صلحای امتدندر و غایت کنج ایکن  
 مجاهده نفسه باشلا یوب یکریمی درت ساعتده قرق بیک اخلاص شریف  
 تلاوتنی معتاد ایتدیکی متواتر در . و ( ابو بکر بن العباس ) نام مجاهد  
 دخی قرق سنه دوشکه کیروب یاتماش و ابداً اوجاع و آلامدن شکایت  
 ایتماش و کوزینک برینه کلان مسافری زوجه سی بیله یکریمی سنه صکره  
 اکلایه بیلشدر .

§

﴿ ابو التراب نحشی ﴾ — سادات صوفیه دندر و مسقط رأسی  
 خراسان اسمی عسکر در . بو ذات قنوت و زهد و توکل صاحبی  
 جلیل القدر بر ذات ایدی . بر دفعه او چیوز قدر درویشیله بادیه یه  
 چیققدده ایکی درویشندن ماعداسی مجاهده سنه تحمل ایده میوب عودته

مجبور اولدی و بر دفعه دخی بادیده نماز قیلارکن سام روز کاری  
طوقینوب وفات ایلد کده جنازه سی تمام بر سنه ایاق اوزری قالدی .  
وفاتی ( ۸۵۹ م و ۵۲۴۵ هـ ) تاریخنده در .

§

﴿ ابو التمام ﴾ الطائی - شعرای عربند در و اسمی حبیب بن  
اوس در . بو ذات فن شعرده امام و روایت اشعار جاهلیه ده سند  
و معتمد علیه ایدی بونک ( کتاب الحماسه ) سنی مطالعه بیوران ذات  
درجه فضل و کالنی اکلیه یلور دیوان مخصوصی و ( اختیارات  
من شعر الشعراء و مدح الخلفاء ) نام کتابی و وزرادن ابو دلف العجلی یه  
انشاد ایلدیکی قصیده سی دخی شایان مطالعه در و شعرای جاهلیه دن  
بر چوق ذواتک نطقلرینی جامع اولان ( فحول الشعراء ) نام کتابی انتقه  
حکمنده در . تاریخ وفاتی ( ۷۴۵ م و ۲۳۱ هـ )

مومی الیه ابو دلف ایچون یازدیغی قصیده یه شویله باشلار

بیت

إذا افتخرت يوماً تمیم بقوسها  
وزادت علی ما و طدت من مناقب

فانتم یدی قار امالت سیوفکم  
عروش الذین استرهنوا قوس حاجب

محاسن من مجد متی تقرنوا بها  
محاسن اقوام تکن کالمعایب

§

﴿ ابو الثنا ﴾ - مفسرین کرامند در ( شمس الدین ) کله سنه نظر  
بیور یله .

§

﴿ ابو جرجه ﴾ - مصر علیاده بنی سویفک جنوب غربیسنده و یتمش  
کیلومتر و بعدنده اون ایکبیک نفوسی جامع بر قصبه در ( ۱۷۹۹ م و ۱۲۱۲ هـ )  
تاریخنده فرانسزلر ایله مصر لیلر بو قصبه جوارنده بر بیوک محاربه یاپدیله .

§

﴿ابوجعفر﴾ المنصور — خلفای عباسیه دندر و جلوسی  
 ( ۷۵۴ م و ۱۳۷ هـ ) و وفاتی ( ۷۷۵ م و ۱۵۹ هـ ) تاریخده در  
 مشارالیه برادری سفاحك و فایله انبارده تخته جلوس ایدوب عیسنك  
 سلطنت دعواسنی و علویلك اختلالات واقعه سنی بتورد کدن صکره  
 دولت عباسیه بی تشکیله سبب مستقل اولان خراسان والیسی ( ابا مسلم ) ی  
 بردسیسه ایله کتوردوب بر قاچ کون تعظیم و تکریمدن صکره اعدام  
 ایلدی و ( زورا ) یعنی بغداد شهرینی یایدیروب پای تختنی ابتدا  
 هاشمیه و مؤخرأً بغداده قالدیردی و یونانيلك اوزرینه اعلان حرب  
 ایدرك آسیای صغرا ده و الجزیره و ایرانده ایچمه فتوحاته نائل اولدی لکن  
 اندلس حکومت اسلامیة سی شمدی یه قدر دولت عباسیه یه تابع ایکن  
 بونك زماننده الدن چیقدی . ابوجعفرك سلطنت عباسیه بی تقدیر  
 ایچون صرف ایتدیکی همته و علوم عالیه و کتابت حقنده کوستردیکی  
 رغبت و بوجهتله سلطنت اسلامیة نك ترقیاته دیه جك یوغیسه ده  
 امام اعظم رحه الله حضرتلرینه ایتدیکی ظلم ایله ابا مسلم حقنده وقوعبولان  
 غدري اونودیور شیلردن دکلدن و دوکدیکی قان پك زیاده و انصافك  
 خارجنده در زیرا مدت سلطنتی اولان یکریمی ایکی سنه ظرفنده  
 محارباته تلف اولنلردن بشقه اوله رق یالکز خلقی صیندیرمق ایچون الی  
 باغلی اعدام ایلدیکی اسلامك مقداری الی یوز بیکه بالغ اولدی دیرلر .  
 مکة مکرمه جوارنده بر محلده وفات ایتشدن . ابوجعفر غایت  
 حسابی و نمسك بر ذات اولوب هر حسابی ( دانق ) ه قدر تدقیق عادتی  
 اولدیغندن ( منصور دوانقی لقبیله دخی تلقیب اولنمشدر .

§

﴿ابوجعفر﴾ المجذوم — کبار اولیاء اللمهدنر بو ذات زمانتك  
 غوث اعظمی اولدیغنی حالده علت جذام ایله مستور اولدیغندن کسه  
 واقف اوله مز ایدی حتی برکون کبار مشایخ صوفیه دن ابوالحسن  
 الدراج حج شریفه کیدرکن رفقاسندن آریلوب یالکز باشنه قادیسه یه  
 واردقده ابوجعفر المجذومه تصادف ایتدی و ذاتاً الفتی اولمدیغنی حالده  
 یا ابا الحسن اکر حج شریفه کیده یور ایسك برابر کیده لم دیدکده ابوالحسن



علت معهوده سنه و اختیار لغنه بناء رد ایتسیله ابو جعفر ( الله ضعیف ایچون قوی بی تعجبه دوشور مکه مقتدر در ) دیدی و ابو الحسن اندن صکره هر قنغی قوناغه واردیسه ابو جعفری اوراده بولدی و بوصولته بالدفعات کوردیکی کراماتی اوزرینه یانسه واروب یوزینی کوزینی یرله سورهرک قصورینک عفویینی رجا واسترحام ایلدی و اندن صکره مکة مکرمه ده دخی بر قاچ کره تصادف و دعا نیاز ایلدکده بن دعا اتمام سن دعا ایت بن آمین خوان اولورم دیمسی اوزرینه ابو الحسن ایکسی دنیاده وبری آخرتده حاصل اولمق اوزره اوچ دعا ایتدی و دنیاچه اولان مراداتی حاصل اولدیغنه نظراً آخرتجه اولان مرادینک دخی بعنایة الله حاصل اوله جغنده شبهه قالدی

§

﴿ ابو جهل ﴾ — قبیله قریشک مشایخ معدوده سندندر واسمی عمرو بن هشامدر و زمان جاهلیتده کنیه سی ابو الحکم اولدیغی حالده علیه الصلوة والسلام افندمز ایتدیکی خباثت و خیانتله بناء ( ابو جهل ) تسمیه بیورمشدر زیرا شرفظهور ایدن اسلامه قارشو فساداتده خذله سائرهدن بر قاچ فرسخ ایلرو کیتمش ایدی نهایت هجرت نبویه نک ایکنجی سنه سنده و قوعبولان بدر غزاسنده ( ابن عمرو ابن الجموح ) و ( ابن عفراء الانصاری ) حضراتی یدلریله قتل و ( ابن مسعود ) معرفتیه قفاسی کوکده سندن فک اولندی و علیه الصلاة والسلام افندمز قتل اولندیغنی کورنجه ( بحمد الله امت مرحومه نک فرعونی دخی قتل اولندی ) بیوردی . خبیث مرقوم قتل اولندیغنی زمان یتمش یاشنده ایدی .

§

﴿ ابو حامد ﴾ — کبار مشایخ صوفیه دنندر و مسقط رأسی بلخ اسمی اجد شهرتی حضروه در . بو ذات عالیقدر بر مدت خراسانده توطن ایدوب ابراهیم بن ادهم و حاتم اصم کبی ذوات کرام حضراتیله کوزشدی و پیک بیوک مقامه واصل اولدی حتی ابو حفص حداد حضرتلری مشارالیهی پیک چوق ثنا ایدوب صدق احوال و همتده ابو

حامد دن اولو بر کسه کور مدم بیور مشدر . بر کون بر کسه ابو حامد دن وصیت طلب ایتد کده ( امت نفسک حتی تحیها ) دیدی و ( بول واضح و حق ظاهر و قرآن و اخبار و اثار مشهود و مسموع ایکن بو تحیر ندر بوکا کور لکدن بشقه نه معنا و یریلور ) بیوردی . وفاتی ( ۸۵۴ م و ۲۴۰ هـ ) تاریخنده و قبری بلخده در .

§

﴿ ابو حامد ﴾ — علمای متقدمیندندر و مسقط رأسی ( اسفرائن ) اسمی احمد بن محمد در و ( التعلیقیه الکبری فی الفروع ) کتابنی بو ذات یازمش و ( ۱۰۱۵ م و ۴۰۶ هـ ) تاریخنده وفات ایتشدر . شافعی المذهب ایدی .

§

﴿ ابو حسن الاشعری ﴾ — ائمه دیندندر و کبار اصحاب کرامدن ابو موسی الاشعری حضرتلرینک اولادندندر . مذهب حنفیه اصحابنک اعتقادده امامی ابو منصور ماتریدی حضرتلری اولدیغی کبی خراسان و عراق و شام و اقطار سائرده اولان شافعی و مالکی و حنبلیلرک اعتقادده امامی دخی بوذاتدر و بونکله ابو منصور ماتریدی آره سننده اولان اختلاف تکوین و ایمان مقلد مسئله لری کبی قرق عدد مسائل اعتقادیه دن عبارتدر و وفاتی ( ۹۳۵ م و ۳۲۴ هـ ) تاریخنده در .

§

﴿ ابو حسن الخرقانی ﴾ — کلین اولیاء اللهیندر و مسقط رأسی خرقان اسمی علی بن جعفر در . مشار الیه طریق اویسی اوزره متوفی شیخ ابو یزید بسطامی حضرتلرینک روحانیت علیه لرندن استفاضه ایدرک و اصل مرتبه کمال اولمش و مقام جلیل غوثیته ایر مشدر . دائماً مریدانه کولرک روشنی آنده خلق اولیاندر و عملرک یکرکی آنده مخلوق فکری اولیاندر و نعمتک اطیبی جهد ایله حاصل اولاندر و رفیقک خیر لوسی زندگانسی حقله اولاندر بیورر ایدی بر کون کندو مجاهداتندن بحت ایتدیکی صره ده قرق ییلدر نفسم بر ایچم صغوق صو یاخود بر اکتشی عیران استدیکی حالده و یرمدم و قرق ییلدر جناب حق

کوکله نظر ایدوب کندوسندن بشقه سنی کورمدی بیور مشدر . وفاتی  
(۱۰۳۳ م و ۴۲۵ هـ) تاریخنده در .

§

﴿ ابو حسن الهروی ﴾ علی — سیاحین شرقیه دندر . بوذات  
ممالک شرقیه و غربیه دن بعضیلرینی کشت و کذار ایدرک کوردیکی  
احوال و وقوعاتی ( کتاب الاشارات فی معرفة الزیارات ) نام کتابنه  
یازدی و ( ۱۲۱۴ م و ۶۱۱ هـ ) تاریخنده وفات ایلدی . ( خطیب  
الهروی ) نام کتاب دخی بونکدر .

§

﴿ ابو حسین البصری ﴾ — ائمه معتزله دندر واسمی محمد بن علی  
الطیب در . مذهب معتزله اوزره علم کلامده ید طولاسی وار ایدی  
( تصفح الادلة ) و ( کتاب الامامة ) و ( شرح اصول الخمسه )  
و ( غرر الادلة ) و امثالی خیلی کتاب یازدی و بغدادده ( ۱۰۴۴ م  
و ۴۳۶ هـ ) تاریخنده وفات ایلدی .

§

﴿ ابو حفص حداد ﴾ — کبار اولیاء الیهنددر و مسقط رأسی  
نیشابور اسمی عمر بن سلمه در . مشارالیه اهل ملامتک شیخ بزرگوار  
ایدی ار باب کمال بو عالمده حکمت جناب جنیده و وجود شاه کرمانی یه  
و حیرت عشق ابو یزیده و اخلاق اشبو ابو حفص حداده و یرلدی  
دیشدر . بوذات هر بار مرید لرینه افعال و اقوال و احوالی میزان  
کتاب الله و سنته اور میانر نفسنی اتهام ایده مز وار ندر دن عداولنه مز  
ادب ظاهری ادب باطنینک عنوانیدر بیورر و غایت مؤدب اولان مرید-  
لرینی قار شوسنده ایاق اوزری وال باغلی طور دیروب ملوکانه بر هیئت  
تشکیل ایدر ایدی . وفاتی ( ۸۷۷ م و ۲۶۴ هـ ) تاریخنده در .

§

﴿ ابو حنیفه ﴾ — ائمه اربعه حضراتنک برنجیسیدر و مسقط رأس  
عایلری کوفه اسمی نعمان بن ثابت در و نسب سعادتلری نوشیر وان  
عاده موصولدر . حضرت مشارالیه ابتدای حالنده اختیار ازوا

و نشر و تدریس ایله اکتفا بوروب صکره عالم معناده شرفصادر اولان امر و فرمان جناب نبوی موجب عالیسی اوزره اجتهاده باشلادی و علم و عرفان و کالی هر طرفه منتشر اولدیغندن درسنه پک چوق متهی ذوات کلدی و ابراهیم بن ادهم و بشر حافی و داود طائی و امام محمدوزفر و حسن و عبدالله بن المبارک کبی ذاتلریتشدریدی و ایچلرندن یتیمش عددی اجتهاده مقتدر اولدی . خلیفه ابو جعفر المنصور ابتداری بوذات عالیقدره فوق الغایه حرمت و رعایت ایدوب برآره لق بغداد انشأأته ناظر تعیین ایتدیسده مؤخرأ تکلیف ایتدیکی قاضی القضاة منصبنی قبول ایتدیکندن و امامت بحثنده سویلدیکی طوغری جوابی اگری آلدیغندن و یاخود عهدلرنده طور میان موصل اهالیسنی اور مق ایچون مساعغ شرعی اولدیغنی سویلدیکندن حدتلتوب زندانه آندی و کونده اونر قامچی آرتیره رق هر کون ضرب اولنسنی امر ایتدی و قامچینک عددی یوزه بالغ اولدقده پک چوق بکا ایدوب یتیمش یاشنده اولدیغنی حالده متأثراً وفات ایلدی ( ۷۶۷ م و ۱۵۰ هـ ) مشار ایسه حضرتلری بوندن اول بنی امیه حکومتی زماننده یعنی یزید بن عمرو بن هبیره نک کوفه و الیلکنده تکلیف اولنان کوفه قاضیلکنی دخی قبول ایتدیکندن ضرب اولنمش ایدی . جنازه سنده الی بیک کشی بولندیغنی متواتراً ثابتدر . بعد العشاء صباحه قدر نوافل قیلار لر و هر یکر می درت ساعتده بر کره قرآن کریمی ختم ایدر لر و کیجه لری خشية اللمهدن اغلادجه قومشولری آجیر لر ایدی . بر کوی مرحومک ( نور الاخیار ) نام کتابنده ( ابو هریره ) حضرتلرندن روایة حضرت پیغمبر افندمزک اوچ دفعه ( ان فی امتی رجلاً اسمه نعمان و کنیته ابو حنیفه هو سراج امتی ) بیور دیغنی وینه انس بن مالک حضرتلرندن روایة افندمزک ( سیأئی من بعدی رجل یقال له النعمان ابن ثابت و یکنی بابی حنیفه لیحیی الله تعالی سنتی علی یدلیه ) بیور دیغنی یازمشدر .

§

﴿ ابو حنیفة الدینوری ﴾ اجد بن داود — قدما ی ریاضیوندن بر ادیب ذیشاندر علم هندسه و نجوم و لغت و نحو و نباتات و تاریخ

وحساب و منطقہ زمانک فریدی ایدی • بر تفسیر شریفی و ( اصلاح المنطق ) نامندہ بر کتابی وجواہر العلم نامندہ بر تاریخی و جبر و مقابلہ دہ برسالہ سی وارد در و رکن الدین بن بویہ ایچون بزینج و ( ۸۴۹ م و ۲۳۵ ھ ) تاریخندہ اصفہاندہ بر صد خانہ یامشدر و ( کتاب الفصاحۃ ) و ( کتاب لحن العامہ ) و ( کتاب الوصایا ) دخی بونک جہلہ تألیفاتنددر و وفاتی ( ۸۹۴ م و ۲۸۱ یا خود ۲۹۰ ھ ) تاریخندہ در •

§

﴿ ابو حور ﴾ یا خود ابو قیر ) — اسکندریہ نک جانب شرقیسنندہ و اون یدی کیلو مترو بعدندہ و ساحل بحر دہ بر قصبہ در لیمانی کوزل و مضبوطدر حوالیسنندہ اولان خرابہ دہ خیلی آنتیقہ بولنور و خانہ لری بر چوق قیالر آرہ سندہ کورینور • ( ۱۷۹۸ م و ۱۲۱۳ ھ ) تاریخندہ فرانسز جنزالی بونا پارت عسا کر و فیرہ ایلہ ابتدا بولیمانہ کلوب مصری استیلا ایلدی و متعاقباً انکلیرلرک امیرال ( نلسون ) قومانداسندہ اولان دوئتماسی کلوب لیمان مذکور دہ یتان اون یدی قطعہ فرانسہ حرب سفاینی یاقدی و برسنہ صکرہ بشیک فرانسز عسکری اون بشیک عثمانلی عسکری بوزوب قوماندان کوسہ مصطفی پاشایی اوچ بیک کشیلہ اسیر ایتدی لکن فرانسز لرکدہ بر قاچ بیکی وایکی جنزالی تلف اولدی ایرتسی سنہ انکلیرلرک اسقوچیلی ( آبرو قرومی ) نام جنرال قومانداسندہ اولان عسکری لیمان مذکور فرانسزلردن حرباً قور تاردی و فرانسزلر آرتق اولحوالیدہ طورہ میوب بتون بتون رجعتہ مجبور اولدی •

§

﴿ ابو حیان ﴾ — اثیر الدین کلمہ سنہ نظر بیوریلہ •

§

﴿ ابو الحیر ﴾ — کبار اولیاء اللہنددر و مقسطر آسی تینات اسمی حاددر • مشار الیہ صاغ الی مقطوع اولدیغی حالسدہ سنبل اوروب انکلہ تعیش ایدر و هرکس نصل اور دیکنہ تعجب ایلر و بعضیلری الی وار کبی کورر ایدی • بونک پک بیوک بر ذات صاحب الکرامات اولدیغنه ارسلانلر ایلہ موآنستندن بیوک دلیل اوله مز • بر کون کسندوسندن

ارسلانز ايله موانستی کیفیتتی سؤال اولندوقده اوت کلبک بک بعضیسی بعضیسیله موانست ایده بیلور بیوردی بوکا ( ابو الخیر تیناتی الاقطع ) دخی دیرلر اصلی غلامدرو ( تینات ) مصره اون فرسخ مسافه ده برقریه در ووفاتی ( ۹۵۱ م و ۳۴۰ هـ ) تاریخنده در .

§

﴿ ابو داود ﴾ — ائمه حدیثدندر واسمی سلیمان بن اشعدر . کتب سته نک او چنجیسی اولان ( سنن ابی داود نام کتاب مستطابی بو ذات عالیقدر تألیف ایتدی و ( ۸۸۸ م و ۲۷۵ هـ ) تاریخنده وفات ایلدی .

§

﴿ ابو الدرداء ﴾ — متعینان اصحاب کرامدندر واسم عالیلی ( عویمر ) در مشار الیه عاقل و حکیم بر ذات ستوده سمات اولدیغی جهته حضرت پیغمبر افندمزک ( عویمر حکیم امتی ) قول جلیلله ثنای والارینه مظهر اولدی و فضل و فقاہتی مناسبتیله شام شریفک فتحنده اورایه قاضی نصب بیورلدی . زوجه محترمه لری ( ام الدرداء ) حضرتلری دخی قانات صحابیاتدندر و حضرت پیغمبر افندمزدن و زوجی مشار الیه دن خیلی حدیث شریف روایت ایتشدر .

§

﴿ ابو الرجا ﴾ مختار — مصنفیندندر . ( فرائض الزاهری ) نام کتاب مستطابی بو ذات تألیف ایدوب ( ۱۲۵۹ م و ۶۵۸ هـ ) تاریخنده وفات ایلدی . بر روایتده اسمی احمد بن ابو الرجا و تاریخ وفاتی ( ۲۳۳ هـ ) دیرلر ايسه ده بو قول صحیح دکدر بونک دخی بر بشقه ذات اولسی مأمول اولنور .

§

﴿ ابو الریحان ﴾ — معارفندان عصر دندر و مسقط رأسی خوارزم اسمی محمد در . بونک علم نجوم و تاریخ و سائر ده اقتداری فوق الغایه ایدی مومی الیه ( الاثر الباقیه عن قرون الحالیه ) نام کتابی یازوب ( ۹۴۲ م و ۳۳۲ هـ ) یاخود ( ۴۳۰ هـ ) تاریخنده وفات ایتشدر .

§

﴿ ابوزید ﴾ سعید بن اوس — کعب بن الخزرج الانصاری سلاله سندن  
 بر ادیب ذیشاندر . مشارالیه علوم ادبیه وغریبه ولغاته و فن تاریخ و نبات  
 وسائر ده مشهور و روایاته معتمد علیه بر ذات ایدی ( کتاب القوس والترس )  
 و ( کتاب الابل ) و ( کتاب خلق الانسان ) و ( کتاب المطر ) و  
 ( کتاب المیاه ) و ( کتاب اللغات ) و ( کتاب النوادر ) و ( کتاب الجمع  
 والثنیه ) و ( کتاب البن ) و ( کتاب الفرق ) و ( کتاب القضیب )  
 وامثالی یک چوق تألیفاتی وارد و وفاتی ( ۸۳۰ م و ۲۱۵ هـ )  
 تاریخنده در .

§

﴿ ابوالسعود العمادی ﴾ احمد افندی — سلطان سلیمان اول و سلطان  
 سلیم ثانی زمانلرنده او توزسنه شیخ الاسلاملق اتمش بر فاضل ذیشاندر و تفسیر  
 شریفیه تألیفنه موفق اولدیغی فتاوا ی شریفه مقبول خواص و عوامدر  
 مشار الیهک بر حقیدی و فات اتمکله غایت متالم اولمش و یار بی بوندن صکره  
 بکا بوکی برالم دها و یرمه دیو دعا اتمشیدی حقیقه دعاسی قبول اولدیغنه  
 بناء بردها اولیه برالم کورمدی ونهایت ( ۱۵۷۴ م و ۹۸۲ هـ ) تاریخنده  
 و فات ایدوب ایوب الانصاریده قیماقیلر باشنده انشاسنه موفق اولدیغی  
 مکتب شریف خطیره سنه دفن اولندی . رجال حلوتیه دن ومظنه  
 کر آمدن قدسی ( ابوالسعود ) افندی دخی ابو بده صغه مخصوصنده  
 مدفوندر .

§

﴿ ابوالسعود ﴾ — کبار مشایخ صوفیه دندر . بو ذات فتوحات  
 مکیه ده محرر اولدیغی اوزره امام الوقت ایدی بر کون دجله کنارندن  
 بکر ایکن خاطرینه عجبا بو صویک ایچنده دخی جناب حقه عبادت ایدر  
 قول وارمیدر دیوکلدیکی آنده صوایکی شق اولوب ایچندن بر آدم چیقیدی  
 و بن فی الاصل ( تکریت ) دنیم و بو صویک ایچنده عبادت اتمکده یم دیدی .  
 فصوصده ابوالسعودک مریدلرینه بش ییلدنبرو جناب حق بکا ملکنده  
 تصرفه اجازت و یردی بن قبول ایتدم انی ککندوسنه بر اقدم دیدیکی

محرر در . مشایخ کرامدن بر ذات مشار الیه کبری جوارندن پکرکن  
 کوکننه زه یه کیده یورسک کل بنی زیارت ایله دیو بر اشارت کلور  
 واو ذات دخی کیدوب زیارتیله منبسط وخوش حال اولدقدنصرکه  
 ابوالسعودک قبری اولدیغنی اوکرنور و تعجب ایله . ابوالسعودک عجیب  
 برطریقہ سی وار ایدی جناب حقندن هر نه که ظهور ایدر ایسه اتی ردا تمز  
 وهیج برکسه دن نسنه استه مز وغایت مکلف لباس کیر وملوکانه طعام  
 ایدر ایدی حتی برکون بر درویش مشار الیهک باشنده برقاچ یک  
 غروشلق بر شال کوروب تعجب ایلدکده شیخ درویشک خاطرہ سنه واقف  
 اوله رق بزبونی کندو لکمز دن صارمادق استرایسک آل صات اتجه سنی  
 درویشله صرف ایت دیدی و درویش دخی ممنوناً شالی آلوب پازارده  
 صاندقدن بر ساعت صکره کلوب شالی ینه شیخک باشنده کوردی  
 و بتون بتون مراقه دوشه رک پازاره عزیزتمله شالک نه اولدیغنی صاندیغنی  
 آدمدن سؤال ایتدکده سن کندکدنصرکه بر تجار کلدی و بر مقدار تجارت  
 اعطاسیله شالی آلدی کوتوردی دیدی و درویش بالا طرف تحقیقاته  
 کیریشوب تجار مرقومک بوشالی بر فورتنه دن ساحل سلامتہ واصل  
 اولان سفینه سیچون نذر اوله رق شیخ مشار الیه و یردیکنی و صکره پازارده  
 کوروب ضرورته مبنی صاندلی ظنیه مبیاعه و ینه شیخ مشار الیه تقدیم  
 ایلدیکنی اوکرندی و خاطرہ سندن رجوع ایدرک تائب و مستغفر اولدی .

§

﴿ ابو سعید الخُدَری ﴾ — فقهاء اصحاب کرامدن در و اصحابدن

مالک بن سنان حضرتلرینک اوغلیدر اون بش یاشنده ایکن بنی مصطلق  
 غزاسنه کندی و علیه الصلاة والسلام افندمزدن یک یوز یمش حدیث  
 شریف روایت ایتدی و ( ٦٨٣ م و ٦٤ یا خود ٧٤ ه ) تاریخنده وفات  
 ایلدی . مشار الیه حضرتلرینک مرقدی در سعادتده ایوان سرای  
 داخلنده قعریه جامع شریفی حولیسندنه ایسه ده بعضیلری مشکو کدر دیرلر .

§

﴿ ابوسعید الخراز ﴾ — اعظم مشایخ صوفیه دن در و مسقط رأسی

بغداد . اسمی احمد بن عیسی در . ار باب طریقت کمال شرف و اتقاسنه



بناء (قرالصوفیه) دیرلر و جناب حقندن و حضرت پیغمبردن صکره  
سید العارفين بودر دیوقدرینی اعلا ایلرلر ایدی. طریقت صوفیه ده  
بقا و فسادن بحث ایدنلرک امامیدر و حضرت جنیددن بیوکدر.  
برکسه جهد ایله حقه ایریشمکه چالیشور ایسه بیهوده زجت چکمش  
اولور و برکسه جهد سز حقه ایریشورم دیر ایسه قوری دعوا ایلمش  
اولور بیورر و حق طلبله بولنمز اما انی ینه طالب بولور معناسنی مراد  
ایدر ایدی. وفاتی (۸۹۹ م و ۲۸۶ ه) تاریخنده در.

§

﴿ابوسعید﴾ بن ابوالخیر — کبار مشایخ صوفیه دندر و مسقط  
رأسی (سرخس) اسمی فضل الله در. سلطان عالم حقیقت و جمال  
پیران طریقت و مشرف القلوب و کریم الاسلوب بر ذات ستوده سمات ایدی  
وزماننک شیخری کاملاً بوندن اخذ فیض ایدرلر و پک چوق کراماتنی  
کوررلر و صحبت علیه لریله مستفید اولورلر ایدی. برکون احباسندن  
برینک خسته اولدیغنی خبر ویرد کلرنده کاغد قلم امر ایدوب شو بیتلری  
یازدی و امریله کوتوروب خسته نک بوینه آصدقلرنده خسته در حال  
صحت بولوب یئاغندن قالدی ذکر اولنان بیتلرله ممالک عراقیه ده الیوم  
استشفاء اولنور. پک چوق ذوات شرحریازمشلر در و شیخ خواجه  
عبید الله نقشبندی حضرتلرینک دخی برکوزل شرحی واردر. (بیت)  
حورا بنظاره نکارم صف زد. رضوان ز تعجب کف خود برکف زد.  
یک خال سیه برآن رخان مطرف زد. ابدال زیم جنک در مصحف زد.  
حضرت مشار الیه وفاتنه قریب شو بیتلری یازوب جنازه سی کیدر کن  
اوکنده اوقونمسنی امر ایتدی (بیت) خوبتر اندر جهان ازین چه  
بودکار. دوست بر دوست رفت و یار بر یار. آن همه اندوه بود  
وین همه شادی. وان همه کفتار بودوین همه کردار. وفاتی  
(۱۰۴۸ م و ۴۴۰ ه) تاریخنده در.

§

﴿ابوسعید بهادر﴾ — ملوک ایلخانیه دندر و جلوسی (۱۳۱۸ م  
و ۷۱۸ ه) وفاتی (۱۳۳۵ م و ۷۳۶ ه) تاریخنده در بونک زماننده

امور دولت بر طاقم نا اهل خلوص کاران انه کچمش وندما و سرای قادینلری نفوذ سلطنتی استعمالله کندو ایشلرینی ترویجه آلمشش و وکلا و کبرا و معتبران اهالی بیننه اختلاف دوشمش اولدیغندن خلنی (ارپا) خان زماننده نتیجه طبیعیه کندینی کوستردی یعنی دولت ایلیخانیه منقرض اولدی و ممالک ایرانیه طوائف ملوک هیئنه کیروب اسکثریسی دولت جلایریه ایرانیه انه کچدی . اشبو ملوک ایلیخانیه سلاله جنکیریه دن ایدی .  
(ایلیخان) کله سنه نظر بیور یله .

§

﴿ابوسعید بهادر﴾ - هندستانده واقع (ماسور) یاخود (مایسور) قطعه سی حکمدار لر نندندر (۱۷۸۲ م و ۱۱۹۷ ه) تاریخنده پدری حیدر علینک و فاتیله جلوس ایتدکده ذاتاً انکلیرلره خصومتی اولدیغندن محاربه یه طوتیشوب اگرچه ایلك محاربه یی و او سایه ده شاه عالمک (نائب السلطان) عنواننی قزاندیسه ده بر قاق سنه صکره هند راچه لرندن برینک اوزرینه آچدیغنی محاربه یی انکلیرلرک آنلره ایتدیکی معاونت سببیه غیب ایتدیکندن و پای تختی تحت محاصره یه آلدیغندن فائده سز عظمتلری براغوب مصالحه یه رغبت کوستردی و انکلیرلره یتش بش ملیون تضمینات و ممالکنک نصفنی اعطا ایله (۱۷۹۲ م و ۱۲۰۷ ه) تاریخنده یقایی قورتاروب یدی سنه سلطنت سوردی و اندن صکره انکلیرلر بر هجوم دها ایدوب قصور ممالکنی دخی آلدی و بیچاره سلاح بدست اوله رق وفات ایلدی .

§

﴿ابوشیر﴾ یاخود (بندر بوشیر) - بصره کورفزینک ساحل شمالیسنده و ایران دولتی اداره سنده بر معمور و تجارتگاه شهردر و بر کوزل لیمانی وارددر لکن کیروب چیقمسی صعوبتلی اولدیغندن بحر یونجه معتبر دکلدر . بوراسنی انکلیرلر (۱۸۵۶ م و ۱۲۸۳ ه) تاریخنده ضبط ایدوب بر سنه صکره پارسده عقد اولنان قونفرانس قرار یله ینه اعاده ایلدیلر . شهرمز بورده شمیلر ده اون بشییک نفوس تخمین اولتمقدهدر .

§

﴿ابوطالب﴾ بن عبدالمطلب - اعمام نبویندر و امام علی کرم الله

وجبه ورضی الله عنه حضرتلرینک پدریدر . حضرت پیغمبر افندمز کوچک اولدیغی حالده جدلری عبدالمطلب وفات ایدرکن مشارالیه حضرتلرینک محافظه سنی اشبو بیوک اوغلی ابو طالبه سپارش ایش و انلر دخی حقیقه پک کوزل خدمت و صیانت ایلشدر حتی علیه الصلاة والسلام افندمز اظهار دعوت بیوروب خلق اوزرینه هجوم ایتدیکی زمان ابو طالب تیشوب تمام قوتیه منع ایلدی . بعثتک یکرمنجی سنه سنده یعنی هجرتک اوچ سنه مقدمنده ابو طالب وفات ایدرکن علیه الصلاة والسلام افندمز یاننده بولندی وموی الیهک دو داغنی دیره ته رک اسلامی قبول ایلدیکنی حضرت عباس سولمسلیله ( الحمد لله الذی هدانا لهذا الذی کنا علیها لولم کونوا یفقهون ) بیوردی بو قوله مخالفت ایدنلرده واردر . ابو طالب سکسان سنه معمر اولدی دیرلر .

§

﴿ ابو العباس السفاح ﴾ — خلفای عباسیه نک برنجیسیدر واسمی

عبدالله بن محمد بن علی بن عبدالله بن (عباس رضی الله عنه) در و ابتدای جلوسی (۷۴۹ م و ۱۳۲ هـ) وفاتی (۷۴۳ م و ۱۳۶ هـ) تاریخنده در . ابا مسلم خراسانی عراق اهالیسنی ابتدا بونک برادری ابراهیمه بیعت ایچون دعوت ایدوب ملوک امویه نک صوک حکمداری اولان مروان الحماری مرقوم ابراهیمی قتل ایتدکدن صکره دعوتی اشبو (ابو العباس السفاح) اوزرینه چویردی و (زاب) محاربه سنی قزانوب شامی استیلا ایتدیکی کبی بونی حیره دن انباره کتوردوب تخته اقعاد وسلطنت عباسیه بی اعلان ایلدی . ابو العباس مدت سلطنتی اولان درت سنه ظرفنده بر کوزل ایش کورمک شویله طورسون مغلوب اولان رجال امویه بی ضیافت بهانه سیله سراینه چاغیروب جله سنی بردن سفره باشنده اعدام ایلدیکیچون الی یوم القیام بد نام اولمش و بو وقعه دن صکره کندوسیده چوق معمر اوله میوب اوتوز ایکی یاشنده چیچک علتدن کورله مش کیتشدر . عباسیه و ابا مسلم و مروان کله لرینه دخی نظر بیوریه .

§

﴿ ابو العباس ﴾ آملی - کدین اولیاءالهدندر واسمی احد بن محمد

و شهرتی قصاب زاده در . مشارالیه حضرتلری زمانک غوث اعظمی ایدی  
 و هر طرفدن مشایخ کرام کلوب توجهات سنیه لریله مستفیض اولورلر  
 و اصول دینه و دقایق توحیدده اولان مشکلرینی عرض ایدرک حضرت  
 شیخک هیچ اوقویوب یازمسی اولدیغی حالده جوابنی الورلر ایدی .  
 بر کون بر درویش کلوب کرامت استدکده ( اولادم سکا شو کرامت  
 یتشمز میکه الله تعالی و تقدس حضرتلری بنم کی بر امی قصاب اوغلبه  
 بو قدر نعمت احسان ایتمش و بونجه عالم و فاضلی شرق و غربدن التونلر  
 خرج ایدهرک کتوردوب نائل مرام ایتمکده بولنمش ) بیوردی . بر دفعه  
 دخی کرمانشاه امیری یاغور یاغقی ایچون دعا نیاز ایلدکده برالما کونردی  
 و الما کرمانشاهه واردیغی کبی یاغور باشلادی مشارالیه حضرتلری  
 دائماً مریدلرینه وقت کییادر صاقنوب ضایع ایتیه سکر دیو تنبیه  
 ایدر ایدی . وفاتی ( ۱۰۴۰ م و ۴۳۲ هـ ) تاریخنده در . بهاء الدین  
 آملی بشقه .

§

﴿ ابو عبدالله ﴾ — اندلس علماسندندر و مسقط رأسی قرطبه .  
 اسمی محمددر . بونک علم فقه و حدیثده ید طولاسی وار ایدی و ( وفقه  
 الحسن البصری ) نامنده یازدیغی یدی جلد کتابی بین العلماء پک زیاده مقبول  
 و معتبر اولدی .  
 ( فقه الزهری ) دخی بونکدر و وفاتی ( ۹۵۹ م و ۳۴۸ هـ ) تاریخنده در .

§

﴿ ابو عبدالله ﴾ — فضلالی مشایخ کرامندندر و مسقط رأسی رودبار .  
 اسمی احمد بن عطارددر . مومی الیهک طریقه جلیله صوفیهده کمالی  
 علم حدیث و قرآئنده اولان کالندن اشاغی دکل ایدی . بر دفعه احباسیله  
 صحبت ایدرکن ( التصوف ترک التکلف و استعمال التطرق و حذف التشریف )  
 بیورمشدر . وفاتی ( ۹۷۹ م و ۳۶۹ هـ ) تاریخنده و قبری صور قضاسنده  
 توطن ایلدیکی موقعهدر .

§

﴿ ابو عبدالله ﴾ — اندلس علماسندندر و مسقط رأسی غرناطه .

اسمى محمددر . بو ذات عصرينك علامه سى ايدى . و بين الناس  
( لسان المتكلمين عنوانيله مشهور ايدى . ( كتاب التعريف ) و ( اشارة  
الى اداب الوزارة ) و ( ديوان لسان الدين ) و ( هدار الكنايات فى تراجم  
الادباء بالمغرب ) بونكدر . و بونلردن بشقه دها بر چوق تأليفاتى و ( احاطه  
فى تاريخ غرناطه ) نامنده التى جلدى جامع بر تاريخى وارد .

§

﴿ ابو عبيده ﴾ بن جراح — اصحاب كرامدن وعشرة مبشره دندر  
و مسقط رأسى مکه مکرمه اسمى عامر بن عبداللهدر . بو ذات فرسان  
اصحاب كرامدن ايدى و هجرت نبويه نك اون سكرنجى سنه سنه قدر  
وقوعبولان غزوانك همان كافه سنده بولندى ورايت اسلاميه ابتدا بونك  
يدينه توديع قلندى و پك چوق خدمت وغيرت ايتديكندن و كريم الخلق  
وغير متعصب و حلیم و عاقل و مدبر اولديغندن عليه الصلاة والسلام افندمن  
( امين الامة ) تسميه بيوردى . بو ذات روم ديارنده حسن شمائل و صدق  
مقال ايله شهرت بولديغندن شام مصالحه سنده روملر بونى استمشلر ايدى  
كيدوب ياپديغى مصالحه اليوم اورو پالولر نزننده معتبر و مستحسندر .  
مشاراليه حضرتلرى ( ٦٣٩ م و ١٨ هـ ) تاريخنده محاربه يه كيدر كن رمله  
ايله بيت المقدس اراسنده بر قريه ده ظهور ايدن طاعوندن اجتناب ايدن  
عسكرينه تسليت و يرمك ايچون بر يوكسك يره چيقوب ( ايها الناس ان  
هذا الوجد رحمة من ربكم و دعوة من نبيكم و موت الصالحين قبلكم و ان  
ابى عبيده يسأل الله ان يقسم له منه حظه ) الى اخره خطبه سنى قرائت  
و تمام ايتديكى آنده طاعون اصابتيه رحلت ايلدى .

§

﴿ ابو عبيده ﴾ بن مسعود — شجاعان اصحاب كرامدندر هجرت  
نبويه نك اون دردنچى سنه سنده حضرت عمر رضى الله عنه طرفندن  
( حيره ) فتحنه كوندرلمشيدى رفاقتنده اولان عساكر اسلاميه ايله  
( زاب ) نهرينك اوته يقه سنه كچوب اعدا ايله محاربه يه طوتشددقه  
عساكر اسلاميه نك اتلرى اعدانك فيلرندن اوركديكى جهته بوزغونلق

وقوعبولدی وقهرمان مشارالیه فیلاردن برینک اوزرینه یوریوب خرطومنه قلیچ چالمسیله فیل مشارالیهی التنه الهرق شهید ایلدیکندن عسکر بتون بتون رجعته مجبوریت کوردی واولجه قورلمش اولان کبری امید رجعتی قطع ایچون مشارالیه طرفندن کسدرلمش بولندیغندن عساکر اسلامیهک هممان اکثریسی غریق لجه رجت و نائل رتبه شهادت اولدی .

§

﴿ ابو عریش ﴾ — یمن ولایتی داخلنده و بحر احمر ساحلنه یقین محلده و ( حلیه ) اسکله سنک جهت شمالیسندنه وسکسان طقوز کیلومتره بعدنده بر شهردر بو شهر وقیله صنعا و شرفای مکه حکومتری بیننده واقع اولان کوچک بر حکومتک مرکزی ایدی . غزه ایله مضراره سنده اولان عریش بشقه در ( عریش ) کله سنه نظر بیوریه .

§

﴿ ابو العلاء ﴾ المعری احمد بن عبدالله — ادبای امتدندر . بونک علم شعر و معانی و بیانده اولان مهارتی وقوه . حافظه سی همان امثال سز کبی اولوب بعض کسه لر اعتقادنده شبه ایدر لر و بعضیلری حسین ظن ایلر لرایدی . مومی الیه کشتی نفسی ایچون حیوانی ذبح و ازعاج و وجودینی افنا ایتک لایق دکلدردیهرک قرق بش سنه حیوان اتی بیامشدر و حال صباوتندنبرو ایکی کوزی اعما اولدیغی حالده هر قنغی برکتابدن اولورایسه اولسون یکر می صحیفه قدر محلی حضورنده بردفعه قرائت اولنسه در حال حفظ ایدوب بر یا کشتسز او قودینغی چوق کره تجربه اولنمشدر . بونی بر کره شیوعبولان شهرته بناء بغداده جلب ایتمشرایدی یولده کیدرکن رفاقتنده بولنان تاتار ( افندی اغاج التسدن کچه یورز باشی آزاجق اشاغی اک ) دیمسیله ابو العلاء باشی اکوب او موقعه نشان قودی و بر قاچ آی صکره عودت ایدرکن او موقعه کلدکده همان باشی اشاغی اکوب رفقاسنی حیرته بر اقدی .

بر دفعه دخی قیون صساتان اوچ کردک جامع شریفده شرکت حسابندن طولایی منازعه ایتد کلرینی ابو العلاء اوزاقدن دکله یوب عریچهدن ماعدا

بر لسانه واقف اولدیغی حالده کردجه اولان سوزلرینی بلر و کردلر دعوألرینی بینلرنده فصل ایده میوب محکمه یه کیتد کارنده حاکم افندی برینک اقرارینه شاهد استر و کردلر دخی بولندیغمز محلمده اوچزدن ماعدا کسه یوغیدی فقط شو قیافتده بر اعما کنارده نماز قیلقده ایدی دیملریله حاکم ابو العلاء اولدیغی حس ایدرک چاغیروب بونلر اوراده بر لرینه نه دیدیلر دیو سؤال ایلد کده ابو العلاء بن بونلرک لساننی یلم فقط شو صدانک صاحبی شویله سویلدی و او بری بویله دیدی دیرک چله سنک افاده سنی تقریر ایلر و او تقریری ترجمه اولنهرق کردلرک افاده سی میدانه چیقار و ایجاب شرعیسی اجرا اولنور . وفاتی (۱۰۵۷ م و ۴۴۹ هـ) تاریخنده در وخیلی تصنیقاتی و بر دیوانی واردر

§

﴿ ابو علی ﴾ — کبار مشایخ صوفیه دنلر و مسقط رأسی رودبار اسمی اجد بن محمد در . بو ذات سلاله کسرادن بروزیر زاده ایدی بر کون بغدادده حضرت جنیدک مریدلریله صحبت ایتدیکی محله اوغرایوب کلمات حقیقت ایاتنی استماع ایتسیله دروننده عشق و طریقت علیه صوفیه یه محبت حاصل اولدیغندن در حال جمیع واریتینی ترکسه کلوب حضرت شیخه مرید اولدی و ازوقت ایچنده علوم ظاهره و باطنه یی تماماً تحصیل ایدرک امام و سید القوم عنواننی الدی و بعده مصره هجرت ایدرک اوراده یك چوق ذوات یتشدیردی . ( فضل المقال علی الفعال منقصة و فضل الفعال علی المقال مکرمه ) و ( علامت اعراض اه عن العبد ان یشغله بما لا ینفعه ) کلمات حکمت ایاتی مریدلرینه ویردیکی نصایح جله سنلندر . تاریخ وفاتی ( ۹۳۲ م و ۳۲۱ )

§

﴿ ابو علی سینا ﴾ — حکمای اسلامیه دنلر و مسقط رأسی بخارا اسمی حسین بن عبداه بن سینادر . مومی الیه اون التی یاشنه قدر علوم طبیعیه و ریاضیه و طبیه و منطق و سایر ه یی تحصیل ایدرک علم طبی تدریسه باشلادی و بر یچق سنه ظرفنده جمیع کتب فلسفه یی مطالعه و ( ارسطو ) نک مسلکی

اوزره کتابلر تألیف ایدوب مومی الیهک اونودلمش اولان اقتدارینی میدانه چیقاردی واندن صکره علوم آیهه بی بلاستناد تحصیل ایدوب سنی اون سکره واردقده شهرتی عالی طوتدی ووقوعبولان دعوتلر اوزرینه (جرجان) و (ری) و (قزوین) ممالکنه کیدوب اورالرده بر مدت ارام ایتدکدنصکره (همدان)ه واردی وملك (شمس الدوله) یه مصاحب وبعده وزیر اولدی واثنای وزارتنده کوندزلری مصالح عباد و کچه لری تدریس طلاب ایله اشتغال ایدرک پک چوق عالم یتشدیردی وملك مشار الیهک وفاتندن صکره امیر (علاء الدوله) نك دعوتنه مبنی اصفهانه عزیمت واوراده بر مکمل رصدخانه و آلات رصدیه تدارکنه همت ایلدی ونهایت حظوظات شهوانیه ابتلادن ناشی عارض اولان فقر دم و قولنج وصرعه علتلرندن قورئله میوب الی سکره یاشنده اولدیغی حالده همداندن آخرته کندی.

استاذ مومی الیهک شو قیصه عمری تحصیل علوم و سیاحت وعلل و سقامتله پکدیکی حالده علوم شریفیه اولان همت وغیرتی حیرت افزای عقولدر و بو غیرت وهمتی سایه سنده کندوسنی حکمتده ارسطوطبده بقراط تدریمش و شیخ الرئیس عنواننی آلمشدر. مومی الیه اجسام عالمک حدوثی یابنده ارسطو و ابو النصر فارابی رأینه تابع اوله رق (افلاک ذاتی وصفاتی و شکل قیدمدر و حرکات و اوضاعنک هر بریسی حادث و مسبوق بالاخردر و حرکاتنک اولی ونهاییت یوقدر یعنی بنوعها قدیم وبشکلها حادثدر) دیدی. وفاتی (۱۰۳۵ و ۴۲۷ ه) تاریخنده در.

زیرده محرر اولان تألیفاتندن قانون طبی (زارار غرمون) معرفتیه لاینجه یه وسائر بعض کتابلری فرانسزجه یه ترجمه اولمش و منطقی (۱۶۵۸ م و ۱۰۶۹ ه) تاریخنده یارسده موقع انتشاره چیقارلمش و مشهور قصیده روحیه سنه شیخ الوزرا ساهی پاشا مرحوم بر کوزل شرح یازمشدر.

(راوند) و (خیارشنبه) و (تمرهندی) ابو علی سینانک کشف ایتدیکی ادویه دندر.



ابوعلی سینانک تحقیق اولنه بیان تألیفاتی شونلردر:

	عدد	جلد
تفسیر بعض سور قرآنیه	١	١
احادیث نبویه	١	١
کتاب المبدأ والمعاد	٤	٤
کتاب البر والاثم	١	٢
کتاب الانصاف	١	٢٠
کتاب النجاة	١	٣
قانون الطب	١	١
لواحق الشفاء	١	٢٢
لواحق الانصاف	١	٢٢
الحصول والمحصل	١	٢٠
منطق طب نجوم شعر انشاوساأره دن	١٠٦	١٠٦
یکون	١١٩	٢٠٢

§

﴿ ابوعلی فارمدی ﴾ — مشایخ ذوالاحترام دندر و مسقط رأسی (طوس) اسمی فضل بن محمد در . مشارالیه خراسانک شیخ الشیوخی و کندو نامنه نسبتله معروف اولان طریقک مؤسسی ایدی . ابتدا شیخ ابو سعید حضرتلرندن صکره شیخ ابو القاسم کرکانی حضرتلرندن اخذ فیض ایتشلر وخواجه یوسف همدانی حضرتلرینی خلیفه تعیین بیورمشلردر . وفاتی ( ١٠٨٤ م و ٤٧٧ هـ ) تاریخنده در .

§

﴿ ابوعلی مرغینانی ﴾ — برهان الدین کلهسنه نظر بیوریله .

§

﴿ ابوعلی بن الهیثم ﴾ — علمای فن هیئت و هندسه دن بز معروف ذاتدر ( ٩٨٠ م و ٣٧٠ هـ ) تاریخنده بصره ده دنیایه کلوب خلیفه مصر حاکم بامراه زماننده شهرت بولدی . کوزله کورمسی و اشیانک کورنسی کیفیاتی بیلدیرریدی جلدی جامع اولان کتابی لاتینجه یه ترجمه اولنهرق بازنده طبع

اولنشد و ( کتاب الارصاد الکلیه ) و ( کتاب المساحه ) دخی بونک  
ایسه ده اوروپالیرک خبر ویردیکی ( جغرافیة ) کتابی بمالک شرقیه ده  
کورلماشدر . اشعه نک عینه انکسارینی وزجاجک توسع و تقلسنی ابتدا  
بولان بودر وفاتی ( ۱۰۳۸ م و ۴۳۰ هـ ) تاریخنده در .

§

﴿ ابو عمرو ﴾ — قراء سبعه دندر و مسقط رأسی بصره اسمی  
عماردر . بو ذات علوم عربیه و فنون ادبیه و سائرده فریدالعصر ایدی .  
اصمعی کبی بر ذات ابو عمرو دن بیک مسئله صوردم جله سنک دال و محتبیه  
جوابنی آلدیم دیدی هله قرائت قرآن کریمده امام اولدیغنه شبهه یوقدر زیرا  
تحقیقاتده اولدرجه ایروکتدیکه فصحای عربدن استماع ایلدیکی کلماتک کافه سنی  
ضبط و تحریر ایلدیکندن خانه سی سقنه قدر کتاب ایله طولدی وفاتی ( ۷۷۰ م  
و ۱۵۴ هـ ) تاریخنده در .

§

﴿ ابو الغیث ﴾ — اعزّه کرامدندر و مسقط رأسی تونس شهرتی  
( فشاش ) در . بو ذات خیلی زمان عریان اولهرق تونس طاغرنده کروب  
صکره قصبیه ایندی و برطاقم کرامات ارائه و مهدیلک دعوا ایلدیکندن  
خلق باشنه طویلاندیسه ده حکومت ایروسنه میدان ویرمدی و مؤخرأ بر  
مقدار ضرورته و صکره غنا وینه ضرورته دوچار اولهرق نهایت غنا و ثروتده  
قرار قیلدی و بر قاچ سنه ظرفنده اوتوز ایکی مسجد و زاویه و بونلره جسم  
و قفلر یایدردی و بو زاویه لرده اوتوران و کلوب یکن بر قاچ یوز یقدرت  
در ویشانه هراخشام و صباح طعام چیقارتدی و عاجز لرینه بر مقدار خرچلق  
ویرلمسنی امر ایتدی و هرکیم بر کتاب کوتوروب صاته جغنی ایما ایش  
اولسه در حال قیتمک بر قاچ مثلنی ووروب المقتی اولدیغندن کتبخانه سی  
صحاف چارشوسنه دوندی و یالکز بیک عدد ( بخاری شریف ) جمع  
اولدی عزیز مومی الیهک علوم ظاهره و باطنیه دخی و قوفی و بعض کراماتی  
و کاه بکاه عالم غیبندن اخباری مرویدر وفاتی ( ۱۶۲۱ م و ۱۰۳۱ هـ )  
تاریخنده در .

﴿ ابو الفتح الشهرستاني ﴾ محمد بن عبدالکريم — علمای کلامندر

دائماً مذهب اشعری اوزره تکلم ايدر و کثیر الحفظ و لطيف البحث بر ذات اولديغندن بغداد اهالیسی و عظم و نصیحتنی استماعه پک چوق رغبت ايرایدی (نهایة الاقدام فی علم الکلام) و (کتاب الملل و النحل) و (المناهج) و (کتاب المضارعة) و (تلخیص الاقسام) و (کتاب غایة المرام) و (کتاب دقایق الاوهام) و (کتاب الارشاد الی عقائد العباد) و (کتاب المبدء و المعاد) و امثالی خیلی تألیفاتی واردر . بغدادده اوچ سنه او تور دقندن صکره شهرستانه کیدوب اوراده (۱۱۵۳ م و ۵۴۸ هـ) تاریخنده وفات ایتمشدر .

§

﴿ ابو الفدی ﴾ الدمشقی — مصنفیندندر . و اسمی اسماعیل

مخلصی عمادالدين در . بو ذات اصول اسلامدن اولان کتب عشره احادیثنی سندلریله جمع ایدوب (جامع المسانید) نامنده بر کتاب یازدی و (۱۲۹۴ م و ۶۹۴ هـ) تاریخنده وفات ایلدی .

§

﴿ ابو الفدی ﴾ الدمشقی — ارباب شجاعت و معرفتدن بریوک ذاتدر

واصلی سلاله ملوک ایوبیه دندر . شجاعتی سایه سنده جا و الیکنه نائل اولوب صکره بالاستقلال اداره و ولایته دخی موفق اولدی و فن کتابتده فوق الغایه مهارتی اولدیغندن مختصر بر تاریخ و جغرافیه قلمه آلدی . بو کتابلر (۱۷۶۶ م و ۱۱۸۰ هـ) تاریخنده عربجه دن لاتنجیه ترجمه اولمشدر و وفاتی (۱۳۳۱ م و ۷۳۲ هـ) تاریخنده در . اشبو ایکی ابو الفدی نك بر ذات اولسی دخی مأمول اولنیور .

§

﴿ ابو الفرج ﴾ محمد البغدادی — مصنفیندندر بونک (استذکار

فی فقه الشافعی) نام کتابی بین العلماء مشهور ایسه ده غایت بلیغ و مختصر اولدیغندن هر منتهی ایچون استفاده میسر دکدر . وفاتی (۱۰۵۶ م و ۴۴۸ هـ) تاریخنده در .

§

﴿ ابو الفرج ﴾ الاصفهانی — اعیان ابدان بر ذاتدر و فن محاضراتدن ( کتاب الاغانی ) و ( کتاب القیان ) و ( کتاب الاماء الشواع ) و ( دعوة الاطباء ) و ( مجرد الاغانی ) و ( کتاب الدیارات ) و ( کتاب التعدیل والاتصاف فی مآثر العرب ) کبی الی التمش قدر تألیفی وارد و وفاتی ( ۹۶۶ م و ۳۵۶ هـ ) تاریخنده در کندوسی حکم بن ابی العاص سلاسه سندن اولدیغی حالده بغدادده مذهب شیعه اوزره شهرت بولمش ایدی .

§

﴿ ابو الفرج ﴾ الجوزی البغدادی — اسمی عبدالرحن لقبی جمال الدین فقهاء حنبلیه دندر علم تفسیر و حدیث و طب و تاریخ و سائرده مهارتنی توصیف کنجایش ناپذیر دهان تعبیر و مقدار تألیفاتنی بیان و تعریف حقیقه بر امر عسیر اولدیغی کبی علم باطنده دخی کالی مصدق انام ایدی کستان صاحبی شیخ سعیدی مرحوم بوندن اخذ فیض ایلدی وفاتی ( ۱۲۰۰ م و ۵۹۷ هـ ) تاریخنده در . فاضل مشارالیه حقنده دهها زیاده معلومات استحصالنه ارزومند اولنلر جمال الدین کله سنه نظر بیورسونلر .

§

﴿ ابو الفرج ﴾ — مورخین عربدندر ملاطیه ده بر فقیر خرستیابک اوغلی ایکن تحصیل ایتدیکی علوم ریاضیه و فلسفه و سائرده سایه سنده حلبک یعقوبیه باش پاپاسلغنه نائل اولدی ولسان عربی و سریانی و یونانی بی دخی تحصیل ایدرک سوریه لسان قدیمی اوزره بر تاریخ عمومی و ( کتاب الاحداق ) و ( مناجات الحکمة ) و امثالی بر قاچ کتاب یازدی و ( ۱۲۸۶ م و ۶۸۵ هـ ) تاریخنده وفات ایلدی . تاریخ مذکور مؤخرأ لاتجهیه ترجمه اولمشدر .

§

﴿ ابو الفضل ﴾ سرخسی — کبار اولیاء الله دندر واسمی محمد بن حسن در . خلیفه سی ( ابو سعید ) حضرت تلی نوقت بر قبض درونه اوغراسه مریدلریله برابر مشار الیهک قبرینه کیدوب منبسط اولور

و مریدلرینه ایچکزدن قنغیکز ججه کتک مراد ایدر سه کلسون بو ذات العلیقدری زیارت ایتسون دیر و ( معدن شادیست این معدن جود و کرم . قبله ماروی یار قبله هر کس حرم ) بیتنی او قور ایدی . حضرت مشار الیهک پک چوق کراماتی کورلشدیر و بردفعه هوادن اشاغی اینوب براغاجه قوندیغنی اوراده بولنان بر شخص کوروب تعجب ایتدکده شیخ نیچون تعجب ایدرسک یوقسه سنده بویله اوچقمی استرسک دیدکده شخص مرقوم استرم دیمسیله شیخ اشته استدیکک ایچون الیکه کیرمز دیوب کندو اوچسی استکیله اولدیغنی افاده ایلدی .

حضرت مشار الیه بر کون بغچه لر آردسندن پکرکن کمال انبساطله ( خدایا برسند دنبرو براچیجه و یرمدککه صاچی تراش ایدیم دوستلرله بویله می ایدرلر ) دیدیکی آنده قارشوسنده اولان براغاج التون کسلدی و شیخ بوخالی کوردکده ( یاربنا سکا انبساطله برشیء سونلک جائز اولیور ) دیوب یولنه کتدی . اشای وعظ و نصیحتده مریدلرینه ماضی کچدی تدارک اولمز و مستقبله انتظار کرکز همان معتبر اولان حالدر و حال ایسه صفت عبودیتدر و حقیقت عبودیت ایکیدر بریسی جناب حقه افتقار ایله دیکری علیه الصلاة والسلام افندمزه حسن اقتدا ایله در و بونلرده نفس ایچون نصیب و راحت یوقدر بیوررایدی . وفاتی ( تخمیناً ۱۰۰۹ م و ۴۰۰ هـ ) تاریخنده در .

§

﴿ ابو الفضل عیاض ﴾ — اندلس علمسندندر و مسقط رأسی غرناطه اسمی سلیمان بن موسی در . بو ذات علم فقه و حدیث و سائرده زمانک فریدی ایدی ( الشفاء فی تعریف حقوق المصطفی ) و ( الاعلام فی حدود الاحکام ) و ( الجامع التاریخ ) و ( مشارق الانوار علی صحاح الآثار ) بونکدر و بونلردن بشقه اون درت تألیفی ده ا واردر و مرا کشته وفاتی ( ۱۱۴۸ م و ۵۴۳ هـ ) تاریخنده در .

§

﴿ ابو الفضل ﴾ — ملوک هندیه و زراسندن برفاضل ذاتدر بتون ممالک هندیه بی زیرجایه سنه آلمش اولان مشهور جلال الدین اکبر بونی کندوسنه

وزیرالوزرا تعیین ایتدی و بودخی خیلی زمان مصالح هندیه بی کوزل اداره ایدوب ولی فتمتک قدروشانی درجه علیایه چیقاردی. تأسیسات ملکیه وامور عدلیه ومحافظه سلطنت حفسده تحریر ایتدیکی (اکبر نامه) یک معتبر برکتابدیر و بوکتاب (۱۷۸۳ م و ۱۱۹۸ ه) تاریخنده قالدکوتوده اوچ جلد اوله رق طبع ونشراولتمشدر. ابو الفضلک اعدامی جلال الدین اکبرک وفاتی سنه سنده وقوعبولدی.

§

﴿ ابو القاسم ﴾ — اطبای عربدندر و مولدی اندلسده مدینه لزهره اسمی خلف بن عباسدر. بونک فن طب وجراحیده مهارتی فوق الغایه اولدیغندن لقمان زمان دیرلرایدی (التعریف فی الطب) و (التصریف لمن عجز عن التألیف) وامثالی اوتوز ایکی جلدکتاب تألیف ایتمش و اکثریسی مؤخرأ لاتنجه به ترجمه اولنه رق اورویاده طبع ونشراولتمشدر. اشبو ابوالقاسمک اوچیوز قرق بش واللی تاریخلرنده اندلس پادشاهی سلطان (عبدالرحمن) ه الانجا ایدن قرال (سانشو) یه مداوات ایدیشنه باقیلنجه تاریخ وفاتسک (۱۱۰۷ م و ۵۰۱ ه) یازیلیشنده سهو اولمق لازم کلور.

§

﴿ ابو القاسم ﴾ الحکیم — کبار مشایخ صوفیه دندر و مسقط رأسی سمرقند اسمی اسحق بن محمددر. بوذات دائماً الله تعالی و تقس حضرتلرینه متوجه اولوب اندن غیریه نظر ایتمز و خلق ایله معامله سی انجق انلرایچون اولوب کندو نفسیچون حظ بکله مز ایدی بر کون مشایخ کرامدن بریوک ذات مشار الیهک زیارتنه کلوب امور عبادله مشغول بولدیغندن سجاده سنی حوضک اوزرینه سروب نمازه طوردی و مشار الیه پنچره دن کوروب بوسنک یاپدیغک اوغلا بچقلر کاریدر معرفت مشغولیت آره سنده کوکلنی حقدن آیرماقدر بیوردی. وفاتی (۹۵۳ م و ۳۴۲ ه) تاریخنده در.

§

﴿ ابو قیر ﴾ — ابو حور کله سنه نظر بیوریه.

§

﴿ ابو کرب ﴾ — تباعه یمندن بر مشهور پادشاهدر یمن حکومتی بونک

وفاتندن صکره ( بنی کهلان ) سلاسه سنه انتقال ایلدی . کعبه مکرمه یه ابتدا کسوه یاپیدیران بو ذات عالی نهاددر .

§

﴿ ابوالمیث ﴾ — مفسرین کرامدندر و مسقط رأسی سمرقند اسمی نصر بن محمددر . بو ذات علم فقهده فرید العصر ایدی ( بوستان العارفین ) و فقهه دائر ( نوازل ) نام کتابلر ایله درت جلدی جامع تفسیر شریف جلهء تألیفاتدنددر و وفاتی ( ۹۹۳ م و ۳۸۳ هـ ) تاریخندهدر .

§

﴿ اپولونی ﴾ — سوزه بولی قصبه سنک نام عتیقیدر بوراسی وقتیه اسکی یونانلیرک آله آلالهه اعتقاد ایتدکلیر اپولونه منسوب ایدی .

§

﴿ آپولون ﴾ — شمس پرست اولان اسکی یونانلیرک آله الالهه و حاکم ضیاء و صنایع اعتقاد ایتدکلیر شخص موهومک اسمیدر بونک یونانستانده دلفی شهرنده بر عبادتخانه سی وردوس لیمانی آغزنده و در سعادتده چنبرلی طاش اوزرنده برر جسم هیکلی وار ایدی . آپولونک زیر حایه سنده یاخود خدمتنده ( موسه ) نامنده طقوز عدد ( پری قزی ) اولدیغی و بو پرلرک مقری موره شبه جزیره سنده واقع ( ماتاپان ) طاغلرینک ایوکسک محلی ایدوکی خرافات یونانیه دنددر . ( شارس ) و ( چنبرلی طاش ) کلمه لرینه دخی مراجعت یوریه .

§

﴿ ابولهب ﴾ — اعمام جناب پیغمبریدنددر . افندمزک تشکراً جاریه آزاد و دایه تعیین ایتش ایدی لکن صکره اسلامی قبول ایتیبوب کفر اوزرینه مصر اولدیغندن مقهور اولدی و حضرت ( عباس ) ک زوجه سی ( ام الفضل ) دن یدیکی طیاغک تأثیریه مبتلا اولدیغی ( عدسه ) علتندن آخرته کندی و بر قاج کون یانسه کسه وار مامغله قوقوب او حالله دفن ایلدی .

§

﴿ ابو محمد الجریری ﴾ اجد — مشایخ صوفیه دنددر و حضرت

(جنید) ك خواص اصحابنددر حضرت جنید وفات ایتد کدنصکره  
یرینه بوذات خلیفه اولدی . قرامطه طائفة باغیسه سی بغدادی محاصره  
ایتد کری زمان اهالی زیاده سیله صیقیلوب مشار الیهدن دفعلمریچون دعا  
نیاز ایتد کرنده بن دعا ایتدم لکن جناب حق بن دیلدی کیمی پیارم دیو فرمان  
بیوردیغندن صبر وسکوته مجبور اولدم سزك دخی صبریکنز لازم کلور  
زیرا شمدی دعا وقتی دکل تسلیم ورضاقیتدر دعا بلانک نزول و ظهورندن  
اول اولور بیوردی .  
مشار الیه (۹۲۴ م و ۳۱۲ هـ) تاریخنده محاصره مذکوره اثناسنده صوسزلقدن  
وفات ایتددر

§

﴿ ابو محمد علی ﴾ القرطبی — اندلس علمای فحامنددر وشهرتی ابن  
الحزم در . بوذات زمانک افضل فضلاسندن ایدی ( مداوات النفوس )  
و ( الفصل بین اهل الاهواء والنحل ) و ( کتاب التقرب ) و ( ارد علی  
فرق التقلید ) بونکدر و بونلردن بشقه اون ایکی تألیفی دها واردر  
ووفاتی ( ۱۰۶۳ م و ۴۵۶ هـ ) تاریخنده در .

§

﴿ ابو محمد مسلمة ﴾ — مجریطی کله سنه نظر بیور یله .

§

﴿ ابو محمد المکی ﴾ القیروانی — مغرب علماسندندر وشهرتی  
( ابن ابی طالب الخموش ) در . بوذات اندلسده واقع قرطبه شهرنده دائماً  
تدریس وتألیف ایله مشغول ایدی . ( الایجاز فی ناسخ القرآن ومنسوخه )  
و ( الایضاح فی ناسخ القرآن ومنسوخه ) و ( الهدایة الی جذع النهایة )  
و ( الانتصاف ) و ( الریاض ) بونکدر و بونلردن بشقه یکریمی ایدی  
تألیفی دها واردر ووفاتی ( ۱۰۴۵ م و ۴۳۷ هـ ) تاریخنده در .

§

﴿ ابو مدین ﴾ المغربی — کبار اولیاء الیهنددر واسمی شعیب در .  
توحید وتوکلده مشایخ صوفیه نک امامی ایدی ( محیی الدین العربی )  
حضرتلری کبی پک چوق ذوات کرام بوذات عالیقدرک همت وصحبتیله



واصل مرام اولشدر . خلقك اللزینی تبرك قصديه مشاراليه سوروب اوپدكړینی مشایخ كرامدن بعضیلری كوروب نفسكزده بوندن بر اثر فخر حس بیوریه یورمی دیو سؤال ایتدكړنده بنم حالم حجر الاسوده مشاهدرد بونجه انبیاء و اولیاء انی تقبیل ایدرلر انك حجریتی ذره قدر تغیر اتمز جوابنی و یردی . برذات شیطانی رؤیاسنده كوروب ابومدین ایله نصلسك دیو سؤال ایتدكده شیطان بنم انی اضلاله سعیم كلابك دریاه تبولی كبیدر دیدی بوفقره شیخ اكبر حضرتلرینك فتوحاتنده مسطوردر .

ابو مدین حضرتلرینك بردفعه كفار الینه اسیر دوشوب سفینه یه آتدیغی وهواده مساعد روزكار وار ایكن سفینه نك حر كمدن قالدیغی وسفینه قیودانی کیفیتی اكلا یوب سائر اسرای اسلامیة ایله برابر سیلینی تخلیه ایتدیكى مشهور و متواتر در ووفاتی (۱۱۹۳ م و ۵۸۹ هـ) تاریخنده در .

§

﴿ ابو معشر ﴾ جعفر بن محمد — فضلاى عصر دندر و مولدى ( بلخ ) شهرتى قاضى در . بونك علم حدیث و رمئ و نجوم و سائر ده شهرتى فوق العاده ایدی . اثنای سیاحتنده ملوك اعجامدن بری بونك نجومده اولان مهارتتی تحقیق و حضورینه جلب ایدوب بنم مقر بلمدن بری فرار ایتدی زه ده اولدیغنی بیله میورم اكر شونك زه ده اولدیغنی فنا تحقیق ایده بیلور ایسك سكا زیاده سیله اكرام ایدرم دیدی و مومی الیه دخی بوله جغنی تعهد و حساب ایدرك نهایت برمشكل محلدده یعنی برقان دریاسی اوزرنده اولدیغنی متخیرانه سویلدى و مؤخرأ ملك فراریء مرقومك عفوینی اعلان و جلب ایله زه ده ایلدوكنی سؤال ایلدكده قاضی ابومعشرك مهارتی معلوم اولدیغندن بوله مامق ایچون برتكنه یه قان طولدیروب اوزرینه اوتوردم ایدی دیدی . و بردفعه دخی بلخ پادشاهنك غایت قیمتدار بریوزوكی غیب اولمغله ابو معشری چاغیروب یوزوكی چالانك كیم اولدیغنی نجوم قوتیله بولسنی امراتمی اوزرینه ابو معشر فنا یایله جق شیء یاپدقذنصره پادشاهم سرك یوزوككزی حق تعالی حضرتلری اخذ بیورمش دیمسیله پادشاه ووكلاسی كولوشرلر و عاداتا سن برشیء بیلیورسك دیرلر و مؤخرأ یوزوك پادشاهك آره صره او قودیغی مصحف شریفك پیراقرلی آره سندن

یاخود محفظه سی ایچنده چیتمغله ابومعشرک علم نجومده اولان مهارتی تصدیق واحسان ایلرله ( کتاب الالوف ) و ( کتاب المدخل ) و ( کتاب المذاکرات ) بونکدر وصرعه علمندن وفاتی ( ۸۸۵ م و ۲۷۲ هـ ) تاریخنده در .

§

﴿ ابو منصور ﴾ ماتریدی — ماوراء النهرده و دیار رومده وسائر بعض اقطارده اولان اهل سنتک اعتقادده امامیدر واسمی محمد بن محمد در . بوذات علم فقه و کلامده زمانک الی اعلمی اولدیغندن ( امام المتکلمین ) دیرلر ایدی حدیث و اصول و فروعده سندلری شیخ ( ابی نصر العیاص ) حضرتلریدر وانلرده ( ابو بکر جرجانی ) دن وانلرده ( محمد بن حسن الشیبانی ) دن وانلرده ( امام الاعظم ) حضرتلرندن آلمشلردر و مذهب ماتریديه ایله مذهب اشعریه بیننده اولان فرق ( ابو الحسن ) کله سنده محرردر . ابو منصور حضرتلرینک درجه کمال و همتلری تألیف یوردقلری ( مأخذ الشرایع ) و ( تأویلات اهل السنة ) نام کتابلردن اکلاشیلور . وفاتی ( ۹۴۴ م و ۳۳۳ هـ ) تاریخنده در .

§

﴿ ابو موسی الأشعری ﴾ — فقهاء اصحاب کرامدندر . بوذات زمان سعادتده عدن وزیید و سواحل یمن ولایاتنه عامل یعنی والی تعیین یورلدی و حضرت عمر زماننده کوفه و بصره و الیلکیله کیدوب اهواز و اصفهانی فتح ایتدی وصفین محاربه سی عقینده شام طرفندن عمرو بن العاص حکم تعیین اولندیغنی کبی حضرت علی طرفندن دخی اشبو ابو موسی حضرتلری تعیین یورلدی . اسلامده هجرتدن اعتباراً تاریخ وضعی بوذاتک اخطاریله بالذاکره قرارلشدیرلمشدر و وفاتی ( ۶۶۲ م و ۴۲ یاخود ۵۱ هـ ) تاریخنده وقوعبولمشدر . مشار الیه کیجه لری صباحه قدر او یومیوب احیا ایدر و ( معاذ بن جبل ) حضرتلری دخی براز او بودقدنصکره قالقوب صباحه قدر عبادات و طاعاتده بولنور ایدی افضلیت بونک قغیسنده اولدیغنی یالمناسبه علیه الصلاة والسلام

افندمزه عرض ایتدکرنده ( معاذ ) سندن افقهدر بیورمشر اوو یخونک  
وجود انسان ایچون برغدای مخصوص ایدوکنی اکلاتمشردر .

§

﴿ ابوالنجیب سهروردی ﴾ — کبار اولیاء اللمهدندر واسمی عبد

القادر لقبی ضیاء الدیندر . بوذاتک نسب شریفی اون ایکی واسطه ایله  
( ابو بکر الصدیق ) رضی الله عنه حضرتلرینه و طریقتده نسبتی ( امام  
غزالی ) حضرتلرینه منتهی اولور و اکثر طرق علیه اصحابنک سلسله  
نسبتلری بوکا ایریشور پک بیوک و ظاهر و باطنی مهور برذات ایدی  
و پک چوق فاضل و عابد یتشدیردی و متعدد کتابلر تألیف ایدی .  
برکون قصاب دکانتک اوکندن پکر کن آصیلی اولان قیونه تعجبله نظر  
ایدوب بوقیون بن مذبوح دکلم مرده یم دیور بیوردقده قصابک انکاره  
مجالی قالیوب مرده ایدوکنی تصدیق و شیخک دامننی بالتقبیل عفوینی  
استرحام ایلدی . وفاتی ( ۱۱۶۷ م و ۵۶۳ هـ ) تاریخنده در .

§

﴿ ابوالولید ﴾ سلیمان — اندلس علماسندندر علم حدیث و فقه و سائرده

فرید العصر برذات ستوده سمات ایدی . ( احکام الفصول فی احکام  
الاصول ) و ( التعلیل والتجرید فین روی عن البخاری فی الصحیح )  
و ( التسدید الی معرفة التوحید ) و ( کتاب الاشارة فی اصول الفقه )  
وامشالی اون یدی عدد کتابی واردر و بونلرک ایچنده ( شرح الموطأ )  
یکرمی و ( ایماء فی الفلسفه ) بش جلدی جامعدر و وفاتی ( ۱۰۸۱ م  
و ۴۷۴ هـ ) تاریخنده در .

§

﴿ ابوالولید ﴾ محمد بن الرشد — حکمای عربدندر و مسقط رأسی

اندلسده واقع قرطبه شهریدر . بوذاتک علوم حکمیه دن بشقه علم طبده  
دخی مهارت کامله سی وار ایدی و بو علمده استادی اولان حکیم ( زووار )  
دن ده ایلرو کیدوب علم مذکورک عملیاتدن زیاده نظریاته اعتنا ایدی  
و حکمای یونانیه دن ارسطونک کتاب الکون و الفسادینی عربجه یه ترجمه

و ( شرح الارجوزة في الطب ) و ( التهافة رداً على تهافة الغزالي )  
 و ( خلیجۀ طب ) نامرلیه مشهور اولان کتابری تألیف ایلدی خلیجۀ  
 طب سکز جلدی جامعدر . مومی الیه برآردلق مراکشه کیدوب تحت  
 موحدیده بولنان ذاتک فوق الغایه مظهر قبولی اولدیغندن اوراده یرلشدی  
 و بعضاً امور حکومتده دخی استخدام اولندی . کتب مز بوره دن  
 ( کتاب الکونی ) ۱۵۹۵ م و ۱۰۰۴ هـ تاریخنده وطبه دائر اولان سابر  
 کتابری ( ۱۴۸۴ م و ۸۸۹ هـ ) تاریخنده لاتینجه یه ترجمه اولنه رق  
 اوروپاده طبع ونشر اولمشدر . ابو الولیدک وفاتی ( ۱۱۹۸ م و ۵۹۵ هـ )  
 تاریخنده در .

§

﴿ ابوهریره ﴾ رضی الله عنه — اصحاب صفه دندر ومولدی یمن  
 اسمی عبدالرحمن در . غایت لطیفه کو ومنشرح برذات ایدی وحفظنده  
 بشیک التي یوز التمش بش حدیث شریف وار ایدی . کدی بی پک چوق  
 سودیکندن بوکینه بی علیه الصلاة والسلام افندمز قویمش ومشار الیه  
 الی اخر العمر بوکینه الیه افتخار اتمشدر . بر دفعه علیه الصلاة والسلام  
 افندمزک بکا احسان واعطا یوردیغی معلومات ایکی نوعدر برینی خلقه  
 اعلان ودیکرینی کتم ایدرم اکر اوکتم ایتدیگمی سزه سویلیه جک اولور  
 ایسه م بنی قتل ایدرسکز یوردی . مشار الیه بروقت مدینه منوره ده  
 بیت الماله عائد خرماقلرک حراستنه مأمور اولمشیدی او ائناده شیطانی اوچ  
 دفعه خرما چالار ایکن یقالار وشیطان ایکی دفعه سنده برر صورتده تمقله  
 یقایی قورتارر ایسه ده اوچنجیسنده قورتاره مز ونهایت بنم شرمندن  
 خلاصک طریقنی سکا اوکر دیر ایسه م براغور میسک دیوب ( ابوهریره )  
 دخی موافقت اتمسیله ( آیه الکرسی ) او قویان بنم شرمندن خلاص اولور  
 دیر و ابوهریره شیطانی براغوب کیفیتی علیه الصلاة والسلام افندمز  
 بیان ایتدکده ( آیه الکرسی ) نک شر شیطانندن محافظه سنی تصدیق یلورر .

§

﴿ ابو الهول ﴾ — اسکی مصر لیلرک فراست آلله سی اعتقاد ایتدکری  
 شخص موهومک صورت مثالیه سی اوله رق یابدقری هیکلرک اسمیدر . بو

هیکلر باشی و کوکسی کنج قزه و اشاغیسی ارسلانه مشابه اوله رق قیچی  
 اوستنه اوتورمش صورتده یایلور ایدی بونلر ایوم مصر علیاده اسکی  
 (تب) شهری خرابه سی جوارنده و یول اوزرنده واک بیوکی ایکنجی اهرامک  
 جهت شرقیسنده و نصفی قوم ایچنده کورلمکده در اشبو بیوک ابوالهول  
 یرلی بر قیا او ییله رق یاپلدیغی جهتله پک بیوک و یردن باشنه قدر ارتقاعی  
 یکر می سکر مترودر • یونانستانده واقع دیگر (تب) شهر عتیقنده دخی  
 ابوالهول هیکلری موجود اولوب بونلرک فضلده اوله رق برده قنادری  
 واردر •

اشبو ابوالهوللرک وقتیه دلی طریق اوزرنده طوروب یولچیره بیلجه  
 صور دقری و بیلجه یی حل ایده میانلری دکره آتدقری و حل اولندیغی حالده  
 کندولر آتدقری خرافات یونانیه دنلر •

§

﴿ ابو یزید بسطامی ﴾ — کبار اولیاء الیهندر واسمی طیفور

بن عیسی در و طریقتده نسبت علیه لری بش واسطه ایله (ابو بکر الصدیق)  
 رضی الله عنه حضرتلرینه موصولدر • بو ذات عالیقدر عشقده استغراقی  
 و عبادات و طاعاتده مجاهده یی اول درجه یه واردیرمش ایدیکه نماز قیلارکن  
 جناب حقک هیبت و جلاندن و شریعت مطهره یه تعظیمندن ناشی کو کسنک  
 کککری قاغشدار ایدی • حال احتضارنده (آلهی ماذکر تک الا  
 عن غفلة و ما خدمتک الا عن فتره) بیوروب تسلیم روح ایتشدر •  
 مخلصلرندن بزى مشار الیهی رؤ یاسنده کوروب حالکز نیجه در دیو سؤال  
 ایتدکده بکا نه کتوردک دیو سؤال ایتدیلر بن دخی بر درویش بر  
 پادشاهک قیوسنه کلدیکی وقت نه کتوردک دیمزلر بلکه نه استرسک دیرلر  
 دیدم اندن صکره بر سؤال وقوع بولدی بحمد الله نعم آلهیه ایله مثلذدم  
 بیوردی • حال استغراقده بن خیمه یی عرشک بر ابرنده قوردم دیمش  
 ارلدیغی روایت ایدرلر ایسه ده صحیح دکلدر • ارتحاللری (۸۷۲ م  
 و ۲۶۱ یا خود ۲۳۴ ه) تاریخنده در و تر به شریفه لری حلب ملحقاتندن  
 عمق اوه سنده در •

﴿ ابو یزید ﴾ — مغرب شیخزندن برطوپال حریفدر بو حریف  
 (۹۴۳ م و ۳۳۲ هـ) تاریخنده شیخکی شاهلغه تحویل آرزوسنه دوشهرك  
 مریدزندن وطولاشوب اغفال ایتدیکی قرا وقصبات اهالیسندن باشنه  
 طولادیقی حشرات ایله قیروان ورقه شهرلینی اوروب ایشنی ایلجه  
 یولنه قویدیسه ده ملوک فاطمیهدن سلطان منصور ایلروسنه میدان ویرمدی  
 واوزینه عسکر سوق ایدرك تاریخ مذکوردن درت سنه صکره  
 اخذ و بر تیمور ققس دروننه میونلرله حبس و اعدام ایلدی . بو خیت  
 باشنده اولان عسکری تحریر ایچون کافه منہای و اسلامک قتلنی  
 و مالرینک مصادرهنی مباح قلمش ایدی .

§

﴿ ابو یوسف ﴾ — ائمه حنفیه دندر و مولدی کوفه اسمی  
 یعقوب بن ابراهیمدر . مشار الیه ابتدای تحصیلنده زیاده سیله ضرورت  
 ایچنده بولندیغندن والدهسی درسنی ترك ایدوب بر صنعته سلوک ایتسنی  
 تنبیه و اجبار ایدر و خواهجهسی اولان امام اعظم حضرتلری درسنی  
 ترك ایتامک ایچون اعانه بیورر ایدی تکمیل علوم ایدوب بغداده  
 هجرت ایلدکده بالجمله بغداد علماسی نزدنده مشار بالبنان و آز وقت ایچنده  
 قاضی القضاة رتبه رفیعه سیله کامران اولدی . بر کون امرادن بر معتبر  
 ذاتک شهادتی رد ایتدیکنندن او ذات کیدوب خلیفه هارون الرشیده  
 شکایت ایلدی هارون الرشید دخی ابو یوسفی چاغیروب شهادتنک  
 ردی سببنی سؤال ایلدکده (بونک دائما حضور یکزده بن سزک قولکرم  
 دیدیکنی ایشیدییورم اکر بوکلاننده صادق ایسه قولک شهادتی  
 مشروع دکلدر و اکر کاذب ایسه کاذبک دخی شهادتی مسوع  
 دکلدر انک ایچون رد ایتدم) جوابنی ویردی . التمش طقوز سنه  
 معمر اولدقندن صکره وفاتی (۷۹۸ م و ۱۸۲ هـ) تاریخنده در .

§

﴿ اهر ﴾ — قزوین ایله همدان آره سنده واقع نواحی جبلیه دن  
 بر ناحیه در و عجملر بیننده (آهر) دیمکله مشهوردر اصفهانده

دخی بو نامده بر کوچك قصبه واردر . بوراردن پك چوق علما ظهوره  
كلدی حتی ایسا غوجی صاحبی اثیرالدین دخی ابهر یدر .

§

﴿آبه نین﴾ — ای تالیاده بر سلسلهء جبالك اسمیدر . بو طاغ  
ایتالیا شبه جزیره سنك طولیله کیدوب (قاسینو) ده آلب طاغردن  
آریله رقی (جنوه) کورفرینك اطرافنده کی نصف دائره بی وسجلیاده واقع  
(آتنا) طاغنی تشکیل ایدر . مشهور (وزو) طاغیله اطرافنده بولنان  
جبال وولقانیه سلسلهء مذکورهنك جهت جنوبیسنده واقعدر . و اوچبیک  
درتیوز مترودن عبارت اولان الك یوکسك محلی (آتنا) ده در . بو طاغر  
وقتیله قطاع طریق وفراریله مقرایدی شمیدیه بوش دکلدر .

§

﴿آبیار﴾ — مصر سفلاده بر قضا مرکز یدر .

§

﴿آپیدوس﴾ — آق دکز بوغازنده نعره برونی دید کلمی محلنده  
وقتیله موجود وشمدی خراب و مفقود بر شهردر .

§

﴿آپيروس﴾ یا خود (ایر) — غرباً یونان دکزی، وایلیریا  
و شرقاً (تسالونیا) ایله محدود اولان وارنودلنگ جهت جنوبیسندن  
عبارت بولنان قطعهنك اسمیدر . بوراسی (۱۶۷ م) تاریخنده روما  
دولتنه انتقال ایدوب (۱۳۳۵ م و ۷۳۶ ه) تاریخنده دولت عثمانیه یه  
پکدی و بر مدت تحت جایه ده بولندیسه ده پرنسی اولان اسکندر بک  
استقلال داعیه سنه دوشدیکندن بر قاچ دفعه تر بیه ایدیلوب نهایت  
(۱۲۶۷ م و ۸۷۲ ه) تاریخنده حرباً اخذ و طوغریدن طوغری یه اداره  
اولنان ممالک صره سنه ادخال اولندی . آپيروسك نصفی الیوم یانیه  
ولایتی دیمکدر .

§

﴿آپیس﴾ — اسکی مصر لیلرک معبود اعتقاد ایتد کلمی و دائماً

بولند پروب تقدیسه مجبور اولدق لری بر او کوزك اسمیدر . بو او کوزك اناسی صاعقه دن هلاک اولش اولسی وتوی کاملاً سیاه اولوب النک اورتیه سنده مثلث الشكل بر بیاضی و صر تنده قرتال قوشی رسمنده بر اشارتی و بو ینک التنده کوچک بوجک کبی و صاغ طرفنده هلال قر کبی علامتری بولنسی شرط ایمش و بو او کوز مصر لیره یکر می بش سنه حاشا تکر یلیق ایسکدن صکره مطنن آلائی ایله کوتور یلوب نیله آتیلور و برینه بشقه سی تدارک اولنور ایمش . بو او کوز حر یفلر قره کیک و آتجه کبی بعض حیواناتی دخی تقدیس ایدر لر ایدی .

( منه ویس ) دخی مصر لیرک بر مقدس او کوزی ایدی لکن بو او کوزك وجودی اولیوب یالکز بر هیکلی موجود و بو هیکل شمسک صورت مثالیه سی اولق اوزره معروف ایدی .

§

﴿ آپیسترون ﴾ — بحر حزك جهت غریسنده و ( باقو ) سنجاغی داخلنده بر شبه جزیره در اشبو شبه جزیره نك نصفی آسیا ممالکندن و نصف دیکری اورو پای روسی اراضیسندن معدود در . باقو کله سنه دخی نظر بیور یله .

§

﴿ اتابك ﴾ — اون برنجی و اون ایکنجی عصر لده عراق و ایرانه صدر دولت مقامنده بولنان سر کردگان اتراکک عنوانیدر . بو عنوان مقدا تاتار اوبه باشلیرینه و بر یلور ایدی . آتابك عنوانه نائل اولان سر کردگان وولاتك بعضیسی استقلال اوزره حکومت سور دیسه ده هیچ بر یسی سلطان عنوانه نائل اوله ددی . درت سلاله یه منحصر اولان حکومت اتابکیه نك برنجیسی ( عماد الدین زنگی ) معرفتیه تشکل ایدوب ( ۱۱۲۷ م و ۵۲۱ هـ ) تار یخندن اعتباراً یوز طقوز سنه پایدار اولان موصل اتابکری و ایکنجیسی ( سنغر بن مودود ) معرفتیه تشکل ایدوب ( ۱۱۴۷ م و ۵۴۲ هـ ) تار یخندن اعتباراً یوز قرق اوچ سنه پایدار اولان شیراز اتابکری و اوچنجیسی ( غلام شمس الدین ) معرفتیه تشکل ایدوب ( ۱۱۶۰ م و ۵۵۵ هـ ) تار یخندن اعتباراً التمش یدی سنه دوام ایدن ( ازربایجان



اتابکری و در دنجیسی (۱۱۷۴ م و ۵۷۰ هـ) تاریخندن اعتباراً (حرم آباده) یوز قرق التی سنه حکومت سورن لرستان صغیر اتابکریدر .  
 اتابک (بک بابا) دیمک .

§

﴿ آتیا ﴾ — یونانستانده مقدماتشکیل اولنش برجعت ملیه و اخوه در بوجعت ابتدا معارفک ترقیسی ایچون باشلایوب خیلی مدت اورو پانک تحسین و آفرینی و معاونت کلیه نقدیه سنی قزانديسه ده (۱۷۹۸ م و ۱۲۱۳ هـ) تاریخنده دولت علیه یه کوجشمش اولان شاعر (ریعاس) ک تشویقیله بر بشقه رنک آلدی یعنی ملنک محکومیتدن نجاتی اسبابنی تمیئه یه مأمور بر هیئت سیاسیة خفیه حالنه کیردی و اون التی سنه بوصولتله ایفای وظیفه و تحصیل استعداد ایدوب مؤخر ايسار ایايه نقل و توسیع اولندی ویدی سنه قدر اورادن دولت علیه علیه ایندیکی نثریات و افسادات سایه سنده ظهوره کلان اختلال کرمی پیدا ایدرک ایش کرمی کبی عملوند کدن و تپه دنلی علی پاشا موسسز اعدام اولندقدن صکره بتون بتون میدانه چیقوب حکمنی اجرایه باشلادی عاقبت یونانستانک دولت علیه الندن چیمسنه سبب اولدی .

§

﴿ آتیه ﴾ — یونان دولتنک (پوتیا) سنجاغی داخلنده پای تختی اولان شهردر . بوشهر یکریمی بر طول شرقی ایله اوتوز یدی عرض شمالیده و ساحلدن سکز کیلو مترو کیروده واقع اولوب مقدا نفوسی سکسان بیک راده سنده ایکن شمعی اسکله سی حکمنده اولان (پیره) قصبه سسیله برابر الی بیکدن زیاده دکدر . آتیه جوارندن جریان ایدن (کفیسوس) یاخود (آریدان) و (ایلیسوس) نهرلی اورارک باعث حیاتی اولدیغندن وقتیه بونلرک برینی آلهه یونانیه دن (پا) نك چشمه سی اعتقاد ایدرلر ایدی . (۴۰۱۴ خ) تاریخنده یعنی میلادک بیک بشیوز سکسان یاخود بیک التی یوز قرق ایکی سنه مقدمنده مصردن (سقروپ) نامنده برسر کرده نك برچوق مهاجرلرله یونانستان اراضیسنده آتیه جوارینه هجرت ایتدیکی و آتیه نك اولدیغی محله ده اون ایکی عدد کوچک شهرلر بنا ایلدیکی توار یخده مقید ايسه ده بوشهرلی برلشدیروب اصل آتیه شهرینی بنا ایدن

ذات تاریخ مذکور دن ایکیوز التمش درت سنه صکره حکمدار اولان (تزه) در واشبو تزه نك زمان حکومتندن اون طقوزنجی عصر میلادی به قدر اتنه نك اداره سنجه وقوعیافته اولان انقلابات زیرده کوسترلمشدر .

### اتنه نك انقلاباتی

تاریخ خلقت	میلاد دن مقدم	تاریخ هجرت
۴۲۷۸	۱۳۱۶	۰۸۶۲
۴۵۲۶	۱۰۶۸	۱۲۴۵
۴۸۴۰	۰۷۵۴	
۵۰۳۳	۰۵۶۱	
۵۲۵۶	۳۳۸	
۵۴۴۸	۱۴۶	
	تاریخ میلاد	
	دولت علیه به انتقالی	
	ابتدای استقلالی	

§

﴿آتوسا﴾ — فرس حکمداری مشهور کینسروک قزیدر .

بو قز ابتدا ارکک قرنداشی لهراسبک ومؤخرأ دیگر قرنداشی یاخود ساخته قرنداشی سمیردیسک ودها صکره سمیردیسسه خلف اولان برنجی دارانک زوجه سی اولوب بونلردن سرخس یاخود سخسار و اراییل نامنده ایکی اولادی اولمش و سرخس (۵۱۰۹ خ) تاریخنده یعنی میلادک درتیوز سکسان بش سنه مقدمنده پدیری دارانک یرینه کچمشندر . مجوس آیینده قزیله وقز قرنداشیله تزوج جائز ایمش .

§

﴿آتوود﴾ — حکمت طبیعیه علماسندندر ومسقط رأسی انکتره

تاریخ وفاتی (۱۸۰۷ م و ۱۲۲۲ ه) در . بو ذات انکتره ده قاهبر یج دارالفنوننده برمشهور خواجه ایدی . حرکات دوریه ومستقیمه به

وقواعد حکمیہ و طبیعیہ ساثرہ یہ دائرہ ایکی عدد رسالہ سی وارد و بونلرک برینہ چالار ساعتلرک کفچہ لری حرکتہ دائرہ بعض مسائل درج اتمش و حکمت طبیعیہ درس لرنده اجسامک سقوطی قانونلرینی حساب اتمک اوزرہ برماکنہ ایجاد ایشدر . بوماکنہ ایکی بچق مترو ارتفاعندہ اخشابدن معمول برستونک رأسنہ وضع اولنور و اوزرینہ فانوس پکوریلور بیوجک معدنی بردائرہ سی و ابرہ سی و اجسام ثقیلہ تعلیق اولنہ جق غایت اینجہ ایلیکی و ثانیہ لی ساعتی و مقیاسی وارد و بوالتموی الیہک نامیلہ مشهوردر .

§

﴿ آتیل ﴾ یاخود (آتیل) — (۵۳۵۲ خ) تاریخندن (۵۴۶۵ خ)

تاریخنہ یعنی میلادک یوزیکرمی طقوز سنہ مقدمنہ قدر برغمہ ده حکومت ایدن اوچ حکمدارک اسمی یاخود عنوانیدر . بونلرک برنجیسی معارفپرور برذات اولدیغندن ایکویز بیک کتابی جامع اولان مشهور (پرغام) کتبخانہ سنی یایدردی و ایکنجیسی ذوق و صفایہ مائل اولدیغندن امور حکومتی ندماسی یدینہ و یردی و اوچنجیسی هر نقدر ابتداری براز ایش کوردیسه ده صکرہ لری ایشی کوچی براغوب باغچه وانلغہ باشلادیغیچون تبعہ سی نظرندن دوشدی و کندوسی دخی سوء حال و حیثیتی اکلایوب مجنون کبی سراینک برکوشه سنده مآم اثوابیلہ وقتنی پکوردی واک صکرہ ملکنی وفاتندن صکرہ تصرف اتمک اوزرہ روما دولتنہ ترک ایدرک تبعہ سی حقندہ اولان کین و غرضنی اجرایہ موفق اولدی .

§

﴿ آتیشست ﴾ یاخود (اوتیشست) — اوتیش کلہ سنہ نظر بیوریلہ .

§

﴿ آتیکی ﴾ یاخود (اتاکی) — اتنہ نک نام عتیقیدر (اتنہ) کلہ سنہ

نظر بیوریلہ .

§

﴿ آتیل ﴾ یاخود (آتیل) — آسیاده برجسیم نهردر . بونهر

اورال طاغلرندن طویلانوب و (ایاتقہ) و (قزان) و (صمارہ) اراضیسنی اسقا ایدرک کلوب (اژدرهان) شهرینک جهت شمالیسنندن بحر

حززه انصباب ایتکده در طولی اوچیک بشیوز کیلو مترودر .  
بونره اسکی زمانده ( را ) دیرلر ایدی شمعی ( وولغا )

§

﴿ آتیللا ﴾ — هون طائفه سنک رئیسی و حکمداریدر بو ذات

( ۴۳۴ م ) تاریخنده برادرلیه بالاشتراک ریاست مذکورہ یی در عہدہ وروما  
غرب دولتیلہ عقد ایتدیکی معاہدہ یی برمدت محافظہ ایتدکنصکرہ برادرینی  
دفع و معاہدہ مذکورہ یی فسخ و جرمانلرلہ اتفاق ایدرک روما شرق  
ایمپراطوری ممالکنہ هجوم و ( تراسب ) قطعہ سنی بحر سیاہہ قدر استیلا  
ایلدیکندن ایمپراطور کنج تئودوس سنوی ایکیک یوز التون و یرمک  
شرطیلہ مصالحہ یی مجبور اولدی ( ۴۵۱ م ) تاریخنده دخی بشیوز یک  
عسکر ایلہ غرب ایمپراطوری ممالکنہ یوریوب و ( استراز بورغ )  
و ( حج ) شہرلرینی آلوب پارسہ طیاندی ایسہدہ ایمپراطور مشارالیه  
( ویزیغوت ) و ( بورغون ) و ( فرانق ) و ( ساقسون ) طائفہ لرلیہ  
بالاتفاق مقابلہ و ( شالون ) دہ غلبہ ایتدیکندن آتیللا اوچیوز یک تلفاتلہ  
کیرو یہ دوندی وحدتندن ایتالیانک بعض شہرلرینی و مشہور ( اکیلہ ) شہر  
جسینی یغما و احراق ایلدی . آتیللا بلای آلہی لقبیلہ افتخار ایدر  
و یازدیغی فرمانلرہ بولقبی قورایدی . ( ۴۵۳ م ) تاریخنده مرکز حکومتی  
اولان ( پانونی ) دہ تآهل ایدوب کوکی کیردیکی کیچہ زیادہ جہ شراب  
ایچدیکندن چاتلامش و خلفی اولان برقاچ اولادی برلرینہ دوشہ رک  
پدرلرینک شوکتی ضایع اتمشدر .

§

﴿ آتین باقور ﴾ — ترانسیلوانیا دوقہ سیدر . ( ۱۵۷۵ م و ۹۸۳ھ )

تاریخنده زیر حایہ سندن اولدیغی اوستریا ایمپراطوری مقسیمیلانہ کوچنوب  
دولت علیہ یہ التجا و حایہ سنی قبول ایلدیکندن دولت علیہ بر مقدار  
عسکر کونردی و موھی الیہ عساکر مرقومہ یی کندو عسکرلیہ  
برلشدرہ رک ایمپراطور مشار الیہی فنا حالده مغلوب و پریشان ایتدی  
و بو خدمتنہ مکافاة طرف دولت علیہ دن لہستان قرالغی توجیہ پیورلدی .  
بو ذات دولت علیہ نیک چوق خدماتندہ بولنمش و برقاچ دفعہ دولت علیہ

نامنه اوستریالولز و روسیه لولر ایله محاربه ایتش و (۱۵۸۶ م و ۹۹۵ ه) تاریخنده وفات ایشدر.   
یرینه یکن اوغلی (قریستوف) سرسام و احق برآدم اولدیغندن اوستریالولرک دسایسنه آلدانوب دولت علیه جایه سنی ترک ایلدی.

§

﴿ آتین بوجقای ﴾ — بودخی ترانسیلوانیا دوقه سی ایدی

(۱۶۰۵ م و ۱۰۱۴ ه) تاریخنده زیر جایه سنده اولدیغی اوستریا دولتندن آیریلوب دولت علیه جایه سنی قبول و دولت علیه طرفندن و یریلان عساکر معاونه ایله اوستریا ممالکنه هجوم ایدرک (دارات) و (توقای) و (قاشه) و (ایوار) قلعه لرینی آلدی و برچوق مجار بکریله اردوی همایوه کلوب خلعت فاخره کیدی و تریاکی حسن پاشا مومی الیهک اخطار ایله کیدوب نقاط مهمه ده اولان قلعه و پلانغه لری ضبط ایلدی و (۱۶۱۳ م و ۱۰۲۲ ه) تاریخنده وفات ایلدکده ترانسیلوانیا اهالیسی ایکی طرف اولوب برطرفی دولت علیه جایه سنده قالمسنی و دیگر طرفی کالاول اوستریا جایه سنه یکمسنی استه مکده و بر برلریله مجادله ایتکده ایکن مقدما دولت علیه یه دخالت ایدن (بتلن قابور) نام پرنس برطاقم عسکر و اسکندر پاشا ایله کوندریلوب حرباً اقعاد اولندیغی کبی ایکی طرف دخی اطاعته مجبور اولدی و تسکین هیجان ایچسون اهالی یه بعض امتیازلر ویرلدی.

§

﴿ آتین ﴾ — انکلتزه قرا ایچه سی اولان صغیره ماتیلدک وصی

منصوبی ایکن (۵۳۰ م) تاریخنده مرقومه بی تختندن ایندیروب سلطنتی غضب ایدن ذاتدر. بونک غدرو وظلمی مشهور ایدی و زماننده تحصیل مأمورلری کتد کبری قرا و قصبات اهالیسنی سیف ایله تهدید ایدرلر و پاره آله مدقلری صورتده قریه و قصبه لرینی یقارلر کیدرلر ایدی. مومی الیه بو حال اوزره اون طقوز سنه سلطنت سوروب وفات ایلدکده حکومت قرالیه (نورمانه) خاندانی نندن چیقوب (آنزو) خاندانه یکمشدر.

§

﴿ نار شعریه ﴾ — حکمت طبیعیه ده اینجه بوریلر دروننده وقاپلرک

سطوح جناحیه لری طولیجه مایعاتك سطحلینك ترفع و یاخود تنزل ایتمنی خاصه سنه دنیلور، مثلا اینجه برشیشه بوری صویه باتیرلسه دروننه کیرن صویك سطحی خارجنده اولان صویك سطحندن یوکسك اولدیغی مشاهده اولنور اکر بو بوری جیویه باتیریلورسه بالعکس دروننه کیرن جیویه سطحنك خارجنده بولنان جیویه نك سطحندن آچاق اولدیغی کوریلور و شو تجربه لر قطرلری مختلف بوریلره اجرا اولنورسه ترفع و یاتنزل ایدن مایع ستونك طولی شیشه بوریلرک قطرلریله معکوساً متناسب اولدیغی اکلشیلور و آثارشعریه سطحلرک انحناسی حسیله دفع و جذب اثری حصوله کتورر مثلا منطاردن معمول ایکی یووارلق برصویه وضع اولنوب سطحلری اصلادلدقده بربرندن بعیدجه اولدقجه بینلرنده برکونه تأثیر حاصل اولمازسه ده آثارشعریه مناسبتیله ترفع و یاتنزل ایدن سطحلر بربرینی قطع ایدجه درجه ده تقریب اولنجه مذکور یووارلقلر شدتله بربرینی جذب ایدرلر و بالعکس چام ساقزی ایله بالمومندن یاپیلان ایکی یووارلقدن بری اصلادیلور و دیگری اصلادلز ایسه بوجه مشروح صویه وضع و بربرینه تقریب اولدقده بربرینی شدتله دفع ایدرلر.

§

﴿ اثر ﴾ — فنون حکیمیه اربابی نزدنده غایت رقیق و غیر موزون و کافه موجوداتی محیط بر ماده یه اطلاق اولنور. طبیعیتندن بعضیلرینك قولنجه (ضیا) و (الکتریق) بونك اهتر ازنندن حصوله کلرر ایمش. هندسه رسمیه ده بر مستوینك سطح ارتسام ایله فصل مشترک نه دخی (اثر) تعبیر ایدیلور.

§

﴿ آثور ﴾ — سام بن نوح علیه السلامک در دنجی اوغیدر. بوذات حین تفرقه قبیله سی خلقیله بغدادک اوست طرفلرینه کیدوب وطن ایلدیه ده بر زمان صکره بابل اراضیسنده ساکن اولان حامیلر بونلری استقاله و نزاع وجداله قالفشدقلرندن (۲۹۵۴ خ) تاریخنده یعنی میلادک ایکبیک الی یوز قرق یاخود ایکبیک طقوز یوز اون درت سنه مقدمنده دجله کنارینه ودها یوقاریلره چکلیمکه مجبور اولدی رموصل

جوارنده مشهور (نینوه) شهر بنی بنا و برنجی آثور دولتی تشکیل ایدوب  
 بالاستقلال حکومته باشلادی . اشبو برنجی آثور دولتی تشکیل ایدن  
 سامک اوغلی اولیوب آنک ینه او نامده براوغلی یاخود حفیدی اولق  
 احتمالیده واردر و شهر مزبوره نینوه نامی صکره دن و یرلمشدر .  
 (نینوس) و (آثوریا) کله رینه دخی نظر بیور یله .

§

﴿ اثوریا ﴾ — شرقاً کردستان و شمالاً حر پوت و دیار بکر و غرباً  
 الجزیره و جنوباً بابل اراضیسیله محدود اولان و بعضاً بابل و الجزیره دخی  
 داخل بولنان اراضی و سیه نك اسمیدر . بو اراضینک جهت جنوبیسنده  
 سامیلر ساکن ایکن (۴۲۹۴ خ) تاریخنده یعنی میلادک بیک اوچیوز سنه  
 مقدمنده (بلوس) نامنده برذات سامیلری طرد ایدرک برنجی آثور دولتی  
 تجدید و توسیع ایلدی و یکریمی بش سنه صکره جلوس ایدن اوغلی (نینوس)  
 دخی پای تختی توسیع و تزین ایدوب (نینوه) نامی و یردی و بابل حکومتی  
 اورته دن قالدیروب (باقریان) و (مدیا) و (ارمنستان) ولایاتی تحت  
 جایه سنه آلدی . مومی الیهک تجدید ایلدیکی اشبو برنجی آثور دولتی  
 (۴۸۰۶ خ) تاریخنده یعنی میلادک یدییوز سکسان سکر سنه مقدمنده بابل  
 و الیسی (بله زیس) ایله (مدیا) و الیسی (اریپاکسس) ک عصیان و غلبه  
 سیله منقرض اولوب بله زیس شرق و جنوب جهته لرنده ایکنجی آثور  
 دولتی واریپاکسس مدیا دولتی تشکیل اتمشدر .

(۴۸۸۸ خ) تاریخنده آثوریا حکمداری اولان (سناخریب) دخی مدیا  
 و ارمنستان و سوریه ممالکنی و ممالک یهودیه و مصریه بی استرداد و استیلا  
 ایلدی و اخلاقی خیلی ایشلر کوردیسه ده (۴۹۸۸ خ) تاریخنده بابل  
 حکمداری بولنان (نابوپولاصر) ایله مدیا و الیسی برنجی (سیئازار)  
 متبوع منخلمری (سارداناپال) علیه قیام ایدرک سرعسکرلری مشهور  
 ایکنجی (بخت نصر) معرفتیه بیچاره بی مغلوب و نینوه بی یغما و تخریب  
 ایتدکرندن قوجه ایکنجی آثور دولتی دخی محو و برباد اولدی .

و متعاقباً مرقوم بخت نصر پندری شیئازارک فراغیسه بابل و آثوریا  
 حکمدار لغنه کچدی و (۵۰۳۴ خ) تاریخنده یعنی میلادک بشیوز الشمس

سنه مقدمنده مدیا حکمدار لغنی احراز ایدن مشهور کینسرو دخی پکرمی  
ایکی سنه ظرفنده بابل و آتوریا و لیدیا و نینوه حکومتلرینی کاملاً محو  
و ملکلرینی ضبط ایدوب عمومه بردن ( فرس دولتی ) نامنی و یردی .  
کینسروک تشکیل ایلدیکی اشبو فرس دولتی تواریخ شرقیه ده دولت  
( کیانیه ) نامیله مشهور و متعارفدر .

§

﴿ آتوراطه لری ﴾ — بحر محیط اطلسیده و پورتکیز دولتی زیر  
اداره سنده اون عدد جزایر صغیره نك اسمیدر و مرکز اداره لری ( ترسیرا )  
اطه سنده واقع ( انقره ) شهیدر . بونلرک جمله سنده ایکوز التمش بشیک  
بشیوز نفوس تخمین اولنیور . جزایر مذکور دن ( بیق ) اطه سنده  
سکزیک قدم ارتفاعنده اولان برطاغده کی وولقان شایان تماشادر .  
بواطه لری ( ۱۰۴۱ م و ۴۳۲ هـ ) تاریخنده اندلس عربلری و ( ۱۴۲۰ م  
و ۸۲۳ هـ ) تاریخنده پورتکیز سیاحلری کشف اتمشرایدی بوواطه لرده  
یک چوق آتمجه قوشی اولدیغندن و پورتکیزلر آتمجه قوشنه ( آتوروس )  
دیدکلرندن عموم اطه لره ( آتوراطه لری ) نامنی و یرمشلردر . ( اطلاعاتیت )  
کله سنه دخی نظر بیور یله .

§

﴿ اثیرالدین ﴾ ابوحیان — اندلس علماسندندر و مسقط رأسی  
غرناطه اسمی محمد بن یوسف در . بو ذات مصرده شیخ نحاة  
و مدرسه منصوریه ده شیخ المحدثین و علوم عربیه و لغتده رئیس العما اولوب  
عربی تدریس و تصنیف ایله پکوردی . ( البحر المحیط فی التفسیر )  
و ( البراجلی والنظر الخفی فی التفسیر ) و ( کتاب الاعلام بارکان الاسلام )  
و ( التقریب ) و ( خلاصة التبیان فی المعانی والبیان ) و ( اتحاف الادیب )  
و ( الاسفار ) و ( شرح لکتاب سیویه ) و ( کتاب التجرید لاحکام  
سیویه ) بونکدر و بونلردن بشقه قرق التی عدد تألیغاتی دهاواردر .  
شوراسی غریبدرکه بو ذات هیچ ترکیه یلیدیکی حالده آتی دخی مصرده  
تحصیل ایدوب قواعد ترکیه بی جامع براقچ کتاب تألیف ایتدی . و یرینی



(الادراك للسان الاتراك) تسميه ايلدى . وفاتی ( ۱۳۴۴ م و ۷۴۵ هـ )  
 تاريخنده در .  
 اثير الدين اخستكي فرغانی و اثير الدين اومانی دخی زمانلری شعرای  
 بنامندن ايدیلر .

§

﴿ اثيرالدين ﴾ — ( ايساغوجی ) کلمه سنه نظر بيوريله

§

﴿ اجتماع ﴾ — علم هيئته هر قنغی بر کوبک شمس وسطده بولنق  
 شرطيله کره ارض ايله بر استقامته بولنسنه اجتماع دنيلور . واجتماع  
 وقوعنده کره ارض اوزرنده بولنسان راصد شمس ايله کوبک مذکوری  
 بر استقامته کورر . بوکامحاق دخی دیرلر زيرا اولوقت صفحه قری کاملا  
 مظلم کوررلر .

§

﴿ اجرام سماويه ﴾ — جو سماده محور عالم اطرافنده هيئت  
 مجموعه لريه و بر حرکت عمومی منتظمه ايله شرقدن غربه طوغری دور ایتکده  
 اولان و بینرنده کی ابعادی و کندو وضعیتلری محافظه ایلان ثوابته و طلوع  
 وغروب و ابعاد و اوضاعی مختلف اولان و حرکات یومیه و انتقاليه لری  
 محسوس و مرئی بولنن سیاراته ( اجرام سماويه ) دیرلر . نجوم ثوابت  
 عددجه نامناهی و اکثریسی آلتسز غیر مرئیدر و نجوم سیاره دن  
 شمدی به قدر کشف اولنه یلان ایکیوز بر عددی مضبوط و مرصود و کافه سی  
 آتله مشهوددر .  
 ( ثوابت ) کلمه سنه دخی نظر بيوريله .

§

﴿ اجسام ﴾ — خارجه و وجودی مرئی و محسوس اولان شیلره  
 اطلاق اولنور . بولردن بعضیلری حس و حرکتدن عاری و فقط قوانین  
 حکمیه احکامنه تابع و بعضیلریه ذو حیات اولوب دوام حیاتلریچون  
 بر چوق اعضایی حاویدر و حس و حرکتدن عاری اولنره ( اجسام  
 غیر عضویه ) و ذو حیات اولنره ( اجسام عضویه ) دینلشدر اجسام

غير عضويه معدنياتي و اجسام عضويه حيوانات و نباتاتي شاملدر و بو اوچي بشقه بشقه فن اولقله برابر جله سنه مواليد ثلثه تعبير اولمشدر . مواليد ثلثه مذكوره دن اجسام معدنيه قابل تجزيه اولديغي حالده ( بسيله ) و ( مركبه ) نامرليه ايكي به منقسم اولديغي كبي اجزاي مركبه لينك قوه ارتباطيه لينك صور مختلفه سنه نظراً اشبو ايكي قسمك هر برى دخی اجسام ( صلبيه ) و ( مائيه ) و ( هوائيه ) دنيله رك اوچ قسمه تفريق اولنور .

عمليات كيمويه ايله تحليللری و كندیلرندن بر جسم ديكر استحصالی ممكن اوليان التون و كوش و قورشون كبي اجسام بسيله ( عناصر ) ويا ( اجسام عنصریه ) و يا خود ( اجسام مفرده ) ديرلر و تحليللری و كندیلرندن بر جسم ديكر استحصالی ممكن اولان صو و شاب و كهرچله مثالو اجسامه ( اجسام مركبه ) تعبير ايدرلر بونرك جله سنك خواص طبيعیه و كيمويه و حسيه ليله بينلرنده اولان مناسبات و امتزاجات كتب حكيمیه و كيمويه ده مفصل و مشروحدر بو حالده اوته دنبرو معروف اولان عناصر اربعه نك اجسام عنصریه دن اولديغي فوق العاده ترقی ايتمش اولان اصول تحليل ايله واصل مرتبه ثبوت اولمش واصل اجسام عنصریه اطلاقه سزا اولان اجسام مفرده ارباب فن طرفلرندن التمش التي عدده قدر ابلاغ اولمشدر .

علم هندسه ده اجسام ابعاد ثلثه يعنى طول و عرض و عمق صاحبي اولان شينه دينور و جسمك متخير اولديغي مكان محدوده ( حجم ) يا خود جسم تعليمي تسميه اولنور و خطوط منحنیه احاطه سندن حاصل اولان اجسامه ( اجسام مستويه و خطوط منحنیه احاطه سندن حاصل اولان اجسامه اجسام منحنیه السطوح ) تعبير ايديلور .

§

﴿ اجنادين ﴾ — دمشق جهت جنوبيسنده واقع رمله ايله ارض فلسطين آره سنده بيت جبرين جوارنده برصحرانك اسيدر . هجرت نبويه نك اون اوچنجي سنه سنده و يرموك محاربه سي عقينده بوراده اسلامك روملر ايله بر يوك محاربه سي وقوعبولدى . بو محاربه عمرو بن العاص اردوسنه معاونت ايچون خالد بن وليد قومانداسيله كوندريلان

بشيك قدر عساكر اسلاميه يه يوز بيك قدر روم عسكرينك تصادف  
ومحاصره سى مناسبتيله ظهوره كمش وبعنايه الله تعالى عساكر اسلاميه غلبه  
ايشدر .

§

﴿ آچه اووه سى ﴾ — آق دكز بوغازينك ساحل غريسينى تشكيل  
ايدن مثلث الشكل شبه جزيره نك اسميدر . بوراسنى وقتيله ( آچه بك ) فتح  
ايلديكندن انك نامنه نسبتله شهرت بولدى كليولى وسد البحر وكليد البحر  
قلعه لرى و بولايير استحكاماتى و نماز گاه وچنك و مجديه و غلظه طايه لرى  
ومايدوس قصبه سى بو اراضينك سواحلنده در

§

﴿ آچه ﴾ — بحر محيط كيرده و صوماره جزيره سنك شمال  
غريسينده برحومت مستقلة اسلاميه در و مقر اداره سى آچين نهري  
اوزرنده قازقر اوستنه بنا اولمش سكر اون بيك خانه يى جامع ( قيره طون )  
شهريدر . بوندن ايكيوز اللى سنه مقدم يعنى بيك قرق تاريخ هجر يسينده  
آچه حكومتى صوماره جزيره سنك همان نصفنه قريب محله حكم ايدر  
ايكن شمى ربعنه تنزل ايتدى و فلنكلور بو ائاده حكومت مذكوره نك بتون بتون  
مخوينه قالقشدى . آچه اهالىسى عصر سابعده مكه مكرمه دن كيدن  
برمالك همتيله اسلامه كمش و عصر تاسعهده يعنى سلطان سليم خان اول  
زماننده دولت عليه حايه سنى قبول ايتد كارندن طرف دولت عليه دن  
برطاقم يكيچرى عسكرى و طوپ و سنجاق كوندرلشدر .

آچه لولر اوزون بويلى متناسب الاعضا جسور و جنگاور آدملردر  
و مملكتلرنده اولان التون و كوش معدنلرندن خيلجه تجار تلى واردر .

§

﴿ اجيبت ﴾ — مصرك اورو پاچه مشهور اولان نامى . ( مصر )  
كله سنه نظر بيوريله .

§

﴿ احد ﴾ — مدينه منوره نك جهت جنوبيسينده و بر ايكي ساعت

بعنده بر قرمزى طاغك اسميدر بو طابخ عليه الصلوة والسلام افندمز طرفندن مظهر مدح و ثنا اولمشدر.

هجرت نبويه نك او چنجى سنه سننده رئيس قريش (ابوسفیان) اولجه وقوعبولان بدر غزاسنده كوردىكي مغلوبتك اجيسى چيقارمق اچون اوج بيك كشى ايله جبل مذكور جوارينه كلوب اسلام ايله محارب به ايتدى و اسلام ابتدا غالب ايكن وقوعبولان بر خطايه مبنى مغلوب اوله رق يتش نفر شهيد و یردی. عليه الصلوة والسلام افندمز كعميسى حضرت (حزه) رضی الله عنه دخى بو محارب به ده شهيد اولمش و مشجعة اعدادن بر قارى شهيد مشار اليهك جكرينى چيقاروب ديشيله چيكنه مش و حضرت پيغمبر افندمزك سن سعادترى قبر يلوب وجه سعادترى طرمانمشدر.

§

﴿احسا﴾ ياخود (حسا) — جزیره العربك جهت شرقيسنده وبصره كورفزينك جانب غربيسنده واقع نجد قطعه سنك اقسام ثلثه سندن بر یدر. بوقسمه (بحرين) و (قسطر) و (جبرين) اراضيسى داخل اولديغى حالده بعضاً (بحرين) ولايتى دخى ديرلر. اشبو ولايت وسيعه يه خيلى زماندنبرو اهميت و یرلديكى حالده (۱۸۶۸ م و ۱۲۸۵ هـ) تار يخنده بغداد واليسى بولنان مدحت پاشا خاكرای شاهانه دن الديغى امر اوزرينه خفيف بر قوت ايله كيدوب اهاليسى تحت اطاعته الدى وقضا ونواحيسنه مأمورلر تعيين و ممكن مرتبه نظامه ربط ايتدى. بوكا بعضاً (حسا) دخى ديرلر. اليوم مركز اداره سى (هفوف) شهرى اولوب اسكله سى حكمنده اولان (قطيف) و (نفود) و (مبرز) و (قاسم) و (الرياض) بلاد مشهوره سندنلر.

§

﴿احقاف﴾ — يمن ولايتنك جهت شرقيسنده و حضر موت ولايتنك شمال غربيسنده بر قطعه در بو قطعه نك اكثر اراضيسى چول و قومصال اولديغدن بونامله شهرت بولمش و قرآن كريمده ذكر بيورلمشدر. عربلر شمدي (بحرالصافي) ديرلر و (خبيثه) و (وسوا) قصبه لرينى بو قطعه نك بلاد مشهوره سندن عدايدرلر. اطلسلرايسه (نجران) قصبه سنى

احقافك بر معروف بلده سی اولقی اوزره کوستر مکده درلر (هود) نبی علیه السلام قبر شریفی بوراده در . عرب بانده دن عاد اولی قبیله سی وقتیه بوراده توطن ایتدی و شداد جنتنی بوراده یایدیروب بوراده باد صرصرله منقرض اولدی . جامع الفتاوی صاحبی امام ابی القاسم بن یوسف السمرقندی نکی دخی احقاف نامنده بر کتابی وارد در . ومومی الیهک وفاتی ( ۱۱۶۰ م و ۵۵۶ هـ ) تاریخنده در .

§

﴿ احمد الرفاعی ﴾ ابوالعباس — رتیه جلیله غوثیتی ایکی دفعه احراز ایدرک ( ابوالعلمین ) عنواننی آلمش بر ولی ذیشاندر . بو ذات امام ( موسی الکاظم ) حضرت تترینک سلاله طاهره سندن اولدیغی حالده بطایحده ( امعبیده ) نام قریه ده ساکن اولور و طریقت علیه ده کالی هر طرفه منتشر اولدیغندن اطراف ممالک وعشاریدن عاشقان و مریدان کلور انتساب ایدرایدی لکن فوق الغایه چوغالمش اولان اشبو مریدلرک ایچندن بر چوغنی آنشه کیرمک ییلان وعقرب ییمک کبی ملاحبه هوسیه یا کلش یوله صاپدیغندن اومقوله لر حضرت شیخک حسن نظر و توجهنه نائل اوله مدی . جناب ملک المنان بو ذات عالیقدره پک چوق نعم جلیله خوارق العاده عنایت واحسان بیورمش ایدی حتی بر دفعه خواص مریدانندن بری دوزخدن نجات فرمانی نیاز و حضرت شیخه رابطه ایله دعا ایلدکده سمانن بر بیاض کاغد دوشدی و کاغدی حضرت شیخک حضورینه کتورد کلرنده ده کیفیت افاده اولتمسزین حضرت شیخ سجده یه واروب ( الحمد لله الذی ارانی عتق اصحابی من النار فی الدنیا قبل الاخرة ) بیوردی . بو کبی دهاپک چوق کراماتی کورلمشدر . کندولری غایت جلیم و نازک و صابر و جهور الصوت بر ذات ایدی نمازه قالدغه جغنی وقت اتکنده بر کدی او یومش اولسه او کدی بی او یاندر ماق ایچون اتکنی کسوب بعد اداء الصلاة ینه دیکر و سنک و بوجک کبی موزیاتی اولدرمز ایدی . مشار الیهک سلاله سندن اولدیغنی ادعا ایدنلر قرداشی اولاد و احفاد ننددر و وفاتی ( ۱۱۸۲ م و ۵۷۸ هـ ) تاریخنده و قبری قریه مذکوره جوارنده در . طریقت کلمه سنه دخی نظر بیوریله .

﴿ احمد البدوی ﴾ — سادات کرامدن و مشایخ ذوی الاحترام دندر .  
 ( ۱۲۷۶ م و ۶۷۵ هـ ) تاریخنده وفات ایدوب مصرده ( طنطه ) نام محله  
 دفن اولندی . طریقت کلمه سنه نظر بیور یله .

§

﴿ احمد بن محمد بن الحنبل ﴾ الشیبانی — ائمه اربعه نك  
 دردنجیسیدر وحق عالیرنده ( حجة بین الله و بین عبیده فی ارضه ) دینلمش  
 برفاضل نادرالوجوددر . بوذات پك چوق کتاب تألیف ایتدی و امام  
 ابوقرلید احمد بن ابی الرجا کبی ذوات یتشیدردی و اوچیوز بیکدن متجاوز  
 حدیث شریف حفظ ایلدی . کتب احادیثدن ( مسند احمد بن حنبل )  
 جمله اثار جلیله لرندندر .

خلفای عباسیه دن معتصم زمانته وزیر ابن ابی داودك میدانه چیقاردیغی  
 خلق قرآن مسئله سندن طولایی مشار الیه دخی حضور خلیفه یه کتوریلوب  
 قرآن کریمك مخلوقیتنی اقرار تکلیف اولندوقده قبول و اقرار ایتدیکندن الیری  
 باغلنوب مبارک دریلری یارینلجه یه قدر ضرب اولندی و برنجی قامچیده  
 ( بسم الله ) ایکنجیسنده ( لاحول و لا قوة الا بالله ) اوچنجیسنده ( القرآن  
 کلام الله غیر مخلوق ) دیدی و دردنجیسندن ( قل لن یصینا الا ما کتب الله لنا )  
 ایت کریمه سنی او قودی و محضا کرامات علیه لرندن اوله رق الیری  
 چوزلدیکندن در حال براغلدیسده اثر ضربدن حاصل اولان ضعف  
 و سقامدن قورتیله میوب یتمش یدی یاشنده اولدیغی حالده ( ۸۵۵ م و ۲۴۱ هـ )  
 تاریخنده وفات ایلدی . مشار الیهك جنازه سنه بغدادده رجالدن سکز یوز  
 پك و نسادن التمش پك کشی حاضر اولمش و یهود و نصارا و مجوسدن  
 یکرهی پك کشی اسلامه کلشدر .

§

﴿ احمد البخاری ﴾ — سادات کرامدن و مشایخ نقشبندیه دن بریوک  
 ذاتدر . شیخ آلهی حضرتلری بخارادن دیار رومه عودت ایدرکن حضرت  
 مشار الیه دخی اولادو عیال و املاکنی بخاراده ترک ایدرک برلکده تشریف  
 و سما و قصبه سنده شیخ مشار الیه حضرتلریله اقامت و برقاچ سنه سلوک

بیوردی و برار هلق حج شریفه کیدوبینه عودت ایلدی و شیخ آلهی حضرتلری روم ایلنه هجرت و اوراده وفات ایلدیکندن حضرت مشار الیه دخی در سعادتده فاتح جامع شریفی جوارنده الیوم تریه شریفه لری اولان محلهده اقامت و ارشاد عبادده همت بیوردی . بوذاتک پک چوق کراماتی کورلمشدر حتی وفاتنده غسل اولنور ایکن اوچ دفعه کوزلرینی آچوب غساله نظر بیوردقزینی و قبره ایندیریلوب یاتیرلدقده همان قبله دن یکا صاغ طرفلری اوزرینه دوندیکنی حاضر بولنان حفاظ و مریداندن جم الغفیر کوروب برآغزدن صلاوه وسلام کتوردیکی مشهور و متواتردر و یتش اوچ یاشینده اولدیغی حالده وفاتی (۱۵۱۶ م و ۹۲۲ هـ) تاریخنده در .

§

﴿ احمد خان ﴾ اول — دولت عثمانیهده اون دردننجی پادشاهدر و سلطان محمد خان ثالث حضرتلرینک اوغلی و سلطان عثمان ثانی حضرتلرینک پدریدر و ولادت (۱۵۸۹ م و ۹۹۸ هـ) و جلوسی (۱۶۰۳ م و ۱۰۱۲ هـ) و وفاتی (۱۶۱۶ م و ۱۰۲۶ هـ) تاریخنده در . مشار الیهک ایران شاهی عباس خان ایله ایتدیکي محاربه لردن بر نتیجه حاصل اوله مدیسه ده مجار قرالی (رودولف) ایله ایتدیکي محاربه لردن ایچمه فائده کوردی و مغنیسا و حوالیسندده چوقدنبرو حال عصیانده اولان قلندر اوغلی غائله سنی بتوردی و ایاصوفیه جوارنده بناسنه مباشرت ایتدیکي جامع شریفک اتمامنه موفق اولدی و روضه مطهریه تبرکاً بر لوح زرین کوندردی و الحاصل زمان سلطنتی بر معتدل صورتده پکدی .

کنج یاشنده وفاتی معده ضعفنددر . لوح مزبورک اسمی (کوکبدری) ایدی و اوزرنده سائر مجوهراتدن بشقه الی بیك التون قیمتنده بر یوک الماس وار ایدی .

§

﴿ احمد خان ﴾ ثانی — دولت عثمانیهده یکریمی برنجی پادشاهدر و سلطان ابراهیم خان حضرتلرینک اوغلی و سلطان سلیمان خان ثانی حضرتلرینک برادریدر و ولادت (۱۶۴۲ م و ۱۰۵۲ هـ) و جلوسی (۱۶۹۰ م و ۱۱۰۲ هـ) و وفاتی (۱۶۹۴ م و ۱۱۰۶ هـ) تاریخنده در . مشار الیه

حضرت تریک مدت سلطنتی اولان درت سنه ظرفنده صدر اعظم کوپریلی زاده فاضل مصطفی پاشا بلغراد قلعه سنی استرداد ایلدیه ده اوستریا وله ووندیک عسا کر متفه سی هر طرفدن ممالک محروسه یه هجومی آرتردی واستقلاونیاده واقع (سلانق امین) نام محله بریوک محاربه وقوعبوله رق ایکی طرفدن لایعد عسکر تلف اولدی و (آرات) و (یانوه) قلعه لری الدن چیقوب پاشای مشار الیه جام شهادتی نوش ایتدی و موستار اهالی خرستیانیه سی اختلال چیقاروب اسلام و طنداشلرینی طرد ایلدی و ساقز جزیره سنی و ندیک و ایتالیا و مالطه سفینه لری احراق ایتد کدنصکره دونمای همایون ینیشوب سفاین مذکوره بی دفع ایدرک بش التی دانه سنی یاقدی والحاصل سلطان مشار الیهک شوقیصه زمانی کاملاً اضطراب ایچنده کچدی.

§

﴿ احمد خان ﴾ ثالث — دولت عثمانیه ده یکر می اوچنجی پادشاهدر و سلطان محمد رابع حضرت تریک اوغلی و سلطان مصطفی خان ثالث حضرت تریک پدیردر و ولادت ( ۶۷۲ م و ۱۰۸۳ هـ و جلوسی ( ۱۷۰۳ م و ۱۱۱۵ هـ ) واستغفاسی ( ۱۷۳۰ م و ۱۱۴۳ هـ ) تاریخنده در . مشار الیه حضرت لری تاریخ مذکوره ادرنه وقعه سی عقبنده تخنه جلوس ایتد کدنصکره قریملیر روسیه امپراطوری بیوک پترونک مغایر عهد حرکاتدن وقریمه تسلطندن شکایت ایتد ک لری حالده باب عالی برشانی جواب ویره مدی . واسوج قرالی ( قارلوس ) پولتاوده روسیه یه مغلوب اوله رق اوزی والیسی یوسف پاشایه التجا ایلدیکندن قبول ودرت سنه اوراده مسافر ایلدی و مومی الیهک تشویقیله روسیه یه اعلان حرب اولنوب ( ۱۷۱۱ م و ۱۱۲۳ هـ ) تاریخنده بالطه جی محمد پاشا روسیه امپراطورینی اردوسیه برابر محاصره ایتدی و امپراطورک امید خلاصی منقطع اولدیغی حالده وقوعبولان استرحامنه بناء بعض شرائطله سیبلی تخلیه اولندیغندن بریوک فرصت قاچیرلدی وموره وندیکولردن حرباً آنسدی ومصرده کولنلر بربرلری علیه نه اختلال چیقاروب غلبه ایدن طرف والی بی طرد ایلدی و سوریه وجده وحبش ولایاتی والیکنی زوربالقله آکش اولان نصوح پاشا وبوراوقده ادبسرلکه قالمیشان ملتجی عباس غائله لری حرباً بتورلدی و صدر اعظم داماد علی پاشا



مشهور ( قارلویج ) محاربه سنی غیب ایدرک کلی تلفات و یردی ایران دولتندن بر قاج مملکت و قلعه آندیسه ده عجملرینه استرداد ایلدی و در سعادتده ( پاتورنه و موصلی ) وقعہ سی ظهوره کلهرک صدر اعظم داماد ابراهیم پاشا اعدام و زوربا یکچیرلره تسلیم اولندقدن صکره سلطان احمدخان حضرتلری دخی استعفا و ازوایه مجبور اولدی . التی آی صکره دار بقایه ارتحال بیورمشدر . ( ابراهیم پاشایه دخی نظر بیوریله .

§

﴿ احمد جلایری ﴾ — عراق حکمدار لرندندر . تیمور لنکک ممالک ایرانیه بی استیلایه باشلامسی اوزرینه آذر بایجان حکمداری قره یوسف ترکانی اور کوب بغدادده بولنان اشبو احمد جلایری نزدیکه فرار ایتش و تیمور لنکک مؤخرأ اوراره دخی صارقدیغندن ( ۱۳۹۸ م و ۸۰۱ هـ ) تاریخنده ایکیمی بردن مصره قاچشیدی مصر حکمداری سلطان ( برقوق ) ابتدا بونلره حرمت و رعایت ایدوب صکره تیمور لنکک اشعار و طلبنه مبنی چهره بی چو یردی و مومی الیهما دخی اورادن بروسه یه یعنی ( یلدریم بایزید ) خان حضرتلرینه التجا ایلدی و تیمور بونلری یلدرمدن دخی استدیسه ده ( اعلم ایها الکلب العقور الموسوم بالتیمور ) مقدمه سیله جواب رددن بشقه برشی آله مدیغندن و کتدیجه کسب اشداد ایدن مخبرات محاربه بی نتیجه و یردیکندن وقعہ معلومه ظهوره کلدی و تیمور سلطان بایزید حضرتلرینی بوزوب اسیر ایتدکن و دفع اولوب کتد کدن صکره قره یوسف ایله احمد جلایری نینه ملکرینه متصرف اولدیلسه ده چکد کلری زجت و فلا کتدن متنبه اولمیوب بر برلریله محاربه یه قالقشدیلر و ( ۱۴۰۹ م و ۸۱۳ هـ ) تاریخنده یاپدقلری محارباتک برنده احمد جلایری اعدام اولندی . ( بایزید ) کله سنه دخی نظر بیوریله .

§

﴿ احمد بن طولون ﴾ — ملوک مصریه دندر . مرقوم طولون ترکستانده او یغور قبیله سنندن اولدیغی حالده هجرتک ایکیز تاریخنده بخارا و الیسی ( نوح بن اسد ) طرفندن کوله اولمق اوزره خلیفه ( مأمون ) ه اهدا اولندی و اوغلی اشبو احمد سامرا ده بر ترکی جاریه دن دنیا یه کلوب ( ۸۶۹ م و ۲۵۶ هـ ) تاریخنده خلیفه مهندی طرفندن مصر و الیسی اولان

(ماجور) ه داماد اولدی و مصرده متسلم ایکن قاشن پدری وفات ایتدیکی کبی سوریه یی دخی جلیله مصرده استقلالنی اعلان ایلدی و نامنه خطبه اوقوتدی و حضرت معاویه نك اوزرینه قوجامان برقبه یاپدیرتدی و طرسوس و جاو حص و حلب و حران بلادینی حرباً آلدی و استانبول ایمراطوری (۸۸۳ م و ۲۷۰ ه) تاریخنده یوز بیک عسکر کوندروب طرسوسی استردادده چالشیدسهده ممکن اولهمدی و بالعکس مغلوب و برقاچ جنرالی مقتول اولدیغی حالده عسکرینک انجق اونده اوچی تخلیص کریمانه ایده ییلدی احمد بن طولونک اخلافی یکریمی اوچ سنه استقلالنی محافظه ایده بیلش و عاقبت ینه مرکز خلافتی طانیغه مجبور اولشدر.

§

﴿ احمد آبان ﴾ — متجربیدن برذاتدر و اصلی اندلسلیدر یوز جلدی جامع بر لغت کتابی یازدی و کتاب (سیوییه) اوزرینه بر مکمل شرح قله آلدی و (۹۹۲ م و ۳۸۲ ه) تاریخنده وفات ایلدی.

§

﴿ احمد آباد ﴾ — هندستانده یتمش طول شرقی ایله یکریمی اوچ عرض شمالیده و بومبای ولایتی داخلمنده برشهردر. بو شهر مقدما پک معمور و تجارتگاه ایکن انکلیرزه کچدکنصکره خراب اولدی و برقاچ یوز بیک نفوسی یوز اوتوز بیک راده سنه ایندی. شهر مذکور (۱۴۲۶ م و ۸۳۰ ه) تاریخنده مغول حکمدار لرندن احمد نظام زماننده انشا اولمش و مشار ایله و اولاد و احفادی اوراده در تیوز سنه حکومت سورمشدر.

§

﴿ احمد بن ابراهیم ﴾ — حکمای عربنددر و مسقط رأسی اندلس کئیده سی (ابن الخرار المقتول) در بونک علوم حکمیه و طبیه ده پک چوق مهارتی وار ایدی. (الاعتماد فی الادویه المفرده) و (البعیثه فی الادویه المركبه) و (رساله النوم والیقظه) و (زاد المسافر فی الطب) و (طب الفقر) و (نصایح الابرار) جمله تالیفاتنددر. و وفاتی (۱۰۰۹ م و ۴۰۰ ه) تاریخنده در.

§

﴿ احمد پاشا ﴾ كدك احمد پاشا — كدك كلمه سنه نظر بيوريلاه .

§

﴿ احمد پاشا ﴾ هرسك زاده -- عصر بايزيد خان ثاني وسليم خان ثانيه درت دفعه يدي ييل صدارت ايتش بر وزير ذيشاندر . سلطان محمد خان ثاني حضرتلري ( ۱۴۶۲ م و ۸۶۷ هـ ) تاريخنده نقص عهد ايدن بوسنه پرنسي تاؤديب وملكني ضبط ايتديكي صرده هرسك ولايتني دخي استيلا ايتش وهرسك پرنسي استغان ملكنه بردها مالك اوله ميه جغني اكلا ديغندن اوغلني برچوق هديه لرله خا كپاي شاهانه يه كوندروب ملكنك نصفني استرحام ايتش وذات شاهانه دخي مومي اليهك حال شيخوختنه حرمة اوغلني رهن كبي آليقويوب ملكنك نصفني اعاده واحسان بيورمشيدي اشته بوچوجق سراي همايونده خيلي زمان تريه اولدقدنصكره بالاستحقاق رتبه وزارت وصهرته نائل اولدي وهرسك زاده احمد پاشا ناميله شهرت بولوب آخر عمرينه قدر دولت عليه خدماتنده بولندي . وفاتي ( ۱۵۱۴ م و ۹۲۰ هـ ) تاريخنده در .

§

﴿ آخنف ﴾ بن قيس — فصحاي عربدن وسادات تابعيندندر هرنقدر زمان سعادتده شرف اسلامله مشرف اولديسه ده مدينه منوره يه كلوب مجلس نبويه بولنه مديغندن زمرة جليله اصحاب كرامه داخل اوله مامشدر . بو ذات بني تميم قبيله جسيمه سنك رئيسي وعراق واليرينك نديم خاصي ايدى غايت عاقل ومدبر وجسور اولدقدن بشغه سويلديكي سوزلر كاملا عقل وحكمته موافق ونصيحتي فوق الغايه مؤثر اولديغندن استديكي حالده باشنه يوزيك مسلح آدم جمع ايديه بيلورايدى . وفاتي ( ۶۸۶ م و ۶۷۷ هـ ) تاريخنده در .

§

﴿ اخائي ﴾ — ياخود ( اخايا ) — موره شبه جزيره سنك جهت شماليسنده اليوم ( آليس ) دنيلان سنجاغك مركزيدر . بوراسي وقيله بر جمهوريت ومقر اداره سي ( قورينتوس ) شهري ايكن ( ۱۴۶ م ) تاريخنده سائر موره ممالكيه برابر حرباً روما دولتنه ومؤخرأ ونديك وعثماني ويونان دولترينه انتقال ايلشدر .

§

﴿ اخاب ﴾ — ملوک اسرائیلیه دندر . ( ۶۷۸ خ ) تاریخنده

یعنی میلادک طقوز یوز اون التی سنه مقدمنده سامریه ده تختنه جلوس ایتدکدنصرکه ( صیدون ) ملکک قزی ( یزابلی ) بی تزوج وانک تشویقیله پتپرستلکی قبول ایدوب بر بعل هیکلی و بر معبد یایدردی و بو معبد کیدوب بعله پرستش ایتلرچون یهودیلری صیقشدردی و مدت سلطنتی اولان اون سکز یاخود یکرهی سنه ظرفنده پتپرستلکی منعه چالیشان پیغمبران عظام و صلحای امتدن بر چوق ذواتی اعدام ایتدردی لکن کندوسیده بر رفاه کوره مدی و سوریه لیلرک تعرض و هجومندن کوز آچه مدی و الک صکره اظهار ندامت و استغفار ایلدیسده اه اعلم قرین قبول اوله مدی و عاقبت بر محاربه ده قتل اولنوب کاپلر قانی یالادی .

( اخاب بن قولایا ) یهودا ملکی صدقیازماننده نبوت دعواسنه قالمش بر کاذبدر . بابل حکمداری بحت نصر بونی مأسوراً بابله کوندروب ملک صدقیایله برابر آتشد یاقدی .

§

﴿ آخاز ﴾ — یاخود ( آساز ) آساز کله سنه نظر یوریه

§

﴿ اختلاف منظر ﴾ — فن هیئنده اجرام سماویه رصداتنده راصدک مرکز ارضه بولندیغی فرض اولنمق قاعده عمومیه دن اولوب حالبوکه رصدات ارضک سطحنده اجرا اولندیغندن بر کوب بر کره مرکز ارضدن و بر کره ده سطح ارضدن رصد اولدیغنه کوره کوب مزبورک ارتفاعنده حاصل اولان اختلافه ( اختلاف منظر ) دیرلر و اختلاف منظر زاویه سنک مقدارینی بالحساب تعیین و تقدیر ایدرلر .

§

﴿ آخمار ﴾ — آسیاده وان کولنک ساحل شرقیسنده بر کوچک جزیره در و دروننده بر کوچک قلعه ایله ( ۶۵۳ م ) تاریخنده یاپلش بر مناستر واردر . اشبو مناستر ( ۱۱۱۳ م و ۵۰۷ هـ ) تاریخنده درت ارمنی پتریقندن برینه مقر انجاذ اولندی .

§

﴿ اُخُدود ﴾ — اصحاب اخدود نجرانده چيريلردن بر قومدر .

يوسف كله سنه نظر بيوريه .

§

﴿ اخسنه ﴾ — كرجستانده واردهانك شماله طوغرى اون بش

كيلومتر و ايلروسنده بر شهردر . بوراسى مقدا دولت عليه ممالكنده  
ايكن (۱۸۲۸ م و ۱۲۴۴ ه) تاريخنده قسم اعظمى روسيه دولته انتقال ايتدى .  
اخسنه نك اراضيسى طاغلق و محصولداردر و اهالييسى (لاز)  
( كرجى ) و ( اتراك ) دن عبارت اولهرق اوتوز بيك تخمين اولمقدهدر  
ودرونده درت بيك قدر خانه و ( اجديه ) نامنده بر كوزل جامع شريف  
وارددر . اخسنه نك اراضى متباقيه سى دنخى ( ۱۸۷۷ م و ۱۲۹۲ ه )  
تاريخنده قارص واردهان ايله برابر روسيه نك يد استيلاسنه دوشدى .

§

﴿ اخشيد ﴾ — تركستانده فرغانه حكمدار لرينه مخصوص بر عنواندر .

سوريه ورملة واليسى ( ابو بكر اخشيد ) ( ۹۳۵ م و ۳۲۴ ه ) تاريخنده  
مرکز خلافتى ضعيف كوره رك مصر و لايتنى دنخى قبضه تصرفه چكوره رك  
استقلالنى اعلان ايدوب و حكومته ( حكومت اخشيديه ) نامنى ويردى .  
بو حكومت اوتوز اوچ سنه دن زياده پايدار اوله مامشدر .

§

﴿ اخلاط ﴾ — وان ولايتنده و وان كولنك شمال غريسنده وارجيش

جوارنده بر شهردر . بوشهر شمى بيك خانه دن عبارت ايسهده مقدا  
پك بيوك و معمور و استانبول جسامتنده برپاى تخت مشهور ايدى . بوراسى  
( ۱۲۲۸ م و ۶۲۶ ه ) تاريخنده جلال الدين ويكرمى سنه صكره عز الدين  
معرفتريه تسخير اولنوب بر عصر صكره دولت عليه به انتقال ايلدى .  
اخلاطك صغونى زياده ايسهده الما و جوزكبي ميوه و محصولات سائره سى  
چوقدر و دروننده اولان سليمان خان تره سى مشهور زيارتگاهدر . اشبو  
سليمان خان حال حياتنده روضه مطهره به پك چوق خدمت ايتش ايدى .

§

﴿ اخلاق علائی ﴾ — تحصیل مکارم اخلاق ایچون حکمت عملیه نك  
اقسامنی مبین ترکیه یازلمش برکوزل کتابدر و مؤلفی ابن الخنائی دیمکله  
معروف (علی بن امرالله) در . مومی الیه بو کتابی شامده تألیف ایدوب  
مؤخرأ ( ۱۵۷۱ م و ۹۷۹ هـ ) تاریخنده ادر نه ده وفات ایلدی .

﴿ تاریخ تألیفی ﴾

لاجرم ختمه تاریخ انك  
اولدی اخلاق علائی احسن

- ( اخلاق الابرار والنجاه من الاشرار ) محمد الغزالی حضرتلر نك اثریدر .  
( اخلاق الاتقیاء وصفات الاصفیاء ) ( ۱۵۵۶ م و ۹۶۴ هـ ) تاریخنده وفات  
ایدن مظفر بن عثمان البر مکینک اثریدر .  
( اخلاق راغب ) ( ۱۱۰۶ م و ۵۰۰ هـ ) تاریخنده وفات ایدن ابو القاسم  
حسین الاصفها نینکدر .  
( لامع الاشراق ) شیخ جمال الدین اقسرای حضرتلر نك اثر برکزیده سیدر .  
( تمهذیب الاخلاق ) ابوعلی سینانك .  
( اخلاق فخرالدین ) ( ۱۲۰۹ م و ۶۰۶ هـ ) تاریخنده وفات ایدن شیخ محمد  
بن عمر الرازینک .  
( اخلاق ناصری ) ( ۱۲۷۳ م و ۶۷۲ هـ ) تاریخنده وفات ایدن علامه نصیر  
الدین طوسینک .  
( اخلاق عزیزیه ) — روضة الابرار صاحبی قره چلبی زاده شیخ الاسلام  
عبدالعزیز افندینک .

§

﴿ اخیلر ﴾ — طریق قوته سلوک و عقد اخوت ایدن بر زمره نك  
عنوانیدر . بونلر اناطولی ایچنده بولنورلر و صوفیلر مسلکنی الترام  
وحالترینی اجنیدن ستر ایدوب دائماً عبادات و طاعات و ابناى جنسته امداد

واعانات ایله مشغول اولورلر ایدی لکن صکره ایچلرینه قاریشان برطاقم  
غرضکار جهلا اشبو اخوت خالصه یی اتحاد سیاسییه تحویل واغراض  
نفسانیه لرینی اجرایه وسیله اتخاذ ایدوب وینلرنده مقرر اولان اشارات  
وعبارات ایله یکدیگرینی طایه رق چونالوب نهایت انقره و سیواس ولایاتی  
استیلا و برمدت طوائف ملوک کبی اولخالیده نفوذ لرینی اجرا ایلدیلر  
وبعضیلری دخی قونیه ده قرمان اوغلی جایه سنده بولندیلر ایسه ده سلطان  
مراد اول حضرتلرینک سطوت و جلادتنه طیانه میوب جله سی پریشان اولدیلر  
اخیلردن (حسام الدین انقروی) و طربزونده مدفون دباغیر شیخی (اخچ اورن)  
حضراتی کبی پک بیوک ذوات کلش ایدی . اشبو اخوت مقدا عربلرده  
دخی (فتیان) نامیله وار ایمش . (اخیولی) و (اخچ چلبی) و امشالی  
ناملر بولردن قالمه در .

§

﴿آدام﴾ — لسان عبرانیده ارض معنا سنه در و (اردن) نهری  
اوزرنده صرتان طرفنده برقصه اسمیدر . سرندیب جزیره سنده کی بیوک  
طاغه دخی (آدام) یاخود (آدم) دیرلر (آدم) کله سنه نظر بیوریه .

§

﴿ادرمید﴾ — بالیکسر سنجاخی داخلنده و بالیکسر شهرینک اون سکر  
ساعت جنوبنده و ایوالق کورفی دروننده برقصا مرکزیدر و ملحقاتی  
اولان (بالیه) و (اونیه) و (اورندی) و (ارمود اباد) و (کره سون)  
ناحیه لرندن ماعدا نفس ادرمید قصبه سنک نفوس ذکوری سکر بیک یدییوز  
تخمین اولتقده در و کر ادرمید بشقه اولوب بونده دخی یدی بیک نفوس  
ذکور واردر .

§

﴿ادرنه﴾ — روم ایلنده و استانبولک شمال غریسنده و یوز تیش یدی  
کیلومتر و بعدنده و مریح و آرده و طونجه نه رلرینک التقا ایلدیکی محلده تخمیناً  
یوز بیک نفوسی جامع بر شهر جسیدر و دروننده اولان سلطان (سلیم ثانی)  
و (سلطان بایزید ثانی) و سلطان (محمد ثانی) حضرتاتک جسیم جامعلری

وعالی پاشا بازاری واسکی سرای پک مشهور در ورومانوسلردن قلعه بعض آتقهلری واردز .

ادرنه یونانلر یندنه ایکن (اراسته) نامیله مشهور ایدی صکره (آدریان) نامنده بر ایمپراطور توسیع و تزین ایلدیکندن اکا نسبتله (آندرینوپل) تسمیه اولندی . بورانک فاتحی (۱۳۶۱ م و ۷۶۳ ه) تاریخنده سلطان مراد اول حضرتلری طرفندن مأمور اولان غازی (لالا شاهین پاشا) حضرتلریدر بوذات اردوسیه ادرنه جوارینه کلوب درون قلعه دن اوزون اوزادی مقاومت اولنه جغنی حس ایلدیکندن حیله ایله ضبط طرفنی ترجیح ایتدی . ومومی الیهک تدبیریه (حاجی ایل بک) آکسزین اردودن قاچوب ادرنه حصاری التندن پادشاهه کوجنوب فرار والتجا ایلدیکنی سویلدی وبوصورتله ایچرو کیروب وکندوسنی ایناندریوب برطرفک محافظه سنی درعهده ایلدی . ومومی الیهه تقلیداً دهها برچوق فراری کلوب ایچرو قبول اولندیغندن ایچروده بیاغی برفرقه عسکر طویلاندی وبرکون علی الصباح حصار قیورینی آچیورملریله عساکر عثمانیه ایچرو کیروب رایات عثمانیه یی برجلره رکز ایلدی . ویدی سنه صکره پای تحت عثمانی بروسه دن صکره موقتاً پای تحت اتخاذا اولنمش اولان دیمتوقه دن ادرنه یه نقل اولندی و (۱۸۲۹ م و ۱۲۴۵ ه) و (۱۸۷۸ م و ۱۲۹۵ ه) تاریخلرنده روسیه بلا محاربه کیروب حسب المعاهده ینه چیقدی و (۱۸۷۸ م و ۱۲۹۵ ه) استیلاسی عقیننده بعض ملحقاتی مختاریت وجهله اداره سی تقرر و تشکل ایند روم ایلی شرقی ولایتنه ویرلدی .

ادرنه ده جماعتی کثیر برجامعک اسمی (اهمال پاشا) وجوارنده صوی مبذول برچشمه نك اسمی (قوری چشمه) در و فاتح ادرنه لالا شاهین پاشانک برکنسارده قالان تر به سی تعمیره محتاجدر جوامع ومدارس وتکایا ومکاتب وسائر سی جمله نك معلومی اولدیغیچون تفصیل اولنماشدر .

§

﴿ آدر و ماتوم ﴾ — افریقاده تونس ولایتی داخلنده واسکی (قرتاجنه) نك جهت جنوبیسنده ویوز اوتوز کیلومتر و بعدنده برشهردر . بوشهری وقتیه لیلر یاپدرمش ونیمجه زمان صکره خراب اولدیغیسندن یرینه (حماهه)



یاخود (سوسا) شهری بنا اولمشدر . (۵۵۴۷ خ) تاریخنده یعنی میلادک قرق یدی سنه مقدمنده روما قیصری بولنسان ذات افریقایی کاملاً تحت انقیاده آلمق ایچون بوشهره کلوب محارباته باشلامشیدی .

§

﴿ ادریس ﴾ علیه السلام — پیغمبران عظامدندر وسریانجه اسم عالیری (اخنوخ) در (۱۱۲۲ خ) تاریخنده یعنی میلادک درت بیک درتیوز یتیمش ایکی سنه مقدمنده شیت علیه السلام سلاسه سندن دنیایه کلوب اوچیوز قرق بش سنه صکره (ورفعناه مکانا علیاً) نص جلیلی اوزره رفع بیورلدی . مشارالیه حضرتلری نبوت و حکمت و خلافتی جمع بیوردقلرنندن (مثلت النعمه) عنواننی آلمش و کندورینه شرف نازل اولان اوتوز صحفده اسرار سماویه و تسخیر روحانیات و طبایع اشیا مندرج اولدیغی کبی علم کتابت و حساب و رمل و اسرار نباتاتک تحقیقنه کافی اشارات دخی موجود اولدیغندن اورادن بالاستخراج معلم اول شرفنه نائل اولمشدر . ابتدا امرا و علما و رعایای تقربق و وظیفه لرینی تعیین و یاپدیردیغی قرا و قصاباتده اسکان ایدن و اولاد قابلك نفاق و فسادینه قارشو غزایه مأمور اولان بودر و رفع لرند نصکره مخدوم مکرم لری (متوشلخ) یاخود (متوشلخ) خلیفه اولمشدر .

§

﴿ ادریس العلوی ﴾ — عباسیلرک امویلره غلبه سی ائناده بوذات دخی طرابلس و تونس طرفلرینه و اورادن برچوق مشقتله فاس دیارینه فرار ایدوب اورا اهللسنک مظهر حسن قبولی اولدی و ازوقت ایچنده یعنی (۷۸۸ م و ۱۷۲ ه) تاریخنده (ادارسه) نامیله برحکومت تشکیل ایلدی و هرتقدر کربندوسی خلیفه منصورک غدربله مسوما وفات ایتدیسه ده اهالی حکومتی اوغلندن بشقه سنه ویرمدی و اخلافی اوچیوز اون طقوز سنه پایدار اولدی .

§

﴿ ادریس بدلیسی ﴾ یاخود (تبلیسی) — رجال اعجمدندر . بوذات رجال ایرانده آق قیونلی حکومتنده موقع اولدیغی حالده شاه اسماعیل فتنه سنده

اورادن صاوشوب دولت عليه التبا ایلدی و مسلم اولان فضل و کالنه  
 بناء نزد سلطان (سليم) خانیده پک بيوک بر موقع طوتدی و ايران حايه سنده  
 اولان قبائل اکراد و اعجمای جلب و تألیفه مأمور اولدیغندن کیدوب  
 اکثریسی اکراددن یکرهی بش قدر قبائل جسمه یی دولت عليه حايه سنه  
 آلدی و سلطان بايزید خان ثانی حضرتلر ننگ امریله (هشت بهشت) نامنده  
 بر تاریخ عثمانی و مذهب روافضی رد ضمنده بر کوزل کتاب تألیف ایلدی.  
 ایوب انصاری جوارنده کی ادریس کوشکی و چشمه بونک و اوراده کی مسجد  
 زوجه سی زینب خاتون کدر و وفاتی (۱۵۱۵ م و ۹۲۱ هـ) تاریخنده در.

§

﴿ ادریس مختفی ﴾ استانبولی — طریقت علیه بیرامیه رجالندن  
 بر بیوک ذاتدر. در سعادتده چهارشنبه بازار ی جوارنده واقع قوناغنده  
 ارشاد عبادله مشغول اولور و هر صنف بای و کدا ایچون قپوسنی آچیق  
 بولندیرر ایدی بو ذاتک فوق العاده شهرتی اولدیغی حالده درویشلری  
 و قومشوری بینده اسمی (علی بک) و خار جده (شیخ ادریس) اولدیغندن  
 چوق کسه لر ایکسی بر ذات اولدیغی بیله مزلر و بعضیلری سوء حالندن  
 بحث ایدوب بعضیلری کال و کراماتی سویلرلر ایدی حتی بر طاقم کندیلرینی  
 بیلزلر (شیخ ادریس بر او یغونسز آدم ایش و بر چوق مسلمانلری اضلال  
 ایده یور ایش) دید کلرینه و جامعلرده کرسی شیخلری عن جهل  
 مذمت ایتدیکنه بناء جانب مشیختدن خفی و جلی تحریننه قیام اولندیسه ده  
 شیخ ادریس نامنک صاحبی بولتی ممکن اوله مدی. مشار الیهک  
 قوناغنده قرق التی سنه دنبرو کیجه کونوز الی التمش نفر مرید وزوار  
 موجود اولدیغی و قپوسی هر کس ایچون آچیق بولندیغی حالده نااهل لردن  
 شو صورتله اختفاسی پک بیوک کرامتدر و قطب الزمان اولدیغنده شبهه یوقدر  
 خواص اصحابی قرق چشمه ده پشمالجیلر خانی دروننده طوقوی بیلقی ایله مشغول  
 و متعیش اولورلر ایدی بعض کتب صوفیه ده محرر اولان (خواجه علی  
 الرومی الخیاط) دخی بو ذاتدر و وفاتی (۱۶۱۵ م و ۱۰۲۶ هـ) تاریخنده و قبری  
 قاسم پاشا اوزرنده در.

§

﴿ ادريانی ﴾ — انكلتره اطه سنك جهت شماليسنده برجسيم  
قلعه در . بوقلعه يي انكلتره قرالردن ( اديسان ) انشا ايتيردي وجسيم  
ديوار لرله بربرينه مربوط يكرمي اوچ عدد قله و متعدد طابيه لر ياپيردي .

§

﴿ ادريانيك ﴾ — بحرسفيدده واقع ونديك كور فزنيك نام ديكريدر  
وبونام ايتالياده ( پو ) نهري منصبنده واقع مشهور ( آدريا ) شهر شهرينه  
نسبتله تسميه اولمشدر .

§

﴿ ادفو ﴾ — صعيد مصرده ونيك جانب يسارنده وايكي ميل بعدنده  
برشردر وشمدي نفوسي ايكي بيك راده سنده در . بوراده پك چوق اثار  
عتيقه بولنور و بطليوسك فرعونلر زماننده كي بنالرسمنده ياپديغي ايكي  
عدد جسيم بنا كورينور بوبنارك بيوكي اوچ قات اولوب هر قاتك پنجه لر ي  
آر سنده قبارتمه معبود وقهرمان شكلري واردر وزمندن سقفته قدر  
داخله طوغري مائل اولديغندن سقفتك وسعتي الت قاتك وسعتندن  
نقصاندر . وقتيله بوراده علمای اسلاميه دن خيلي ذوات پتشدی  
و ( ابوبكر الادفوی ) دخي انلردن بری ایدی .

§

﴿ آدم ﴾ عليه السلام — ابنای بشرك برنجی پدري ونشئه  
عنصريه ده انبياء كرام عليهم الصلوة والسلام حضراتك اقدميدر .  
جناب خالق لايزال حضرت آدمي روي ارضده يدقدرتيله بالچقندن خلق  
وايجاد و جنت اعلايه ادخال بيوردقندن صكره ظاهرده صادر اولان زله يه  
و حقيقتده نوع بني بشرك ظهوري حكمت بالغه سنه مبنی دنيايه چيقاردی  
و حضرت مشاراليه هند شريفده برمدت نعم جنانندن دور و حضور  
حضرتدن مهجور اولديغچيون بكا وتضرع له امرار وقت ايدوب علي  
روايه يوزسنه صكره مكه مكرمه اراضيسنه كلدی و امر الهي ايله كعبه  
مكرمه يي ياپوب تعليم ملائكه ايله طوافه باشلادی و جنت اعلايه رفيقه سي

اولان حضرت ( حوا ) بی مزدلفه نام محله بولهرق مسرور اولدی  
 و براز مدت صکره عهدومیشاق وقوعبولدی و حرف هیجا و اسرار اسماء  
 و سایر معارف آئینه بی جامع اون عدد صحف جلیله احسان بیورلدی .  
 حضرت آدم علیه السلام طقوز یوز اوتوز سنه دن عبارت اولان مدت  
 حیاتنده حضرت حوادن بری قز دیکری ارکک و توأم اولمق اوزره قرق نفر  
 اولادی دنیایه کلش و اولاد و احفاد و احفاد احفادی قرق بیکه بالغ اولمش  
 و هابل و قابل و قعه مکروهه سنی کور مشدر .  
 حضرت آدمک قبری میناده مسجد الحنیفه یا خود جبل ابی قیسیده بر مغاره  
 دروننده در .

خلقت ادم ایله میلاد عیسی علیهما السلام بیننده کچن زمان حقتده روایتلر  
 یک چوق اولوب بعضیلرینک قوی ( تاریخ ) کله سنده کوسترلدیسه ده  
 صحیح نظریله باقیله من زیرا هیچ بریسی برسند قوی یه مستند د کادر .  
 ( هابل و قابل ) کله لرینه دخی مراجعت بیوریله .  
 نوع بنی ادمک اصلی ( ایلض ) و ( اصفر ) و ( اسود ) یعنی ( قوقاس )  
 و ( مغولی ) و ( زنجی ) ناملریله اوچه تقسیم اولندیغی حالده نوعلری زیرده  
 کورلدیکی اوزره اولمق لازم کلور .

قوقاسی	}	هند - اورویا جنسی	۱
		عرب نسلی	۱
		قدیم اسپانیا لورک نسلی	۱
		فنیانلرک نسلی	۱
مغولی	}	مجار نسلی	۱
		تاتار نسلی	۱
		چینلورک نسلی	۱
		ملزلی	۱
ذنجی	}	آمریقانلورک قسم اعظمی	۱
		کافرستان اهلینک نسلی	۱
		سودان نسلی	۱
		هوتانتو نسلی	۱
		حبش نسلی	۱
		اوقیانوس اطدرینک اهلینک	۱

تخمینات اخیرہ اوزرہ قطعات جسہ دہ موجود اولان نوع بنی ادم

اسلام	۲۳۰,۰۰۰,۰۰۰
اور تودوقس	۰۸۰,۰۰۰,۰۰۰
قتولک	۲۰۰,۰۰۰,۰۰۰
پروتستان	۰۶۰,۰۰۰,۰۰۰
موسوی	۰۰۴,۰۰۰,۰۰۰
بودا	۳۶۰,۰۰۰,۰۰۰
براہمہ	۰۰۸,۰۰۰,۰۰۰
پت پرست مجوسی وسائرہ	۱۶۰,۰۰۰,۰۰۰
	<hr/>
	۱۱۰۲۰,۰۰۰,۰۰۰

§

﴿ آدم ﴾ یا خود (آدم) — سرندیب اطہ سندنہ اوچ بیک اوچیوز  
 او تو زیش مترو ارتقا عنده بر طاغدر بو طاغدن این اوچ نهر بتون اطہ یی  
 اسقا ایتمکده در . زروہ سنہ تعلیق اولنان بر زنجیر واسطہ سیلہ  
 چیقیلور ویوقاروسندہ بر بولک انسان ایغی ایزی کوریلور بوکارلور  
 آسیای شرقی معبودی (بودا) نک وخرستیانلر حضرت ادمک ایغی ایزی  
 دیرلر ویک چوق ہندلیلر کلور زیارت ایدرلر .  
 اشبو سرندیب اطہ سی جوارندہ واقع (ماتار) جزیرہ صغیرہ سیلہ (میسارام)  
 اطہ سی بیندہ اولان طاش بیغنتیسی بر ممر حاصل ایش اولدیغندن بومردخی  
 حضرت آدم کو پریمی نامیلہ مشہوردر .

§

﴿ ادوارس ﴾ — انکلترہ قرالرنندرنر .

فرانسہ قرالی شارل بلاولد وفات ایلدیکندن یرینہ قرابتی مناسبتیلہ کندو  
 انتخابی اشبو اوچنجی ادوارس مأمول ایدرکن دیگر اقباسندن دردنچی  
 فلیب نامندہ برینک انتخاب وتعیین اولندیغنی خبر الدیغنی کبی دعوا یہ مباشرت  
 وبوبابدہ فرانسہ سناتوسنی اقتناع ایدہ مدیکندن (۱۳۳۸ م و ۱۸۳۹ ه)  
 تار یخندہ وسائط جبریہ یہ مراجعت ایدوب مشہور یوزسنہ محاربتہ سنی  
 آچدی . اشبو یوزسنہ ظرفندہ نوبت نوبت وقوعبولان محاربتاندہ بر قاج  
 ملیون آدم تلف اولمش والکصرکہ فرانسزلر حال پریشانی وسفالتہ دوچار  
 اولہرق حق یرینی بولشیلر .

﴿ آدوم ﴾ — اسحق عليه السلام اوغلی (عیص) یا خود (عیسو) ننگ لیبیدر . آدوم لسان عبرانیده قرزنی معناسنه اولدیغندن بواسم بعضاً اراضی و جباله دخی و یریلور و بناء علیه (آدومیون) ک یعنی مر قوم عیص اولادینک ارض کنعانده جبل سعیرده ساکن اولدقلری محله دخی (آدوم) دینور ایدی . (سدوم) کله سنه دخی مراجعت یور یله .

§

﴿ ادهالی ﴾ — اعزه کرامنددر . سردفتر سلاطین عثمانیان سلطان (عثمان غازی خان) حضرتلری بو ذات عالیقدرک کریمه محترمه سی مالی خاتونی تزوج ایدوب پک چوق دعاسنی آلدی و بیله جک قضاسنک محصولات عشریه سنی مشارالیه ایله مخدومنه و زوجه سنه تخصیص یوردی . (ادهالی) افندینک مسقطرأسی (قرمان) مدت عمری (۱۲۵) سنه تاریخ وفاتی (۱۳۲۵ م و ۷۲۶ هـ) در .

§

﴿ آده سا ﴾ — سلانیک ولایتی داخلنده واقع (وودینه) قصبه سنک نام عتیقیدر بوراسی مقدا ما کیدونیا قرالرینه پای تحت دخی اولمشیدی .

§

﴿ آده لاید ﴾ — فلنک جدید جزیره جسمه سنک منقسم اولدیغی درت ولایت وسیعه دن برینک مرکز اداره سی اولان شهرک اسمیدر . بوشهر فوق الغایه معموریتدن کنایه اوله رق (فلنک جدید لوندیره سی) نامیله مشهوردر .

§

﴿ آراتو ستم ﴾ — قدما ی جغرافیوندندر ابتدا سطح ارضک بدرجه سنی اولچوب کره ارضی بهری یوز سکسان مترو اولوق اوزره ایکیوز الی ایکی بیک طول بولان ومدار شمسک یکرمی اوچ درجه ایله الی بردقیقه انحرافی کشف ایدن و فن جغرافیه بی تدریس ایچون برخریطة عمومی بیان و رصدخانه تأسیس و کره مصنعه بی ایجاد ایلان بودر . بونک علوم ریاضیه وهیئت و حساب و سائر ده مهارت فوق العاده سی اولدیغی کبی علم انشا و شعرده دخی ید طولاسی وار ایدی لکن زماننده قدری بیلنه مدیکندن

عمری ضرورتاً پکدی و آخر عمر نده کوزلرینه عمارتاری اولدی ونهایت  
(۵۳۱۸ خ) تاریخنده یعنی میلادک ایکیوزیتیش التی سنه مقدمنده سکسان  
ایکی یاشنده اولدیغی حالده آجملقدن وفات ایلدی .

§

﴿ اراج ﴾ — قسطمونی ولایتنده بر قضا مرکزیدر و صرت و مرکوزه  
ناحیه لری ملحقاتندندر و اورمانلق ایکی طاغ آره سنده اولوب هر هفته بازار  
قورلمقده در .

§

﴿ آرات ﴾ — روان شهرینک التمش بش کیلومتر و جنوب غریبسنده  
ودرت بیک مترو ارتفاعنده بر طاغک اسمیدر بو نامک ملوک ارامنه دن  
(آرام) ک اوغلی (ارا) یه نسبتله تسمیه اولندیغی بعض توارینخده  
کورلمشدر . خرسیتیانلر طوفانده نوح علیه السلامک سفینه سی اشبو طاغک  
اوزرینه ایندی اعتقاد ایدرلر و جوار اهلایسی آغری طاغ دیرلر زروه سنده  
دائم قار موجود وولقان اغزلی مشهوددر قرآن کریمده ذکر اولندیغی وجهله  
نوح سفینه سنک مستقری جبل جودی اولوب بوایسه دیار بکر ایله موصل  
بیننده تمتد بر طاغدر

§

﴿ آراغوز ﴾ — اسپانیاده یکی قستل ایله (ناوارا) نک جهت غریبسنده  
(قتالونیا) نک جانب شرقیسنده و اسپانیادولتی اداره سنده برولاتیک اسمیدر .  
بوراسی وقتیه پک چوق اللره پکدیکی کبی (۱۰۳۵ م و ۴۲۷ ه) تاریخندن  
(۱۲۷۶ م) تاریخنده قدر دخیریلی حکمدار لر معرفتیه اداره اولنوب (۱۵۱۶ م  
و ۹۲۲ ه) تاریخنده بتون اسپانیاه قرال اولان (شار لکن) ک ید ضبطنه  
پکدی . بو ولایتده اولان اوچ سنجاغک بری مشهور سرقسطه درکه  
اهالیسی غیور و ایشکدار اولدقاری حالده کبر و عظمتدن یانلرینه وارلمز .

§

﴿ اراقوسیا ﴾ — اسپاده واقع سجستان قطعه سنک نام یونانیسیدر .  
سجستان کله سنه نظر بیوریه .

§

﴿ ارام ﴾ — ممالك ارميه حكمدار لرندندر و ( اراميان )  
 سلاله حكمرانيسك برنجيسيدر بوندن اولكى حكمداران ( حايق )  
 سلاله سندن ايدى . بوذات تخميناً ( ۳۷۵۰ خ ) تاريخنده يعنى ميلادك  
 يك سكر يوز قرق درت سنه مقدمنده نائل سلطنت اولوب ملكنى  
 قاقاسيه دن طوروس طاغنه قدر توسيع ايلمش و اخلافى شمالاً كرجستان  
 و ايمره لى و شرقاً كردستان و اذربايجان و جنوباً الجزيره و غرباً اناطولى  
 حدودلرینه قدر ايلرولمش ايسه ده صكره لرى ممالك و سيعه مذكوره پك  
 چوق تبدلاته اوغرامشدر شويله كه ( ۴۷۵۰ خ ) تاريخنده يعنى ميلادك  
 سكر يوز قرق درت سنه مقدمنده آثور حكمدارى ( سميراميس ) ك يد  
 ضبطنه و مؤخرأ بر قاچ دفعه ايران و سلوسيد و روما دولترى اداره  
 و جايه سنه كيروب ( ۵۴۰۰ خ ) تاريخنده يعنى ميلادك يوز سكران طقوز  
 سنه مقدمنده ايكي ولايته منقسم اولدى و هربرى ينه ايران و روما و يونت  
 و يونان دولترى اداره و جايه لرنده نو بت نو بت دوران ايدوب بعضاً دخى  
 استقلال بولديسه ده ( ۱۳۷۳ م و ۷۵۵ هـ ) تاريخنده تانارلك هجوم  
 و استيلاسى دوامنه مساعده اتمدى واك صكره بو مملكتلك بر چوغى  
 ايران و روسيه دولترينه و برازى دخى سلجوقيله انتقال ايدوب اندن  
 بعضيسى دولت عثمانيه يه چكىدى .

§

﴿ اربا كسس ﴾ — ياخود ( ارباس ) — بوذات برنجى آثور  
 دولتى طرفندن صدر ابلق و جهله ( مديا ) واليسى ايكن ( ۴۸۰۶ خ )  
 تاريخنده يعنى ميلادك يديوز سكران سكر سنه مقدمنده دولت مشار اليها  
 جايه سنده اولان بابل و اليسى ياخود باش پاپاسى ( بيله زيس ) ايله متبوعلى  
 عليهنه اتفاق وولى نعمتلى اولان ( ساردا ناپال ) ي نينوده مغلوب و پریشان  
 و برنجى آثور دولتنى محو و بى نشان ايتديلر و ممالك آثور يه يى بينلرنده  
 تقسيم ايدرك بو عصيانده مشترك اولان سائر حكامه دخى برر پارچه ير  
 وريدلر . ديكر روايته كوره بو وقعه ( ۴۸۳۵ خ ) تاريخنده وقوعبولمشدر .

§

﴿ اربيل ﴾ — موصلك جنوب شرقيسنده و سكران بش كيلومترو



بعنده بر شهر در اهالیسی اکثری کرد اولق اوزره درت بیک تخمین اولمخده در . اسکندر رومی عجم شاهی دارایی (۵۲۶۳ خ) تاریخنده یعنی میلادک اوچوز او توز بر سنه مقدمنده بوراده مغلوب و پریشان ایتدی و مشارالیهک بو غلبه سی مبدأ تاریخ اعتبار اولندی.

§

﴿ ارتاقساد ﴾ — ( اردیش ) شهرینک نام عتیقیدر . بوراسی بر مدت ملوک ارمنیه نک پای تختی ایدی .

§

﴿ ارتسام ﴾ — علم هندسه ده بر نقطه دن بر مستوی اوزرینه تنزیل اولنان عمودک مذکور مستوی اوزرنده واقع اولان نقطه سنه اول نقطه نک ( مرسمی ) و بر خطدن مستوی معلومه عمود اوله رق مرور ایتدیریلان دیگر بر مستوینک مستوی معلومی قطع ایتدیکی فصل مشترک خطنه دخی خط مز بورک ( مرسمی ) و مستوی عموده ( راسمی ) و مستوی معلومه ( ارتسامی ) تعبیر اولنور هندسیه رسمیه ده اجسامک بر برینه عمود اولق اوزره بولنان ارتسام مستویلرنده ترسیم اولنان ( مرسم عمودی ) و ( مرسم افقی ) سی واسطه سیله دعاوی و مسائل حل اولنور . هیئت و جغرافیا فنلرنده دخی کره ارض ایله کره سماک مسطحاً اراءه سنه مخصوص اولان قاعده یه ارتسام اصولی دنیلور .

§

﴿ آرتق ﴾ — ( ایلغازی ) کله سنه نظر بیوریه .

§

﴿ ارتماقیق ﴾ — لاتینجه علم حساب دیمکدر .

§

﴿ ارجیش ﴾ — نفس وان سنجاغنه تابع بر قضا مرکزیدر و ( ارارات ) طاغنگ اتکنده و وان کولنک ساحل شمالیسنده اولدیغندن بر مهم و معنا نقطه در . بوراسنی حیب مسله الفهری حضرتلری ( ۶۶۵ م و ۲۵ ه ) تاریخنده فتح ایتدی و ( ۹۹۲ م و ۳۸۲ ه ) تاریخنده ملک الروم طرفندن محاصره اولندی و سلطان محمد سلجوقی

زماننده ودها صکره لری بر قاج دفعه غارت ایدلدی . ارجیش جوارنده  
اولان ارجیش طاغی ( انتی طوروس ) طاغنگ برشعه سیدر وقضاسنده  
یوز یدی قریه واردر .

§

﴿ آرخون ﴾ — اته حکومتی خیلی زمان ادارهیه مأمورا اولان  
هیئت حاکمه نك عنوانیدر . اشبو آرخونلق مسندی ( ۴۵۲۶ خ )  
تاریخنده یعنی میلادك يك التمش سنکز سنه مقدمنده اته قرالی فداکار  
( قودروس ) ك اوغلی ( مدون ) ه پدینك خاطر یچون مکافاة اولق اوزره  
ایجاد ودائی صورتله و قید جیة شرطیله اعطا اولتمش و مرقوم و اخلاقی  
اوپوز اون درت سنه قدر مستقل بالرأی اوله رق اداره ایدوب اندن  
صکره حکومت مذکورہ بر مدت اون سنه ده بر و بر مدت هر سنه تبدل ایدر  
ارخونلردن مرکب هیئت معرفتلیله اداره قلمشدر . اشبو آرخونلر  
رأیلرنده سربست اولدق لری حالده مناصب مهمه یه مأمور تعییننده و حرب  
و صلح و تنظیم قوانین و موازنه اموال خزینه خصوصاً تنده آرای اهالی یه  
مراجعه مجبور ایدیلر .

§

﴿ ارداشنس ﴾ — ملوک ارمنیه نك نامدار لرندندر . بونك زماننده  
دولت ارمنه برنجی دولتلر صره سنه کچوب فرس دولتی ایکنجی درجه یه  
ایتمش و ممالک ارمنیه اولکینک بر قاج مثلن توسع ایلشدر . مومی الیهک  
ارمنستانده کی پای تختندن بشقه ایرانده دخی بر پای تختی وار ایدی .

§

﴿ اردب ﴾ — بر نوع مصر کیله سیدر لکن مقدار استیعابی  
هر یرده مساوی دکلدر اسکندریه ده اکیوز یتش ایکی وقاهره ده  
یوز یتش طقوز ورشیدده اکیوز سکسان التی لتره یه بر اردب دیرلر .  
لتره بر عشر مترو مکعبدن عبارتدر . ویکرمی درت صاع والتی و یسه  
دخی بر اردب صاییلور . درت کیله بر ویه اولور .

§

﴿ اردبیل ﴾ — ایران ممالکنندن اولان اذربایجان ولایتنده

و تبریزك جهت شرقیسنده و یوز التمش درت کیلو مترو بعدنده برشهردر .  
 بو شهرك ایچ قلعه سی مقدا فرانسزلر معرفتیه یاپلمش و ( ۱۷۲۷ م و ۱۱۴۰ هـ )  
 تاریخنده دولت علیه طرفندن ضبط وینه اعاده اولمشیدی .

• شیخ صفی الدین اردبیلی حضرتلرینك قبری بوراده در .

§

﴿ اردشیر ﴾ اول — فرس حکمدارلرینك کیانیان طبقه سندندر .  
 بوذات ( ۵۱۲۹ خ ) تاریخنده یعنی میلادك درتیوز التمش بش سنه مقدمنده  
 تخته جلوس ایتدیکی کبی پدری برنجی سرخسك قاتلی ظنیه ایکی برادرینی  
 و عیسی قتل ایتدیروب بلا مزاحم امور سلطنتی اداره به باشلادی و مؤخرأ  
 پدرینك قاتلی کندو ندیمی اولان خادم اغاسی ایدومی تحقق ایلدیکندن انی  
 دخی قرنداشلرینك ارقه سی صره کونوردی و مقدا مقدس شریفدن نفی  
 اولنوب بابلده قالان یهودیلری اطلاق و حضرت ( عزیر ) علیه السلام  
 ایله مملکتلرینه اعاده ایلدی . و یونانستانده اعدامنه حکم لاحق اولدیغی  
 جهتله مقدا ایرانه فرار و التجا ایدن قهرمان مشهور ( دیمستوقلی ) بی  
 حضورینه چاغیروب یونان اوزرینه کوندره چکی اردویه سرعسکر تعیین  
 ایده چکنی افاده ایلدکده مرقوم دیمستوقلی ایرانلردن کوردیکی بونجه لطف  
 و جایه یه قازشو بو قدر جق بر تکلیفك ردینی مناسب کورمدیکی کبی کندو  
 وطنداشلری علیه نه قیامی دخی حوصله سنه صیغدییره مدیغندن کندوسنی  
 اعدام ایتدی و ( ۵۱۴۵ خ ) تاریخنده یعنی میلادك درتیوز قرق طقوز  
 سنه مقدمنده آتله لوله مغلوب اولوب فرس سفاین حر به سنك یونان  
 دکزینه چیقه مامسی و ایرانلرک قره دن سوا حله نهایت بر ساعت مسافه یه  
 قدر ایله بیلمسی کبی آغر بر معاهده بی امضالیوب مشهور ( مدیق ) محاربه  
 مدیده سنه نهایت ویردی . اردشیرك سلطنتی تمام قرق سنه در ووفاتنده  
 یرینه کوچك اوغلی ایکنجی ( دارا ) جلوس ایلشدر . اوروپا لیلر  
 بوکا ( ارتکسرس ) دیرلر .

§

﴿ اردشیر ﴾ ثانی — فرس حکمدارلرینك کیانیان طبقه سندندر .  
 بوذات ( ۵۱۸۹ خ ) تاریخنده یعنی میلادك درتیوز بش سنه مقدمنده وفات

ایدن پدري ايكنجى دارانك يرينه جلوس ايلدى و كوچك قرنداشى ( كينسرو ) اناطولى واليسى اولديغى حالده سلطنت دعواسنه دوشهرك تاريخ مذكور دن اوچ سنه صكره ( سارد ) ده جمع ايتديكى يوز بيك عسكر ايله قرنداشنىك اوزرينه يورديسه ده بابلده ويرديكى بوزغونلقدن بشقه اينه برشى چكىدى و حين رجعتده طوتيلوب اعدام اولدى و ذكر اولنان يوز بيك عسكرى اچنده اولان يونانلردن انجق اون بيك نفرى قورتيلوب يونانستانه كله بيلدى .

اشبو اون بيك نفرى يكرى آيده نه درلو فلاكتره اوغرايه رق عودت ايتديكى تواريخ يونانيه ده مفصلاً مذكوردر .

اردشير قرق التى سنه سلطنت سورديسه ده آخر عمرنده يتشمش براوغلى قتل ايتديريكندن وديكر اوغلى خائن ( اوخوس ) دخى سلطنت كندوسنه قالمق اچون ايكى قرنداشنىك جانه قيدىغدن بچاره اختيار اوچ اولادىنىك آجيسنه تحمل ايدهميوب ( ۵۲۳۵ خ ) تاريخنده يعنى ميلادىك اوچيوز اللى طقوزسنه مقدمنده وفات ايلدى ويرينه خائن مرقوم چكىدى . اردشيرىك لقبى ( بابل ) ايدى .

§

﴿ اردشير ﴾ — فرس حكمدارلرينىك دردنجى طبقه سنى تشكيل ايدن ملوك ساسانيه نىك برنجيسيدر . بوذات ملوك فرس جاياه سنده مختاريت وجهله اداره اولنان ( اسطخر ) ولايته تابع ( دارابگرد ) سنجاغى امراسندن ( ساسان ) نامنده بر بهادرك اوغلى ايكن پدرينىك وفاتى عقبنده باشنه طوپلانان عساكر كثره ايله ميدانه چيقوب ممالك ايرانيه نىك ايالات جنوبيه سنى استيلا و ( ۲۳۰ م ياخود ۲۲۸ م ) تاريخنده دولت ساسانيه يى تشكيل ايلدى و متعاقباً ( اردوان ) خامسه دخى غلبه ايدهرىك ممالك شماليه يى آلوب دولت اشكانيه نىك نام و نشانى اورته دن قالديردى و اون اوچ سنه دن عبارت اولان مدت سلطنتنده هيج بر راحت و حضور كوره ميوب بتون كون محارباتله مشغول اولدى و ( ۲۳۳ م ) تاريخنده رومايه درتيوز كشىدن مركب بر هيئت سفارت ارسال و روملرك آسيان كاملاً ال چكلمرينى رسماً تكليف ايدوب رومالور دخى ارانه سيف ايله

جواب قطعی و یرد کردن و او ائساده دیگر بر غائله چیقدیغندن سکوته  
مجبور اولدی .

§

﴿ آزدن ﴾ — قدس شریف جوارنده ( وادی الشریعه )  
دید کاری نهرک اسمیدر . حضرت موسی علیه السلام آخر عمرنده  
وادی تپدن اشبو نهره قدر حرباً کلوب ( بنی مؤاب ) و ( بنی عمون )  
و ( عمالقه ) قبیله لرندن آلدیغی ممالکی بنی اسرائیله توزیع ایلشیدی .  
بو نهر جبل لبناندن چیقوب بحر لوطه منصب اولمقده در . بو نام  
فرانسه ده واقع ایکی سلسلهٔ جباله دخی و یرلمش و بو جبال شرقی و غربی  
ناملریله ایکی یه منقسم بولمشددر . بلجیقا حدودی اوزرنده بر سنجاغک  
اسمی دخی ( اردن ) در . حضرت عیسی علیه السلام نبوتنی اعلاندن  
اول حضرت یحیی علیه السلامک دلائلیله بونهرده غسل ایتشیدی .

§

﴿ اردوان ﴾ — یاخود ( ارتابان ) — فرس پادشاهلرینک  
اشکانیان طبقه سنده بونامده درت پادشاه کلدی بونلردن برنجی  
اردوان ( ۵۳۹۶ خ ) تاریخنده یعنی میلادک یوز طقسان سکر سنه مقدمنده  
یونانیره غلبه ایدرک ارمنستان کبیری آلوب برادری ( اغرشاک ) ی صدر  
اب تعیین ایتدی و کوچک ارمنستان و ( پونتوس ) و ( قپا دو قیا )  
حکمدارلرینک هجوملرینی دفع و خیلی مملکتلرینی ضبط ایدرک برنجی  
دولتر صره سنه یکدی . و در دنجی و یاخود بشنجی اردوان ( ۵۸۲۴ خ )  
تاریخنده یعنی میلادک ایکی یوز او تونجی سنه سنده ساسانیلرک هجومیه  
مغلوب و دولتی منقرض اولدیغندن انده یالکز ارمنستان قالدی . اشکانیلر  
ارمنستانده سلطنتلرینی یوز طقسان سکر سنه دهها محافظه ایده بیلشدر .

§

﴿ آرزاتین ﴾ — آمریقای جنوبینک جهت جنوبیسنده و ( شیلی )  
و ( پتاغونیا ) حکومتلری حدودنده بر سینوک جمهوریتدر بونام اوراده  
آرژان یعنی کوش نامنده اولان بر نهره نسبتله و یرلمشیدی . بعضاً  
( ریود یلاپلانه ) دخی دیرلر . بورا اهالیسی مقدا اسپانیوللرک تحت

تابعیتندہ ایکن ( ۱۸۱۱ م و ۱۲۲۶ ھ ) تاریخندہ اعلان عصیان ایدرک استقلالہ نائل اولدیلر . جهوریت مذکورہنک مرکز ادارهسی یوز یتیش یندی بیک نفوسی جامع اولان ( بوانوزیر ) شهر یدر واکتر اھالیسی قاتولکدر . وسعت واققداریچون حکومت کلمہسنہ نظر بیوریلہ .

§

﴿ ارز میدخت ﴾ — فرس پادشاھلرینک ساسانیان طبقہسندن بر کوزل حاکمہدر . بوخاتون ( ۶۳۲ م و ۱۱ ھ ) تاریخندہ وفات ایدن پدیری ( خسرو پرویز ) کیرینه پکدیسہدہ سلطنت ساسانیہیہ اوچ درت سنہدنبرو عارض اولان ادبار مناسبتیلہ مدت مذکورہ ظرفندہ قادین ارکک خلغ وقتل اولنان یندی سکز حکمدارک بریدہ بو اولدی . مز بورہنک اثنای سلطنتندہ خراسان والیسی بولنان ( فرخ هرمز ) بوکا تعشق ایدرک زوجیتہ قبولنی استرحام ایلدکدہ مز بورہ پادشاھلرہ ازدواج یاقیشماز فقط بر کیچہ وصالملہ مسرور اولہ ییلوردیہرک کتوردوب حرم دائرہسندن آخرتہ کوندردی مؤخرأمر قومک اوغلی مشهور ( رستم ) دخی پدیرینک قانی المی ایچون کایتلو عسکر ایلہ کلوب مز بورہی اخذ و تسمیم ایلدی .

§

﴿ ارزنجان ﴾ — ارضرومک جنوب غربیسندہ و یوز اوتوز اوچ کیلومیترو بعدندہ برشردر . بوشهر مقدما حرکت ارضلر مناسبتیلہ کرکی کبی خراب اولمشسہدہ عسکری وسائرہجہ اھمیتی حالا باقیدر و اھالیسی یندی سکز بیک رادہسندہدر .

§

﴿ ارستد ﴾ — حکمای متأخریندندر . مسقط رأسی دانیمارقہ اولوب قو پنہاقده تحصیل علم ایدرک قوہ الکتریقیہنک مانیاتیرمو ایلہ اتحادینی فعلاً تجربہ واثبات ایلدیکندن شهرت بولدی و پک چوق مکافاتہ نائل اولدی . تاریخ فن کیمیایہ وقوہ الکتریقیہیہ یعنی مقناطیسی ابرہ اوزرینہ سیالہ الکتریقیہنک تأثیری تجاریب وکشفیاتنہ دائر تألیفاتی دخی وارد و وفاتی ( ۱۸۵۱ م و ۱۲۶۸ ھ ) تاریخندہدر .

§

﴿ارستودوم﴾ — یونانستانده واقع (مسه نیا) قطعه سی حکمدار لر ندر  
 مومی الیه ( ۱۸۵۱ خ ) تاریخده یعنی میلادک یدی یوز قرق اوچ یا خود  
 قرق درت سنه مقدمنده قوموشوسی اولان اسپارتلولره آچدیغی محاربه ده  
 مغلوب اوله جغنی حس ایلدیکندن هاتف غیبه مراجعت ایدوب ( قرال  
 فاملیاسندن بر کنج قز قر بان ایدیلور ایسه غلبه میسر اوله ییلور ) جوابنی  
 الدقده کیفیتی متعلقانه خبر و یردی و او یله بر قز بولنسنی امر  
 ایلدیسده کسه قزینی فدایه موافقت ایتدیکندن سکز اون یاشنده اولان  
 کندو کوزل قزینی بیر املق اثوابلرینی کینش اولدیغی حالده حضور  
 اهالی یه چیقاره رق بر از اوخشایوب اغلا دقن صکره ذبح ایلدی لکن  
 ایش هاتف غیبک یعنی پاپاس دوز نبالرینک دیدیکی کبی چیمیبوب  
 ( مسه نیا ) لیلرینه اسپارتلولره مغلوب اولدی مرقوم ارستودوم  
 بر کیجه رؤ یاسنده مظلومه مرقومه یی دهشتلی بر صورته کوردیکندن  
 قبری اوزرینه کیدوب بر مدت بکا و اظهار ندامت و استعفا ی قصوردن  
 صکره کندو کندوسنی دخی اوروب قزینک یانه کیتدی و ملتی بیننده  
 بو صورته ابقای نام ایتدی .

یونانلر بونک اشبو فدا کارلغنه قارشو بر حرمت مخصوصه اولق  
 اوزره آر خونلق مسندینی احداث و اوغلنه اعطا ایتشلردر ( آر خون ) کله  
 سنه نظر یور یله .

§

﴿ارسطو﴾ یا خود ( ارستطالیس ) — حکمای یونانیه دندر .  
 مسقط رأسی ما کیدونیا اولوب حال شبانده پدرینک دوستی اولان  
 ( پروفنوس ) دن مقدمات فنونی تحصیل و بر مدت عسکرلک و بر از وقت  
 مسک یا عجیلق ایتدکن صکره آتیه به عزیمت و افلاطونک درسنه یکرهی  
 سنه مداومت و ینه ما کدونیا به عودت ایدوب ما کدونیا قرالی فیلیک  
 التماسیله اوغلی اسکندر خواجه اولدی و بعده ینه آتیه به کیدوب  
 یکی یابیلان و مؤخرأ مکتب ( مشائیون ) تسمیه اولنان مکتبک خواجه لکنی  
 قبول و بر خیلی مدت علوم حکمیه تدریس ایتدی و اسکندرک وفاتندن  
 صکره بر طاقم حسودلرک القآتیه اتهام اولندیغدن آغر بیوزه صاوشوب

بر مدت دخی اوراده تدریس ایله مشغول اوله رق (۵۲۷۲ خ) تاریخنده یعنی میلادک اوچ یوز یکرمی ایکی سنه مقدمنده وفات ایلدی . مومی الیهک علم حکمت و اخلاق و کلام و ثروت و حیوانات و تناسل و علایم السماءیه و کون و فساد عالمه و احوال روحه دائر اولان تألیفاتندن اکثریسی موجوددر بونلرده و علم منطق و فلسفه ده اخلافنی کرکی کبی تدقیقاته مجبور ایتشدر .  
 عدم و ماده و صورتک فبداء اشیا اولدیغنه و عالم کون و فسادده اولان هرشیء عناصر ار بعدهن ظهور کلدیکنه و جناب واجب الوجود بر مرکز کبی اولوب جله نك اکار جوعنه قائل اولور و دائماً کرینه رک درس و یردیکی ایچون شا کردانه (مشائیون) دینور ایدی . قبری آغریبوزده در . اسکندر بوکا پک چوق حرمت ایدر و باعث حیاتم یدرم ایسه ده شان و شوکتله سوردیکم حکومت ارسطونک سایه لطف و تربیه سننده در یر ایدی .

§

﴿ ارسطوفان ﴾ — شعرای یونانیه دندر . بونک علم و اشعارینه دیه جک یوغیسه ده طبیعی اوته کنی بروکنی هجوه غایت مجبور ایدی بر دفعه دخی تیاروده و کلا و معتبرانی هجوله رزیل و بتون اهالی بی رسوای و خجیل ایلدیکندن کرک مرقومک و کرک سائر شعرانک هجویه یازمسی قطعاً منع اولندی . وفاتی (۵۱۴۲ خ) تاریخنده یعنی میلادک درت یوز الی ایکی سنه مقدمنده در .

§

﴿ آرسنیق ﴾ — خواص حکمیه سنه نظراً معدنیاته مشابه ایسه ده مرکباتنک فوسفور مرکباتنه مماثل اولسی جهتیله معدنیاتدن معدود دکلدر . بعض محللرده کوکرت ایله مزوج یعنی صاری و یا قرمزی زرنیخ حالنده و بعضاً معادنن (قوبالت) و حدید ایله مزوج اوله رق بونلور . و بعض میاه معدنیه ده دخی اولور و غایت منکسر اولغله سهولتله سحق اولنور و هواده و صوده ترک اولندیغی حالده مولدالمحوضه بی جذب ایدر و اوچ یوز درجه حرارتده اریمکسزین طیران ایلر و ینار کور اوزرینه وضع اولنسه بلا اذابه تبخیر ایلر و صارمساق قوقوسنه شبیه



بر قوقو و یرر و مولدالمحوضه ایچنده تسخین ایدلسه بالامتراج یشیل رنکلو برشعله ایله اشتعال ایتکله (حامض آرسنیک) یعنی صیچان اوتی حصوله کلور بونک هیچ بر لذتی یوقدر و صوده حلی ممکن دکلدر و ثقلت اضافیه سی (۵ : ۷) در .  
 رصدور ینلرینی اشبو آرسنیک ایله اعمال ایدرلر .

§

﴿ آرشاق ﴾ — ارمنستان حکمدارلرندندر . ایران حکمداری ایکنجی شاپور ارمنستانی ضبط ایتدیکی زمان مرقومی دخی طوتوب بر چوق معتبران ایله زنجیر بند اوله رق ایرانه کوتورمش و معتبران مومی الیهی قازقلیه رق اعدام ایدوب مرقوم ارشاقی زندانه آتمش ایدی بیچاره بر مدت زندانده اوتوروب اجرا اولنان اذا وجفایه تحمل ایده مدیکندن (۳۸۱ م) تاریخنده کندو کندوسنی بتوردی و مرهوناً استانبولده اولان وخرستیانلغی قبول ایدن اوغلی (باب) تحت موروشه مالک اولوق اوزره بر مقدار روم عسکر یله ارمنستانه کندیسه ده هنوز خرستیانلغی قبول اتمیان ارمنیلر قبول آتدیلر و محاربه ایدر ایسه مدافعه اتمک اوزره بر برلریله عهد و میثاق ایدوب حین محاصره ده ذخیره جه مضایقه چکلمامک ایچون قار یلرینی قلعه قپورینه و بر جلرینه آتدیلر لکن بوتدیرلرک هیچ بریسی مرقوم بابک قلعه قپوسندن دخولنی منع ایده مدی . شاپورک مرقوم ارشاق وارمنیلر حقبنده ایتدیکی ظلم و تعدی خرستیانلغی قبول اتمدکلرندن ایلر و کلمش ایدی

§

﴿ ارشک ﴾ — سلفکیاندن یعنی (سلوسید) دولتی حکمدارلرندن اوچنجی انتی یوخوسک زیر جایه سنده اولان طبرستان ولایتندن (۵۳۳۸ خ) تاریخنده یعنی میلادک ایکیوزاللی التی سنه هقدمنده خروج و اشکانیان دولتی تشکیل ایدن ذاتدر . بوقهرمان طبرستان امراسندن ایدی تاریخ مذکورده ممالک فرسه هجوم و بلخ وری و اصفهان جهتلرینی بعد الاستیلا (دمغان) شهرینی پای تخت اتخاذا ایلدی و سلوسیدلرک النده قالان بقیه ممالکی دخی آورده قبضه تسخیر اتمک و یاخود مرقوم انتی یوخوسک

هجومی بی منع ائلك ایچون اوغراشهرق ایکی سنه سلطنت سورد کدنصرکه  
بربحار به ده هم کندوسی وهم مرقوم ائی یوخوس مقتولاً وفات ایلدیکندن  
ایکیسیده غوغای جهانندن قورتلدی . فرنکلر بوکا (ارساد) و حکومته  
(ارسانید) دیرلر . اشکانیان کله سنه دخی نظر بیوریه

§

﴿ آرشمید ﴾ - قدمای ریاضیوندنلر . بوذات سجاایده واقع  
سیراقوز شهرنده دنیاه کلوب بعد البلوغ تحصیل علم آرزوسیه اسکندر یه یه  
عزیمت و حکمای مشهوره دن ( اقلیدس ) ک درسنه مداومت ایلدی  
وفنون ریاضیه وسائرده یدطولا صاحبی اولوب مصر سفلائک نیلدن حاصل  
اولان بطاقلقرینی تطهیره موفق اولدی و سجاایه عودتده مملکتی یونانی  
(مارسلر) نام قپودان مشهورک تحت محاصره سنده بولدیغندن ائی دخی  
معارف سایه سنده ایکی سنه اشغال ایلدی شویله که دشمن سفینه لرینی  
هویه قالدیروب ینه دوشورمک اوزره یاپدیغی آلترو سفاین مذکوره بی  
حرارت شمسله یاقق ایچون ایجاد ایتدیکی قطع مکافی آینه لر واسطه سیله  
قپودان مرقومی عاجز براقدی و اک صکره اعدا غلبه و مملکتی یغما  
ایدرکن براق یغماچی مرقوم ارشمیدک خانه سنه کیروب بیچاره بی یازو  
خانه سی اوزرنده اعدام ایتدی . شوراسی غریبدرکه یغما کرلر پرسلاح  
مرقومک خانه سنه کیردکری زمان مومی الیهی علوم ریاضیه دن بر مسئله نک  
حلیله مشغول واستیلادن بیخبر بولوب مالنک زه ده اولدیغنی سؤال  
ایتدکرنده آزاجق صبر ایدک شو مسئله بی حل ایده یم دیدی . ارشمیدک  
علوم ریاضیه وهندسیه یه دائر کشف ایتدیکی شیلر پک چوق ومهمدر  
ومانوله نک قوتنه دائر وقوعبولان بر مباحثه ائناسنده اکر بن بر نقطه استناد  
بولسه م کره ارضی قالدیرر ایدم دیمشدر .  
بر دفعه جامده ایکن مایعاتک کثافتی اوچمک ایچون بر طریق خاطرینه  
کدکده زیاده سیله سونجندن چیر چپلاق جامدن سوقاغه اوغرایوب آره دیغمی  
بولدم دیو باغرمغه باشلادی وفاتی ( ۶۳۸۲ خ ) تاریخنده یعنی میلادک ایکوز  
اون ایکی سنه مقدمنده در .

§

﴿ آرشیپل ﴾ — بحر سفیدك چناق قلعہ سی بوغازینہ منتهی اولان قسم شرقیسنہ مخصوص بر اسمدر بو دکرده (سیقلات) و (ایسپورات) نامرلیه متعارف ایکی بیوک طاقم اطه و برچوق یالکز اطه لر واردر و اشبو یالکز اطه لرک مشهورلری اولان (سالامین) و (آغریبوز) و (سمندرک) اطه لری اوروپا قطعہ سندن و (لمنی) و (سیسام) و (مدلاو) و (ساقز) و (ردوس) و (استانکوی) اطه لری آسیا قطعہ سندن معدوددر.

§

﴿ ارض ﴾ — ژئولوژی یعنی طبقات الارض فنک خبر ویردیکی وجهله جوئی نار و اوزری قشر مقامنده انواع معادنک مکهنی اولان تراب و احجار ایله مستور برکره در.

اشبو ارض سیارات مشهوره دن بری اولدیغی حالده شکلا کره یه قریب بر جسم اولوب قطبلرندن مرورایدن محوری اطرافنده تقریباً یکرمی درت ساعت ظرفنده اجرام سماویه نك حرکات ظاهریه لری کبی حرکت یومینه سنی اجرا ایدر. ارضک محور دورانیسنک استقامتی محور عالمه منطبق و قطب نقطه لری ثابتدر. ارض دائره استواسندن اعتباراً شمالی و جنوبی نامرلیه ایکی قسمه منقسم اولدیغی کبی دائره مذکوریه عمود اولق اوزره (نصف النهار) دائره لرینی و موازی اولسق اوزره دخی (عرض) دائره لرینی و مدارینی و منطقه ها بروچی حاویدر.

و شکنده قطبلر طرفنک باصق اولسی جهته تام کره اولماسی نصف النهاردن بر درجه لک قوسک طولنک عرضلر تزايد ایتدیگجه او نسبتده تزايد ایتدیکی یعنی نصف النهار مزبور بر دائره اولیوب قطع ناقصه قریب بر منحنی ایدوکی بالمساحه اکلاشلمشدر.

نصف النهار محیطنک طولی قرق میلیون مترو اولدیغی کبی خط استواده کی نصف قطری (۶۳۷۷۰۰۰) مترو و قطبلرده کی نصف قطری دخی (۶۳۵۶۰۰۰) مترو اولغله خط استوا نصف قطریله قطبلر نصف قطری بیننده اولان (۲۱۰۰۰) مترو فرقدن ارضک باصقلغی مقدارینک قرق ایکی کیلومتر و اولدیغی نمایان اولور.

ارض اوزرنده بولنان نقاطدن اک یوکسک نقطه نك ارتفاعی سطح بحر دن

اعتباراً طقوز بيك مترو وچقورلردن الك درينك عمقى اوچيوز مترودر و بو مقدار ارتفاع ارضك قطرينه نسبةً هيچ مثابه سنده در و ارضك تكميل سطحى بشيوز اون مليون كيلومترو مربعه اولوب بوندن اوچيوز سكسان اوچ مليون كيلو مترو مربعى محلى دكزلر قابلامش و باقى يوز يكرمى يدى مليون كيلو مترو مربعى محلى دخى قاره بولمشدر .

و دكزلرك عمق اعظميلرى بحرمحيط شماليده اون درت بيك و بحرمحيط جنوبيده اون بيك درتيوز و بحز اوقيانوسده يدى بيك مترودر و قوه عن المركز و قوه الى المركز نامرئيله ايكى قوتى حائز اولوب قوه الى المركز قطبلرده موجود و قوه عن المركز خط استوايه طوغرى متر ايد اوله رق مشهوددر كتب فقهيهدن فتاواى زينيه ده كونش غروب ايتدكده زهيه كيدر سؤالنه دائماً بر قومك اوزرندن غروب و ديكر قومك اوزرينه طلوع ايدرك دور ايدر جوابى و يرلمش و كليات فقهيده برى چينده و ديكرى اصفهانده اولان ايكى برادر ك رمضانك برنجى كونى و فائلى و قوعبولسه قنغيسى قنغيسنك ميراثنى آله بيلور سؤالنه اختلاف اوقات طلوع حسييله اصفهانده و فات ايدنه چينده و فات ايدن وارث اولور جوابى اعطا اولمش اولغله ارضك كرويتى شرعاً دخى ثبوت بولمشدر .

§

﴿ ارضروم ﴾ ياخود ( ارزن الروم ) — اناطولينك جهت شماليسنده و فرات نهرينك منبعى جوارنده و قارلى طاغ دنيلان يوكسك طاغك اتكنده بر بيوك شهردر . بوشهر ( ۴۱۵ م ) تاريخنده ايمپراطور تئودوس معرفتيله انشا اولنوب اون برنجى عصر ميلاديه سلچوقيلر يدينه و ( ۱۵۱۷ م و ۹۲۳ هـ ) تاريخنده دولت عثمانيه يدينه كچدى و ( ۱۷۲۸ م و ۱۲۴۱ هـ و ۱۲۹۳ هـ ) تاريخنده روسيه ضبط ايدوب يته اعاده ايلدى .

ارضروم اهاليسى يوز بيكدن متجاوزدر و درون شهرده اون ايكى جامع شريف اولوب حجام و مكتب و كليسارى و بازار يرلى و كاربانسارلى مكمل ايسه ده سواقلى طار و غير منتظمدر و خارج شهرده و يارم ساعت مسافه ده واقع ( عبدالرحمن غازى ) تربه سى مشهور بر زيارتگاهدر . اميد برونى كشف اولنمزدن اول ارضروم اوروپايله آسيا بيننده بر بيوك تجار تگاه ايدى .

ارضرومده قيشك الك شدتلى وقتنده مير ان الحرارة صفردن اوتوز درجه يه قدر تنزل ايدر . غلطات حفيديه ارضروم رومك الك يوكسك یرى معناسنه (اولان ارزن الروم) دن غلط اولديغى يازلمشدر . ارضروم شهرينك موقعاً سطح بگردن در تيك ذراع يوكسك اولسنه باقيلور ايسه اشبو يازيلشك صحیح اولديغى اكلاشيلور .

§

﴿ ارض كنعان ﴾ — سوريه نك جهت جنوبيسنده وعكادن غزه يه قدر سكسان كيلو مترو طولنده اولان سواحل ايله كيرولرنده اولان اراضى وسيعه نك اسميدر بوراسى مقدا كنعان بن حام بن نوح عليه السلامك اون بر اولادينه خيلى زمان وطن اولديغندن بونامى آلمش ايدى مؤخرأ اراضى مذكوره جانب حقندن جناب ابراهيم عليه السلامه وعد بيورلديغى چون بنى اسرائيل (ارض موعود) نامنى زيرديلر سده فلسطين قبيله سى كاه بكاه بنى اسرايلى محكوم ايمسى مناسبيله نام مذكور تدريجأ اونوديلوب يرينه فلسطين نامى قائم اولدى وحدود سابقه سى بر قاچ دفعه توسع وتناقص ايلدى . (فلسطين) كلمه سنه دى مراجعت بيوريله .

§

﴿ ارطغرل ﴾ غازى — جد سلاطين عثمانيان سليمان شاه حضرت ترينك اوغلى وسلطان عثمان غازى حضرت ترينك پديريدر . مشار اليه ( ۱۲۲۴ م و ۶۲۱ هـ ) تاريخنده پديرى ايله ارزنجاندن تركستانه عودت ايدر كن اورفه مضافاتندن جعبر قلعه سى جو وارنده پديرى مغروقا وفات ايلديكندن در تيوز قدر چادر خليفه قرداشلرندن آريلوب ارضرومه كلدى ويدى سنه ياسين اوه سننده اقامت ايدوب اندن صيكره سلطان علاء الدين سلجوقيدن بر مقدار اراضى التماس ايتك اوزره قونيه يه عزيمت وسلطان مشار اليه تانارلر ايله محارب بولديغندن معيتنده اولان بر قاچ يوز سوارى ايله معاونت وتاتارلرى مجبور رجعت ايلدى وبوخدمتنه مكافاة قره طشاغ يابلاغى ومؤخرأ سكود اراضيسى تملك واحسان بيورلديغندن ( ۱۲۸۱ م و ۶۸۰ هـ ) تاريخنه قدر بورالده توطن وفرصت دوشد بجه دولت مشار اليها نامنه روملر ايله محاربه

ایتدی و تاریخ مذکورده طقسان یاشنده اولدیغی حالده وفات ایلدیکندن  
یرینه اوغلی سلطان (عثمان غازی) حضرتلری رئیس قبیله اولدی.

§

﴿ ارغنی ﴾ — اناتولیده فرات نهری اوزرنده و دیاز بکر ولایتی  
داخلنده بر سنجاغ مرکزیدر هواسی براز وخیم ایسهده طاغرنده کوش  
معدنی جو قدر.

§

﴿ آرغولید ﴾ — موره شبه جزیره سنده بر سنجاغ اسمیدر و (آرغوس)  
شهری دخی بو سنجاغ مرکز اداره سیدر (قورینت) (ایناکوس) کله رینه  
دخی نظر بیوریه.

§

﴿ آرغونوت ﴾ — اسکی یونان قبادایلرندن و آتیه زادکانندن مرکب  
برهیئت سیاره در.

بوهیئت تسالیا قرالنک اوغلی (ژازون) ک تحت قومانداسنده اللی درت  
کشیدن عبارت اوله رق (پیئوتی) قرالنک اوغلی قتل ایدن قولشیدقرالندن  
اخذ انتقام ایتمک و بحر سفیدک برو طرف سواحلی و مرمره دکریله قره دکزک  
اناتولی قییلرینی طولاشوب استفاده اینک اوزره غلوصدن یوله چیقوب  
(۴۲۴ خ) تاریخنده یعنی میلادک بیک اوچیوز اللی سنه مقدمنده بعض  
سواحلی غارت ایدرک بانه چیه سینوبه قدر کتدیلر و قولشیدقرالنک  
پای تختی برباد و قزینی اسیر ایتدیلر ایسهده قرال مر قومک تعقیلرینه مأمور  
ایتدیکی آدملرک سرعتله و رودندن تخلیص کریان ایده میه جکلرینی اکلا دقرلندن  
روم ایلی قییسنه کچمکه مجبور اولدیلر و طونه بوغازندن ایچرو کیره رک  
وقایقلرینی صرتلرینه آلهرق برأ و ندیک کورفرزیه و اورادن دخی هوانک  
مخالفتی جهتیله اسکندر یه قدر کیدوب کوچ حاله تسالیابه عودت  
ایده یلدیلر. بونلرک قییلره صوقولق ایچون طاشیدقلری قایقلر سپت  
اوزرینه کرلمش اوکوز دریسندن ایدی.

§

﴿ آرغون ﴾ — ملوک ایلیخانیه دن برذاتک اسمیدر. بونک وزیر

اعظم ایتدیکی بریهودی سلطنت ایلیخانیه ده کرکی کبی نفوذ پیدا ایتدکن صکره خیانتلکه صاپوب فخرالدین کبی برنادر الوجودک اعدامنه سبب اولدی ودها صکره نبوت دیدکاری شیء مساعده بخته منوطدن دیه رک ملک مزبور ی قاندریوب نبوت دعواسنه قالقشدردی و کعبه مکرمه یه بدل برینا یاپدیروب هر کسی حجه کتمکن منع ایلدی. ملک غافل مزبورک وفاتی (۱۲۹۲ م و ۶۹۲ هـ) تاریخنده در. بالاده محرراولان ارغونونلرک بندکاری سفینه نک اسمی دخی (ارغون) ایدی.

§

﴿ارفخشد﴾ — یاخود (اریاقساد) — سام بن نوح علیه السلام برنجی اوغلیدر. بونک منسوباتی ابتدا فرات ودجله نهرلی آره سنه یایلوب مؤخرأ برطاقی ایران اراضیسنه واکثر یسی جبل جودی وارمنستان طرفلرینه چکلدی. ارفخشدک شالخ وشالحک بارنامنده برر اوغلی اولوب مابرك دخی قحطان یاخود یقطان وفالع اسمنده ایکی اوغلی اولمش وقحطانک جرهم نامنده کی ایلک اوغلنه منسوب اولان قبیله دن حضرت اسماعیل علیه السلام مکة مکرمه ده برقز آدیغنه بناء عرب مستعربه ظهوره گلشدر. (عرب) کله سنه دخی نظر بیوریه. (ارفخشد) رئیس القوم وحصن الکلدانین دیمکدر.

§

﴿آرقادیوس﴾ — استانبول ایمراطوری بیولکئودوسک اوغلیدر. بونک برادری روما غرب ایمراطورلغنه انتخاب اولندیغی اثناده یعنی میلادک اوچیوز طقسان بش سنه مقدمنده بودخی پدرینک یرینه استانبول ایمراطورلغنه انتخاب اولمش ایدی لکن بیچاره پک مسکین وقلپرن چپه رق مصالح دولتی برطاقم قاووق صالاییحی خلوصکارلر یدینه بر اقدیغندن وصادق آدملرک طوغری سوزلرینه انفعال عادتی آنلریده سکوته مجبور ایتدیکندن هرکس شکایته باشلادی ونهایت باش ماینجیسی وحرمی دلاتیه خلع وانطاکیه یه نفی اولنوب اوراده اون اوچ سنه سفالت چکدکن صکره وفات ایلدی.

§

﴿ارقادیا﴾ — موره شبه جزیره سننده الیوم موجود اولان بش

سجاقدن بریدر و مرکز اداره سی (طراپولیچه) یاخود (تریولیس) شهریدر • بوشهر اسکی (مانتینا) شهرینک خرابه سی اوزرینه بنا اولمش ایدی • مورده کپارسیا کورفزی ساحلنده (ارقادیا) نامنده برشهردها واردر • بو شهر اهلایسنک وقتیه توطن ایتماش برطاقم کوچهردن عبارت ایدوکی توارمخده مسطوردر •

§

﴿ ارقانجل ﴾ — روسیه دولتی جایه سننده بر پرنسلکک یاخود او پرنسلکک مرکز اداره سی اولان شهرک اسمیدر • بوشهر پترسبورغک شمال شرقیسنده ویدیوز الی کیلومتر و بعدنده و بحر ایض ساحلنده اولدیغندن غایت صغوق ایسه ده لیمانی غایت کوزلدر و روسیه نك بر کوچک ترسانه سی واردر • لیمان مذکور ایام شتاده درت آی بوز طوتار و اون طقوز بیک راده سننده اولان اهلایسی بالق صیدیه تعیش ایدر • پترسبورغ انشا اولمزدن اول ارقانجل روسیه نك تجارت بحریه سنک برنجی موقعی ایدی •

§

﴿ ارکلی ﴾ — یاخود (هراکلیوس) — اسکی یونانیرک هر کول نام شخص موهومه نسبتله بعض شهرلره ویردکاری اسمدر • بونلردن ممالک شاهانه ده اولنلرک برنجیسی مرمره دکزینک روم ایلی ساحلنده و استانبولک سکسان بش کیلومتر و بعدنده اولان (ارکلی) نام دیگر (پراتوس) قصبه سیدر بو قصبه ما کیدونیا قرالی فلیک محاصره سنندن یعنی میلادک اوچوز قرق برسنه مقدمندبرو خراب برحالده ایسه ده سفاین تجاریه نك اوغراق بر لیمانی و روم ایلینک ایچجه براسکله سی اولدیغندن مهم و معتبردر ایکنجیسی قره دکزک اناطولی ساحلنده و استانبول بوغازینک یوزیتش کیلومتر و بعدنده اولان (ارکلی) نام دیگر (ایریولوم) در بوراده پک چوق معدن کوری چیقار و اهلایسی سکزاون بیک تخمین اولنور اوچنجیسی قونیه نك جنوب شرقیسنده و یوز اون بش کیلومتر و بعدنده اولان و ایوم قائم مقاملق مرکزی بولنان (ارکلی) در • ایتالیا ده ایوم (پولیتورو) دنیلان قصبه نك نام عتیقی دخی (هراکله لوقانیه) اولدیغی کبی فرانسه ده ایوم (سن تروپهس) دنیلان قصبه نك و سچلیاده



اولان (مینوا) نك نام عتیق دخی هرا کلیوس ایدی . ذکر اولنان  
هرا کله لوقانیه قصبه سنده حضرت عیسی علیه السلامن بیک یدیوزاوتوز  
برسنه مقدم تاریخلو و پرنج لوحدر اوزرینه محکوک یازولر بولمشدر .

§

﴿ اَرَم ﴾ — سام بن نوح علیه السلامک بشنجی اوغلیدر . بونک  
برنجی اوغلی (عوص) عاد اولینک وایکنجی اوغلی (کاشر) قوم ثمودک  
پدری ایدی دیگر بر قوله کوره ( ارم ) حضر موت ایله صنعا آره سنده  
عاد اولی حکمدار لرندن شدادک بنا ایتدیکی بلده لر دن بر بلده در یا خود  
شام شریف و یا خود اسکندریه در . ( ارم ) مؤخرأ عاد اولی قبيله سنه  
دخی نام اولدی و خلطی قوت و طول قامت ایله شهرت بولدی بونلره  
( فالز ) دخی دیرلر . شداد کله سنه نظر بیوریه .

§

﴿ اَرَمَنَّاك ﴾ — ایچ ایلده بر قضا مرکزیدر بوراده بر چوق باغچلر  
صولر واردر و اوزومی و بالی اعلادر .

§

﴿ اَرْمَنِي ﴾ — ارمنستانده سلطنت سورن برنجی ( حایق ) سلاله  
حکمرانیسی منقرض اولدقدنصکره تخمیناً میلاد عیسی علیه السلامک بیک  
سکز یوز قرق درت سنه مقدمنده ( ارمیان ) سلاله سنی تشکیل ایدن ( ارام ) ه  
نسبت اولنان قومدر .  
بونلر درنجی یا خودیدنجی عصرده قیصریه پسیپوسی ( لیساوور یخ غریغوار )  
واسطه سیله خرسیتیانلغی قبول ایتشلر ایدی . ( ارام ) کله سنه دخی  
نظر بیوریه .

§ -

﴿ اَرْمُورِيك ﴾ — برتانیانور ماندیانک اسکی اسمیدر .

§

﴿ اَرْمِيَاء ﴾ علیه السلام — پیغمبران بنی اسرائیلدندر . بو ذات  
بابلیلرک تحت جایه سنده یهود حکمداری اولان ( یوسیا ) و ( الیاقیم )  
و ( صدقیا ) زمانلرنده قدس شریفده ساکن اولور و هر کسک عهد آلهمی بی

ترك و بعلاره پرستش و زنايى مباح ايتديكيچون غضب آلہى ظهور ايدہ جكنى و ممالك يهوديه بابل ملكى يديله خراب اوله جغنى و مصر لولرك معاونتى ممکن اوله ميه جغنى و استغفار و اطاعتدن بشقه چاره اولديغنى سويلر كزر ايدى . ( ۵۰۰۷ خ ) تاريخنده يعنى ميلادك بشيوز سكرسان يدى سنه مقدمده مرقوم صدقيا اولجه ايتديكى عهد و يميناك خلافنده حر كته بابليره عصيان ايلديكندن مشهور ايكنجى ( بخت نصر ) كلوب اون سكرز آى قدس شريفى محاصره ايتدى و اثنائى محاصره ده ( ارمياء ) عليه السلام بابليره طرفدار ظن اولنهرق حبسه و بعدہ آچلقدن تلف اولق ايچون برقورى قيويه القا اولنوب عبد الملك ننده بر حبشيناك اخبار و التماسيله ينه براغدى و مصر لولرك يهوديله معاونت و عدى يالكز بر لفظدن عبارت قالدیغندن بخت نصر قدس شريفه كيروب كاملاً احراق و يغمما ايلدى .

حضرت ارميانك بخت نصر دن حرمت كوردىكى و ديلديكى كجى حر كته مأذونيت آلدیغنى معلوم ايسه ده قدس شريفده ترك اولنان التمش كشى ايله برابر قالدیمى يوخسه مصره هجرت ايدنزله كتديمى معلوم دكلدر فقط مصره هجرتى اغلب احتمالدر و يوز اللى ياشنده اولديغنى حالده اوراده شهيد اولمشدر ( ۵۰۱۰ خ ) .

اللى ايكى بابى مشتمل اولان سفر مخصوصى و بش بابى مشتمل اولان نياحاتى زير تورانده محرردر يهوديلر نياحات مذكوره يى دائماً او قور آغلارلر . حضر عليه السلامك بر اسمى دخى ( ارمياء ) در .

§

﴿ انود ﴾ — روم ايلنده شمالا بوسنه و قره طاغ اراضيسيله و غرباً و نديك و شرقاً سلا نيك كور فلز ليله محدود و لا ياتنده ساكن اولان قومك اسميدر . انود لنگك جهت جنو بيسينده واقع ( برات ) و ( تپه دلن ) و ( يانيه ) و ( تر حاله ) قضا رنده ساكن اولنلره طوسقه و جهت شماليسينده واقع اشقودره و پرزرين و اسكوب و ( دبره ) و ( ياقوه ) و ( ايپك ) قضا رنده ساكن اولنلره ( كه غه ) ديرلر و طوسقه لر ( لاپ ) يا خود ( لياپ ) و ( ژايسدى ) و ( مره ديت ) و ( قنه منت ) و ساثره نامر ليله قبائل متعدده يه منقسم اولديغنى كجى ( كه غه ) لر دخى اووه و طاغ قبيله لر ينه تقسيم اولنورلر و اليوم اصول و عادات قديمه لر ينى

محافظه ایدرلر و فخذلرینه (فیس) دیرلر . ارنودلرک اصلی اسکلی (پلاز) لر  
 و (لژ) لر ظن اولینور ایسه ده صحتنه حکم اولنه مز .  
 ارنودلق مقدا برقاچ دفعه (اپیر) وما کیدونیا و روما شرق ایمپراطورلری  
 جایه سنه کچوب متعدد پرنسلکه تقسیم اولنش و او پرنسلردن بری  
 (۱۲۳۵ م و ۸۳۹ ه) تاریخنده دولت علیه جایه سنی قبول ایدرک اوغلنی  
 رهن طریقله درس عادتته کوندرمش ایدی بوچوق اسکندر بک نامیله  
 بر مدت سرای همایونده تربیه اولدقدن صکره پدینک و قاتی مناسبتیله طرف  
 دولت علیه دن مملکتنه پرنس تعیین وارسال اولندیسه ده اورایه واردیغی کبی  
 طوری دکشدیردی و برقاچ دفعه عصیان ایلدیکندن متصرف اولدیغی  
 ارنودلق ضبط اولنوب طوغریدن طوغری اداره اولنان ممالک صره سنه ادخال  
 اولندی . فرنکلر ارنودلغه (البانی) دیرلر البانی (سلت) لسانده طاغ  
 معناسنه اولان البدن مشتقدر . ارنودلر کندیلرینی (اشکیتار) و ارنودلغی  
 (اسکیه ری) یا خود اسکیه نی دیه طانورلر البانی دیمسنی استه مز لر و اصلا  
 طانیزلر اسکندر کله سنه دخی نظریوریه .

§

﴿ آری ﴾ — انسانه نافع اولان بالی وجوده کتورن حیوانچقدر .  
 بو حیوان خرطومیله چیچکلردن الدیغی بالی مسدس الشکل یایدیغی حجره لره  
 املا ایدر و دشمننی قارنده اولان ایکنه سیله صوقوب ایکنه سنی اوراده  
 براغور بر آدمی آری صوقدیغی زمان درحال ایکنه بی چیقارملی یا خود  
 مقراص ایله ایکنه نك خارجنده قالان کوکنی کسوب ایکنه نك کوکنده کی  
 سم ایله مملو کیسه جکدن سمک سرایتنه میدان ویرماملی و اوزرینه سرکه لی  
 صوده عادی طوزی حل ایدوب انکله ییقاملی و نشادر روحلی صو یا خود  
 زیت یاغی طلا سیله آغریستی کسمیلدر .

آریلر اوج صنفدر بری ارکک دیکری دیشی اوچنجیسی عمله طاقیدر ارکک  
 آریلر سائرلرینه نسبتله قلیل العدد و بیوجک و ایکنه سزا لور و بونلر قوغانلرده  
 برایکی ماهرن زیاده طور دیرلمیوب عمله طرفندن هلاک و اخراج ایدیلور  
 و دیشی آریلر بر قوغانده برقاچ دانه ظهور ایدرایسه بر برینی قیره رق نهایت  
 بریسی قالور و جلّه سنه حاکم اولور بو حاکم عمله طاقنک یاپدقلمی مسدس

الشکل حجره لره هر کون یوز یتش عدده قدر یمورطه لدیغی یمورطه دن برر  
دانه سنی قور و یمورطه لر آچیلوب یاور یلر چیققدنه بیوبوب بر هیئت تشکیل  
ایدنجه یه قدر بسیلر و اناج آر یلره برر ایکیشتر ترفیق ایدرک بال و پتک اعمالنی  
او کر تدریر . عمله آر یلر دخی اوچ صنفدر و بر طاقی بال طویلماق و دیکری  
حجره لری یامق و او بری کتور یلان بال لری حجره لره یرلشدیر مک ایله  
مالوفدر .

قوغانلردن زیاده بال اخدی مراد اولندیغی حالده قوغانلر کوز لجه حفظ  
وسائر هوام و وحشر اتدن محافظه و ایجابنده درونی تطهیر اولنق و بر قوغانک  
آریسی نقصان بولمش ایسه چوغالتیق لازمدر .

اشبو چوغالتیق دخی اوسنه چیقاجق اولان اوغلك حاکمی یعنی دیشیسی  
بولوب تلف ایتمک ایله ممکندر بو حاکم قوغانک کیر و سنده کندویه مخصوص  
اولان مه شکنده کی پتک دروننده محبوس ایدو کندن بو پتک قطع ایله حاکم  
مرقوم تلف اولدیغی حالده جماعتی قوغانک آناج آر یلرینه تابع اوله جقنندن  
قوغان قوت بولور . سکرز قوغان ایچون بردوم اراضی کافیدر و جوارنده  
صوبولنق لازمدر .

§

﴿ آریا ﴾ — ابتدا سندن کلوب بلخ و صغد و ایران اراضیسی وطن  
اتخاذ ایدن قبائل یاقشیه نك یا خود قبائل مذکوریه نسبتله اراضیء مرقومه نك  
نام عتیقیدر بو نام مؤخرأ مرکزى هرات اولان ( سبختان )  
قطعه سنه دخی و یرلدی . مقدا ( پیشدادیان ) سلالهء حکمرانیسی  
تشکیل ایدن اولاد ( عیلام ) دخی بونلر ظن اولنیور . اریازک بر یسوک  
فرقه سی ( ۳۱۹۴ خ ) نارینخنده یعنی میلادک ایکبیک در تیوز سنه مقدمنده بلاد  
آتوریه بی استیلا و ( آریا ) نامیله بر حکومت تشکیل ایدوب ایکوز سنه صکره  
ثورانیلر معرفتیه منقرض اولدیلر . اشته محبوس مذهبی عراق عربه کتورن  
بونلردر و ممالک سائر هیه انتشار لری ( ابراهیم ) علیه السلام زمانندن  
صکره جه در . ایران نامی اریادن مأخوذ و محرف اولق کرک . ( ایران )  
کله سنه دخی نظر یور یله .

§

﴿ اریحا ﴾ — فلسطینده اردن نهری اوزرنده اسکی برشهردر .  
 بوشهر وقتیلہ پک معمور ایدی حضرت عیسیٰ علیہ السلام بورایہ کلوب  
 بر اعمانک کوزینی آچدی .  
 شمعی قرق الی التمش خانہلی بر قریہدر و اوروپالور بیندہ ( چریقو )  
 نامیلہ مشهوردر .

§

﴿ آریوس ﴾ — خرسیتیان پاپاسلرننددر واصلی اسکندریہ لیدر .  
 بوذات کتب عقائد نصاریٰ تدقیق ایدرک ( ۳۰۰ م ) تاریخندہ بر مذهب  
 جدید اعلان ایلدی و بو مذهب سائر پاپاسلرک حسابنه موافق  
 کلدیکندن ( ۳۲۵ م ) تاریخندہ موئی الیہی ازنیق جمعیت رهبانیہ سنہ  
 کتوردوب بر چوق مباحثہدن صکرہ مذہبنی رد و کندوسنی ضرب  
 وانا طولی ایچنہ طرد ایلدیلر .

بونک اعلان ایتدیکی مذهب جناب حقک خالقیتنی و حضرت عیسیٰ علیہ السلامک  
 صفات آلہیہ مظهریتلہ برابر مخلوقیتنی و روح القدس بر بشقہ جوهر  
 ایدوکنی تصدیق اساسلرنندن عبارت ایدی . استانبول ایمراطوری  
 قسطنطین مؤخرآ موئی الہک ذہابنی تصدیق ایدرک اطلاق و اسکندریہ  
 عودتنی فرمان ایلدیسده بیچارہ اسکندریہده پاپاسلرک تحقیرینہ تحمل  
 ایدہمدیکندن استانبولہ ہجرت و براز صکرہ مسموماً آخرتہ رحلت  
 ایلدی . اشبو آریوس مذہبی اولوقت غوتلر و واندالر و بورغونلر  
 ولومباردلر طرفندن قبول اولنہرق ( ۶۶۰ م و ۴۰ هـ ) تاریخندہ قدر دوام  
 ایتمش و صکرہ متروک اولوب مؤخرآ ( اونیر ) و ( سوسی ) ناملریلہ  
 ینہ تجدد ایلشدر . اعتقاد کلمہ سنندہ اون التنجی فرقہ خرسیتیانہ  
 نظر بیوریلہ .

§

﴿ آزاد ﴾ — نجبای اصحاب کرامدن فیروز الدلی حضرتلرینک  
 عزادہسی اولان صنعا والیسی ( شهر ) ابن بازان حضرتلرینک زوجہ  
 محترمہ سیدر . اواخر عصر سعادتہ دعواۓ نبوتلہ یمندہ ظهور و اکثر  
 ممالک یعنی استیلا ایدن ( اسود عنس ) نام خبیث والی مشار الہی شہید

ایتدکن صکره زوجہ سی مشار الیہابی جبراً تزوج ایتشیدی مؤخرا  
مرقوم اسودک بر تقریب اخذ واعدامی خصوصنی علیہ الصلوٰۃ والسلام  
افندمن انباردہ بولنان (ابن عبد یغوثہ) فرمان بیوردی واول دخی  
مشار الیہایہ خفیاً آدم کوندروب استعانہ و موافقتنی استحصال ایلدکن  
صکرہ بر مقدار فدایی کوندردی و بوفداییلر بر کیجہ مشار الیہانک تدبیر  
ودلائیلہ اسودک یاتدیغی قصرہ کیروب خبیثی باغرتہ باغرتہ اعدام  
ایتدیلر • (بازان) و (اسود) کلہلرینہ دخی مراجعت بیوریلہ •

§

﴿از باندوت﴾ یاخود (از باندیت) — اعصار سابقہ دکر

خرسزلغی ایدنلرہ ویریلور بر نام ایدی • فرمانلی حیدود معناسنہ  
ایتالیانجہدن مأخوذدر • بعض ممالک عثمانیہ دہ قوتلی و خائن قیافتلی  
آدملرہ از باندوت کبی بر حریف دیرلر • ترکیجہ سی (ظہر)

§

﴿از درہان﴾ — بحر حزرک غرب شمالیسندہ وولغانہرینک

بحر مذکورہ منصب اولدیغی محلدہ روسیہ دولتنگ بر ولایتی مرکزیدر •  
بو شہر روسیہ و بخارا و ایران و ہندستان تجارتلرینک موقع اخذ و اعطاسی  
اولوب اوچ عدد بازارینک بری روسیہ و دیگر ہندستان و اوبری ممالک ساثرہ  
امتہ سی اخذ و اعطاسنہ تخصیص اولمشدر • ولیمانی غایت کوزل و مہمدر  
واہالیسی قرق بشیک رادہ سندہ ایسہدہ اکثریسی حال بدو یتدہدر •

اشبو ولایت برمدت قریم تاتارلرینک مسکنی اولہرق خانلق و جہلہ ادارہ  
اولنوب (۱۵۵۴ م و ۹۶۲ ھ) تار یخندہ روسیہ یچدی واون بش سنہ  
صکرہ دولت علیہ طرفندن محاصرہ اولندیسہدہ فحقی ممکن اولہمدی •  
(از درہان) حاجی ترخانک غلط وز بازدیدر •

§

﴿آزر﴾ — ابراہیم علیہ السلامک پدری (تارخ) ک لقبیدر •

بولقب کندو صحنہ نسبتلہ ویرلش ایدی •  
سوق الہواز ایلہ (رامہرمز) آرسندہ واقع بر ناحیہ نک اسمی دخی (آزر) در

§

﴿ آذربایجان ﴾ — ایران ممالکنک غرب شمالیسندہ و روسیہ دولت علیہ حدودی اوزرنده بر قطعہ جسمہ در . و مرکز ادارہ سی ( تبریز ) شہری اولوب ( خوی ) و ( سلماس ) و ( اردبیل ) و ( عجان ) و ( مراغہ ) ممالک مشہورہ سیندندر . بو قطعہ دہ مقدا درت ملیونہ قریب اہالی موجود ایکن اوغرا دیغی انقلابات مناسبتیلہ شمدی بر بچق ملیونہ تنزل ایلدی .

بورادہ پک اعلا تیمور و باقر و طوز معدنلری واردر و قابلیچہ لری خستہ لره نافعدر . ازربایجان ( ۷۰۶ م و ۸۸ هـ ) تاریخندہ یداسلامیانہ یکدی و سلطان ( مراد ثالث ) و سلطان ( سلیم اول ) حضراتی طرفندن کرکی کبی تہدید و بر قاچ دفعہ استیلا اولندیسده محافظہ سی ممکن اولہندی . ( آذربایجان ) نامنک ( آتروپاتان ) ننگ غلطی اولدیغنی و آتروپاتان اسکندر رومی جنرالرندن بر شخص ایدوکنی بعض مورخین بیان ایدہ یور .

§

﴿ ازقون ﴾ — بینالنصراری ( سن ) یعنی عزیز و محترم عد اولنان کسہ لردن بر یدر . بو ذات سریانیچہ یازدیغی بر موعظہ سندہ . اصحاب کھفک احوالی بیان ایتدی و ( ۳۶۱ م ) تاریخندہ وفات ایلدی . ایوم سنہ دہ بر کرہ یورطیسی طوتلمقدہدر .

§

﴿ ازمید ﴾ — مرمرہ دکزینک جهت شرقیسندہ ینہ بو ناملہ مشہور کورفزک نہایتندہ و ساحل بجرده بر سنجاق مرکز یدر . بوراسنی ( سلطان اورخان ) امراسندن اچہ ( قوجہ ) نامندہ بر قهرمان مدت مدیدہ محاصرہ ایتدیکیچون سلطان مشارالیه حضرتلری ( ۱۳۲۷ م و ۷۲۷ هـ ) تاریخندہ فتح ایتدکده قهرمان موئی الہک نامنی و یردی یعنی قوجہ ایلی تسمیہ ایلدی . ازمیدک هواسی جوارنده اولان بتاقلقلر مناسبتیلہ براز آغرجہ ایسده اسکله سی غایت ایشلک و معتبردر . و درت بیک خانہ سی و سکز جامعی و درت جامی و بر کوزل چارشوسی و ترسانہ سی واردر و اراضیسی محصولدار و اورمانلری زنکین و معدن صولری اعلادر و استانبولدن بر شمندوفر ایشلکدهدر .

ازمید ( ۴۰۳۵ خ ) تاریخنده یعنی میلادك بیک بشیوز الی طقوز سنه  
مقدمنده یونانیرك معرفتیه انشا و ( نیقومیدیا ) تسمیه اولندی و ( ۱۲۰۴ م  
و ۶۰۱ هـ ) تاریخنده و ندیک و فرانسز غاصبرلی استانبول ایمراطورینه  
معاونت بهانه سیله کلوب استانبولی ضبط ولاتین حکومتی تشکیل ایتد کبری  
زمان استانبول هیئت حکومتی ازمیده کیلوب اوراده الی یدی سنه  
حکومت سوردی و صکره ینه استانبوله کلدی . دیگر روایته کوره  
هیئت مذ کوره اولوقت ( ازنیق ) ی مقر حکومت اتخاذا تمشیدی .

§

﴿ازمیر﴾ — بحر سفیدك جانب شرقیسنده و چناق قلعه سی  
بوغاز ینك جهت شمالیسنده انطولینك مشهور اسکله سی وایدین ولایتك  
مقر اداره سیدر . ازمیر شهرنده اوچ عدد کبیر و بر چوق صغیر جوامع  
و مساجد شریفه و یدی سکز عدد جام و یکر می اوتوز مکتب و بر قاچ  
کلیسا و بر قشله و متعدد چارشو وفرنکخانه وایدین والا شهره کیدن  
شمندوفرلرک مرکز لری و ساحلنده مکمل بر ریختمی و خسته خانه لری واردر  
و اراضی غایت منبت و محصولداردر و هر درلو جوبات و میوه و سبره  
وافیون و بویا و اویک و پلاموط و زیتون تیشور و کیتلو قوری اوزوم  
وانجیر چیقار و اهلالیسی مسافرین ایله برابر ایکی یوز بیک تخمین اولنور.  
ازمیر شهری ( ۴۵۷۹ خ ) تاریخنده یعنی میلادك بیک اون بش سنه  
مقدمندن صکره جه ( ایثونی ) اتحادی ممالکندن معدود ایکن لیدیلر  
طرفندن تخریب اولنوب اسکندر رومینك و فاتندن صکره ( انتی غون )  
نام حکمدار معرفتیه اعمار و ( لیزیماق ) یدپله توسیع اولندی ودها صکره  
( پرغام ) و زوما حکمدار لری یدینه و ( ۱۰۸۴ م و ۴۷۷ هـ ) تاریخنده  
سلچوقیلر یدینه کچوب بر قاچ دفعه روملر طرفندن استرداد ایدلدی  
و ( ۱۴۰۲ م و ۸۲۸ هـ ) تاریخنده سلطان مراد ثانی ضبط ایتدی .

ازمیر اهالی قدیمه سنك ایاسلوغدن هجرت ایتدیکی واسکی ازمیر ازمیرك اوچ  
بچق کیلومتر و کیر و سنده اولوب شمدی ناموجود ایدوکی بعض توارینخده  
کورلمشدر . ازمیر لیمانك طولی الی و عرضی یکرمی کیلومتر ودر .



﴿ آزناوور ﴾ — کورجی قبائلندن (دادیان) یاخود (متقریل) دنیلان قبیله نك رؤسا و معتبرانه مخصوص بر عنواندر . بو قبیله خلقی ایوم چور کصو ایله صخوم اراسنده ساکن اولورلر . بونلر مقدا بر قاچ دفعه ایران و قریم و دولت علیه جایه سنده بولنوب اک صکره روسیه جایه سنی قبول ایتدیلر . ماردین سنجاغنده بر ناحیه نك اسمی دخی (ازناوور) در .

§

﴿ ازنیق ﴾ — زبازدی (چینی ازنیق) دن غلط اوله رق (چیزلیک) در بو شهر بروسه نك الی کیلومتر و شرق شمالی سنده و یکی شهر سنجاغی داخلنده و اهالیسی بشیک راده سنده در و معمولاتی عادی قالیچه و آوانی تراپیه دن عبارتدر . بوراسی و قتیله معمور بر شهر ایدی بر مدت روم ایمپراطور لرینه پای تخت اولدی . ازنیق سلطان اورخان حضرتلر نك شهزاده سی (سلیمان چلبی) معرفتیله (۱۳۳۰ م و ۷۳۱ هـ) تاریخنده فتح اولمش و سلطان مشار الیه پای تختی بورایه نقل ایتشددر . (اشرف رومی) حضرتلر نك تر به شریفه سی ازنیقک برنجی زیارتکاهیدر ازنیق کولنک دوره سی یکر می ایکی ساعت و اطرافنده کی قریه لر یکر می ایکی عدددر . و قتیله بوراده (اعلا چینی) پیارلر ایدی حتی در سعادتده و بروسه ده و سائر محالرده اولان جوامع شریفه دیوارلرنده کی چینلر بتون بورانک معمولاتنددر .

§

﴿ آزوت ﴾ — یونانجه (هواء مماتی) معناسنه — بر ماده هوائدر (۱۷۷۵ م و ۱۱۸۹ هـ) تاریخنده (روترفور) یاخود (لاوازیه) نامنده بر ذات معرفتیله کشف اولندی . بوغاز هوای نسیمی ترکیبنده بشده درت نسبتنده بولمغله ایچنده یشاد یغمز هوانک بر جزو اصلیمی دیمک اولور و استحصالی هوای نسیمیدن اولدیغی جهتله رنگ و رایحه و لذتی یوقدر ثقلت اضافیه سی (۰,۹۷۱۳) مقدارنده اولوب منفرداً اشتعال و تنسمه غیر صالح و بناء علیه دروننده ذی روحک هلاک و آتشک منطقی اولدیغی مثبت و واضحدر . بو هوا علی الاکثر بعض متروک قویی و مغاره لرله معدن

اوجاقرنده موجود اولدیغندن اویله محلله کیدرکن برابر یئار موم کوتورلنز و موم سویندیگی کبی عودت ایدلرسه موت مقرردر . آزوت حیوانات و نباتاته دخی بولنور .

§

﴿ آزه نور ﴾ — افریقادن (۴۰۳۶ خ) تاریخنده یعنی میلادک بیک بشیوز الی سکر سنه مقدمنده سوریه ساحلنه کلوب (فیکه) حکمدار لغنی احراز ایدن ذاتدر . بونک اورویا نامنده اولان قزی غایت کوزل اولدیغندن اورویا قطعه سنه غایت کوزلکنندن کنایه اوله رق انک نامی ویرلدیگی بعضی تواریخده کوریه یور .

§

﴿ آسا ﴾ — (۴۶۵۰ خ) تاریخنده یعنی میلادک طقوز یوز قرق درت سنه مقدمنده قدس شریفده حکومت ایدن یهودا ملکرندن بریدر . چوقدنبرو پتپرستلکه و هر درلو فسق و فجوره آله شمش اولان ملتنی اصلاحه و سوریه ده (ارام) حکمداری اولان (ابن هداد) ایله اتفاق ایدرک حکومت اسرائیلیه نک مقدا تبعه سنی قدس شریف و بیت مقدس زیارتندن منع ایچون یایدیردیغی (رامه) معبدینی هدمه موفق اولدی و حبشیلرک بر میلیون عسکر ایله ایتدیگی هجومه قارشو اوچیوز بیک قالقان و مزر اقلی یهودا و ایکیوز سکسان بیک مزر اقل و اوق یاییلی بنیامین عسکر یله میدانه چیقوب حبشیلری رجعته مجبور ایتدی و اهلینک امنیتی ایچون اطرافی حصارلی بر چوق شهرلر یایدیردی . مومی الیهک سلطنتی قرق سنه در . (عیسی) اشبو (آسانک) معربی اولق کرک . ترچکھ سی (آسه) .

§

﴿ آسارخادون ﴾ — ایکنجی آثور دولتی حکمدار لرندندر . بونک ایکی قرن دانی پدرلری مشهور سناخریبی سلطنت طمعیله اعدام و فرار ایلدیگی جهته میدان کندوسنه قالب (۴۹۱۸ خ) تاریخنده یعنی میلادک الی یوز یتش الی سنه مقدمنده تخنه جلوس ایلدی و برمدتنبرو قطع رسته تابعیت ایدن بابل و مصر و حبشستان اهلینسی تأدیپ و اصلاحه و فیکه بی استیلایه موفق اولدی و برسنه صکره یهودا ملکی (منشا) تک اوزرینه

هجوم ایدرک قدس شریفی آلوب ملک مزبوری بر طاقم معتبران ایله بابه کونردی و بلاد یهودیه و اسرائیلیه (سااوسدوخوس) نامنده برکلدانی والی نصب ایتدی و بو والی بر مدت صکره استقلاله قالفیشوب بیچاره یهودیلری درلو دراو بلاره اوغراتدی. یهودیلرک بیوک تغریبی بوندن یتش سنه صکره ایکنجی بخت نصر زمانده در.

§

﴿اساطیر﴾ — افسانه مقوله سی دوزمه حکایه لر و داستانلر و پریشان سوزلر دیمکدر اسرائیلیات کبی. روی ارضده حکومتلر تشکل ایتکه باشلادیغی زماندن روما شهرینک تأسیسنه یعنی میلادک یدیوز اللی اوج سنه مقدمنه قدر مرور ایدن زمانه مورخین (ازمنه اساطیریه) دیرلر زیرا بو زمانک بر مکمل تاریخی اولدیغندن اکثر وقوعاتی اساطیردن التمش ایدی (افسانه) کله سنه دخی نظر بیوریه.

§

﴿آسام﴾ — هندچینیده غرباً بنکاله و شرقاً چین ایله محدودانکلتره مستملکاتندن بر قطعہ جسمیه در اشبو قطعہ نک یاغموری پک چوق اولدیغندن دائماً صو باصار و کافه سی مجوسی اولق اوزره نفوسی برملیونه قریب تخمین اولنور و بیوک طاغیر ایله محاط بر اووه اوزرنده اولان مرکز اداره سنه (جوجه) دینور و اراضیسندن بو روزنجفیل و پاموق و اپیک و مسک کبی شیر و حبوبات ساثره یتیشور. بوراسی مقداگاه مستقلاً اداره اولنور و گاه فلنک دولتی جایه سنده بولنور ایکن انکلیرلر (۱۸۲۶ م و ۱۲۴۲ هـ) تاریخنده استملک اتمشدر.

§

﴿اسپارت﴾ — نام دیگر (لاکه دیمون) — موره شبه جزیره سنک جهت شمالیسندن اسکی و مشهور بر جمهوریتدر. بو جمهوریت و قتیله یونانستانک اکتقتدر بر جمهوری و اهالیسی اکتشید و شجیعی و وطنلرینک فوق الغایه محبی ایدی اسپارتلورلرک پک مختصر سوز سویلکه مجبوریتلری الیوم اوروپاده مشهوردر اسکی اسپارت شهری (۳۸۸۴ م خ) تاریخنده یعنی میلادک بیک یدیوز اون سنه مقدمنده (ایناکوس) سلاله سندن

(اسپارتوس) نامنده بر حکمدار معرفتیه یاپیلوب یوز طقسان درت سنه صکره مصرلی حکمدار (له کس) یدبله توسیع و اعمار اولندی و شدتله مشهور اولان (لیقورغ) قانونی (۷۳۸ خ) تاریخنده حکومتک جمهوریه تحویلبله برابر نشر ایدلدی اسپارت شهر عتیقنک خرابه سی اوزرینه مؤخرأ یکی اسپارت شهری یابلس و موره یونان دولته کچد کدنصکره شهر جدید مزبور (لاقونیا) سنجاغنه مرکز اولشدر. اسپارتلورک (مسه نیا) لورله آچدیغی برنجی محاربه یکریمی سنه سوروب مسه نیالورک مغلوبیت و اسارتبله نهایت بولدی و کندولری رومارک یونانستانی دور استیلاسنده منقرض اولدی. (لیقورغ) کلمه سنه نظر بیوربله.

§

﴿ اسپارته ﴾ — قونیه نك جانب غربیسنده و قرق بش ساعت بعدنده بر سنجاق مرکزیدر بوراسی وقتیه امرای سلچوقیه دن و حیدبکک بروجه مالکانه تحت تصرفنده بولندیغندن الیوم حیدایلی و حید سنجاغنی نامیه دخی یاد اولنور اسپارته ده اون اوج جامع و التمش اوج مسجد شریف و طقوز مدرسه و برقشله و اون ایکیبیک نفوس واردر هواسی غایت لطیف و معتدلدر و هر درلو محصولدن بشقه اعلا بادم دخی چیقدیغندن یاغیله کایتلو تجارت اولنور. اسپارته و قره اغاج ویلواج و یکیشهر وسیدی شهری ناحیه لرینی سلطان مراد اول حضر تلی (۱۳۸۱ م و ۷۸۳ هـ) تاریخنده حیدبک زاده لردن حسین بکدن مبیعه ایتدی زیر اناوای مذ کوره قرمان امارتنک ایکیده برده تسلطندن قورتبله میور ایدی. خواجه منصور عطار حضر تلی بوراده مدفوندر.

§

﴿ اسپانیا ﴾ — اوروپای جنوبیده بر حکومت جسمیده در حدودی شمالاً غاسقونیا کور فزی و فرانسه ممالکی و شرقاً بحر سفید و سبته بوغازی و غرباً بحر محیط غربی و پورتکیز ممالکیدر و مجموع نفوسی اون التی ملیون التی یوز بیک راده سنده در و اراضیسی عموماً منبت و محصولدار ایسه ده بحر محیط غربی جهتی پک صیحا قدر. اسپانیا ممالکینه ابتدا فنیکه لیلر و صکره یونایلر و قرنا جلیلر و دها صکره یعنی

(۵۲۶۹ خ) تاریخنده رومالیر مالک اولوب (۴۰۹ م) تاریخنده واندا لره ووز یغوتلره انتقال ایلدی و (۷۱۰ م و ۹۲ ه) تاریخنده عساکر اسلامیه ووز یغوتلری شماله طوغری سوروب بر حکومت اسلامیه تشکیل ایلدی و بر حکومت اون برسنه ظرفنده پک چوق ممالک ضبط ایتد کدنصکره فرانسه ممالکندن اولان (ارپونه) و (قرقشونه) و (نیم) و (لیون) و (اورغوسترون) و (طور) شهرلینی آلدی لکن (پوواتیه) محاربه سنده بر بیوک بوزغون و یردی و (۷۵۶ م و ۱۲۹ ه) تاریخنده عبدالرحمن الامونیک ورود و جلوسیه شامده اولان خلفای عباسیه نك جایه سندن قورتلدی و (۹۱۲ م و ۳۰۰ ه) تاریخنده جلوس ایدن قهرمان زمان سلطان عبدالرحمن بین الولاة موجود اولان شقاقی بر طرف ایتد کدن صکره فاس حکومتی دخی زیر جایه سنه ایلدی و (۹۸۰ م و ۳۷۰ ه) تاریخنده صدر اعظم (محمد المنصور) قشتاله سنجاغنی آورده قبضه تسخیر و لیونی تکرار محاصره ایلدی سه ده وفاتندن صکره ینه اختلالات داخلیه باش کوستر مکّه و هر والی کندوسنی بر حکمدار طانیوب مرکز سلطنتی طانیماغه باشلادیغندن بالجمله اندلس ممالکی طوائف ملوک هیئته کوروب اون عدد حکومت صغیره یه منقسم اولدی و بو حال اوزره اره دن خیلی زمان کچوب تاریخ (۱۱۹۰ م و ۵۸۶ ه) یه بالغ اولدقده پورتکیر جهتی ویکرمی اوچ سنه صکره فرانسه و ایتالیا و المانیا و لیون قرالری نیک بالاتفاق هجومیله (طلیطله) و (طالوزه) سنجاقلری الدن چیقدی و وقوعبولان غوغالرده متفقین عسکرینک انه کچن اسرای اسلامیه دن هیچ بری صاغ قورتلدی و معهود (انکیرسیون) جمعیت ظالمه سی تشکیل اولندی و (۱۴۷۹ م و ۸۸۴ ه) تاریخنده اراغون قرالیچه سیله نوار قرالی فردیناند ازدواج و مملکتلرینی اداره ده اشتراک ایلد کدرندن اندلس حکومت اسلامیه سنک آتیبی قرانلقلشدی و اک صکره تخته جلوس ایدن (عبدالله الصغیر) ایله عمیسنک سلطنت دعواسندن تولد ایدن اختلال (۱۴۸۶ م و ۸۹۲ ه) تاریخنده هر طرفدن مترصد فرصت اولان اعدایه جسارت و یردیکه کنی التی سنه صکره مر قوم عبدالله الصغیرک عمیسنه قارشو سلطنتدن دور اولماق ایچون قرال فردیناند ایله ایتدیکی مقاوله بتون بتون

اسلامك عجزینی کوستردیکندن مرقوم فردیناند مقاوله دو جنبه همان  
 غرناطه بی ابلوقه ایدرک ایچرو کیزوب طقوز یوز قدر سنه لک بر دولتی محو  
 ومنقرض ایلدی . ( ۱۸۰۸ م و ۱۲۲۳ ه ) تاریخنده فرانسه قرالی ناپلیون  
 بوناپارت اسپانیا ممالکنی برادری ( ژوزف ) ه احسان ایلدیکندن دولایی  
 ظهور ایدن محاربات تمام التی سنه سوردی و ( ۱۸۷۳ م و ۱۲۹۰ ه ) تاریخنده  
 قراللق استیان قارلیست طاقنک یکی تشکیل اولنان جمهوریت علیهنه  
 چیقاردقری اختلال اسپانیا دولتنی برایکی سنه مشغول ومضطرب ایتدی .  
 اسپانیا دولتک شمذیکی قوت ومکنتی ایچون ( حکومت ) کله سنه ونام  
 عتیقی ایچون ( اپیریا ) کله سنه نظر بیور یله .

§

﴿ اسپرودوز ﴾ — علمای نصارا اندر . بو ذات جناب ( یسوع )  
 علیه السلامه اعتقادی فوق العاده اولدیغندن اعزهدن صاییلور وملتی بینده  
 پک معتبر و محترم طوتیلور ایدی . مسقط رأسی اولان قبر یسده وفاتی  
 ( ۳۵۱ م ) تاریخنده در .

§

﴿ استاروه ﴾ — کسریه سنجاغنده بر قضا مرکز یدر و ( اوپاره )  
 ناحیه سیدر . اشوشهرک اوکنده بولنان کولک ایچنده شرفه سندن  
 یوروسی کورینور برمناره موجود اولدیغنه نظراً وقتيله بو کولک یرنده  
 بر مملکت اولوب صکره منخسف اولدیغی اکلاشیلور .

§

﴿ استانبول ﴾ — دولت علیه عثمانیه نك پای تختیدر بو شهر  
 قرق بر درجه عرض شمالی و یکریمی التی درجه طول شرقیده اولوب  
 اسکدار و غلطه و ایوب ونواحی سائرهنده مسافر لایله برابر بر ملیونه  
 قریب اهالی تخمین اولمخده در هواسی غایت لطیف و خفیف و اطرافنده  
 اولان صحرازی و مسیره لری و ازچله اطهر وقاضی کوبی وچاملیجه  
 وبوغاز ایچی کبی ستملری پک کوزل و مفرحدر وموقعی ایجابنجه اکثر طرفلرنک  
 اینده سی طبقه طبقه انشا اولنش اولدیغندن دکر طرفندن منظره سی غایت  
 یاقیشقلیدر وقره دکر بوغازی متعدد قلعه لر وطایه لرایله مستحکم و لیمانی ککیش

و بتون سواحلی الیوک سفینلر یناشه بیلور صورتده درین وصوینی دایماً جاری وجیددر.

استانبول قره دکره ایشلیان سفاین تجاریه ننگ ممری و ممالک دولت علیه ننگ برنجی تجارتکاهی ایسه ده تجارتک اکثریسی اجانب النده در. بوغاز ایچی واسکدار وقاضی کوی و اطهر و ایاستفانوس و کوپری ایچی اسکله لینگ اکثریسنه هر کون شرکت خیریه و اداره مخصوصه و ترسانه و اپورلری ایشلر و استانبولدن غلطه طرفنه تمید اولنان ۵۱۵ و ۴۷۰ متر و طولنده ایکی عدد تیمور کو پرلردن هر کون علی النخمن یتیم سکان بیک آدم کلور کچر و غلطه قره کوی قپوسندن مولو یخانه یه یاپیلان طونل واسطه سیله کل یوم تخمیناً اون بیک ادم اینر چیقار وروم ایننه و ازمیده ایشلیان ایکی شمندو فر ایاستفانوس و مقری کوی و قزل طوپراق و فنار کبی یول اوزرنده بولنان جوار قرا استاسیونلرینه کونده براقچ سفر ایدر و غلطه یه اوچ درت ساعت بعید محالرده دولت عثمانیه ننگ استانبولی پای تحت اتخاندن بر و یاپلش اولان یدی عدد جسیم بندلردن بیوک یولر و کرلر واسطه سیله اعلا ولذید صولر کلور. استانبولده موجود اولان اثار عتیقه دن سلطان احمد میدانده کی ایکی عدد دیکیلی طاش و توجدن معمول بورمه لی دیرک و سلطان محمود تر به سی جوارنده کی چنبرلی طاش و فاتح جوارنده قزطاشی و فضلی پاشاده یرالتنده بیک بر دیرک و ایاصوفیه ده یره بتان و (۱۴۴۶ م و ۸۵۰ هـ) تاریخنده جنویزلرک یاپدیغی غلطه قله سی و دولت عثمانیه ده خیلی زمان حبسخانه اولان یدی قله و قز قله سی و ایاصوفیه و قعریه و فتحیه وزیرک و کل جوامع شریفه سی و اناطولی وروم ایلی حصارلری و تکفور سرایی شایان تماشادر.

استانبول (۴۹۳۶ خ) تاریخنده یعنی میلادک التی بوز الی سکزسنه مقدمنده (مغار بیرانس) نامنده بر حکمدار معرفتیه و یالکز سرای برونی صرتنده اولمق اوزره یاپدیریلوب مقر حکومت اتخاذا و لشمس و (بیرانس) نامی و یرلمش ایلی صکره ایران شاهی دارایه و اندن اسپار تلوره و اندن اتنه لوره کچوب (۵۲۳۶ خ) تاریخنده یعنی میلادک اوچ بوز الی سکزسنه مقدمنده ینه اولکی حکمداران سلاله سنه انتقال ایلدیه ده اشو سلاله دن کلان صوک حکمدار تحت حایه سنده بولندیغی رومادولتنه روی عصیان کوستردیکندن

دولت مشارالیهایمپراطور لرنن مشهور ( سبتیم سور ) آسیا مظفریتندن صکره  
 ( ۱۹۶ م ) تاریخنده کلوب امین او کندن و وزیر خاندن قدرغه لیمانه قدر  
 سور و جوانب سائرہسی بحرایله محاط و محفوظ اولان استانبول قلعه سنی  
 اوچ سنہ محاصره ایله ضبط و تخریب ایلدی . ( اشبو محاصره زمانندہ  
 اہالینک ذخیرہ و حطب کبی حوایج ضروریہ و آلات حربیہ سی تو کش  
 اولدیغندن کلب و کدی و فارہ کبی حیواناتی بتوروب مقتولرک اتلرینی چیک  
 چیک ییہرک و قاریلرینک جانلری کبی صاقدقلری اوکوزل صاحبلیک یلہ صپان  
 اورغانلری یاپہرق مدافعه دہ ثباتلری جای دقت واستغرابدر ) و یوز اوتوز  
 درت سنہ حال خرابیدہ قالبوب ( ۳۳۰ م ) تاریخندہ روما ایمپراطوری بیوک  
 قسطنطنین تعمیر و سورینی دوری اون التی کیلو مترودن عبارت اولان  
 شمذیکی حالہ ابلاغ و توسیع ایله پای تخت اتخاذا ایلدی . و بوتاریخندن اعتباراً  
 ( بیرانس ) نامی ( قسطنطنیویل ) ہ تھویل اولندی و ( ۵۰۶ م ) تاریخندہ  
 ایمپراطور انشطاش بلغارلرک شرنندن قورتلوق ایچون سلوریدن قرہ دکرہ  
 قدر برسور چکدی و ( ۵۵۷ م ) تاریخندہ وقوعبولان بیوک حرکت ارضدن  
 منہدم اولان استانبول سورینی ایاصوفیہنگ بانسی اولان ( ژوستین )  
 تعمیر ایتدی و ( ۵۹۳ م ) تاریخندہ ( آوار ) لر و اوتوز ایکی سنہ صکرہ  
 ینہ ( آوار ) لرلہ عجملر و ( ۶۶۸ م و ۴۸ هـ ) تاریخندہ شام خلیفہ سی  
 یزیدبن معاویہ ویدی سنہ صکرہ بلغارلر و ( ۷۱۶ م و ۹۸ هـ ) تاریخندہ  
 مسئلہ قومانداسیالہ کلان مسلمانلر واندن قرق سنہ صکرہ ینہ بلغارلر واندن  
 یکریمی یدی سنہ صکرہ خلیفہ مہدی تضییق و محاصره ایدوب ضبطنہ موفق  
 اولہ مدقلری حالده ( ۱۲۰۴ م و ۶۰۱ هـ ) تاریخندہ فرانسدن قدس شریف  
 امدادینہ کلان صلیبیلر استانبولده تصادف ایتدکاری سلطنت دعواسنہ  
 مداخلہ و اوسیلہ ایله مملکتی ضبط ایدرک برلاتین حکومتی تشکیل  
 ایلدیلر فقط انلر دخی الی یدی سنہ دن زیادہ طورہ میوب و سلطان اورخان  
 و یلدریم بایزید و سلطان مراد حضراتی دخی بررکرہ طالعیرینی دنہ یوب  
 نہایت ( ۱۴۵۳ م و ۸۵۷ هـ ) تاریخندہ سلطان محمد ثانی حضرتلری فتحنہ  
 موفق اولدی . استانبولہ بعضیلری اسلامی بول معناسی ویرہ یورلرایسہ دہ  
 صحیح دکدر صحیحی یونانجہ ( مملکتہ ) معناسنہ اولان ( ایستین پولین ) دن



مأخوذ اولسيدر . ( قاضی کوی ) ( بندر ) ( ایاصوفیه ) ( دیکیلی طاش )  
( چنبرلی طاش ) کلمه لرینه دخی مراجعت بیور یله .

استانبول و بلاد ثلثه و حوالیسندنه معمور و موجود اولان جوامع و مساجد  
و مدارس و خانه و دکان و سائره

۶۹۳۲۰	خانه و پیکار اوطله لری	۰۲۳	التي درت ایکی مناره لی جوامع
۳۹۳۰۰	دکان و مغازه	۴۳۹	سائر جوامع و مساجد
۰۰۳	کمرلی چارشو	۰۱۵	محاکم شرعیه
۰۰۴	بدستان	۰۶۰	مدارس
۰۶۷	فابریقه	۱۹۳	تسکایا وزوایا
۰۲۱	سفارتخانه و قونسلو سخانه	۰۲۳	دوائر میریه
۰۰۲	شهندوفر مرکزی	۰۲۲	قشله
۰۰۱	طونل	۴۱۱	مکاتب عسکریه و ملکیه و سائره
۰۴۶	مسیره لر	۰۴۵	کتبخانه
۰۳۳	مشهور میدانلر	۰۱۹	خسته خانه و اسپتالیه
۰۵۵	مشهور یقوشلر	۰۸۵	کلیسا
۰۶۹	اسکله لر	۰۲۸	حاوره
۰۲۲	کوپر یلر	۳۹۲	خان و هوتل
۰۰۷	صوبندلری	۱۶۹	حمام
۲۰۵۰	بغچه و بوستانلر	۰۰۵	تیاترو خانه
۰۰۱۸	چفتلکلر	۰۱۰	دوائر بلدییه
۴۷۹۹	باغ و ترلا و چاپلر	۵۲۸	محلات

ملوك امويه زماننده استانبولك فتحی ایچون کوندر یلان عساكر اسلامیه نك  
قوماندانی بولنان ذاته مرجع و مشاور اولسق اوزره بوزایه یکریمی اوتوز  
قدر اصحاب کرام تشریف بیورمش ایسه ده ابا ایوب الانصاری  
حضر تزلندن ماعداسنك حقیقه کیملر اولدیغی معلوم دکلدر مع مافیه  
زیرده محرر الاسامی اصحاب و تابعین رضوان الله تعالی علیهم اجمعین حضراتنك  
مقامات جلیله لری اشارت اولنان محللرده ایبدوکی اخیراً ظن و تخمین اولتمش  
و مقامات مذکوره و مر اقداعنه سائره زیارتگاه انام بولنمشدر .

استانبول و بلاد نثه ده اولان زیارتگاهلر

سرای جدید دروننده

اسکی علی پاشاده

ایوبده

ایوبده چنار نام محله بکک دکرمان قربنده

ایوبده زال محمود پاشا جامعی قربنده

عبد الودود محله سنده باب الانصاری قربنده

اکری قیو خارچنده مقبره جوارنده

اکری قیو ده قیو ارسنده

خواجه قاسم جامعی قربنده

اکری قیو داخنده روم کلیسای جوارنده

ایوانسرای قیوسی داخنده

ایوانسرایده طوقلی دده جوارنده قلعه اتصالینده

ایوانسرای قیوسی داخنده جامع دروننده

چنارلی چشمه ده والده جامع شریفی خارچنده

اکری قیو داخنده شیشه خانه قربنده

سلطان حامی جوارنده قریه جامعی قربنده

سلطان حامی کلنجی دروننده

قورشونلی محزن جامعی دروننده

قورشونلی محزن جامعی دروننده

قورشونلی محزن جامعی دروننده

اکری قیو خارچنده

میدانچی جامعی قربنده وحسن حسین قیوسنده

قوجه مصطفی پاشا جامعنده مقام

قوجه مصطفی پاشا جامع شریفی حولیسنده

قوجه مصطفی پاشا جامع شریفی حولیسنده

زندان قیوسی داخنده

بالقلی جوارنده

مولویخانه قیوسی خارچنده

ایوب اوزرنده نشانچی محله سنده

شمس الدین سیواسی حضرتلری جوارنده

خرقه سعادت و اماژت جلیله

خرقه سعادت

اصحاب کرامدن خالد بن زید حضرتلری

اصحاب کرامدن کعب حضرتلری

اصحاب کرامدن ابوالدرداء حضرتلری

اصحاب کرامدن محمد الانصاری حضرتلری

اصحاب کرامدن عامر عبدالصادق حضرتلری

اصحاب کرامدن حافر حضرتلری

اصحاب کرامدن عبدالله الانصاری حضرتلری

اصحاب کرامدن عبدالله الحدری حضرتلری

اصحاب کرامدن ابوشیبة الحدری حضرتلری

اصحاب کرامدن حمدالله الانصاری حضرتلری

اصحاب کرامدن جابر حضرتلری

اصحاب کرامدن ابوذر غفاری حضرتلری

اصحاب کرامدن شعبه حضرتلری

اصحاب کرامدن ابوسعید الخدیی حضرتلری

اصحاب کرامدن عبدالله بن حسام حضرتلری

اصحاب کرامدن عمرو بن العاص حضرتلری

اصحاب کرامدن وهب بن هشیره حضرتلری

تابعیندن سفیان بن عتیبه حضرتلری

اصحاب کرامدن اسامة ابن زید

تابعیندن حسن حسین رضی الله عنه

مقام امام حسین رضی الله عنه

همشیره جناب حسین (شهر بانو) خاتون

دایه خاتون زوجه جناب جابر رضی الله عنه

بابا جعفر الانصاری ومهتدی علی

سید نظام الدین حضرتلری

مرکز افندی حضرتلری

شمس الدین سیواسی حضرتلری

قطب جهان نوری افندی حضرتلری

ایوب اوزرنده تنگه مخصوص دروننده  
 قاریاغدی تپه سنده  
 ایوب جامع شریفی دیواری اتصالننده  
 کروش صوبی بایرنده  
 فاتح جوارنده  
 عاشق پاشا محله سنده  
 سلیمانیه جوارنده  
 ایوبده بلبل دره سنده  
 قاسم پاشاده اوزون یولده  
 ترسانه زندانی آرقه سنده طومیز دره اوزرنده

سلوری قپوسی داخلنده چاده ده  
 قوجه مصطفی پاشا جامع شریفی دروننده  
 قزه کمرک درت یول اغزندن  
 یادود اسکلک سنده  
 حضرت خالد تر به سی اتصالننده  
 اوتاقچیلر حامی قارشو سنده  
 منزویده کیک چایی اوستنده  
 ادرنه قپوسی خارچنده منزوی چاده سنده  
 حاجی جوارنده  
 حلپی جوارنده

حلپی جوارنده  
 حلپی جوارنده  
 ادرنه قپوسی خارچنده  
 ایوانسرای قپوسی اتصالننده  
 غلطه مولویخانه سی دروننده  
 زیرک یقوشی باشنده  
 سید احمد البخاری تر به سی جوارنده  
 سید احمد البخاری تر به سی قارشو سنده  
 فاتحه بویاجی قپوسی چاده سنده  
 شهراده باشنده

چهارشنبه بازارنده  
 اسکی علی پاشا حامی قارشو سنده

شیخ مراد نقشبندی حضرتلری  
 کاشغری عبدالله افندی حضرتلری  
 کوچک امیر افندی حضرتلری  
 خواجه سلیم وحاجی حسام افندی  
 سید احمد البخاری حضرتلری  
 شیخ الهی و شیخ ولایت حضرتانی  
 شیخ ابو الوفا حضرتلری  
 امی سنان حضرتلری  
 حسام الدین عشاق حضرتلری  
 ادریس مختفی حضرتلری

سیف الله افندی حضرتلری  
 سنبل افندی حضرتلری  
 نورالدین جراحی حضرتلری  
 عبدالودود حضرتلری  
 بشیر اغا  
 فراح دده  
 منزوی  
 حلپی ابراهیم افندی  
 علی قوشی  
 ابن کمال

حلوا فروش مصطفی دده  
 ودینلی خواجه  
 شیخ اردبیلی  
 طوقلی دده  
 اسماعیل انقروی  
 سنبللی علی افندی  
 میمی جان افندی  
 قاضی مسکر عبد الرحمن افندی  
 چوبان دده  
 بو قاغولی دده

قوغاجی دده  
 قیون بابا و صابره خاتون

لاله‌لی بابا یا خود لعلی بابا  
 خواجه حزه  
 سوخته سنان  
 یدی امیرلر  
 شهید سکاثر  
 عثمان بابا  
 عثمان بابا  
 بیراقدار بابا

لاله‌لی جامعی صره‌سنده  
 دوه اوغلی بقوشنده  
 سلوکللی چشمه جوارنده  
 فاتح جوارنده  
 شهزاده جامعی جوارنده  
 درکلر ارسنده  
 وزیر خانی تحته  
 ایاصوقیه کلکنلی جوارنده

مهر حسن افندی  
 دوکوملی مصطفی افندی  
 عبد السلام افندی  
 هدایی محمود افندی  
 شیخ نصوحی افندی  
 قره جه احمد  
 سلامی علی افندی  
 صاری غازی  
 یوشع  
 علمدار بابا

اسکی علی پاشا جامعی جوارنده  
 ات میدانده بودرونده  
 حسن پاشا فرونی جوارنده  
 اسکدارده  
 اسکدارده طوغانجیلرده  
 اسکدارده سلیمده  
 اسکدارده چاملیمده  
 قایش طاغی اووه‌سنده  
 بکقوزاوزرنده  
 مولویخانه قیوسی خارج وائصالنده

جهانگیرده  
 بشکطاشده

جهانگیری حسن افندی  
 یحیی افندی

§

﴿ استانکوی ﴾ — بحر سفید اطه‌لرندن مرکز لوا بر اطه‌در .  
 بوراده اولان اووه لک کافه‌سی فوق الغایه منبت و محصولدار وقیون  
 و یکی رعینه الویرشلی اولدیغندن قیون و یکی تجارتی کرکی کبی ایلرو  
 کتمکده در واطه‌نک اورتیه‌سنده اولان طاغک ارتقاعی سکز یوز التمش  
 مترو اولدیغندن منظره‌سی غایت مهیدر . مشهور ( بقراط ) بوراده  
 طوغندی و الیوم موجود اولان چنار افاجنک التنده شاگردلرینه درس  
 و یردی . استانکوی جزیره‌سی سلطان ( سلیمان ) زماننده یعنی ( ۱۵۲۲ م  
 و ۹۲۹ هـ ) تاریخنده ردوس جزیره‌سیله برابر فتح اولمش و ( یفرح المؤمنون  
 بنصر الله ) تاریخ دوشورلمشدر .

§

﴿ آستر ﴾ — انفیولی یعنی یانبولی شهری معتبرانندن مشهور برکانکشدر . ماکدونیا قرالی فلیب بونی بر مأموریتله قایرمدیغی ایچون خصومت پیدا ایدرک مسقط رأسی اولان متوسه کمتشیدی قرال مشارالیه متوسی محاصره ایدرکن قلعه دن براوق آتوب فلیبک صاغ کوزینی چیقاردی و یاننده بولنان و کلاسی اوقی معاینه ایتدکلرنده اوزرنده ( فلیبک صاغ کوزینه ) عباره سی محرر اولدیغی کوروب مهارتنه تعجب ایتدیلر وانلر دخی براوقک اوزرینه ( اکرقلعه آکنور ایسه آستر صلب اولنور ) دیرک یازوب قرال طرفندن ایتدیلر و صکره قلعه بی آلوب آستری صلب ایتدیلر .

§

﴿ استرآباد ﴾ — ایران دولتنک مازندران ولایتنه تابع برسنجاق مرکزیدر و دروننده الیوم اون ایکی بیک نفوس تخمین اولنمقده در . بوراده برنوع قرمزی اعلاکوک بو یا چیتار و بو بو یا ایرانک اکثر محللرنده اقمشه و منسوجات ساآره بو یامق ایچون قوللانیلور و درون شهرده پک چوق پاموق و ایلیک کارخانه لری کوریلور شهر مزبور تیمورلنک زماننده تخریب اولندیسه ده شمیدیلده اییجه مهموردر . مشهور قجار قبیله سی رئیسنک مقری و قبیله بوراسی ایدی .

§

﴿ استراز بورغ ﴾ — فرانسه ده واقع اشاغیکی ( رین ) سنجاغنک مرکزیدر و نفس استراز بورغده سکسان درت بیک و عموم سنجاغده بشیوز سکسان طقوز بیک نفوس تخمین اولنمقده در . صنعت طباعتی ایجاد ایدن ( اوتبروغ ) نام هنرور و جنرال ( قلوبر ) بوراده وفات ایلدی .

§

﴿ استرلیج ﴾ — روسیه چاری دردنچی ( ایوان ) ک ( ۱۵۴۵ م و ۹۵۲ هـ ) تاریخنده تشکیل ایتدیکی برصنف پیاده عسکرک اسمیدر . بو عسکر هیئت ایمپراطورینک محافظه سنه مأمور و ممتاز بولندیغی جهتله خیلی زمان یرارقلر کوستردیسه ده مؤخرأ یکیکر یلر کبی سرکشلکه باشلادیغندن و ( ۱۶۹۸ م و ۱۱۱۰ هـ ) تاریخنده ایمپراطور بیوک پترونک اوروپاده تحصیلده بولندیغنی فرصت اتخاذا ایدن قزقرنلر ایشی محبوس

( صوفیه ) نك تشويقيه مشار اليهك وتشكيلی متصور اولان نظام جدیدك  
 عليهنه بریوك اختلال چیقاردیغندن مشار اليه عودتنده استرلیج اوجانگنك  
 الغاسنه قرار و یردی وابتدا بعضیلرینی تأدیب ایلوب ایکنجی اختلاللری  
 عقیبنده یعنی ( ۱۷۰۵ م و ۱۱۱۷ هـ ) تاریخنده بتون بتون الغا وسبب الغا  
 واحمالرینی برطاش عمود اوزرینه حك ایتدیردی .

§

﴿ استفانسون ﴾ — مشهور هنرورلردندر مسقط رأسی ( نووقستل )  
 تاریخ ولادتی ( ۱۷۸۱ م و ۱۱۹۶ هـ ) تاریخ وفاتی ( ۱۸۴۸ م و ۱۲۶۵ هـ )  
 در • بوذات کور معدنی عمله سندن برفقیرك اوغلی اولدیغی حالده تحصیل  
 فنون ایدرك برنجی درجهده کی مهندسین زمره سنه التحاق وشمندوفر  
 ( لوقوموتیف ) لرینی ایجاد ایلدی اوغلی مشهور ( روبه ر ) دخی  
 برهنلی ذات چیقوب شمندوفر باش مهندسی و پارلمنتویه اعضا اولدی  
 و مشهور بریتانیا وقناده جسر لرینی و ( انکلهزی ) اطه سی معلق شمندوفرینی  
 یاپدی .

§

﴿ استقبال ﴾ — علم هیئنده هر قنغی برکوبك شمس وسطده اولمق  
 شرطیله کره ارض ایله ( ۱۸۰ ) درجه بعدده بولمسنه تعبیر اولنورکه  
 بو حالده قمر بدر اوله رق طلوع ایدر .

§

﴿ استنزال الارواح ﴾ — علم سحر فروغندن برعملك اسمیدر •  
 بونك اربابی ارواحی برطاقم عزایم ایله تنزیل وقوالب اشباحه تحویل  
 ایله حصول مقاصد ایچون استخدام ایدر لر . وطائفه جن یا خود ملائکه یی  
 مجسداً احضاره ( علم الاستحضار ) دیدکای کی تجسید و احضار سنز  
 تسخیره دخی ( علم العزایم ) دیر لر . او قودقلمی عزایم برطاقم دعوتلر  
 وقسملردن و بودعوتلره جمعیت فکر و پرهیز ایله دوامدن عبارتدر وابتدای  
 عملده شویله برعهده نامه او قومق دخی عادتلر یدر ( بسم الله هذا کتاب  
 بما عهد سلیمان بن داود علیه السلام فیما عهد الجن والشیاطین واعلم ان الله  
 تعالی بما یقولون وکیل و عاهدتکم بعهد الله التامات و بعزته و جبروته و طاعته

فی خلقه و عظمته و عرشه و کرسیه و اراضه و سماواته و جنته و نارہ و بنحاتم سلیمان بن داود علیہما السلام لایخالف عہدکم و میثاقکم و لاعن ما یزول الیک من الاسماء المبارکة المیونة المقدسة ان لاتعود بشئ من معصیتک بعدیومنا هذا . (الی اخره) و طالب و مطلوب و طلب و عناصره منسوب حروفک عدد لرندن دخی قواعد مخصوصه سی اوزره ملائکه اسملری ترتیب ایدرک عزایم مذکورہ میانہ درج و وفقلر ترقیم ایلرلر

§

﴿ استوریش ﴾ — یاخود (اوستوریا) — اسپانیا دولتک فانتا بریق طاغلی آرقه سنده و غاستونیا کورفری ساحلنده برسینجاغیدر و مرکزی (اوویدو) شهریدر . بوسینجاغک اراضیسی طاغلی و اھالیسی غایت جسور و صبور و اجابنہ اختلاطدن مجتنب اولدیغی جهتله عربلر استیلا اینده مدی یاخود دکری اولدیغندن استیلا تمک استه مدی (نقدر بیوک خطا) بناء علیه اسلامک برولردن اور کوتدیکی اھالی قدیہ بو صرپ طاغله چکیلوب مملکتلرینه تجاوز ایدن اجابنک طردودفعی اسبابنه تشبثله (غالسیا) و (لئون) و (اوویہ دو) و (قشتالہ) و (آراغون) قرالقلرینی تشکیل ایلدیلر و فرزت دوشدکجه اسلامی از عاجدن و محارباتدن کیرو طور میوب عاقبت اندلس حکومت اسلامیه سنک انقراضنه سبب اولدیلر .

§

﴿ استوقهولم ﴾ — اسوچ دولتک پای تختیدر . بوشهر (ملار) کولنک بحر بالطغه منصب اولدیغی محله قریب بریده اخراجاتی زیاده ولیمانی کوزل بر تجارتکاھدر و نفوس موجوده سی یوز الی بیسک تخمین اولنقدهدر بعض کتابلرده سکسان الی بیسک کوریلور .

§

﴿ اسولچہ ﴾ — هر سکنده بر قضا مرکزیدر (غبلہ) ناحیه سی بو قضا داخلندهدر .

§

﴿ استیر ﴾ — بابیلرک نفی ایتدیکی یہودیلردن (سوس) ولایتنده بولنان بر یہودینک قزیدر . بو قز فوق الغایه حسنا و مستثنا اولدیغندن

ولایت مذکوریه و ممالک ایرانیه به حکم ایدن برنجی (سرخس) کتوردوب  
 زوجاتی عدادینه ادخال ایتشیدی حکمدار مشار الیهک (ماهان) ناننده  
 اولان وزیر اوتهدنبرو یهودیلره دشمن و بتون بتون ازاله لری نزدنده ملتزم  
 اولدیغندن بر کونینه بر چوق شکایتلر ایدرک چله سنک بغتة و دفعه  
 اعدامی ایچون امر آلدی و تصادفات غریبه دن اوله رق او کون  
 (استیر) ک عمیسی اولوب آره صره سرایه کلوب کتمکده اولان (مردخای)  
 نام یهودی دخی وزیر مرقومک سرخسه سوء قصد تشبثنده اولدیغنی خبر  
 آله رق سرایه کلوب قزه و قزدخی اخشام هنکام نوشانوشی و جلوه  
 فروشیده بر صورت متأثرانه ایله کیفیت سرخسه خبر ویرمسلیله سرخس  
 درحال تحقیقاته مباشرت ایدوب خبر مذکورک طوغری اولدیغنی  
 اکلا دیغنی کبی همان وزیر غافل مرقومی حضورینه جلب و کندو ایله  
 اعدام ایلدی و قزک اشبو اخطار و صداقتی اوزرینه یهودیلرک ازاله سیچون  
 اولجه وزیر مقتول مرقومه و یردیکی امری کیرو آلمق لازم کلور ایکن  
 بر پادشاه و یردیکی امری کیرو آلمغه مقتدر دکدر دیه رک ینه انفاذینی امر  
 ایدوب فقط یهودیلره بر مساعدت مخصوصه اولق اوزره امر مذکورک  
 علناً اجرا اولمسنی و یهودیلرک دخی مقابله به مأذون بولمسنی بشقه جه  
 فرمان ایلدیکندن تعیین اولنان کونده یهودیلره مجوسیلر بر برینه کیریشوب  
 ایکی طرفدن یتش ینک قدری ایچنه اوینادی.

بو وقعه (۵۱۱۵ خ) تاریخنده یعنی میلادک درتیوز یتش طقوز سنه مقدمنده  
 ظهور ایتش ایدی یهودیلر اول تاریخدهنبرو هر سنه وقعه مذکوریه  
 تصادف ایدن کونده (استیر) نامیله بیرام ایدوب بر برلینه هدیه لر کوندر لر  
 و چو چوق چولق شورایه بورایه طوقاقلره اوره رق اول کونی اخطار ایدر لر.

§

﴿ استیاج ﴾ — مدیا حکمداری کیکاووسک کتب افرنجیه ده  
 محرر اولان اسمیدر. (کیکاووس) کله سنه نظر بیوریه

§

﴿ اسحق ﴾ علیه السلام — پیغمبران عظامدندر و حضرت  
 ابراهیم علیه السلام اوغلی و حضرت اسماعیل علیه السلام لاب



قرنداشیدر حضرت ابراهیم علیه السلام هاجر نام جاریه دن اولان اوغلی حضرت اسماعیل علیه السلام دنیایه کلدکده عقیم اولوب هیچ بر اولاد کتور مامش و سنی طقسانه بالغ اولمش اولان زوجه سی حضرت ساره زیاده سیله مایوس اولدیغندن جناب حق مرحمت بیوروب (و بشرناه باسحق) آیت کریمه سی منطوق منینی اوزره اسحق علیه السلامی طوغوره جغنی تبشیر و (۳۵۶۸ خ) تاریخنده یعنی میلادک ایکیبیک یکریمی التي یاخود بیک سکز یوز طقسان التي سنه مقدمنده احسان بیوردی .

اسحق علیه السلام پدرینک حیاتنده فلسطینک شام شریف جهتنده ساکن اولان اهالی یه پیغمبر بعث بیوریلوب وفاتندن صکره (جراره) ده توطن ایلدی و جناب حق حیوانات و اموال سارّه سنه فوق الفایه برکت احسان بیوردیغنی جهتله فلسطین اهالیسی حسدلرندن ناشی حفر ایتدیردیکی قیولری املایه و ادملریله مجادلایه قالفشدقلرندن (بئر سبع) دیلان محله هجرت و اوراده خیمه لرینی رکز و اقامت بیوردی و حال شیخوخنده کوزلرینه دومان کلدی و آخر وقتنده زیاده سیله سودیکی اوغلی (عیص) ه دما ایتک استدیکی حالده بحکمه الله تعالی دیگر اوغلی حضرت یعقوب علیه السلام والده سنک تملیمه تقدم و منصب نبوت دعای جلیلینی تحصیل ایلدی . بر روایتده ذبیح بودر و عمر شریفی یوز سکسان بشه بالغ اولمشدر .

§

﴿ اسحق المزنی ﴾ — امام شافعی حضرتلرینک کبار اصحابنددر و مسقط رأسی (مصر) کنیه سی (ابو ابراهیم) در بو ذات عالیقدرک فضل و کالنی تعریف و توصیف ایچون امام شافعی حضرتلرینک (المزنی ناصر مذهبی) کلاملری کافی و وافیدر . (جامع الکبیر) و (جامع الصغیر) و (مختصر المختصر) و (منشور) و (ترغیب) و (کتاب الوثائق) و امثالی خیلی کتاب تألیف ایتدی و زهد و صلاح و احتیاطده فوق الفایه شهرت بولدی و (۸۷۷ م و ۲۶۴ ه) تاریخنده وفات ایلدی .

§

﴿ اسحق قرمانی ﴾ — کبار مشایخ خلوتیه دندر و شهرتی (جال

خلیفه یاخود جلال خلوتی) در . حبیب قرمانی حضرتلرندن تحصیل کمال ایدرک در سعادت کلوب ارشادله عبادله مشغول اولدی . و پک چوق کراماتی کورلدی و (۱۵۲۶ م و ۹۳۳ هـ) تاریخنده وفات ایدوب سودلیجه ده تر به مخصوصنه دفن اولندی .

§

﴿ اسحق پاشا ﴾ — وزیرای دولت عثمانیه دندر و سلطان بایزید وفاتح زمانلرنده ایکی دفعهده یدی سنه صدارتی واردر . مومی الیه ایلک صدارتنده قرمان اوغلی اوزرینه تعیین اولندیغندن کیدوب مرقومک متصرف اولدیغی قرمان ولایتی حرباً ضبط و ممالک دولت علیه یه الحاق ایلدی و اهالیسندن بر چوق کسه لری اوتیه برویه نقل و اسکان ایلدیکی صرهده اقسرای قضاسی ارباب صنایعندن بر چوق کسه لری دخی در سعادت کوندردی . بونلر اولوقت خالی اولان و شمعی اقسرای دنیلان محله اسکان ایدلمش و بو مناسبتله اوراسی اقسرای نامیه شهرت بولشدر . پاشای مومی الیه اشبو نقل خانه ماده سندن طولایی بعض مرتبه لسانه کلدیکندن براز مدت صکره یعنی (۱۳۸۲ م و ۸۸۷ هـ) تاریخنده بر مجلس عیش و طربده سلطان بایزید خان حضرتلرینک امریه اعدام اولندی . مشهور کدک پاشا دخی او کیجه برابر اعدام اولتمشدر .

§

﴿ اسد ﴾ — افریقیهده بالاستقلال حکومت ایدن بنی اغلبدن (زیاده الله) ک امرای عسکریه سندن بر قهرمان ذیشاندر و علم و فضلی شجاعتندن زیاده ایدوکی اثارندن نمایاندر . بوذات مشار الیه طرفندن مأموراً کیدوب سجلیاده واقع (پارمو) یاخود (پالمیر) قلعه مشهوره سنی بش سنه محاصره ایله ضبط ایلدی و نکات و مضامینی بین العلاما شایان تقدیر اولان (اسدیه) نام کتاب مستطابی تألیفه موفق اولدی . بو کتاب فقه مالکیه دن بحث ایدر . بونک تشکیل ایتدیکی سلاله حکمرانی یه بین العرب (بنی کلب) دیرلر ایدی

§

﴿ اسرائیل ﴾ — یعقوب علیه السلامک لقبیدر بولنب مؤخرأ

مشار اليه تدن تولد و تشعب ايدن اون ايكي سبطه يعنى قبائله نام عمومي اولمشدر . اسباط مرقومه خلقي بوناهي ذكرايله برابر بواندقلى سبطك نام مخصوصنى دخى محافظه ايدرلرايدى ( بنى اسرائيلدن سبط نفتال ) و ( بنى اسرائيلدن سبط يهودا ) كبي . يعقوب كلمه سنه نظر بيوريله .

§

﴿اسرائيليه﴾ — سليمان عليه السلامك وفاتى عقينده اون ايكي سبط بنى اسرائيلدن اون سبطى آير يلوب شخيمده برحكومت تشكيل اتمش وايكي سبطى قدس شريفده حضرت سليمانك اوغلى تابعينده قالمش ايدى قدسده قالانرك حكومتنه حكومت يهوديه وشخيمده تشكىل ايدن حكومتنه حكومت اسرائيليه ديرلر . حكومت يهوديه نك نفوسى حكومت اسرائيليه نك نفوسندن دون ايديسه ده ملتك معتبرانى و بيت مقدس قدسده اولمق ملايسه سيله حكومت يهوديه زنكين ونفوذلى ايدى . اشبو دولت اسرائيليه ابتدائى تشكيلى اولان ( ۶۳۳ خ ) تاريخندن يعنى ميلادك طقوز يوز اتمش برسنه مقدمندن آثور يلك هجوميلاه منقرض اولديغى ( ۱۸۷۶ خ ) تاريخنه قدر دولت يهوديه ايله معارضه و مقاتله دن قورتيله مامشدر . ( رجبم . يور بعام ) كلمه رينه دخى مراجعت بيوريله .

§

﴿اسطاط﴾ — اسكى زمانده دونم رينه قوللانيلور براولچيدر كه براسطاط قرق يلى مترويه مساوى ايدى .

§

﴿اسطخر﴾ — شيراز شهرينك شمال شرقيسنده و اللى اوچ كيلومترو بعدنده بر شهر قديمدر . بوراسى و قتيلاه ممالك ايرانيه نك اك معمور و معتنا بر شهرى و مديا حكمدارلرينك پايتختى اولديغى حالده ( ۱۲۶۴ خ ) تاريخنده يعنى اوچيوز اوتوز سنه مقدمنده اسكندر رومى طرفندن احراق اولندى ياخود قضاء يانوب اندن صكره بردها رغبت اولندى . شهر مزبورده يك چوق ملوك مقابرى و ستونلرى موجود و مشهود اولديغندن شمىدى ( چهل منار ) نامى ويرلمشدر . اخيراً خط پهلوى ايله يازولى اوله رق بولنقمده اولان طاشلردن اكلاشديغنه كوره ( اسطخر ) ملوك ساسانيه يه

دخی پای تخت اولمش و یدنجی و سکزنجی عصرلرده عربلر طرفندن تخریب اولمش. در . شهر مذکورک خرابه سنی تماشا ایچون کیدن سیاحلر بوراده خیلی آثار عتیقه کوردکلری کبی برده یکریمی درت مترو طولنده و کول رنگنده متعدد اولوقلی و اویمه لی دیرکلره تزین اولمش و اطرافه غریب صورتلی برطاق حیوانات هیکلری یاپلش بر بنادخی مشاهده ایدرلر بو هیکلر وجودلری قنادلی ارسالان و ایاقلری اسب و باشلری قویرجق صقاللی انسان و باشلرینه تاج کیدیرلش صورتده ترسیم اولمشدر . یونانیلر بوشهره ( پرسه پولی ) دیرلر ایدی .

§

﴿اسطرلاب﴾ — کواکبک رصدلیله طول و عرضلرینی حسابده استعمال اولنور بر آلتدر . بوده ایکی نوع اولوب نوع اولی بربری ایچنده درت دأره دن عبارت اولور و برنجی دأره دأره خسوفی و ایکنجی دأره انقلابین نقطه لرندن مرور ایدن نصف النهاری و اوچنجی دأره خسوفک قطبلری اطرافنده دور ایدرک کواکبک عرضلرینی کوستردر و دردنجی دأره داخلی و هدفه لر ایله مجهز اولدیغندن بونکله رصد ایدیلور و اسطرلاب قطبی دنیلان نوع ثانیسی دخی کره ارضک قطبلرک برندن مرور ایدن خطوط مستقیمه واسطه سیله خط استوائیه موازی سطح اوزرنده مرتسمنی ارئه ایدر صورتده یاپلش نصف کره دن عبارت اولور و بونده نصف النهار دأره لر ی خطوط مستقیمه ایله کوستریلور .

§

﴿اسطوانه﴾ — علم هندسه ده هر ایکی مستوی اوزرنده بر برینه موازی وهم مساوی اولان ایکی دأره نك مرکزلی بیننه واصل اولان خط مستقیمه موازی اوله رق محیطلری اطرافنده دیکر برخط مستقیمک دور ایتدیرلمسیله حاصل اولان شکه اسطوانه دیرلر و مذکور دأره لره اسطوانه نك قاعده لری و مرکزلی بیننه واصل اولان خطه ارتفاعی و محیطلری اطرافنده دور ایدن خطه مولدی تعبیر ایدرلر . و براسطوانه نك محوری قاعده سنه عمود اولور ایسه اسطوانه قائم و عمود اولمز ایسه اسطوانه مائل تسمیه ایدرلر بر اسطوانه نك سطح مستدیرینک مساحه

سطحیه سی قاعده سی اولان دائره محیطنک ارتفاعه حاصل ضربیله تقدیر اولنور و فرضاً قاعده سنک نصف قطری (۵) و ارتفاعی (۶) زراع اعشاری اولسه  $س = ۲ \times ۱۴۱۶ \times ۳ \times ۵ \times ۶$  اولور و بالاصلاح سطح مستدیری مساحه سنک ۱۸۸,۴۹۶ زراع اعشاری اولدیغی اکلاشیلور و مساحه جمیه سی دخی قاعده سی مساحه سطحیه سنک ارتفاعه حاصل ضربیله تقدیر اولنور مثلاً براسطوانه نك قاعده سنک مساحه سطحیه سی (س) زراع اعشاری مربعی و ارتفاعی (ع) و مساحه جمیه سی دخی (ح) اولسه  $ح = س \times ع$  مساحه جمیه سی دستوری اولور واشبو دستوره تطبیقاً هر بر اسطوانه نك مساحه جمیه سی استحصال اولنور

§

﴿ اسعدتبان ﴾ — ابو کرب بن کلکرب یا خود ملکیکرب بن تبع بن زید بن عمرو بن تبع ذی الازعار . تابعه یمندن بر مشهور پادشاهدر بوکا تبع آخر دخی دیرلر . هشتاسب وارد شیر بن بهمن بن اسفندیار زماننده حکومت ایدر ایدی . مخالف یمندن و ملوک بنی حیر بقیه سندن کیلان قلعه سنده ( اسعد بن یعفر ) نامنده بر ذات دها وار ایدی .

§

﴿ اسفرائین ﴾ — نیشابور ایله جرجان آره سنده منتصف طریقده نیشابور ناحیه لرندن بر ناحیه حصینه در . بوراسنی وقتیه ملوک اعجامدن ( اسفندیار ) بنا ایدوب ( مهران ) تسمیه ایلش و ( ۶۵۱ م و ۳۱ هـ ) تاریخنده عبده بن عامر معرفتیه فتح اولنش ایدی . عهد اسلامده بو شهردن پک چوق علما و مشایخ ظهور ایدی . حافظ الکبیر یعقوب بن اسحق و بالاده محرر اولان مشهور ابو اسحق و ابن سقا دیمکله معروف ابو علی و ابو حامد و فنون عالییه ده تألیفات عیدیه سی اولان علمای متأخریندن عصام الدین حضراتی دخی بور ایدر .

§

﴿ اسقلا وونیا ﴾ — اوستریا دولتنگ مجارستانده بر بیوک ولایتیدر و مرکزی ( ازک ) شهر مستحکمیدر بو ولایت غرباً خرواستان و جنوباً

ممالک عثمانیه ایله محدود و اهالیسی الی یوز بیک راده سنده و التون و کوش معدنلری و اورمانلری زنگینجه و هواسی معتدلجه در. اسقلاوونلر اسلاو جنسندن و سلماتی قبیله سندن اولوب میلاددن تقریباً اون بش عصر مقدم آسیاده وولغا نهرینک جانب غریبسنده (اسلاو) و (واندال) لر ایله برابر ایکن روما دولتک انقراضندن صکره جنوبه طوغری کله رک جرمان قبیله لرینه قارشیدیلر و برچوغنی دخی (۷۹۹ م و ۱۸۳ ه) تاریخنده شارلمانک اوارلری تضیق و پریشان ایتدیکی صرهده استقلال بولوب مجارلرک هنگام اقتدارنده استقلاللرینی دهامتین بر صورته قویدیلر. و قبیله روسیه دولتک اساسنی وضع ایدن بونلر در.

دولت علیه اسقلاوونیا یی بر قاج دفعه ضبط ایدوب (۱۶۹۹ م و ۱۱۱۱ ه) تاریخنده اوستریا دولتیه عقد ایتدیکی قارلوفجه معاهده سی اقتضاسنجه ترک ایلدی. اسقلاوونلر بر چوق زمان مجارلرله برابر استقلالرینی محافظه ایده یلدکلری حالده تاریخ مذ کوردن صکره اوستریا تابعیتنی قبوله مجبور اولدیلر.

§

﴿اسقوجیا﴾ — بریتانیا اطه سنک جهت شمالیسنده و انکلتره دولتی اداره سنده بر بیوک قطعه در شمالدن جنوبه طوغری در تیوز و شرقدن غربه طوغری ایکیوز قرق بش کیلومتر و طول و وسعتنده اولان اشبو قطعه نک نفوس موجوده سی اوچ میلیون در تیوز بیک راده سنده در شمال جهتی طاغلق و اراضیسی محصولسز و سیس و صغوقدر. اسقوجیا اهالی قديمه سی (۱۲۰ م) تاریخنده جنوبدن شماله طرد اولنوب تسلطلرندن محافظه ایچون آره یره بر دیوار چکلمش ایدی صکره یعنی (۸۳۳ م و ۲۱۸ ه) تاریخنده ایرلندا طرفندن کلان (غوت) طائفه و حشیه سی نیجه محار بانله اسقوجیا یره لر شوب ابتدا رومالورلی و مؤخرأ اهالی قديمه مر قومه یی حرباً اطاعته مجبور ایتدی و قرالری اولان ایکنجی قانت باشنه ایکی تاج کیوب اسقوجیانک برنجی حکمداری اولدی و اخلافتدن او چنجی علكساندری (۱۲۸۶ م و ۶۸۵ ه) تاریخنده بلا ولد وفات ایلدیکندن قرال انتخابندن طولایی ظهور ایدن شقاق و اختلاف نیجه یوز بیک آدمک تلفنه و انکلیرلرک

ال اوزادوب تحت جایه آلمرینه سبب اولدی و (۱۶۰۳ م و ۱۰۱۲ هـ) تاریخنده انکتره قرالیچه سی (الزابت) بلاولد وفات ایلدیکنه بناء یرینه (زاق) نامنده براسقوچیاالی انتخاب اولندی و قرالیت بو صورتله (ستوارد) خاندانه یکدی ایسه ده مر قوم خروس دو کوشدیر مکدن وسفره ده اوزون اوزادی اوتورمقدن بشقه بر ایشه یرامدی و (۱۷۰۷ م و ۱۱۱۹ هـ) تاریخنده جالس صندالیء حکمرانی اولان (آن) نام قرالیچه دخی انکتره واسقوچیاقرالیتیرینی برلشدیروب وهیئت مجتمعه سنه یوک بریتانیا نامنی و یروب ایکی طرفی سفک دماء وخساردن قور تاردی .

اسقوچیا الیوم اوتوز اوچ قوتلغه منقسم اولوب مرکز اداره سی ایکوز بیک نفوسی جامع اولان (آدینبورغ) شهریدر .

§

﴿ اسکچه ﴾ یاخود (اسکیجه) — درامه سنجاغنه تابع یکجه قره صو قضا سنده بر قصبه در . بوراده کلیتو دخان واعلا بالق عورطه سی چیقار .

§

﴿ اسکیب ﴾ — قسطمونی ولایتی داخلنده بر قضا مرکزیدر وقسمونی شهرینک جنوب شرقیسنده ویکرمی درت ساعت بعدنده در . مع نواحی اون بر بیک نفوسی ویوز یکریمی سکز جامع و مسجدی و بش تکیه و التی مدرسه واللی بر مکتبی وجوارنده بش عدد مملحه سی واردر . اسکلیبه یارم ساعت مسافه ده بر محلدن نبعان ایدن اعلا صواک صیچاق هواده بیله اقلی یارم ساعت براغلدقجه صغو قلغندن ایچیله مز و دأما منبعندن بوز پارچه لری چقیدیغی کوریلور .

§

﴿ اسکندر ذوالقرنین ﴾ — وقتیه یننده حکومت ایدن ملوک تباعه دنذر . ویدری (حارث الرایش ذی مراید) بن (جال ذوسدد) (بن عاد ذی منخ) بن (عامر) بن (ملطاط) بن (سکسک) بن (وائل) بن (حیر) بن (سباء) در و اسمی (صعب) در . بو ذات علی روایت دایی زاده سی ووزیری (حضر) علیه السلام ایله شرق وغربی طولاشوب

خلقی توحیدہ دعوت آیتدی . مشار الیہک سلالہ سندن کلان ابو کرب  
اسعد بن عدی ذوالقرنین حقندہ شو بیتلری سویلشدر .

( ان کان ذوالقرنین جدی مسلماً )

کل الملوك لملكه كالسجد

طاف المشارق والمغرب عالماً

یبغی علوماً من کریم مرشد

ویری مسیر الشمس عند غروبها

فی عین حائمه لها تنو قد

فلقد اذل الصعب صعب زمانه

و اثار عزت عزه بالسفر قد

حکم الامور فا حکمت آیاته

فجری الی اجل له و ینوعد

حکما و فصحاى عربدن قس بن ساعده الیادی دخی برمو عظه سنده ( ایها  
الناس هل اتا کم ما لم یأت آبائکم الاولین ام اخذتم عهداً من السنین ام عندکم  
من ذلك الیقین ام اصبحتم من ذلك آمین والله اصبحتم فی غفلة لایعین این الصعب  
ذوالقرنین جمع الثقلین و ساح الخافقین و عمر القین لم یکن عنده الا کلحظة عین )  
دیشدر .

§

﴿ اسکندر رومی ﴾ - بوکا اسکندر یونانی . و بیوک علیکساندری  
دخی دیرلر ما کیدونیا حکمدار لر ننددر . بو ذات ( ۵۳۸ خ ) تاریخنده  
دنیاه کلوب حکیم مشهور ( ارسطو ) نك تحت تربیه سنده اون التی یاشنه بالغ  
اولدقده پدری ما کیدونیا حکمداری ( فلیب ) ک بیرانس ( استانبول )  
محاربه سنه عزیمتی مناسبیله یرینه وکیل اولدی و اثنای وکالتنده اطرافده  
بولنان بعض اقوامی تحت اطاعته آلدی و یکر می یاشنده ایکن پدری وفات  
ایلدیکندن تخنه جلوس ایدوب شاعر دموسنتک تشویقیله ما کیدونیا  
علیهنه قیام ایدن آتیه لولری و ما کیدونیا نك ترقیسنی چکه میان سائر جواهر



متجاورہ بی تہدیدایتدی و مشہور (تب) شہرینی فنا حالہ خراب ایدوب جاہیر  
 مرقومہ بی کرکی کبی اور کوتدی و پدیری زمانندہ فرس دولتی علیہنہ جاہیر  
 یونانیہ ایلہ یاپیلان اتفاقی تازہ لدی و ویردکاری عسا کر معاونہ بی ما کیدونیان  
 انتخاب ایتدیکی عسکر ایلہ برابر اوتوز درت بیک بشیوزہ ابلاغ و جملہ سنک  
 سر عسکر لکنی در عہدہ ایدرک (۵۲۶۰ خ) تاریخندہ یعنی میلادک اوچیوز  
 اوتوز سنہ مقدمندہ چناق قلعه سی بوغازندن اناطولی یقہ سندی پکدی  
 و فرس ملکی (دارا) ننگ غرائقوس دہ یعنی قوجہ جایی دنیلان نہرک کنارندہ  
 تحشد ایدن یوز اون بیک موجودلی براردوسنی بوزوب آردینہ دوشدی  
 و مرکز صدراب اولان (سارد) شہر جسمینی و فریکیا و پافلاغونیا و یسیدی  
 و سلیسیا ممالکنی استیلا ایدرک (ایسوس) ہ واروب دارانک ایکنجی بیوک  
 اردوسنی دخی پریشان و اولاد و عیالی و خزینہ سنی اخذ و اغتنام ایلدی  
 و ایکی سنہ صکرہ ارمنستان حکمداری (واخہ) ننگ دارا ایلہ اتفاقی خبر  
 آلدیغندن اورایی و متعاقباً سوریه و (تیر) و (غزہ) شہرلرینی دخی استیلا  
 ایلدی و غزہ و الیسی ایکی آی قدر مقاومت ایتدیکی جہتہ بعد الاستیلا  
 والی مومی الہی طوتوب و آت قوزوغنہ باغلدوب سورکلندرک آخرتہ  
 کوندردی و قدس شریفہ واردقدہ یہودیلر بیاض البسہ لر و طنطنہ لرلہ  
 استقبال و اولجہ استدیکی عسکرک کوندریلہ مامسندن طولایی و قوعبولان  
 قصورلرینک عفوینی استرحام ایلدکلرندن عفو ایدوب مصریولنی طوتدی  
 و مصریلر ذاتاً عجملرک جایہ سندن ممنون اولدقلر یچون اسکندری کوزل  
 قبول ایتدیلر و اسکندر مصردہ راحت ایتکدہ ایکن عجملرک اریلدہ  
 عسکر طویلامقدہ اولدقلرینی خبر الدیغنی کبی (۵۲۶۳ خ) تاریخندہ یعنی  
 میلادک اوچیوز اوتوز بر سنہ مقدمندہ اورایہ دخی یتیشوب بیچارہ دارایی  
 بتون بتون بر باد و استرابادہ قدر تعقیب ایلدی و فرس صدرابلرندن  
 (بسوس) نامندہ برخائن دارایی قاچار ایکن باقتراندہ طوتوب اعدام ایلدیکندن  
 اسکندر اورایہ دخی عزیمتہ خائن مرقومی اخذ و دارانک ورثہ سنہ تسلیم  
 ایلدی و سمرقند و خوقند شہرلرینی آلدقدن صکرہ بخارا شاہنک قزیلہ  
 ازدواج و بخارادہ ارام و بش سنہ صکرہ ہندستانک شمال غریبسنندہ واقع  
 پنجابدن کچہرک ہندستان راچہ سی (پوراوہ) بی حرباً اخذ و ینہ عفو

واحسان ایلدی و هندستانی دخی ضبط آرزو سنده بولندیسده زیاده سیله یورلمش اولان عسکری پکده موافقت ایتدیکنندن و اصرار ایده جک اولور ایسه علیهنده بر اختلال چیقہ جغنی اکلادیغندن دونوب سند و بلوجستان طریقہ و صوسز و ایسسز چولردن درلو مشقتله بابله کلدی و بتون دولتر طرفندن تبریک مظفریت ایچون کلان سفرا و اهالی استقباله چیقدی لکن بیچاره عشرتله وجودینی خراب ایدرک بر یوک خسته لکه دوچار اولدیغندن (۵۲۷۱ خ) تاریخنده یعنی میلادک اوچیز یکریمی اوچ سنه مقدمه خسته لکنک اون برنجی کونی غوغای جهانندن قورتلدی کندو جزالرنندن (انتی پاتری) یدیه تسمیم اولندیغی دخی مرویدر هر نه حال ایسه مشارلیه جهانده پک بیوک بر نام قزاقمشدر واکر بخاراده الوهیت دعواسنه قالعشدیغی و مجوسیلرک اعتقادینه میل کوستردیکی ایچون نصیحت ویرن خواجه سی (قالستن) ی اعدام ایتدیرمامش و غزه و الیسنی بالاده بیان اولندیغی و جهله تحقیر ایتماش اولیدی نام جهانکیرانه سی الی قیام الساعة لکه سز یاد اولنور ایدی. مومی الیه قالستن مشهور ارستطالیسک منتخب شاگرداننددر. محرر اولان اسمرک محالرینه دخی مراجعت بیوریه.

§

﴿ اسکندر خان ﴾ — آذربایجان حکمدار لرننددر. بو ذات (۱۴۳۶ م و ۸۴۰ هـ) تاریخنده برادری (جهانشاه) ایله محاربه ایدرکن بوزیلوب اوغلنک تحت محافظه سنده اولان (آلنجق) قلعه سنه فرار و التجا ایتشیدی اوغلی مرقوم ذاتاً پدرینک موطنه لرنندن بر فاجره یه علاقه سی مناسبتیه پدرینک مترصد فرصتی اولدیغندن بو کره و رودینی غنیمت یله رک همان اعدام ایتدیروب فاجره مرقومه یی پستر وصالنه آلدی و جهانشاه دخی شاهرخک جایه سیله تخت اذربایجانه اوتوردی. (نه حیت!)

§

﴿ اسکندر بک ﴾ — ارنودلق برنسنک اوغلیدر و اصل اسمی (ژان قاستریو) در. بو بک حال شبانده پدری طرفندن رهن طریقہ درسعادته کوندرلدیکی جهته سرای همایونه آلنوب خیلی زمان تریه ایدلمش و اسکندر بک نامی ویرلمش و پدرینک وفاتنده دولت علیه تابعیتندن

آبرماق شرطیله مملکتنه پرنس تعیین وارسال اولنمش ایدی بکمز ارنودلغه وارر وارمز دولت علیه نك امرلرینه قارشو حرکتیه و (۱۴۴۶ م و ۱۴۵۰ هـ) تاریخنده بتون بتون عصیانه باشلادیغندن سلطان مراد ثانی حضرتلری موره سفرندن عودتنده ارنودلغه اوغرایوب مقر ادارهسی اولان اقبه حصاری تضییق و وقوعبولان استرحامنه بناءینه عفو و ابقا ایلدی و مؤخرآینه مسلاک تابعیته منافی حال و حرکاتی ظهوره کلمسیله (۱۴۴۹ م و ۱۴۵۳ هـ) تاریخنده تکرار عسکر کوندریلوب اقبه حصار و دبره لر الندن آلدی و (۱۴۶۶ م و ۱۴۷۱ هـ) تاریخنده تکرار عصیان ایلدیکی جهته آرتق اصلاحی قابل اوله میه جنغی اکلاشلدیغندن ممالکی بتون بتون ضبط ایلدی و کندوسی ایتالیایه قاچدی.

§

﴿ اسکندرون ﴾ — حلب ولایتی داخلنده و بحر سفید ساحلنده و حلبک یوز یکریمی درت کیلو مترو بعدنده و جهت غربیسنده بر شهر در و لیمانی اولدقبه ایشلیکدر. بونی ممالک یهودیه حکمدارلرندن ایکن (۵۵۱۶ خ) تاریخنده یعنی میلادک یتمش سکز سنه مقدمنده وفات ایدن علسکساندری تأسیس ایلدی کیچون برچوق مدت (علکساندریامینو) نامیله یاد اولنوب صکره اسکندرون نامی زباززد اولدی. یهودیلرک علسکساندری نامنی قبولی اسکندر رومینک مصرده ایکن امر و تنبهنه یا خود خشنودلقلرندن ناشی بر خلوصکارلغه مبنی ایدی زیرا صکره ینه ترک اولمشدر.

§

﴿ اسکندریه ﴾ — مصر سفلاده اسکی مرؤوتیس کولی ایله دکر آرهسنده واقع دیل اوزرینه اسکندر رومینک امریله بنا اولنمش بر شهر شهیر در مقدا نفوسی طقوز یوز بیک رادهسنده ایکن عصر اخیره بر آرهلق اللی التمش بیک رادهسنه تنزل ایدوب والی محمد علی پاشا مرحومک زماندنبرو درت بشیوز بیکی بولمشدر. و اینیه سی و سرایی و بیک بر دیرکلی جامع شریف و چارشوسی و میدان و مسیره لر ی غایت منتظمدر ساحلدن بیک اوچیوز مترو آچیقده بولنان (فاروس) اطه سی اوزرینه (۵۲۱۱ خ) تاریخنده یعنی میلادک ایکیوز سکسان اوچ سنه مقدمنده ملوک بطالسه دن

برنجی (توله مه) معرفتیه یاپیلان فنار قله سی عجایب سبعة عالمندر بو  
قله سراپا بیاض مر مردن مربع الشكل و غایت اوزون بر بنا اولدیغی حالده  
اوزرینه خارجدن چیقیلور ایدی او یله بر اثر عجیب بیک بشیوز سنه قدر  
پایدار اولوب (۱۲۵۳ م و ۶۵۰ هـ) تاریخنده انهدامه باشلا یوب کیدرک بتون  
بتون بیقلمش و شمعی انقاضی یله قالماشدر.

اسکندریه اهالیسی بر قاج دفعه اختلال چیقاردقاری کبی (۴۷ م) تاریخنده  
دخی بر اختلال چیقاردقارندن جایه سننده بولندقاری روما دولتی طرفندن  
کوجله باصدیرلدی اولوقت (سراییس) ک دیدیوز بیک کتابی جامع  
اولان مشهور کتبخانه سی محترق اولدی و مصر ایله برابر اسکندریه  
(۶۱۱ م) تاریخنده ایرانلورک و (۶۴۰ م و ۲۰ هـ) تاریخنده (عروبن العاص)  
قومانداسنده اولان مسلمانلرک ید ضبطنه کیدی. اسکندریه و حوالیسنده  
خیلی اثار عتیقه بولنور.

اشقودره نك نام صحیحی و بغداد ولایتنه تابع متفق سنجاغنده بر قصبه نك  
اسمی دخی (اسکندریه) در.

§

﴿اسکوب﴾ — قوصوه ولایتی داخلنده و (پرزرین) شهرینک  
اون سکز ساعت بعدنده (واردار) نه ری کنارنده بر کوزل شهردر و نفوسی  
اون بشیک تخمین اولتمده در اراضیسی محصولدار و هواسی لطیفدر  
بوراده هر نوع محصولات اولدیغی کبی اعلا دخان دخی یتیشور.

§

﴿اسکیث﴾ — سیت کله سنه نظر بیوریه.

§

﴿اسکی حصار﴾ — آیدین ولایتی داخلنده و مغله ایله میلاس  
آره سنده بر کوچک قصبه در. بوراسی سوریه حکمداری (ستر اتونیس)  
نامنه یاپلش اولدیغندن بر چوق مدت (ستر اتونیس) نامیله شهرت بولش  
ایدی لکن شمعی قریه حکمنده در خیلی اثار عتیقه سی وار (۳۰۱ م)  
تاریخنده امپراطور (دیو قلتین) معرفتیه نشر اولنان ماقسیمون قانوننک  
لاتینجه محرر اولان بر نسخه سی بوشهرده بولندی.

دكزلی قضا سنك جهت شمالي سنده دخي اسكي حصار يا خوداسكي شهر نامنده بر ناحيه واردر (۱۱۴۷ م و ۱۱۸۹ م) تاريخلرنده فرانسه و المانيا ايمپراطورلری صليبين ايله قدس شريف امدادينه كيدر كن بو شهرده آرام ايتش ایدی صكره یعنی (۱۴۰۲ م و ۸۰۵ هـ) تاريخنده تيمورلنك خراب ايدوب برقریه حالنه كتور مشدر .

§

﴿ اسكي شهر ﴾ — خداوندكار ولايتنه ملحق کوتاهيه سنجاغی داخلنده بر قضا مركزيدر سیدی غازی و این اوکی ناحیه لرندن ماعدا نفوس ذكوری اون بيك راده سنده در . كوزل ايليجه لری وار .

§

﴿ اسکیمو ﴾ — آمريقای شماليده واقع (لابرادور) و (آلیاسقا) شبه جزيره لری اهااليسنك اسميدر و آسيا و اوروپانك شمال طرفلرنده اولان (لاپون) و (سامويد) قوملرينك دخي اشبو اسکیمو جنسندن ايدوکی ظن و تخمين اولنمده در .

اشبو (اسکیمو) لرك بويلری غایت قيصه صاچ و صقاللری صيق و سرت و سياه كوزلری اوافق ديشلری اوزون طبيعتلری ملايم و فتوتلی اولور و كافه سی وجودلرينه آبی در یسی کير و بالتجھيلق ايله تعیش ايدر .

بونلر مقدا بپرست ايکن والده سز قالان يتيم چوجقلرينی والدهلرينك مزارلری اوزرنده ذبح ايدوب چوجغنی والده سزلکدن ناشی دوچار اوله جغنی سفالندن و کندولرينی اعاشه کلفتندن قورتاره رق ثوابه کيرديک اعتقاد ايدرلر ایدی لکن شمديدلرده (موراوی) مسيوزلری خيلوجه سنی خرسيتيانلق دائره سنه صوقدی و چوجق ذبحی کبی غدر و جهالتلردن قورتاردی .

(اسکیمو) لر جوچه لکلریله برابر خانه لرینی سکز آرشون يوکسکلکنه قدر کر پیچ کبی کسلش بوز پارچه لرندن ياپوب ايچنده اوتورلر و يملکلرينی اغاچدن معمول قازغان و تنجره لر ايچنده پيشورلر شویله که پيشوره جکلری شیئی ذکر اولنان اغاج تنجره يه قویوب وآتشده قيزديرلش بر طاشی ايچنه

صوقوب طاشك قیزغینغیله نقدر پیشه بیلور ایسه انکه اغندا واکتفا  
ایدرلر .

§

﴿ اسلاند ﴾ — ایزلاندا ( گله سنه مراجعت بیور یله .

§

﴿ اسلاو ﴾ — یوت تانارلری جنسندن بر بیوک قبیله در بونلر

تانارستاندن طرد اولندقدن صکره ممالک هندیه یه کلوب جرمانلرله بر حکومت  
تشکیل ایتدیلر مؤخرأ یعنی میلاد عیسی علیه السلامدن تخمینا اون بش  
عصر مقدم اسیاده واقع ( وولغا ) نهرینک جهت غریبسنه ایندیلر ایسه ده  
اسلاو نامنک برو طرفلرده ایشیدلسی خیلی زمان صکره وقوعبولدی .

اسلاولر ایکی نوع اولوب بر نوعنه ( اصل اسلاو ) دیکرینه ( واند )  
دیرلر ایدی . اسلاولرک برطاقی ( آتیللا ) نك زمان حکومتنه دکین

مستقل قالوب اندن صکره ایچلرندن صرپلر و خرواتلر آریله رق ( ۶۳۱ م  
و ۱۰ هـ ) تاریخنده اورو پانک جهت جنوبیسنه یرلشدیلر و دیکر طاقی  
الب نهرینه قدرایلرلدویلر ایسه ده ایمپراطور ( شارلمان ) و برنجی ( اوتون ) ک  
بیوندور یغی التنه کیرمکدن بشقه برایش کوره مدیلر .

اشته اولوقت بونلره اسیر معناسننه اوله رق و یرلمش اولان ( اسلاو ) نامی  
اوزرلرنده قالمشدر ( بوهمیا ) و ( اسقلاوونیا ) و ( صریه ) و ( خرواتیه )

و ( موراوایا ) و ( بوسنه ) و ( له ) و ( والاش ) خلقتنک اسلاو جنسندن  
اولدیغنه نظراً ( پولونیا ) و ( روسیه ) و ( اوستریا ) دولتلرینک مقدا  
بونلرک تشکیل ایتدکلری دوقه لقردن بیویوب وجوده کلش اولسی مأمولدر .

اسلاولر خرستیانلغی طقوزنجی عصر دنبرو قبوله باشلادیلر روی  
ارضده ایوم موجود اولان اسلاولرک عددی سکسان درت ملیون تخمین  
اولنیور .

( اسلاو ) کومر بن یافت بن نوح علیه السلامک برنجی اوغلی ایدی  
دیانتلرده وارددر .

§

﴿ اسلمیه ﴾ — روم ایلی شرقی ولایتی داخلننده وقوجه باقلانک

جهت جنوبيسنده اراضيسي غايت محصولدار بر شهردر اهاليسي  
يکرمي بيک راده سنده اولوب کوزل چوقه فابريقه لري وکل بئچهلري  
واردر بوراده پک چوق کل ياغي چيقار يلوب خارجه صاتي لور  
واعلا سلاح اعمال اولنور وهرسنه بر بيوک پناير قوريلور . اسليه ايله  
ادرنه نك ييني يکرمي درت ساعتدر .

§

﴿ اسماء ﴾ — ابوبکر الصديق حضرتلرينک بيوک کریمه سي وعشره  
مبشره دن زبير بن عوام حضرتلرينک زوجه سي وعبدا لله ابن زبير  
حضرتلرينک والده سيدر (رضي عنهم) . اوغلنک شهادتي کوني مشار اليها  
ايله ايتديکي استشاره ده ويريکي جوابلر متانت عقل وقوت قلب و صبرينه  
دليل اولديغندن بعضيلرينک بياننه تصدي اولنور شويلاه که حجاج ظالمک  
ابن الزبيری طومق قصديله مکة مکرمه يي شدتله محاصره وتضييق ايتديکي  
کونلرک برنده مشار اليه والده سي اسماجنابلرينک ايکي اللريني بردن اوپمک  
اوزره کندي الله آلدیغنده ( اوغلم وداعمی ايله يورسک ديو سؤال ايتدی  
ابن الزبير حضرتلري دخي ( اوت وداعه کلدم زيرا ظن ايدر مکه بو کون  
آخر کونمدر ) ديدکده ( اويلاه ايسه هايدي بصيرت اوزره کيت فقط کل  
بنده سکا وداع ايله يم ) ديهرک بو نيونه صارلسيله الي مشار اليهک کيمش  
اولديغي زرهه طوقونده زره پوش اولديغني اکلایوب ( اوغلم بوسنک  
ايتديکي ايتيانلرک يعني آرزوي شهادت ايليانلرک کاري دکلدر )  
ديدي مشار اليه دخي ( بوني بن انجق سکا مدار قوت وتسلیت اولسون  
ايچون کي سدم ) جوابني و يردکده ( بوبکا مدار قوت وتسلیت اوله ماز )  
بيوردي مشار اليه درحال زرهني چيقاره رق حر به کيدوب اوکون  
شهيد اولدي وشهيد دوشمسيله حجاج طاقی تکبير کتوردي . شوراسي  
غرييدرکه ابن عمر حضرتلري تکبيري ايشدکده باقک شو حجاجک  
عسکرينه که مؤمنلر اشبو عبدا لله ابن زبيرک ولادتي کوني ( يهودينرک  
برمسلمانلري تسخير ايتدک انلرک اوغللري اولمز سوزلري يلان چيقمش واسلام  
سونجملرندن تکبير کتورمش ايدي اشته بوکون دخي شهادته سوينوب  
تکبير کتورنلري مقايسه ايجاب ايدر ) بيورمشدر . ليله هجرت حضرت

فخر رسالته مشار الیها حضرتلری نطاقنی (قوشاق) ایکی یه بولوب  
بر پارچه سنی سفره ودیکر پارچه سنی قر به یه باغ اولمق اوزره عرض  
ایتدکلرنده جانب جناب سید البشر دن (یا اسماء سنک بونطاقکه بدل جناب  
حق سکا جننده ایکی نطاق احسان بیوره جقدر) تبشیری شرفصادر اولمقله  
مشار الیها (ذات النطاقین) وصف جیلده شهرت بولمشیدی .

§

﴿اسماعیل﴾ علیه السلام — پیغمبران عظامدندر و حضرت  
ابراهیم علیه السلامک اوغلی و حضرت اسحق علیه السلامک لاب  
قرداشیدر . حضرت ابراهیمک هیچ بر اولادی دنیایه کلدیکیچون  
زوجه سی حضرت ساره مصر ملککنک مقدا هدیته ایتدیکی (هناجر)  
نام جاریه یی حضرت ابراهیمه اهدا و استغراشته مساعده ایلدیکنندن  
حضرت اسماعیل (۳۵۵۸ خ) تاریخنده یعنی میلادک ایکیکیک اوتوز الی  
یاخود ایکیکیک یوز طقسان اوچ سنه مقدمنده دنیایه کلدی مؤخرأ  
جناب حق ساره یه دخی حضرت اسمحاقی احسان بیوردیغندن ساره  
هاجر ایله اوغلنک تبعیدینی استدی حضرت ابراهیم زوجه سی موسی  
الیهانک خاطرندن چیه میوب حضرت اسماعیلی والده سییله برابر ارض  
مکه ده کعبه مکرمه نك اولدیغنی محله براقدی بر مدت صکره حضرت  
ابراهیم اوغلی اسماعیلی کورمک ایچون مکه مکرمه یه کیدوب برلکده کعبه  
مکرمه یی یابدی و (ربنا انی اسکنت من ذریتی بواد غیر ذی زرع عند  
یتک المحرم) دهرک دعا ایدوب ینه خبرونه عودت بیوردی و یمندن شام  
شریفه کیدن (جرهم) قبیله جسیمه سی مکه مکرمه یه کلوب بئرزمنمک  
ظهوری مناسبتیله اوراده توطن ایلدی حضرت اسماعیل قبیله مذکوره  
رؤسası نزدنده علوقدر و منزلتنی اظهار وانلردن برینک قزیه تزوج ایدوب  
مؤخرأ قبیله مذکوره یه پیغمبر بعث بیوردی . مشار الیه حضرتلرینک  
بو قزدن (نبیوت) و (قیدار) و (آدایل) ودیکر اسملرده اون ایکی  
اولادی دنیایه کلوب هر بری بر قبیله یه رئیس اولمش و پدر طرفندن  
کلدانی و والده طرفندن عرب اولدقلر ایچون بونلره (عرب مستعربه) نامی  
و یرلمشدر علیه الصلاة والسلام افندمز (قیدار) سلاله سنه منسوبدر .



حضرت اسماعیل علیه السلام یوز اوتوز یدی سنه معمر اولوب (۳۶۹۵ خ) تاریخنده یعنی میلادک بیک سکز یوز طقسان طقوز سنه مقدمنده وفات ایلدی.

§

﴿ اسماعیل اتقروی ﴾ — کبار مشایخ مولویه دندر . غلطه مولویخانه سی شیخی ایدی مشوی شریفه برکوزل شرح یازمش (و ۱۶۳۱ م و ۱۰۴۱ ه) تاریخنده وفات ایدوب مولویخانه مذکور خطیره سنه دفن اولمشدر .

§

﴿ اسماعیل ﴾ حقی — رجال جلوتیه دن و مفسرین کرامدن بر مبارک ذاتدر . بو ذات عالیقدر مسقط رأسی اولان آیدوسدن درسعاده کلوب اسکدارده احمدیه جامع شریفنده برمدت وعظ و نصیحت ایتد کدنصکره بروسه یه هجرت ایدوب اوراده وحدت وجود مسئله سندن بحث ایتدیکیچون علمانک شکایتله تکفور طاغنه نئی و براز صکره اطلاق اولندی . طریقت جلوتیه ده خلافتی آت پزاری شیخ عثمان افندی حضرتلرندندر وانلرده ذاکر زاده دن وانلرده دیزدار زاده دن وانلرده (هدایی محمود افندی) حضرتلرندن استخلاف بیورمشلردر . اسماعیل حقی حضرتلرینک کمالی (روح البیان) و (اصول حدیث) و (شرح محمدیه) و (شرح مشوی) سنی مطالعه ایدنلر ایچون معلوم اولور .

کندی سویدلیکی (کبش روح حقه قربان ایلدم) تاریخنه نظراً وفاتی (۱۷۱۴ م و ۱۱۲۷ ه) تاریخنده وقبری بروسه ده در .

§

﴿ اسماعیل معشوقی ﴾ — طریقت علییه بیرامیه نک ملامیه قولی رجالندندر . اوغلان کلمه سنه نظر بیوریه .

§

﴿ اسماعیل صفوی ﴾ — شیخ صفی الدین اردبیلی احفادنندن و ملوک ایرانیه دندر . ابتدا پدری کبی کیلانده شیخانک و بعضاً مریدلریله غزا آتمکده ایکن (۱۵۰۰ م و ۹۰۶ ه) تاریخنده حکومت بایندریه نک ضعفنی فرصت اتخاذا و شیخانکی شاهلغنه تحویل ایدرک افشار و قاپچار و ذوالقدریه

عشارندن و اجدادی مرید و طرفدار لرندن تدارك ايتديكى عسکر ايله آق قيونليرى و شروانليرى پريشان و تبريزى استيلا و سلالهٔ ملوك صفويه يي تشكيل ايلدى ممالك محروسهٔ شاهانه اهاليسنى دخی اغفال و جلب ايچون شيخلك يوزندن دعوتنامه لر و خليفه نامنه مفسد لر كوندروب قرمان اهاليسنى كركى كبي قانيردى ايسه ده سلطان بايزيد حضرتلرى حصول آرزوسنه ميدان برآقدى و (يزد) و (اصفهان) طرفلرنده مخالف افكار و اعتقادی اولنردن اوتوز بيك قدر علما و سادات كرامى قتل عام ايتيردى و امرادن حسين بك نامنده برقهرماني تيمور قفس دروننده احراق و مراد بكي كباب ايلدى . و (۱۵۰۸ م و ۹۱۴ هـ) تاريخنده بغدادى اوروب بولديغى سنيلرى كسدى التى سنه صكره سلطان سليم حضرتلرى مشهور چالديران محاربه سنى قزانهرق شاه مشار اليك زوجته سيلاه معشوقه سى تاجلى خاتمی و بتون خزينه و اشياسنى اغتنام و خوى و تبريزى استيلا ايلدى ايسه ده يكچيريلك سرکشكى مانعه سيلاه ده ايلرويه كيده مدي و شاه اسماعيل مغلوبيت مذكوره ملبسه سيلاه حيثيتنى ضايع ايلديكنه و اكثر كردستان ممالكى النندن چيقوب دولت عليه يه انتقال ايتديكنه بناءً كدرندن زياده سيلاه شرب خره مبتلا اولهرق اوتوز سكر ياشنده و (۱۵۲۳ م و ۹۳۰ هـ) تاريخنده آخرته كتدى بقای سلطنتى ايچون امور مذهبيه يه مداخله ايدرك ملت منجيهٔ اسلاميه يي شيعيك و سنيلك تفرقه سنه دوشوروب الى آخر الايام بدنام اولان بودر .

§

اسماعيل صفوى ﴿﴾ — برنجى اسماعيل صفوينك حفيدر .  
 بونك پدرى (طهماسب خان) (۱۵۷۶ م و ۹۸۴ هـ) تاريخنده وفات اتمك اوزره ايكن ايران وكلا و امراسى ايكي طرف اولوب بر طرفى اشبو اسماعيله و ديكر طرفى قرنداشى حيدر ميرزايه بيعت اتمك استدى بينلرنده برچوق مقاتله و قوعندن صكره اسماعيل طرفيليرى غلبه ايتديكندن شاه اسماعيل پدرينك حياتده حبس اولنديغى محلدن چيقوب تخته احلاس ايلدى و درحال حيدر ميرزا طرفدار لرندن برچوغنى و اون برنفر قرنداشى و عمزاده لرينى اعدام ايتديروب پك سوديكي بيوك قرنداشيله مدير الملك

کوزلرینه عنایت مخصوصه اولوق اوزره میل چکدیردی لکن رافضیلرک  
علینده اولدیغنی و سب شیخین بدعت مذمومه سنی منع افکارنده بولندیغنی  
بردن بره اظهار ایلدیکندن امر او اهلینک اکثریسی یان یان باقغه باشلادی  
وجلوسنک ایکنجی سنه سنده برکیجه معشوقی (حلوائی حسن بک) ایله  
یاتورکن ایکسی بردن اعدام اولنوب یرینه بیوک قرنداشی (اعما محمد)  
پکدی و بودخی مصالح دولته نظارت آتمک ایچون اعما بر صدر اعظم انتخاب  
وتعین ایتدی . بروایتده اسماعیل صفوی همشیره سی یاخورد زوجده سی  
بدیله قتل اولمشدر .

§

﴿ اسماعیل افندی ﴾ — سلطان احمد ثالث زمانده اون التی آی  
مشیخت ایتش برذاتدر کتیه سی (ابو اسحق) در . سلطان سلیم  
جامع شریفی جوارنده و چهارشنبه پازاری جاده سنده کعبه مکرده نک تمام  
طول و عرض وقنده اوله رق بنا ایتدیردیکی جامع شریفه ایوم اسماعیل  
اغا جامعی دیرلر . مومی الیهک وفاتی (۱۷۲۵ م و ۱۱۳۸ هـ) تاریخنده  
وقبری جامع مذکور خطیره سنده در .

§

﴿ اسماعیلیه ﴾ — ملاحده اسماعیلیه باطنیلرک مذهب باطلندن بر  
شعبه در . اعتقاد کله سنده اوتوز طقوزنجی فرقه یه نظر بیور یله .

§

﴿ اسماعیل ﴾ — طونه نهرینک ساحل یسارنده رومانیانک بر  
قصبه سیدر . بوراسی مقدا معمور و غلبه لک بر بلده حصینه اولدیغنی  
حالده (۱۷۸۹ م و ۱۲۰۴ هـ) تاریخنده روسیه جنرالی سووواروف  
حرباً دولت علیه دن آلوب اوچ کون یغما و چوق یرلرینی احراق  
ایتدیردیکن صکره دولت علیه یه پکوب (۱۸۰۹ م و ۱۲۲۴ هـ)  
تاریخنده ابرائیل ایله برابر ینه روسیه یه انتقال ایلدیکندن اسکی حالتی  
ضایع ایتدی . ایوم نفوس موجوده سی یکریمی بیک راده سنده در .

§

﴿ اسنه ﴾ — مصرده (قنه) سنجاغنده بر قضا مرکز یندر .

§

﴿ اسوج ﴾ یاخود ( شیوهت ) — شمالاً و غرباً بحر منجمد شمالی و جنوباً بحر بالطق ایله محدود اولان و شمال شرقیسی روسیه نك لاپونیا الکاسنه متصل بولنان ( اسقاندیناوا ) شبه جزیره سی اوزرنده واقع ایکی قطعہ جسیه نك بریدر دیکری ( نورج ) در بونلرک اکرچه ایکسیده برقرالک زیر حکمنده ایسه ده اداره لری مشروطیت وجهله بشقه بشقه اولدیغندن بربرلرینک قانوننه مداخله ایتزلر . اسوج قطعہ سنده اکثریسی پروتستان اولق اوزره درت ملیون ونورج قطعہ سنده بر ملیون سکز یوز بیك نفوس تخمین اولنیور . قرالک پای تختی اسوچده واقع یوز اللی بیك نفوسلی ( استوقولوم ) شهریدر . اهالی مملکت اسوچه ( سوه ریج ) وفرانسزلر ( سوئد ) دیرلر . ذکر اولنان شبه جزیره نك منطقه منجمده یه یقین اولان محالرنده یعنی التمش طقوز و تمش عرضلرنده یاز کونلری کونش بر قاچ هفته افق اوزرنده دوران ایتدیکی کی قیش کونلری دخی اول قدر مدت نابدید اولور بو مظلم زمانلرده اهالی مهتابلر و مشعله لری ابقادیه ایشلرینی واخذ و اعطالرینی یپارلر و قار اوزرنده یورتد کلری قیراقلرینه کیك جنسندن بر نوع حیوان قوشارلر و طولک ایرکن باشلادیغی سنه لرده کویلیلر چام قبوغندن معمول بر نوع خبیر تناول ایدرلر . اسوچ دولتی آمر یقاده واقع کوچک آنتیل اطه لرندن ( سن بارتلی ) نام اطه یه دخی مالکدر . اقتداری ایچون حکومت کله سنه نظر بیوریله .

§

﴿ آسود ﴾ عیله بن کعب — بو حریف زمان سعادتده یمنده توره یوب مر کبنه سجده ایت دیدکده یوزینی یره سورمک و ترسلن دیدکده ترسلنک کی حقه بازلفرله بر چوق خلقی کندویه جلب ایتش و نبوت دعواسیله اطرافه مکتوبلر کوندروب اکثری یمن و نجران جهلاسنی کندوسنه اویدورمش بر خبیث ایدی علیه الصلوة والسلام افدمز انبار طرفندن آدملر ارسال و تدبیر حسنه ایله یاخود حرب و تضییق ایله اخذ و قتل اولنمسنی فرمان بیوردیغندن مأمورلر کیدوب و هر طرفی مسلح بکچیلرله محافظه اولنان قصرینه زوجه سنک تدبیریه آچیلان کد کدن کیروب

ققاسنی کسدیلر وقان دو کلمکسزین غائله سی بر طرف اولدیغنیك خبر بشارت اثری علیه الصلوة والسلام افندمزك ارتحاليله جناب ابا بكر الصدیقك خلافتی ائشاده کلمکله عموم مسلمین مسرور اولدیلر .

§

﴿ آسوله ﴾ — ( ۱۲۳۶ م و ۸۴۰ هـ ) تاریخنده وفات ایدن علاءالدین رومی حضرتلرینک تألیف ایتدیکی کتابك اسمیدر .

§

﴿ اسویچره ﴾ یاخود ( اتحاد هلویتك ) — فرانسه ایله اوستریا ممالکی آرهسنده بر جمهوریتدر و اکثریسی پروتستان و برازی قتولك اولق اوزره اهالیسی ایکی ملیون التی یوز التمش بیک تخمین اولتمقدهدر . اسویچره ممالکنده پك چوق مهیب قیالر و مخوف و عمیق اوچورملر و دره لر تپه لر بولندیغندن وقارک کثرتیله بیوک چیغیر حاصل اولدیغندن سیر ایچون کیدن سیاحلر درلو درلو مخاطراته اوغرارلر و بعضیلری تلف اولورلر . یکریمی ایکی ایالتدن عبارت اولان اشبو اسویچره ممالکی متعدد جمهوریتلره منقسم ایسه ده جله سی اتوز التی بیک نفوسی جامع اولان ( برن ) شهرنده متشکل و اعضاسی برسنه ایچون منتخب مجلسه تابعدرلر . بورا اهالیسنک بر نوع طاغ فاره سی اکل ایتدکری ولذتنی ثنا ایلدکری بعض توار یخنده کورلمشدر . اهالیء مرقومه پك کوزل قاشلر طوقورلر ساعتلر پیارلر .

§

﴿ آسیا ﴾ — قطعات خسهء ارضك واسعی وابتدا معمور اولانیدر و شمالدن جنوبه طوغری طولی طقوز بیک یدیوز و شرقدن غربه طوغری عرضی اون ایکینیک سکز یوز کیلومترو اولوب اهالیسی التی یوز ملیون تخمین اولتمقدهدر جهت شمالیسنده ( سبریا ) و جهت غربیسنده ( آسیای ترکی ) و ( عربستان ) و جهت جنوبیسنده ( ایران ) و ( افغانستان ) و ( بلوچستان ) و جانب شرقیسنده ( چین ) و ( ژاپون ) و وسطنده ( ترکستان و تاتارستان کبیر ) واقع اولوب بحر حرز و اورال

نامریله ایکی عدد بیوک و مستقل دکزی و سکر عدد جسم سلسله جبال  
و مشهور نهر لری واردر .

اسیا قطعه سنک بعض محارنده بر چوق زمان قبائل چین و اتراک و تاتار  
واعجاب و یونان و ایکنجی عصر میلادیده روما دولتی و دردنجی عصرده  
شرق امپراطور لری ویدنجی عصرده خلفای امویه و عباسیه و طقوزنجی  
عصرده ملوک سلچوقیه غالباً حکم سوردی و میلاددن ۶۰۶ سنه مقدم  
آثور یلرک انقراضی و ۵۶۰ سنه مقدم مشهور کینسروک استیلاسی و ۵۸۷  
سنه مقدم ایکنجی بخت نصرک قدسی استیلاسی و ۳۳۴ سنه مقدم اسکندر  
رومینک غلبه سی و میلادک التمش طقوزنجی سنه سنده بیوک قدس محاصره سی  
و هجرتک اوتوز ایکنجی سنه سنده ساسانیرک اضمحلالی و سکسان ایکنجی  
سنه سنده جاجم محاربه سی و یوز اوتوز ایکنجی سنه سنده عباسیرک امویلره  
غلبه سی و درتیوز طقسانجی سنه سنده اهل صلیبک مهاجده سی و الی یوز  
اوچنجی سنه سنده چنکیرک ویدیوز یمش سکرنجی سنه سنده تیمورلنکک  
استیلاسی و طقوز یوز یکرمنجی سنه سنده چالدران محاربه سی و قوعه کلدی .  
آسیای صغرا دنیلان اناطولی قطعه سنه یونانیر ( آسیا مینور ) دیرلر .

§

﴿ آسیه ﴾ — فرعون موسی اوچنجی امنو فیسک یاخود اوغلی  
حاروسک زوجه سیدر . بوخاتون غایت منصفه و عابده اولدیغندن موسی  
علیه السلامی نیلدن التقاط ایدوب باغرینه باصدی و زوجه نک مشارالیه  
حقنده اولان غضب و افکارینی تسکین و تحویل و جایه ایلدی یهودیلرک  
و عمنجه و تورانک قولنجه حضرت موسی بی جایه ایدن فرعونک قزیدر .  
حافظ ضیای مقدسینک حافظه حدیث اولان قز قرداشنک اسمی دخی  
( آسیه ) در .

§

﴿ اشار ﴾ — اوروپا مشاهیر کیمیا کرانندن و برلین اهالیسندن هنرور  
بر ذاتر . مارقرافک بیاننه کوره پانجاردن شکر استحصالنی ابتدا بوذات  
کشف ایدوب پروسیا قرالی بولنان ذاتدن ( سلیسیا ) ده واقع ( قوران )  
اراضیسنی آلوب اوراده تجربه سنی اجرا ایلدی و بو کشفی شایان

تخصیص و آفرین اوله رق قدری یلنوب دار الفنونہ قبول و حکمت طبیعیہ  
درسلمری نظارتہ تعیین اولندی . وفاتی ( ۱۸۲۱ م و ۱۲۳۷ هـ )  
تاریخندہ در .

§

﴿ آشار ﴾ یاخود ( آخاز ) - مرکزی قدس شریف اولان ممالک  
یهودیہ حکمدارلرندندر . سوریه و ممالک اسرائیلیہ ملکلمری ممالک  
یهودیہ بی ایکنجی دفعه محاصره ایتدکلمری زمان مومی الیه آثوریلره  
مراجعت و برچوق التون و کوش اهدا ایدرک آنرک معاونتیلہ یقایی  
قورتاردیسه ده کندو دینی براغوب ساخته آلہلره پرستش وانلرک اغورینه  
اوغلنی قربان ایلدیکندن و معاونت و احساننی کوردیکی آثوریا حکمداری  
( تغلتفالاصر ) ک خاطرندن چیقہ مدیغیچون آنک امریلہ عبادتخانہ سنہ  
پت آصدیغندن بین الملة ملحد و دینسنز نامنی آلدی و ممالکی معاونت  
مذکورہ مناسبتیلہ دولت آثوریه جایہ سنہ کیردی . مومی الیه اون  
التی سنہ حکومت سور دکدنصکرہ ( ۱۸۱۷ خ ) تاریخندہ یعنی میلادک  
یدیوز اون یدی سنہ مقدمندہ وفات ایدوب الحادی مناسبتیلہ حکمدارانہ  
مخصوص اولان مزارہ دفندن محروم قالمشدر . کونش ساعتی بونک  
زمانندہ ایجاد اولندی .

§

﴿ آشانتی ﴾ - آفریقا قطعہ سنک جهت غربیسنندہ و کینہ شمالینک  
ساحل جنوبیسنندہ برزنجی حکمدار لغیدر . بورانک حکمداری بولنان  
ذات جسوارندہ اولان ( روی ) و ( مواسان ) و ( تاکا ) و ( قورائزا )  
و ( توفل ) و ( دانقارہ ) و ( سایونی ) و ( آمپانا ) و ( اکین ) و ( آسیم )  
وسائرہ نامر یلہ متعارف یکریمی ایکی عدد امارات صغیرہ و کبیرہ زنجیہ بی  
تحت اطاعتنہ آلہرق ایچہ بر قوت و یوز بیک عسکر چقارمغه اقتدار پیدا  
ایتدیسه ده آره صره انکلیرلرک تسلطندن قورتیلہ ماقندہ در . حکمدار  
مومی الیهک مقر سلطنتی ( قوماس ) شہریدر بونک ساحلندہ اولان ( سان  
جورج ) قصبہ سی انکلیرلرک اوغراغیدر آشانتی اہالیسنہ ( امة الدہودیہ )  
واراضیسنہ ( سواحل الذهب ) دخی دیرلر و اہالیء مرقومہ بی برملیون

وحایه ایتدیکی امارات اها لیسبله برابر اوج ملیوندن متجاوز تخمین ایدر لر .

§

﴿ آسباه ونظائر ﴾ — ( ۱۵۶۲ م و ۹۷۰ هـ ) تاریخنده وفات ایدن علامه ( ابن النجیم ) مصرینک علم فقه و قواعد و ضوابط و جمع و فرق و حیل و نظائرہ دائریدی فنی جامع تألیف ایتدیکی کتابک اسمیدر مومی الیهک اسمی زین العابدین در تاریخ مذکور دن ایکوز الی درت سنه مقدم کلان شیخ ابن الوکیل صدر الدینک و امام سبکینک و جلال الدین سیوطینک دخی بونامده کتابلری واردر .

§

﴿ اشبیلیه ﴾ — اسپانیا ممالکی داخلنده و اندلسک جهت غربیسنده بر شهر شهیردر . بوراسی غوتلر و رومانلر زماننده ( هیسپالیس ) نامیله مشهور اولدیغی حالده اسلامه انتقالنده ( اشبیلیه ) دینلدی شمدی اسپانیوللر ( سویلا ) دیمکده درلر . بوشهرک موقعی غایت مفرح و دائم الحضرة ولطیف الهوا و اووهلری سما کورنمز صورتده زیتون اشجار یله مزین و معمور اولوب هر طرفنی ( وادی الکبیر ) نهری اسقا اتمکده در . اسپانیوللر نهر مذکوره شمدی غلط اوله رق ( غواد الا کوبرا ) دیرلر و ( اشبیلیه ) یی کورمیان غرب ایدن هیچ برشی کورماشدر ضرب مثلنی حالاقوللانورلر حالبوکه مسلمانلر زمانندن قالان ائارک همان کافه سی محو اولوب یالکز ( خیر الداء ) قله سی و امویلرک ( الفصر ) سرای عتیق قالمش و اولوقت بر ملیوندن زیاده نفوسی و ارایکن شمدی یوز اون بیکه تنزل اتمشدر .

§

﴿ اشرف رومی ﴾ — کبار اولیاء اللمهدندر . مشار الیه اولیاء الله کرامدن ( سید احمد المصری ) حضرتلرینک مخدومی اولوب ازینق قضاسنده دنیا به کمش و اوراده خیلی زمان ارشاد عبادله مشغول اولدیغی حالده ( ۱۴۹۳ م و ۸۹۹ هـ ) تاریخنده دار آخرته انتقال اتمشدر ازینقده اولان تر به سی الیوم زیار تکاه خواص و عوامدر ( مزکی النفوس ) نام کتابی تألیف اتمشدر حفید حفیدی ( سید لطف الله ) افندی دخی کلین مشایخ کرامدن ایدی .

§



﴿ اشرف ﴾ — ملوک غلامان مصریہ دن بر بہادر ذاتدر . بو ذات ( صور ) و ( عکا ) و ( صیدا ) قلعه لرینی بش ہفتہ ظرفندہ لاتینلردن یعنی اولحوالیدہ یرلشمش اولان صلیبیلردن حرراً آلوب کندولرینی اورالردن چکلماکہ مجبور ایتدی و اکثر معتبرانی مأذوناً قبریسه ہجرت ایلدی .  
ملک اشرف مصرده درت سنه کمال عدالتله حکومت ایتدکدنصکره ( ۱۲۹۲ م و ۶۹۲ هـ ) تار یخنده امراسنک طمع وغدر یله شهید اولشدر .

§

﴿ اشعث ﴾ — لغت عربیده صاچی دوکلش معناسنه اولدیغندن ( ابن اشعث ) و ( ابوالاشعث ) بعض ذوانک کنیه ولقی اولشدر .  
ملوک امویہ زماننده عراق والیسی ( حجاج ) طرفندن ایران و ترکستان فتحنه کوندر یلوب اورالرده نیجه ممالکک فتح و تسخیرینه موفق اولان و ( ۷۰۱ م و ۸۲ هـ ) تار یخنده بینلرینه کیرن بروده مبنی اردوسیله حجاجک اوزرینه کلوب برقاچ محاربه قراندقنصکره مشهور ( حجاج ) محاربه سنی غیب ایدن سرعسکرک کنیه سی دخی ( ابن اشعث ) ایدی . حجاج بغداد جوارنده بر موقعدر .

§

﴿ اشعر ﴾ — ( بنو اشعر ) یاخود ( اشعریون ) یمنده مسکون ( سباء ) اولاندن بر بیوک قبیلہ اسمیدر . اصحاب کرامدن ( ابو موسی الاشعری ) و ائمہ دیندن ( ابو حسن الاشعری ) حضراتنک اصللری بوقبیلہ دن ایدی . ( اشعر ) لغت عربیده قیللی آدم دیمکدر . مشارالیه مانک اسملرینه مراجعت بیور یله .  
مکه مکرمه ایله مدینه منوره آره سنده اولان ایکی طاغک برینه ( جبل اقرع ) و دیگرینه ( اشعر ) دیرلر . ینبوع اوزرینه اینن طریقده و بنی جهینه داخلنده برطاغک اسمی دخی ( اشعر ) در .

§

﴿ اشعیاء ﴾ — بن عاموس علیه السلام — انبیاء بنی اسرائیلدندر .  
یهودا ملکی ( اوزیا ) و ( یوثام ) و ( اخاز ) و ( خزقیآ ) زمانلرنده و ( ارمیاء ) علیه السلام دن اول قدس شریفده بولنور ایدی . آثوریا ملکی ( سناخریب )

ممالک اسرائیلیہ میں آوردقن برقاچ سنہ صکرہ یعنی میلادک التي یوز طقسان درت سنہ مقدمندہ ممالک یہودیہ یہ دخی هجوم و بعض شهرلرینی استیلا ایدرک قدس شریفی تحت محاصرہ آلدقده ملک خزقیہ حضرت اشعیاء ایلہ جناب واجب الوجودہ التجا وچولر کینہرک عبادتخانہ سندہ تضرع ودعا ایلدیکنہ و جناب حق مشارالہک و خزقیانک دعا و نیازلرینی قبول یوردیغنه بناء سناخر بیک اردوسی مستولی اولان و باعلتیلہ پریشان اولدی . خزقیہ بردفعہ امیدسز برخستہ لکہ دوچار اولوب حضرت اشعیاءدن افاقتنی رجا و استرحام آتمشیدی مشار الیہ دعا و شافی حقیقی افاقت احسان بیورہ جغنی تبشیر بیوردیسہدہ خزقیہ مطمئن القلب اولہ میوب برنشان التماس ایلدیکندن حضرت اشعیاء شمسک اون درجہ حرکتدن قالدیغنی معجزہ اولہرق کوستردی . اشعیاء علیہ السلامک وقایع آتیہ میں یعنی حضرت ( مسیح ) و حضرت ( محمد المصطفی ) علیہم الصلاة والسلامک ظهورینی ونیجہ وصایا و تهدیدات و نصایحی شامل والتمش التي بابی مشتمل کتابی ذیل توراتہ مسطوردر . مشار الیہ ملک ( منشا ) زمانندہ پترستلکہ سلوک ایدن یہودیہ قارشو شدید سوزلر سویلدیکی ایچون بیجقی ایلہ شہید اولدی دیرلر .

اشعیاء الفسز ( شعیاء ) دخی یازیلور .

§

﴿ اشقر ﴾ — کوك كوزلی صاری تنلی یاخود صاری توکلی آدمہ

ویلهسی قویروغنی قزلہ مائل صاری وآل توکلی اسبہ اطلاق اولنور .  
ترجکھسی عین ایلہ عشقر ایسہدہ صحیحی الف ایلہ در .

§

﴿ اشقودرہ ﴾ — روم ایلینک جانب غریبسندہ وقرہ طاغک جہت

جنویسندہ ووندیک دگری ساحلنہ قریب محلدہ برولایتک مرکزیدر .  
اشقودرہ شهر مستحکمی اسکندر رومی زمانندہ انشا اولنوب مؤخرآ برقاچ دفعہ صرپلورک ووندیکولرکالنه یکدی و ( ۱۲۷۸ م و ۸۸۳ هـ ) تاریخندہ سلطان ( محمدالثانی ) حضرتلری مکمل بر اردوایہ کیدوب ابتدا اطرافندہ کی طاغری استیلا واورالردن قلعه میں دوکک ایچون بیوک طوپلر چیقارلسنی

فرمان ایلدیسده ممکن اوله مدیغندن در سعادتن باقر و اوسته جلب و طاغیرک  
 تپه لرنده بیوک طویلر اصاغه ایتدیره رک الی آی محاصره و تضییق ایله آلدی  
 و ( اسکندریه ارنود ) نامیله و کتخدالقی و جهله روم ایلی ایالتنه الحاق  
 ایلدی . بونک اوزرینه و ندیك دولتی مصالحه یه مجبور اولمشدر .  
 ( ۱۸۳۱ م و ۱۲۶۷ هـ ) تاریخنده اشقودره و الیسی بولنان مصطفی پاشا  
 دولت علیه نك افکار و اراده سنه مغایر حال حرکاتده بولندی دنیه رک ایالتی  
 طوغریدن طوغری تحت اداره یه النوب پاشای مشار ایله در سعادته جلب  
 و قصوری عفو اولندی .

اشقودره نك اتصالنده بر بیوک کول واردر و ساحلنده ایشلیان بیوک کوچک  
 سفینه لر ایکیکیکن اشاغی د کلدر .

§

﴿ اشکانیان ﴾ — یاخود ( ارشکانیان ) — درت طبقه یه  
 منقسم اولان ملوک فرسدن او چنجی طبقه نك عنواندر . بو طبقه ( ۵۳۳۸ خ )  
 تاریخنده یعنی میلادک ایکیوز الی الی سنه مقدمنده پارت رؤساسندن  
 ( ارشک ) نامنده بر صاحب خروجک ( سلوسید ) لره غلبه سیله تشکل  
 ایدوب ( ۲۳۰ م ) تاریخنده طبقه ساسانیه نك ظهوریله منقرض اولدیسده  
 بو طبقه یه منسوب اولان بر قاچ حکمدار ارمنستان قطعه سننده بر مدت ده  
 اجرای حکومت ایشدر . دولت اشکانیه یه ( پارت ) دولتی دخی دیرلر .  
 بونلرک پای تختی ( دمغان ) و ( مداین ) شهرلری ایدی . ( ارشک )  
 و ( پارتیا ) کله لرینه دخی مراجعت بیوریله .

§

﴿ آشهراب ﴾ — یهود علماسنندندر . بو ذات ( ۳۰۰ م ) تاریخنده  
 دنیا یه کلوب ذکا و فراستی سایه سننده بر چوق علومه مالک اولدقدن صکره  
 زمانی علماسنی جمع و شریعت موسویه یی تدقیق ایدرک اقسام سسته اوزره  
 التمش جلدی جامع بر کتاب تألیف و ( تلوت بابلی ) تسمیه ایلدی .  
 بو کتابده علوم جبرییه و هندسیه و فلسفه یه متعلق مسائلدن دخی بحث  
 اولمشدر . ( تلوت یر و شالمی ) بشقه در آنک ایچون ( یوحنان ) کله سنه  
 نظر بیوریله .

§

﴿ آشیل ﴾ — جاهیر یونانیه دن تسالیا حکمداری بولنان ذاتک اوغلیدر . جاهیر مذکورہ بالاتفاق ترووا اوزرینسه کتمک اوزره ایکن بوچوجق دخی سائر دلی قانلیرله برابر کتمک هوسنه دوشدیسده والدهسی مساعده ایتیموب قادین قیاقنده ( ایسکیروس ) اطهسنه قاچیرمش واوراده محافظه اولنسنی تنبیه ایتش ایدی مرقوم بعض مکسه لردن یکتیک و عواسنه طوقینور سوزلر ایشتدیکندن برتقریب صاووشوب ترووایه واردی ووقوعبون محارباتک کافه سنه کیروب پک چوق شجاعت کوستردی و ترووا قرالنک جسارت و شجاعتله مشهور اولان اوغلنی اخذ و عربه سنه ربط ایله ترووانک اطرافنده کردیردی . مرقوم آشیلک غضب و شدتی دخی جسارت و شجاعتی نسبتنده ایدی .

§

﴿ آصاف ﴾ یاخود ( آساف ) — بن برخیا ( داود ) علیه السلامک اصحاب کرانمنددر . مومی الیه اثنای عبادتده ( مزامیر ) او قویانلرک امامی ایدی . بو ذات نعمتک دخی مرتب اولی اولدیغندن تعلیم ایتدیکی مدرسه دن یتیشانلره ( اسافی ) تسمیه اولمش بونام مؤخرأ بعض ملوک بنی اسرائیله و بیوک خاخاملره ورؤسای دیره دخی ویرلمشدر .

§

﴿ اصحاب کهف ﴾ — صیانت و عنایت آلہی یه مظهر اولمش یدی نفر ذواتدر . بونلرک بشی یاخود التیسی شرق امپراطوری غدار ( دسیوس ) یاخود ( داقیوس ) ک دائرہسی منسوباتندن و بریسی چوبان ایدی اشبوالتی ذات هنوز انتشار ایدن دین نصاریه داخل اولدیغی و مرقوم دسیوس دین نصاری علیهنده پک زیاده شدت کوسترمکده و نیجه یوز بیک بیکناھک قاننه کیرمکده بولندیغی جهتله قور قولرندن قاچوب و یولده راست کلدکری برچوبانی دخی التماسنه بناء قبول ایدرک ( افس ) یاخود ( افسوس ) ک شرق جهتله کیدوب بر مغاریه صاقلاندیلر و تفاسیر شریفه ده تفصیلاً بیان بیوردیغی اوزره جناب حق بونلری و چوبانک کلبنی بر بیوک اوینجویه طالدیروب محافظه بیوردقدن اوچیوز طقوز سنه صکره او یاندیره رق اوکون ینہ اماتہ بیوردی . مدت نوملری حقنده نصاری اختلاف ایدوب اکثریسی

بوزطقسان بش سنه دیدیلر سده صحیحی بالاده محرر اولدیغی وجهله در  
 و او یانملری خرسیتیان مذهبیه طرفدار اولان ایمر اطور (تؤدوسیون) زمانده  
 یعنی هجرت نبویه علیه اکمل التحیه نك التمش بو قدر سنه مقدمه  
 وقوعبولشدر . اصحاب کهنک اسلام بیننده زبازند اولان اسملری بشقه  
 و کتب نصاراده بشقه اولدیغی کبی کتب نصاری دخی یکدیگرینه مخالفدر .  
 بزبونلرک السنه اسلامیه ده زبازند اولان و ملکائی قاردینال (اوسی) نک دعا  
 کتابنده بولنان و سائر کتب نصاراده کوریلان اسملری نی زیرده بیان ایده جکز .  
 قاموسده محرر اولان بش نوع اسملری نك بونلره مشابهتی پک آذرر .

اسلام بیننده	دعا کتابنده	بعض کتب نصاراده
۱ یلیخا	۱ مالخوس	۱ یولیخوس
۲ مکسلینا	۲ مکسیمیانوس	۲ مکسملیانوس
۳ مسلینا	۳ یوحنا	۳ اندونیوس
۴ مرنوش	۴ مرتینیانوس	۴ مارتی یانوس
۵ دیرنوش	۵ دیونسیوس	۵ دیونیوس
۶ سازنوش	۶ سارایون	۶ کساقوسنود یانوس
۷ کفشطیوش	۷ قسطنطین	۷ قسطنطینوس
۸ قطمیر کلب		

§

﴿ اصحاب صفه ﴾ — زمان سعادتده طریقه عزلتی اختیار  
 و نفس نفیسرینی زهد و صلاحه اجبار ایدن اصحاب کرام حضراتیدر .  
 بو ذوات محترمه هنوز جمع و ترتیب اولنمیان قرآن کریمی و احادیث نبویه بی  
 قوه حافظه لرنده حفظ و عبادات ایله اشتغال ایدر لر و دائماً علیه الصلاة  
 و السلام افندمزک مظهر ثناء و التفات عالیلری اولورلرایدی . کشف الظنون  
 صاحبنک قولنجه اصحاب صفه او توزدرت زاندر و (بلال حبشی)  
 و (عبدالله بن مسعود) و (سلمان فارسی) و (ابومسعود) و (عکاشه)  
 و (ابوذر غفاری) و (ابوهریره) و (ثوبان بن معاذ) رضوان الله تعالی  
 علیهم اجمعین حضراتی دخی بوجهله به داخلدر .

§

﴿ اصحاب فیل ﴾ — ازهه کله سنه نظر بیوریه .

§

﴿ اصحاب ایکه ﴾ — ایکه کله سنه نظر بیوربله .

§

﴿ اصفهان ﴾ یاخود ( اصفهان ) — ممالک ایرانیه دن عراق عجم

ایالتی داخلنده و طهرانک اوچیوزاللی کیلومتر و جنوبنده برشهردر .  
بوراسی مقدماتک معمور و ایران شاهلرینک مفرسلطنتی ایکن ( ۱۳۸۷ م  
و ۷۸۹ هـ ) تاریخنده تیمورلنک و ( ۱۷۲۲ م و ۱۱۲۵ هـ ) تاریخنده افغانیلر  
قتل عام و ضبط و تخریب ایلدیکندن خراب اولدی . ویدی سنه صکره  
( نادرشاه ) افغانیلردن استرداد ایلدیسده آرتق امنیت ایدمه دیکندن  
پای تختنی قالدیروب ( طهران ) هکتوردی . اصفهانک معمور زماننده یعنی  
شاه عباس ثانی وقتنده نفوسی التی بوزیک راده سنده ایکن شمعی التمش بیکدن  
زیاده دکلدر بعض اثار قدیمه سی کورلمکده در . اصفهانده کوزل  
اسلحه و قلیج بایلور ایپک و اتتون و کموش تللی قاشلر نسج و اعمال اولنور .  
اصفهان عساکر معناسنه اولان ( سپاهان ) دن غلط ایش .

§

﴿ اصمعی ﴾ — ادبای عصردن برذاتدر واسمی ( عبدالملک )

مسقط رأسی ( بصره ) کنیه سی ( ابوسعید ) در . علم نحو و لغتده  
حائز قصب السبق امتیاز بر ادیب سخن پرداز ایدنی هارون الرشید  
بونک شهرتشعار اولان طلاق و بلاغتنی ایشیده رک بغداده کتوردوب  
ندماسی سلکنه ادخال ایلدی امام شافعی حضرتلری عربیده طلاق  
لساننی تحسین بیوردی . اصمعی بلبل خوش نوا کبی نغمات کونا کون  
ایله هر دمده بردرلو نوادر مضحکه نقل و حکایه و مجلسنده اولنلری مدهوش  
وده بسته ایله و حفظمه اون التی بیک ارجوزه واردیر ایدی . طبقات  
سیوطیده بعض تألیفاتنی اولدیغنی دخی بیان اولمشدر وفاتی ( ۸۲۶ م  
و ۲۱۱ هـ ) تاریخنده در .

§

﴿ آطا قاباس ﴾ — امریقای شمالیده و مکسیقا کورفرزی ساحلنک

ایچرو طرفرنده قونز کوچر بر قبیله در و بونلرک همان کافه سی حشرات کبی  
حال سفالتنده واله کچوردکلری اجنبی انسانلری و طوته بیلد کاری و وحوش

و طیوری اکل ایله تعیش ایتمکده درلر فقط اخیراً النان معلوماته کوره ایچلرندن  
برخیلیسی اولدقجه مدنیه آکشدیرلمقده ایمش .

§

﴿ اطرنوس ﴾ — خداوندکار ولایتنده و کشیش طاغی جوارنده بروسه  
سنجاغنه ملحق برقصا مرکزیدر . بوشهری و قتیله ( آدریانوس ) نام قیصر  
یادیروب کندو نامنی ویرمش ایدی .

§

﴿ اطفیر ﴾ — عاقیلردن مصر ملکی ( ریمان ) نک وزیر عزیزی  
وزلیخای یوسفک زوجیدر . بونک بین الاهالی عنوانی ( جبار ) ایدی .  
یوسف علیه السلام مصره کتورلدکده بوذات کوله اولمق اوزره مسایعه  
و برمدت استخدام ایدوب حسن حالی کورد کندنصکره بتون امور و خصوصنی  
تفویض ایدی و مؤخرأ زوجه سی زلیخانک معلوم اولان افتراسنه بناء زندانه  
قویدردی کیفیات سائره سی ( یوسف ) کله سنده محرردر .

بوکا ( فوطیفار ) دخی دیرلر . حضرت یوسف علیه السلام عزیز مصر  
اولدقدنصکره ( اون ) شهرندن الدیغی قزک پدرینک اسمی دخی ( آنام فوطیفار )  
ایدی . دیگر روایته کوره صکره دن آلدیغی زلیخادر .

§

﴿ اطلاس ﴾ — اوروپا قطعه سیله افریقا قطعه سنک جهت شرقیسی  
بیننده و امریقا قطعه سنک جانب غربیسنده اولان بحر محیط برقمیدر .  
بو اسم مقدا اطلس طاغیرینک نهایت غربیسیله محدود اولان بحر محیطه ویرلمش  
ایدی . بحر محیط اطلاسنک طولی برقطعده دن برقطعده و عرضی اوچبیک  
بشیوزدن التی بیک یدیوز کیلومترویه قدر و شرق طرفنده ( کینه )  
و ( قاسقونیا ) و ( مانش ) کورفزلی و شمال و ایرلاندا دکزلی و غرب  
جهتنده مکسیقا و ( آنتیل ) و ( حورسون ) دکزلی موجوددر . بحر  
محیط اطلاسنک ایکی آقتیسی اولوب بری ( سنغال ) دن یوقاریه طوغری  
شرقدن غربه و دیگرى شمالدن غربه آقار .

§

﴿ اطلاتیت ﴾ — اسکی زمانده منخسف اولمش بر اقلیم یا خود جزیره در

بوجزیره بحر محیط اطلسیده براوجی قناریه اطهرینه و براوجی امریقا جوارنده واقع (آتیل) اطهرینه منتهی غایت جسم و واسع برجزیره کبیره اولدیغی حالده هنوز معلوم اولیان بر تاریخده تصادف ایلدیگی حادثه عظیمه ایله منخسف اولمشدر الیوم موجود اولان (آثور) و (مادر) اطهری جزیره مذکوره نك الك یوکسک طاغرینک تپهری ظن اولتمقده در . حکمای یونانیسه دن مشهور افلاطونک و یردیگی معلوماته کوره بواطه امید برونی پیشکاهدن جنوبه طوغری طولاً اوچبیک اسطاط و عرضاً ایکی بیک اسطاط و مربع مستطیل شکنده ایمش .

§

﴿ اطلس ﴾ — افریقانک حدود جنوبیسنده و بحر سفید سطح مائلنده بین الاهالی (جبال درن) دنیلان مغرب سلسله جبالنک اسمیدر اشبو سلسله جبالک الك مرتفع محلی فاس قطعه سنده اولوب ارتفاعی درتیک مترودن زیاده دکدر و جزایر قطعه سنه واصل اولان سلسله سی ایکبیک سکر یوز و ایکبیک درتوز مترو ارتفاعنده در . خریطه مجموعهرینه و اشکالدن خالی و دوز اولان فلك اعظم یا خود فلك الافلاک و ایپکدن معمول دوز قاشه دخی (اطلس) اطلاق اولنور .

§

﴿ اظنه ﴾ — اناطولیده اسکندرون کورفری ساحندنن یکر می بش کیلومتر و کیروده و (سیحون) نهری اوزرنده تجارتگاه برشهر در و بونامده اولان ولایتک مرکزیدر . حوالیسنده یوک اورمانلر و منبت صحرالر وار ایسه ده موجود اولان بطاقلقلر مناسبته ایام صیفده هواسی فنالشدیغندن اکثر اهالیسی یایلاره چکیلورلر . نفوس موجوده سی یکر می بش بیک تخمین اولتمقده در . اسکندرونندن بشقه مر سین دخی اسکله سیدر .

§

﴿ اعتقاد ﴾ — اسلامک اعتقادنجه منقسم اولدیغی یتش اوچ فرقه ایله نصارانک یتش ایکی فرقه سی و یهودیلرک یتش بر فرقه سندن تحقیق اولنه ییلانلری بروجه آتی بیان اولنور .



اسلامك منقسم اولديغى فرقه لر

فرق	اقسام
۰۱	فرقه ناجيه
۲۰	فرقه معتزله
۲۰	فرقه شيعه
۲۲	فرقه خوارج
۰۵	فرقه مرجئه
۰۳	فرقه نجاريه
۰۱	فرقه جبريه
۰۱	فرقه مشبهه
۷۳	•

(۱) فرقه ناجيه) — اشبو فرقه يه داخل اولنلر عليه الصلاة والسلام افندمزلر واصحاب كرام حضراتنك اعتقادلرى وامام ابومنصور ماتريدى وابو حسن الاشعري حضراتنك اجتهادلرى اوزره بولنانلردر. بونلر الله تعالى وتقدس حضرتلرينك واحد و قدیم اولديغنه و حیاة و علم و قدرت و ارادت و سمع و بصر و كلام و تكوین ذاتيله قائم صفات الله ايدوكنه و عباد الله من معدود اولان ملائكة كرامه و كتب منزله يه و كلام الله غير مخلوق اولديغنه و جميع انبياء و رسل كرامله برابر (محمد المصطفى) صلى الله عليه وسلم حضرتلرينك نبوته و بعث و وزن اعمال و سؤاله و عالمك محدث و خالق الله تعالى اولديغنه اينانورلر و چار يار كزين رضوان الله تعالى عليهم اجمعين حضراتنك ترتيب معروف اوزره ولايت و خلافتلريني تصديق و كافه اصحاب كرامه محبت ايدرلر و الله تعالى و تقدس حضرتلرى حقتده عرض و جسم و جوهر و مصور و محدود و معدوم و متناهي و متجزى دييانلرى رد و هيچ برمكانه متمكن اولديغنى و علمندن و قدرتندن هيچ برنسنه خارج اولديغنى يعنى عالم امكانده حير حصوله كلان بالجملة احوال و افعال انك خلق و ايجادى و قضا و قدريله اولوب علم ازلى آلهيده اولان شئونات ترتيب مالا يزالى اوزره البته ظهوره كله جكنى و افعال عباد ايكي نوع اولوب برى عبدك توسط و اختياري اوليه رق مجرد اراده آلهيه ايله و ديكرى عبدك واسطه اختيار و انضمام اراده سنيله و جناب حقتك خلقيله حاصل اولمقده اولديغنى و فعلى علتسز و غرضسز ايدوكنى و اعمال حقيقت ايمانه داخل اولديغنى

وحقیقت ایمان تزیید و تناقص ایتمدیکنی و تغیر سعادت و شقاوتده اولوب اسعاد و اشقاده اولدیغنی و ثواب فضل الهی و عقاب عدل الهی و علم عقلمن افضل و اهل کباره شفاعت انبیا حق اولدیغنی اعتراف و اعتقاد ایدر لر .

(۲) فرق معتزله دن (واصلیه) فرقه سی — بوفرقه نك رئیس حسن بصری حضرت تریسك شاکرد لر دن (واصل بن عطا) در . مرقوم بر مسئله ده حسن بصری حضرت ترینه مخالفتله مجلسندن قالقوب کتدیکنه بناء حضرت مشار الیه (قداعتزل عنا واصل بن عطا) بیوردی و مرقوم دخی کندو ذهاب و اعتقادی ترویج و تدریس ایدرک شاکرد لر پیدا ایتمدیکندن معتزله مذهبی میدانه چیقدی . بونلر صفات آلمیه یی نئی ایدوب ذات اللمهدن غیر ی قدیم یوقدر و کفر و ظلم و شر خدانک تقدیر یله دکدر و کفر ایله ایمان آره سنده بر منزله واردر دیر لر و بوکبی دها یك چوق اعتقادات باطله ایله اهل سنتدن آریلور لر .

(۳) فرق معتزله دن (هذیلیه) فرقه سی — بوفرقه نك رئیس (ابوهذیل العلاف) در . بو آدم بالواسطه واصل بن عطادن اوکرندیکی مسائل باطله دن بعضیلرینی قالب آخره افراغ و تدوین ایدرک مقدم الطائفه نامنی آلدی و اصحابی اقوال فلسفه یی عقائد معتزله یه خلط ایدرک بعض مسائلده یولداش لر دن آیرلدی . بونلر خدای متعال حضرت ترینک مقدوراتی فنا بولور و اهل جنت و جهنمک حرکاتی ضروریدر و عبادک جنت و جهنم اوزرینه قدرتی یوقدر و جناب حقک اراداتی مرادک غیریدر دیر لر .

(۴) فرق معتزله دن (نظامیه) فرقه سی — بوفرقه نك رئیس ابراهیم بن سیارد در . بونک مذهبنه سلوک ایدرلر حق تعالی قولرینه صلاحری اولیان نسنه یی ایشتمکه و آخرتده ثواب و عقابلرینی ا کسلمکه قادر دکدر و مخلوقاتی حدوث و وجود اعتباریله دفعه واحده خلق ایتدی بو تقدم و تأخر کوندن ظهورده در و قرآن کریم کاملاً معجز اولیوب یالکمز مغیباتدن خبر ویردیکی معجزدر اکر حق تعالی مساعده ایتش اولسیدی عرب مثلنی کتوره ییلوردی و اجاع و قیاس شرعه حجت دکدر دیر لر .

(۵) فرق معتزله دن (حائطیه) فرقه سی — بوفرقه نك رئیس (محمد بن حافظ) در . بو خبیث و اصحابی حق تعالی قولرینی بر بشقه دارده

عاقل و سالم و بالغ و اوله رق خلق و کندو معرفت و علمنی و نعم سائرہ فی احسان  
ایتدی و جہلہ سنی او نعم و احسانہ تشکرلہ مکلف قیلدی و قوللرک برطاقی  
تکلیف اولنان امر مذکور کی کاهی حقہا ایفا و دیگر کی قصورلی اوله رق  
ادا ایدوب او چنجی طاقی کاملاً ترک و عصیان ایلدی و جناب حق  
اطاعت و لازمه شکر ایفا ایدنلری دار جحیمہ کوندروب ایکسی اورتہ سی  
اولنلری بودار دنیاہ چیقاردی و بورادہ بأساء و ضراء و شدت و رخا و الام  
و لذات ایله مبتلا قیلدی اشته صور انسانیه و حیوانیه ده کوریلان  
اختلاف انلرک ذنوبلری نسبتندہ در و قدیم اولان جناب حقن بشقہ  
بر حادث آلہا و اردر و روز جزادہ خلقک محاسبہ سنی بو آله کورہ جکدر  
کبی بر چوق هزینلر ایدرلر .

(۶) فرق معتزلہ دن (بشریہ) فرقہ سی — بو فرقہ نک رئیس (بشر  
بن معمر) در . بو آدم و اصحابی خدای متعال حضرتلرینک ارادتی ایکی  
وجدہ اوزرہ در و بر وجهی صفت ذات و دیگر وجهی صفت فعلدر و صفت  
ذاتیله کندو افعالی و عبادینک جمیع طاعاتنی ارادہ ایدر زیرا صلاح و خیری  
یلوبدہ انی ارادہ ایتیمان حکیم صابیلر و جناب حق بر لطفی دها و اردر کہ  
انی اظهار ایتیش اولیدی روی ارضدہ بولنان انسانلرک کافہ سی ایمانہ کلور  
ایدی مع مافیہ اولطفی اظهار ایتک جناب حقہ واجب دکدر و کبیرہ دن  
توبہ مقبول ایسہ ده مرتکبی بردها ایشلدیکی حالده اولکی ارتکابک جرمی  
ینہ عودت ایدر اعتقادندہ بولنورلر .

(۷) فرق معتزلہ دن (معمریہ) فرقہ سی — بو فرقہ نک رئیس اولان  
(معمر بن السلی) قدر یونک اولولرندن ایدی بونک مذهبہ تابع اولانلر  
جناب حق یالکیز اجسامی و اجسام دخی اعراضی خلق ایتدی . جناب  
حق کندو نفسنی بیلر زیرا بیلکلیکی علم ایله معلومک اتحادینی ایجاب ایدر  
انسانک ارادتن غیر فی فعلی یوقدر و هر حرکتی ارادتنہ مستنددر و بو استناد  
تولید طریقہ اولیوب مباشرت طریقہ در دیرلر .

(۸) فرق معتزلہ دن (مزداریہ) فرقہ سی — بو فرقہ نک رئیس اولان  
(عیسی بن صبیح) غایت صوفی صورت اولدیغندن (راهب المعترله)  
عنوانیله شهرت بولش ایدی . بونک مذهبہ سالک اولنلر خلق نظم

و بلاغت جهندن قرآن کریم کبی به و بلکه اندن احسنه قادر در و حدوث  
قرآنده مبالغه ایلیان و قدمنه ذاهب اولانر کافر در و حق تعالی ابصار  
ایله کورنمز و عبادک اعمالی خدانک مخلوقی دکدر بر فعلک تولدجهتیه  
ایکی فاعلدن وقوعی جائز دکدر اعتقاد ایدر لر .

(۹) فرق معتزله دن ( ثمامیه ) فرقه سی — بو فرقه نك رئیس اولان  
( ثمامه بن اشرش ) النیری خلفای عباسیه دن ( مأمون ) ك حضورینه قبول  
و مصاحبت ایتدیکی علمدان ایدی . مرقوم و اصحابی افعال متولده نك  
فاعلی یوقدر و مشرکین و مجوسی و یهودی و نصاری و زنادقه روز قیامتده  
جهنمه کیرمیوب صبیان و بهایم کبی طسپراق اوله جقدر و تحسین و تقبیح  
عقلیدر و معرفت ورود شرعدن اول و اجبدر و کفاردن خالقنی بیلیانلر  
معذوردر دیر لر .

(۱۰) فرق معتزله دن ( هشامیه ) فرقه سی — بو فرقه نك رئیس اولان  
( هشام بن عمرو ) القوطی گروه معتزله دن بر چوق بدع باطله ایله تمیز ایتشدر .  
مرقوم و اصحابی جنت و جهنم الآن مخلوق دکدر زیرا شمدی وجودنده  
فائده یوقدر و امامت اختلاف ایله منعقد اولمز و اعراضده خدانک  
خالق اولدیغنه و رسالت ادما ایدنه نك صدقنه دلالت یوقدر بلکه انزه  
دلالت اجسامده در و قرآن کریمده حلال و حرام اوزرینه دلالت یوقدر دیر لر .

(۱۱) فرق معتزله دن ( جاحظیه ) فرقه سی — بو فرقه نك رئیس  
اولان ( عمرو بن بحر الجاحظ ) اهل اعتراضک بلغا و فصاحتدن اولدیغی  
جهتله خلیفه معتصم و متوکلده تقرب ایتش و کتب فلسفه یی تبع ایدرک بر  
چوق مسائله تفرد ایشیدی . مرقوم و اصحابی معارفک کافه سی ضروریه  
اولوب هیچ بریسی افعال عباددن معدود دکدر و عبدک ارادتن غیر کسبی  
یوقدر و اهل نار جهنمه عذاب جهندن مخلد اولمز بلکه طبیعت ناره  
منقلب اولور لر و حق تعالی عاصیلری نار جهنمه ادخال ایتمز بلکه حجیم انلری  
کندویه جذب ایدر اعتقادنده ایدیلر .

(۱۲) فرق معتزله دن ( خیاطیه ) فرقه سی — بو فرقه نك رئیس اولان  
( ابی الحسن ) و اصحابی خدای متعال حضرتلر نك ارادتی ذاتیه قائمه بر

صفت دکدر و جناب حق سمیع و بصیر دیمک مسموعاته و مبصراته  
عالم دیمکدر دیرلر.

(۱۳) فرق معتزله دن (کعبیه) فرقه سی — بونلرک ریئسلی اولان  
(ابوالقاسم) بالاده محمر خیاطیلردن ایکن برقاچ مسئله ده آنلردن  
آیرلشدر و اومسائلدن بری ارادنگ و سمع و بصرک علمه رجوعی  
مسئله سیدر.

(۱۴) فرق معتزله دن (جسائییه) فرقه سی — بونلرک ریئسی اولان  
(ابو علی محمد الجبائی) واصحابی جناب حقک ارادتی حادثه در و بر مکانه  
دکدر و کندوسی اول اراده حادثه ایله مریدد و حق تعالی بر کلامه  
متکلمدر که انی جسمده خلق ایدر و آخرتده کورنمز و قول فعلنگ خالقیدر  
و مرتکب کبیره نه مؤمن ونه ده کافر در. اکر توبه سز کیدر سه جهنمده  
مخلددر و مکلفه لطف اتمک و اکا اصلح اولان نسنه بی رعایت ائنگ جناب  
حقه واجبدر. دیرلر

(۱۵) فرق معتزله دن (بشمیه) فرقه سی — بونلر معصیتسز عقابه  
استحقاق ممکندر و بر کبیره اوزرینه مصر اولانک دیگر کبیره دن توبه  
و رجوعی مقبول دکدر و قدرتسز توبه یوقدر یعنی بالقرض زنایه قدرتی  
اولیان کسه نک توبه سی فائده ویرمز اعتقادنده درلر

(۱۶) فرق معتزله دن (عمرویه) فرقه سی — بوفرقة نک ریئسی اولان  
(عمرو بن عبید) رواة حدیثدن اولدیغی وزهد و صلاحله معروف  
و موصوف بولدیغی حالده ریئس معتزله و اصل بن عطانک مذهب  
باطلنه اعتقاد ایتدکن نصرکه ده ایلروسنه کیدوب حضرت عثمان و امام  
علی (رضی الله عنهما) قضیه لرنده ایکی طرفیده تفسیقہ قالشدی.

(۱۷) فرق معتزله دن (اسواریه) فرقه سی — بونلرک ریئسی اولان  
(اسوار) نظامیه مذهبنه سالک اوله رق برقاچ مسئله ابداع ائلشدر.

مرقوم واصحابی حق تعالی عدیه له خبر و یردیکی باخود عدمنی بیلدیکی  
نسنه لرک اوزرینه قادر دکدر لکن انسان قادر در زیرا انساک قدرتی  
ضدینه صالحه در دیرلر.

(۱۸) فرق معتزله دن (اسکافیه) فرقه سی — بونلر حق تعالی عقلايه ظلم ایتکه قادر دکلدن فقط صبیان و مجانینه ظلم ایدر دیرلر .

(۱۹) فرق معتزله دن (جعفریه) فرقه سی — بونلر اسکافیه مذهبنی قبول ایله برابر بعض فساق امت زنادقه و مجوسدن بدتردر و حدشرب اوزرینه اجاع امت خطادر زیرا حدده معتبر اولان نصدر و برجه سرفت ایدن ایماندن منخلعدر دیرلر .

(۲۰) فرق معتزله دن (صالحیه) فرقه سی — بونلر علم و قدرت و ارادت و سمع و بصرک میت ایله قیاملرینی تجویز ایدرلر بوحالده ناس بوصفتلرله متصف ایکن اموات اولملری لازم کلور .

(۲۱) فرق معتزله دن (حدیه) فرقه سی — جاحظیه مذهبنده اولوب فقط هر حیوان مکلفدر سوزیله آیرلشدرلر .

(۲۲) غلاة شیعه دن (سبأیه) فرقه سی — بوفرقة نك رئيسی اولان (عبدالله بن سباء) امام علی کرم الله وجهه ورضی الله عنه حضرتلرینه محبتده افراط ایدرک الوهیتنه قائل اولدی وابن ملجم انی شهید ایتدی انک اولدیردیکی برشیطان ایدی حضرت علی الیوم بلوطلرده در ورعد انک اوازی و برق قالمجیسیدر و آخر زمانده یره اینوب اجرای عدالت و عالمی اصلاح ایده جکدر دیدی و برچوق حقا بونک مذهبنه تابع اولدی . بوفرقة نك اصحابی عندالموت تناسخ ارواحه دخی قائل اولور . (عبدالله) کله سنه مراجعت بیور یله .

(۲۳) غلاة شیعه دن (کاملیه) فرقه سی — بونلر امامت برنوردن برشخصده نبوت و دیگر شخصده امامت اولور و بعضاً دخی امامت نبوته انقلاب ایدر دیرلر و امام علی کرم الله وجهه حضرتلرینه بیعت ایتیانلری تکفیر ایدرلر .

(۲۴) غلاة شیعه دن (علیائییه) فرقه سی — بونلر امام علی کرم الله وجهه حضرتلرینی آله اعتقاد ایدرلر و علیه الصلاة والسلام افندمزنی کوندرن حضرت علیدر دیرلر و ایچلرندن بعضیلری حضرت علی ایله برابر حضرت پیغمبر افندمزک و بعضیلری فاطمه و حسن و حسین رضوان الله تعالی علیهم اجمعین حضرتانک دخی الوهیتنه قائل اولورلر .

( ۲۵ ) غلاة شيعه دن ( مغیره ) فرقه سی — بونلر جناب حق نوردن برجل صورتنده در و باشنده نوردن بر تاج واردر و قلبی منبع حکمندر .  
جناب حق انسانی خلق مراد بیوردیغی زمان اسم اعظم ایله تکلم ایتدی و اوچدقده باشی اوزرینه بر تاج دوشدی بعده عبادک عصیانه واقف اوله رق غضبه کلکله ترلدی و ترندن بر طاتلی و دیکری طوزلی ایکی دکر حاصل اولدی و طاتلی دکره نظر ایتدکده کندو کولکه سنی کوروب بو کولکه ننگ بر مقدارندن آی و کونش خلق و ایجاد و ماعداسنی بشقه آلهه لزوم یوقدر دهرک افنا ایلدی و اندنصکره ذکر اولنان طاتلی دکردن مؤمنلری و طوزلی دکردن دینسزلی یرآندی و ناس ظلالده ایکن علیه الصلاة والسلام افتدزمی بعث بیوردی و امانتی یعنی حضرت علی یه امامتدن منع خصوصنی سموات و ارضینه و طاغله و وطاشله عرض ایتدکده جمله سی ابا ایدوب انسان یعنی حضرت عمرک تشویقیله حضرت ابو بکر قبول ایلدی دیرلر و بو کبی دهها برچوق هذیانلر ایدرلر .

( ۲۶ ) غلاة شيعه دن ( منصوریه ) فرقه سی — بونلر دائمارسل و رسالت منقطع اولمز و جنت اکا محبتله مأمور اولدیغمز برکسه ننگ و جهنم اکا بغض و عداوتله مأمور بولندیغمز دیگر برکسه ننگ اسمیدر دیرلر . اشبو فرقه ننگ رئیس اولان ( ابو منصور العجلی ) ننگ کندوسنه نسبت ادعا سنده اولدیغنی امام ( باقر ) حضرتلری خبر آلدیغی کبی حضورندن طرد و تبری بیوردی و مرقوم مشار الیهک و فاته قدر سکوت ایدوب و فاتدنصکره ینه میدانه چیقدی و امامتی کندو نفسنه تخصیص و اعلان ایتدی و بن سمایه چیقدم و معبودیمی کوردم ایله باشمی صیغادی و بکا ای اوغل بیره ایگ بدن تبلیغ ایله بیوردی و جناب حقک ( وان یروا کسفاً من الاسماء ساقطاً یقولوا سبحان من کوم ) ایت جلیله سنده بیوردیغی کسف بکا نازل اولدی دیدی و بو هذیانلری عیراق و الیسی ( حجاج ) ایشیدوب قفاسنی کسیدی .

( ۲۷ ) غلاة شيعه دن ( خطایه ) فرقه سی — بو فرقه ننگ رئیس اولان ( ابی الخطاب محمد زینه الاسدی ) ابتداری امام ( جعفر صادق ) رضی الله عنه حضرتلرینک حضورینه کیرر چیقار ایدی لکن صکره

حضرت مشار الیه مرقومک باطل اولان اعتقادینی اوکرنوب حضورندن  
 طرد واصحابیله الفتی منع بیورمشدر . بوجاهل جنت نعیم دنیادن وجهنم  
 الم دنیادن عبارتدر و دنیا فانی دکلدر وهر مؤمنه وحی ظهور ایدر دیر  
 وجیع محرمتی مباح درجه سنه تنزیل و فرائضی ترک ایلر ایدی . امام  
 جعفر حضرتلری وفات ایتدکنصکره بودخی امامتی کندو نفسنه تخصیص  
 ایدوب اماملر انبیای کرامدن و بلکه جناب حقن بیوکلر کبی هذیانلره  
 باشلادیغندن اخذ واعدام اولمشدر .

( ۲۸ ) غلاة شیعه دن ( هشامیه ) فرقه سی — بوفرقة نك برنجی رئیس  
 ( هشام بن الحکم ) وایکنجی رئیس ( هشام بن سالم الجوانیقی ) در .  
 بونلرک ایکیسیده جناب حقک جسد اولدیغنده اتفاق ایتدیلر سده مؤخرأ ابن  
 الحکم واصحابی دهها زیاده ایضاحاته قالفیشوب جناب حق حاشا طویل  
 وعریض وعمیقدر وطول وعرض وعمقی برابردر و کندو قاریشیله یدی  
 قاریشدر و مکان مخصوصنده حرکت فعلیسی وارددر و قدرتیه متناهی  
 اولیوب ذاتیه متناهدر و بلا تفاوت عرشه مماسدر دیدی . و جناب  
 حق اشایی وجوده کاندکنصکره ییلور وعلی قدم وحدوث ایله وصف  
 اولمز و اراداتی بر حرکتدر که نه عینی ونه غیریدر و کلامی بر صفتدر که  
 نه مخلوق ونه غیر مخلوقدر وائمه معصوم وانبیاء غیر معصومدر کبی  
 هذیانلرده بولندی و ابن سالم حق تعالی انسان صورتنده ایسهده لیم  
 ودم دکلدر والی واغزی و برونی وکوزی وقولاغنی وارددر اعتقادات  
 باطله سنده قالدی .

( ۲۹ ) غلاة شیعه دن ( نعمانیه ) فرقه سی — بونلر هشامیه فرقه سنک  
 اعتقادینی قبول ایدوب یالکز جناب حق جسد دکلدر انسان صورتنده  
 برنورددر سوزیله آیریلورلر . بوفرقة نك براسمی دخی ( شیطانیه ) در .  
 ( ۳۰ ) غلاة شیعه دن ( یونسیه ) فرقه سی — بونلر حق تعالی عرشک  
 اوزرنده در وملائکة کرام آنی کورمکده در و کندوسی ملائکه نك  
 محولی اولدیغنی حالده آنلردن اقوادر دیرلر .

( ۳۱ ) غلاة شیعه دن ( نصیرییه ) فرقه سی — بوفرقه یه تابع اولنلر  
 جناب حقک امام علی کرم الله وجهه حضرتلرینه و اولادینه حالونه قائل



اولورلر و جسد جسمانی ایله روحانینک ظهوری انکار اولنمز دیوب (جبرائیل) علیه السلام خیرده و شیطان علیه العنه نك شرده صورت بشرده ظهورینی مثال کتوررلر .

(۳۲) غلاة شیعه دن (جناحیه) فرقه سی — بونلر روح الله حضرت آدم علیه السلامه ایدی صکره حضرت شینه ودها صکره انبیاء و ائمه یه انتقال ایتدی و امام علی و اوچ اولادندن صکره رئیس مذهبی (عبدالله بن معاویه) یه کلدی و عبدالله مستقبلده اختفا ایتدیکی اصفهان طاغندن چیه جقدر دیرلر و قیامت انکار ایدرلر و محرماتی حلال طوتارلر .

(۳۳) غلاة شیعه دن (غرایه) فرقه سی — بونلر علیه الصلاة و السلام افندمزك امام علی کرم الله وجهه حضرتلرینه مشابهنه غرابك غرابه مشابهنه کبیر و بلکه دها زیاده در دیرلر آنک ایچون غرایه تسمیه اولنمشردر . صورت اعتقادلرینه ظفر یاب اولنه مدی .

(۳۴) غلاة شیعه دن (رزامیه) فرقه سی — بوفرقه یه داخل اولنلر امامتک جناب علی المرتضادن اوغلی محمد و صکره آنک اوغلی ابی هاشم و اندن وصیت ایله علی بن عبدالله بن عباسه و اندن محمد بن علی یه و اندن ینه وصیت ایله ابامسلم خراسانینک خلق بیعت ایتدیردیکی ابراهیمه انتقالی ادعا و آنک اعدامندن صکره ابامسلم خراسانی یه کچدیکنی اعتقاد ایدرلر و جیع محرماتی حلال طوتارلر .

(۳۵) غلاة شیعه دن (زراریه) فرقه سی — بونلر جناب حق حدوت صفاتدن مقدم یالکز حیاة صفتیله متصف ایدی عالم و قادر و سمیع و بصیر دکل ایدی دیرلر یعنی صفات الهینک حدوتنه قائل اولورلر .

(۳۶) غلاة شیعه دن (مفوضه) فرقه سی — بونلرک برطاقی جناب حق حضرت پیغمبری و حضرت پیغمبر دنیا و مافیهای یرائدی دیرلر و دیگر طاقی خلق دنیا من عندالله حضرت علی یه تفویض اولندی ادعا سنده بونورلر .

(۳۷) غلاة شیعه دن (بدائیة) فرقه سی — بونلر حق تعالی برنسنه یی اراده ایتدکدن صکره آنک اوزرینه ظاهر اولمیان نسنه ظاهر اولور دیرلر . بوحالده جناب حقک خاشا عواقب اموره عالم اولماسی لازم کلور .

( ۳۸ ) غلاة شيعه دن ( بنايه ) فرقه سى — بونلر جناب حق انسان صورتنددر وذات الهدن غيرى باقى بوقدر و امام على كرم الله وجهه حضرتلرينه جزؤ الهى حلول ايديوب آنك جسديله متحد اولمشدر و امام مشار اليه خير قىوسنى اوقوتله قوپارمشدر و روح الله اندن صكره اوغلى ( محمد الحنفيه ) يه واندن صكره برقاج واسطه ايله رئيس مذهبى ( بنان ) ه انتقال ايتشدر ديرلر . مرقوم بنان امام ( باقر ) رجه الله حضرتلرى زماننده برحياة اولديغندن مشار اليه مكتوب كوندروب كندو اعتقادينه دعوت ايتش ايدي مشار اليه مكتوبى اوقودقنصكره زياده سييله تعجب ايديوب كتورن ادمه شو مكتوبى يوت بيوردى و حريف يوتديغى كىي وفات ايديوب مندرجاتك بطلانى ثابت اولدى . مرقوم بنان الك صكره قتل و بدينام اولمشدر .

( ۳۹ ) غلاة شيعه دن ( باطنيه ) فرقه سى — بوفرقة نك اصحابى حق سبحانه و تعالى حضرتلرى نه موجود ونه معدومدر ونه عالم ونه جاهلدر ديوب صفات آلهيه نك كافه سننى تشكيك ايدرلر و حق تعالى امريله بالفعل تام اولان عقلى و بو عقل واسطه سييله غير تام اولان نفسى ابداع ايلدى و نفس عقلك كالنه مشتاق اولهرق نقصاندىن كاله كلك ايچون برحركته و حركت دخى آتته محتاج اولديغندن اجرام فلكيه حادث اولدى و مواليد ثلثه دخى اجرام مذكوره دن وجوده كلدى ديرلر و تناسخ ارواح و حلوله قائل اولورلر . بو عقائد باطله اسكى مجوسيلردن قالمه برشى اولوب ( ۱۰۹۰ م و ۲۸۳ هـ ) تاريخنده حسن بن على الصباح معرفيله تجديد اولتمش ايدي . بوملحدلر قرآن كريمك معانى باطنه سننى كندو زعملرنجه اخذ ايديوب معانى ظاهره سننى ترك و حكيمسز اعتقاد ايتدكلر ايچون اشبو ( باطنيه ) ناميله و حسن الصباحدن اولكى رئيسلرينك اسمى جدان قرمط اولديغىچون ( قرامطه ) ناميله و امام جعفر صادق رضى الله عنه حضرتلرينك بىوك اوغلى اسماعيلى امام طانيدقلىچون ( اسماعيليه ) ناميله و محرمات و محارمى كندولرينه مباح قيلدقلىچون ( حريميه ) ناميله و رسل يديدر و هر برينك آره سننده يدي امام واردر اعتقادنده اولدقلىچون ( سبعيه ) ناميله و برآره لى بابك نامنده برخارجى يه تابع اولدقلىچون ( بابكيه )

ناميله و مرقوم بابك زماننده قمرى اثواب كيد كلر يچون (مجرىه) ناميله  
دخى ياد اولنورلر . اشبو ملحدلر خلق اضلال ايچون برطاقم اصطلاحات  
كفرىه قوللنورلر و بول منى دن انجس ايكن حين تبولده غسل لازم  
كلميو بده خروج منيده ندى لازم كلسون كى شك كتوره جك سوزلر  
سويلرلر و دىندن چيقوب تمام ملحد اولنلره (خلع) و چيقمقلغه (سلخ) تسميه  
ايلرلر و بودرجهيه وارانلره جيع محرماتى مباح قيلارلر و وضوء محبت  
امامدن و صلاة طريق الحادك غير يدى منكراتى نهى ايدن رسول ناطقدن  
واحتلام نااهله افشاي سردن و غسل تجديده عهددن و زكاة كلات الحادايه  
تزكيه نفسدن و كعبه و صفانيدن و مروه باب عايدن و تلبيه مخاطبك اجابتدن  
و طواف ائمهيه محبتدن و جنت تكاليف شرعيه دن استراحتدن و جهنم  
تكاليف مذكوره مشقتى اختياردن عبارتدر ديرلر . (بابكيه) و (قرامطه)  
و (حسن) و (سبعيه) كلملر ينه دخى مراجعت بيوريله .

(۴۰) غلاة شيعه دن (زيديه) فرقه سى -- بوفره نك اصحابى (زيد  
بن على بن حسين بن على المرتضى) رضى الله عنه حضرتلر ينه منسوبيت  
ادعا سنده بولنورلر واقعا زيد رئيس معتزله و اصل بن عطايه شاگرد  
اولديسه ده رفض و اعترال كندوسنه و يريله من بوافترا بنى اميه دن  
هشام بن عبدالملك كوفه يه هجومى ائنده بعض غرضكاران طرفدن  
اويدورلش برشى اولسى مأمول قويدر . زيرا امام اعظم ابوحنيفه  
حضرتلر زيد بن على يه اول وقت خيلى مال اعطاسيله معاونت بيورهش  
ايدى هر نه حال ايسه زيديلر (جاروديه) و (سليمانيه) و (صالحيه)  
ناملريه اوچه منقسم اولورلر و بونلردن جاروديلر عليه الصلاة والسلام  
حضرتلردن صكره امام الحق حضرت على ايكن حقى ضايع اولدى ديرلر  
و سليمانيلر حضرت على موجود ايكن امت ديكرلر ينه بيعت ايتديكيچون  
خطا ايتدى ديرلر و صالحيلر سليمانيلر ك اعتقادى قبول ايله برابر حضرت  
عثمان رضى الله عنده توقف ايلرلر .

(۴۱) غلاة شيعه دن (اماميه) فرقه سى — بونلر ايكي قسمه منقسمدر  
و ايكي سى دخى امامت اولاد جناب على يه منحصردر و حقلرنده نص  
جلى واردر ديرلر لکن تعييننده اختلاف ايدرلر و سائر اصحاب كرام  
حقنده لابق اوليه جق سوزلر سويلرلر .

(۴۲) خوارجدن (محکمه) فرقه سی — بونلر نهران اهاالیسندن صوم و صلاته مداوم بر فرقه ضاله اولوب حضرت علی و سائر صحابه کرام رضوان الله تعالی علیهم اجمعین حقارنده ادبسنلک ایدرلر و هر عادل امام اوله بیلور و مرتکب کبیره تکفیر اولنور دیرلر ایدی بونلرک بو ادبسنلکلری حضرت علی یه و اصل اولدیغی کبی عسکر کوندروب اکثریسنی قتل و تأدیب ایلدی.

(۴۳) خوارجدن (ازرقیه) فرقه سی — بو فرقه ننگ اصحابی حضرت عثمان و علی و زبیر و عایشه و ابن عباس رضوان الله تعالی علیهم اجمعین حضراتی حقارنده یکن یوک ادبسنلکلر ایدوب حضرت علینک قاتلی اولان ابن ملجمی ثنا ایدرلر و کندو اعتقادات باطله لرینه مخالف اولنلرک و اولاد و عیالرینک قتلنی مباح طوتارلر و زانی محصنی رجدن قورتارلر و مرتکب کبیره یی تکفیر ایدرلر.

(۴۴) خوارجدن (بیسیه) فرقه سی — بونلر ایمانده لسانله اقرار کافیدر و اطفال کفر ایله ایمانده باباری کیدر و مرتکب کبیره دیندن چیقار دیرلر. بونلرک رئیس اولان (بیسی) بی عراق و الیسی (حجاج) کتوردوب الرینی و ایاقلرینی قطعله اعدام ایلشدر.

(۴۵) خوارجدن (نجدهات) فرقه سی — بونلر تکفیرده عقائد ازرقیه یه تابع اولوب ماعدا مسائله آریلورلر و جهل اوزرینه و قوعبولان جنایت اصحابی معذور طوتارلر.

(۴۶) خوارجدن (اصفریه) فرقه سی — بو فرقه ننگ اصحابی اکثر خصوصده ازرقیه اعتقادینه مخالفت ایدوب قولده تقیه ننگ جوازینه و فعلده منعه ذاهب اولورلر و تارک صوم و صلاتی تکفیر ایدرلر.

(۴۷) خوارجدن (حفصیه)

(۴۸) خوارجدن (یزیدیه)

(۴۹) خوارجدن (حارثیه)

(۵۰) خوارجدن (رابعه)

اشبو درت فرقه یه فرق (اباضیه) دینور. بونلرک اصحابی استطاعت

قبل الفعلدر و قولك فعلى خدانك مخلوقيدر و مرتكب كيره كافر نعمت ايسه ده كافر ملت دكلدر و بزم اعتقاديمزه مخالفت ايدنلر دیندن چيقار و اثنای حربده ماللری حلال اولورديرلر و امام علی کرم الله وجهه و رضی الله عنه حضرت تریله سائر اصحاب کرام حقلمنده درلودرلو ادبسنلکر ایدرلر . هله فرق مند کوره دن یزیدیلرک مسلك و اعتقادى کوله جک بر صورتده در . بونلر حق تعالی اهالیء ایراندن بر پیغمبر کوندره جک و او پیغمبرک کتابی سمداده یازیلوب دفعه و بقعه یره دوشه جک و نبی آخرالزمانک شریعتی ترک اولنه جق دیرلر و سنجاز طاغنده مسکون اولان یزیدیلر دخی ( ملک طاووس ) نامیله شیطان علیه الالعنه یه حرمت و پرستش ایدرلر و برکون سمایه چیقوب بتون ملانکه ننگ ینه رئیسى اوله جقدر دیرلر . بونلرک خرسیتیانلغه میللری اسلامه میللرندن زیاده در . ( اباضیه ) کله سنه دخی مراجعت بیوريله .

- (۵۱) خوارجدن ( میونیه ) فرقه سی .
- (۵۲) خوارجدن ( جزویه ) فرقه سی .
- (۵۳) خوارجدن ( شعیبیه ) فرقه سی .
- (۵۴) خوارجدن ( حازمیه ) فرقه سی .
- (۵۵) خوارجدن ( خلفیه ) فرقه سی .
- (۵۶) خوارجدن ( اطرافیه ) فرقه سی .
- (۵۷) خوارجدن ( معلومیه ) فرقه سی .
- (۵۸) خوارجدن ( مجهولیه ) فرقه سی .
- (۵۹) خوارجدن ( صلتیه ) فرقه سی .
- (۶۰) خوارجدن ( ثعالبه ) فرقه سی .
- (۶۱) خوارجدن ( ثعالبه معبدیه ) فرقه سی .
- (۶۲) خوارجدن ( شیبانیه ) فرقه سی .
- (۶۳) خوارجدن ( مکرمیه ) فرقه سی .

اشبو اون اوچ فرقه ننگ نام عومیسی ( عجارده ) در بو فرقه لر اصحابنک اکثریسی قدره قائل اولوب فعلى خلقاً و ابداعاً عبده نسبت ایدرلر

و بعضی خدای خیری اراده ایدوب شر و معاصی بی اراده ایتز دیرلر و بعضی  
عبدك فعلی جناب حقك مخلوقیدر دیرلر و مرتكب کبیره بی و تارك صلاتی  
ترکندن ناشی اولیوب بلکه حقندن غفلتی ایچون تکفیر ایلرلر و قزلرک  
قزلرینی و قرنداش قزلرینی نکاحله آلورلر و حاشا سوره یوسفی انکار ایدرلر.

(۶۴) فرق مرجئه دن ( یونسیه ) فرقه سی — بو فرقه نك اصحابی  
حقیقت ایمان حقك معرفتیه در و عبدك جنته عبادتله دخولی ممکن دکلدرد  
انجق اخلاص محبتله در و معرفتدن غیرى طاعتك ترکی حقیقت ایمانه  
ضرر ویرمز و او سببله عذاب اولمز دیرلر.

(۶۵) فرق مرجئه دن ( عبیدیه ) فرقه سی — بو فرقه نك اصحابی  
خدای متعال حضرتلری انسان صورتنده در و صفتلری ذاتندن غیرى  
دکلدرد دیرلر.

(۶۶) فرق مرجئه دن ( غسانیه ) فرقه سی — بو فرقه نك اصحابی  
ایمان خدای متعال حضرتلرینی و رسولنی وانلردن کلانلری بیلکدر تفصیلاً  
بیلکه حاجت یوقدر مثلاً جناب حقك حجی فرض ایتدیکنه اینانملی لکن  
حج مکة مکرمه ده کی کعبه یه طواف و زیارتله می بیلنه مز دیرلر.

(۶۷) فرق مرجئه دن ( ثوبانیه ) فرقه سی — بو فرقه نك اصحابی  
ایمان خدای متعال حضرتلرینه و رسلنه اینانمق و عقلاً ایشلمسی جائز اولان  
نسنهلری اقرار ایتك دیمك اولوب عقلاً ایشلمسی جائز اولان نسنه لره  
اعتقاد ایماندن دکلدرد و حق تعالی روز قیامتده بر عاصی بی عفو ایدرسه  
سائر امثالنی دخی عفو ایده جکدر دیرلر.

(۶۸) فرق مرجئه دن ( ثومنیه ) فرقه سی — بو فرقه نك اصحابی ایمان  
معرفت و تصدیق و محبت و اخلاصدر بونلردن برینی یا خود بعضیسنی ترك  
ایدن ایماندن دور اولور و مع مافیله بعضیسی ایمان دکلدرد و نمازی بعده  
قضا ایتك نیتیه ترك کفر دکلدرد دیرلر.

(۶۹) فرق نجاریه دن ( برغوئیه ) فرقه سی .

(۷۰) فرق نجاریه دن ( زعفرانیه ) فرقه سی .

(۷۱) فرق نجاریه دن ( مستدرکه ) فرقه سی .

اشبو فرق ثلثه اصحابی خلق افعال و استطاعت و کسب عبد مسئله رنده  
 اهل سنت و جماعته موافقت ایدوب نئی صفات وجودیه ده و حدوث کلامه  
 و نئی رؤیتده معتزله طرفنده بولنورلر و کلام الله حین قرأته عرض و حین  
 کتابنده جسمدر و غیر اللهدر و غیر الله ایسه مخلوقدر دیرلر و ایچلرندن  
 مستدر که طائفه سی زغفرانیلر اوزرینه استدر اک ایدوب علیه الصلاة والسلام  
 افندمزک (کلام الله غیر مخلوق) بیوردیغنه و سلف صالحینک بونک اوزرینه  
 اجتماعنه بزسخی اینانور غیر مخلوق دیرلر لکن حضرت پیغمبرک بوقولنی  
 شو معنایه جل ایدرزکه قرآن بو ترتیب حروف و اصواتدن نظم اوزرینه  
 مخلوق دکدر بلکه بعینها بو حروفک غیر اوزرینه مخلوقدر و بو  
 حروف اول حروفدن حکایتدر اعتقادندن آیرلیر دیرلر.

(۷۲) فرقه جبریه — بو فرقه نک اصحابی ایکی قسمدر بر قسمنه (جبریه  
 خالصه) و دیگر قسمنه (جبریه متوسطه) دیرلر و قسم اوله تابع اولنلر  
 عبدده فعل و فعله صلاحیت یوقدر بلکه عبددن صادر اولان نسنه  
 جادات منزله سننده مجبوریدر اعتقادنده اولوب قسم ثانییه تابع اولنلرک  
 بعضیلری عبدک قدرتنه فعلده بر اثر اثبات و بو اثره کسب اطلاق ایدرلر  
 ایسه ده دیکرلری اولیه بر اثرده حاجت کورمزلر. اشبو جبریه خالصه  
 اعتقادینی ابداع ایدن (جهنم بن صفوان ترمذی) جناب حنک حیاة و علم  
 صفتلرینی نئی ایدوب قادر و فاعل و خالق اولدیغنی اثبات ایدر و اهل جنت  
 و جهنمک حرکتلرینه بر نهایت ویرر و خلق قرآن مسئله سننده و سائر بعض  
 مسائلده معتزله یه تابع اولور ایدی. مرقوم ملوک امویه نک انقراضنه  
 قریب بر زمانده قتل اولمشدر.

(۷۳) فرقه مشبهه) — بو فرقه نک اصحابی اعتقادده اکثریا غلاة  
 شیعه یه تابع و جناب واجب الوجودی مخلوقاته تشبیهده بر قاچ صنفه منقسمدر  
 کیمیسی خدا جسمدر و اعضا و جوارحی واردر و ملامسه و مصالحه  
 و معانقه ایدر دیر و کیمیسی عرش اوزرنده مستقردر و نزول و حرکتی  
 واردر دیر و کیمیسی سخی حلولنه قائل اولور. طبیعیون و آلهیون و دهریون  
 ایچون (فلسفه) کلمه سنه نظر بیوریه.

خرستیانلرک منقسم اولدیغی فرقه لر

	اقسام	فرق
اورتودوقس	۱	۲
قتولک	۲	۶
نسطوری	۳	۲
مونوفیریت	۴	۵
اونیتر	۵	۵
پروتستان	۶	۱۵
آنتوزیاست	۷	۱۴
خوارج	۸	۲۳
	•	۷۲

(۱) اورتودوقس — بونلر پاپانک وکیل یسوع و خلیفه پتروس اولدیغی طانیوب یالکز در سعادتده اوته دنبرو مؤسس اولان روم پتر یقخانه سنی طانورلر ولاتینلرک تعمیدینی کافی کورمیوب ایجابنده یکیدن اوقونمش صویه طالديره رق تعمید ایدرلر واقانیم ثلثه یه روح القدس یالکز بابادن صدور شرطیله اعتقاد ایدرلر و (لیتورژیا) دنیلان قداسی لاتینلرده بیان اولدیغی اوزره یارلرایسه ده خیرلری مایه لی اولق شرطدر و شرابلری صولی اولسنده بأس یوقدر و (آرشماتریت) رتبه سنی حاز اولنلرک مادوننده اولان پاپاسلر تأهل ایتمکه مأذوندر . اورتودوقسلر لاتینلرکی جهمندن بشقه بر موقع عذاب اثباتنی و کلیساره مجسم تصویر وضعنی قبول ایتمیوب سائر مراسم دینی و مراتب رهبانیه ده برابر اولورلر .

لاتینلر استانبول بطریق (فوتیوس) زمانه یعنی (۸۶۹ م و ۲۵۶ هـ) تاریخنه قدر اورتودوقسلرله برابر استانبول عمومی ورسولی کلیسائی طانیوب اندن صکره برلرندن ایرلیدلر . اورتودوقسلر استانبول وانطاکیه واسکندریه و قدس شریف عنوانلریله درت بطریقلکه منقسمدر .

(۲) لاتین قتولکی — روماده مسند نشین اولان پاپایی حضرت (عیسی) علیه السلام و کیلی وریس حواریون (پتروس) ک خلیفه سی وروما شهری و توابعنک پسیوسی ورومایالتنک سرپسیوسی وایتالیاقطعه سنک متره پولیدی یاخود (اکزارخی) و ممالک غریبه نک بطریق و قتولکلرک رییس روحانیسی طانیان خرستیانلرک نام عمومیسیدر . بونلر چوجقربی طوغدیغی کی



اوقونمش صودن سرپهرك تعميد و بلوغه ايرر ايرمز مقدس ياغلبه  
 و پستقوسلرى واسطه سيله تدهين ايدرلر و مشرف موت اولان خسته لرينه دخی  
 او ياغدن سوررلر و كناهلر نك عفويچون پاپاهلره مراجعت و آخرته  
 كوچك كناهلر ك تطهير يچون جهنمدن خفيف بر موقع عذاب موقت اثبات  
 ايدرلر و اقايم ثلثه به روح القدس بابادن و اوغلدن صدور شرطيله اعتقاد  
 و كليسانك شرائط مخصوصه سندن و مراسم دينه دن اولان مراتب  
 رهبانيه يي تصديق و ( ليتورژيئا ) دنيلان قداسى يعنى حضرت عيسى  
 عليه السلام دم و تنرى ذكرى اولان آيين اصلى يي اجرا ايلرلر بوندن  
 مقصد ايسه اعتبارى قربان تقديمندن و بودنى حضرت عيسانك دمنه  
 قلب اولنديغى اعتقاد اولنان صافى شراب ايله تنى اعتقاد اولنان مايه سز  
 آمكى شرب واكلدن عبارتدر لکن عوام پكنده شرابه نائل اوله مزله .

بوندن بشقه نكاح و پرهيز و توبه و اشارات صليبيه يي دخی پيارلر  
 و كليسالر يه مجسم تصوير قورلر و متأهل پاپاس قبول ايتزلر . ( آريوس )  
 مذهبنى تدقيق اتمك اوزره ( ۴۵۱ م ) تاريخنده قاضى كوينده اجتماع ايدن  
 هيئت رهبانيه مرقومك مذهبنى رد ايدرلر برعمومى ورسولى كليسا يه اعتقاده  
 قرار و يردى و صكره يعنى ( ۸۶۹ م و ۲۵۶ هـ ) تاريخنده استانبول پطريق  
 فوتيوس زماننده لاتينلر روما كليساسنى طانديغندن كليسا شرق و غرب  
 نامر يله ايكي يه منقسم اولوب ( ۱۴۳۱ م و ۸۳۵ هـ ) تاريخنده رسماً تقرر  
 ايلدى .

( ۳ ) روم قنولكى — بونلر پاپانك يالكز رئيس روحانى اولديغنى  
 طانيوب قصور شرائط مذهبيه ده آريلورلر ازان جله چوجقلرينى  
 اورتودوقسلر كى صويه طالديره رق تعميد ايدرلر و مقدس اعتقاد ايتدكلرى  
 ياغنى تعميد عقيبنده سوررلر و قداسى كذلك مايه لي اتمكدن پيارلر و عوام  
 و خواصه و يررلر و پاپاسلرينى تأهل ايچون سر بست براغورلر  
 و پستقوسلرينى كندولرى انتخاب ايدرلر بو مذهب ( ۸۷۸ م و ۲۴۴ هـ )  
 تاريخنده باشلايوب ( ۱۲۷۲ م و ۶۷۱ هـ ) تاريخنده ليونده و يوز التمش  
 يدى سنه صكره فيلورانسه ده تشكلى ايدن جمعيتلر ك ملاحظاته قارشو  
 تأسس ايتلشدر .

(ملکیت) یاخود (ملکائی) دنیلان فرقه دخی روم قتلوی دیمکدر بونک اصحابی اکثر یا سوریه وانطاکیه و دیار بکر و مصر و حوالیسنده اولوب وقتیه برملک اعتقادی طرفنده بولندقلریچون بونامی آلمشردر .  
(۴) ارمنی قتلوی — بونلرک اعتقادی دخی روم قتلولکری کبی اولوب فرقلری یالکز کلیسار سومنده و دعارینی کندو لسانلری اوزره اوقومقدهدر .

(۵) کلدانی قتلوی — بونلرک اعتقادی دخی روم قتلولکری کبیدر بونلر مقدا نسطوریلردن ایریلوب پاپانک رئیس روحانی اولدیغنی طانیدلر لکن رسوم قدیمه لرندن بعضیلرینی ترک ایتدیلر . موصل و بغداد و جزیره و عماره طرفرنده چوق بولنورلر پطریقلری موصلده اوتورر .

(۶) سریانی قتلوی — بونلر دخی کلدانیسر کبیدر . ماردین

و موصل و شام و دیار بکر طرفرنده بولنورلر پطریقلری ماردینده اوتورر .

(۷) مارونی قتلوی — روما پاپاسلرندن (ژان مارون) نامنده برآدم

حضرت (عیسی) علیه السلامده یالکز برطبیعت الوهیه اولدیغنی ادعا

ایدن (مونوته لیسیم) فرقه سنه طرفدارلق ایتدیکیچون (۴۴۹ م) تاریخنده

پاپانک آفروزندن جبل لبنانه قاچوب اوراده مارونی اعتقادینی اعلان و پک

چوق طرفدارلر پیدا ایلدی و مؤخرأ بومذهبک اصحابی اون اوچنجی

غراغوار زماننده روما کلیساسنک بعض آیینی و (۱۷۳۶ م و ۱۱۲۹ هـ)

تاریخنده اون ایکنجی (قله مان) زماننده ترانت جمعیتی قرارینی قبول ایله

قتولک آیینی روم قتلولکری کبی طانیغجه مجبور اولدیلر . بونلرک ایوم رئیس

روحانیسی انطاکیه پطریق عنوانینی حائزدر .

(۸) اورتودوقس روس — بونلر دخی مقدا استانبول پطریقخانه سنی

طانیانلردن ایکن (۱۵۸۸ م و ۹۹۷ هـ) تاریخنده ایریلوب مسقوده

کندولرینه بریطریق تعیین ایتدیلر و صکره پطریقلرینک وظیفه روحانیه سنه

روسیه چارلرینک نظارت مؤثره سنی دخی قبول ایلدیلر . اعتقادجه اصل

اورتودوقسلردن چوقلق فرقلری یوقدر .

(۹) نسطوری فرقه سی — بوفره نک اصحابی حضرت عیسانک

وجود انسانسی بشقه و بابادن طوغدی دنیلان کلمه ازلیه سی بشقه در و بونلر

حضرت عیسی وجوده کلدکنصکره اتحاد ایتشدر وآله وابن آله دینلدیکی تشریف ایچوندر دیرلر وکلدانی کلیسایی طانیوب روما کلیسایی طانیولر وپاپاسلرک تأهلنی قبول ایتزلر . ( ۲۳۱ م و ۴۵۱ م و ۵۵۳ م ) تاریخلرنده تشکل ایدن افس و قاضی کوی جعیترلی بونلرک اعتقادی رد و روما کلیسایسنه جلب ایچون پک چوق اوغراشدیغی حالده دردنجی نومروده محرر کلدانیلردن ماعداسنی جلب ایده مدی . نسطوریلر ایران وموصل وبعض ممالک کلدانیده بولنورلر .

( ۱۰ ) سن طوماس خرستیانلری — نسطوریلرک برشعبه سیدر .

بونلر دخی کلدانی کلیسایی طانیوب پاپاسلرک ازدواجنی قبول ایتلر ایدی صکره یعنی ( ۱۵۹۹ م و ۱۰۰۸ هـ ) تاریخنده ایچلرندن بعضیلری روما کلیسایی طانیولردر . اشبو اعتقاد پورتکیرلرک ( مالابار ) طرفلرینی استیلاسی زماننده هند جهتلرنده دخی بولنمش ایدی

( ۱۱ ) مونوفیزیتلردن ( اوتیشست ) فرقه سی — بونلر حضرت عیسانک حین تجسدنده لاهوت ایله ناسوتی اتحاد ایدوب تماماً لاهوت حکمنه کیردی وطبیعت بشریه سی محو اولوب یالکز طبیعت الوهیه سی قالدی دیرلر . ( اوتیش ) کله سنه نظر بیوریه .

( ۱۲ ) مونوفیزیتلردن ( قبط ) فرقه سی — بونلرک اعتقادی دخی اوتیشستلر کبی اولوب فقط سنت اولق ودعا اوقویه جق قدر اسکی قبط لسانی اوکرمنک کبی عادات قدیمه لرینی ترک ایتماشلردر . قبطیلر قاهره ده اولان پطریقلرینی قدس واسکندریه پطریق عنوانیه یاد ایدرلر وحبشستان پطریقلری اشبو قبط پطریق طرفندن نصب اولنورلر وحبشیلر پطریقلرینه ( ابونا ) دیرلر .

( ۱۳ ) مونوفیزیتلردن ( یعقوبی ) فرقه سی — بونلرک اعتقادی دخی اوتیشستلر کبیدر فقط یوزلرینه آتش داغیله حاج رسمی یاپه رق مخالقلری اولان ملکایلردن آریلورلر . پطریقلری دیار بکرده در . ( یعقوبی ) کله سنه دخی نظر بیوریه .

( ۱۴ ) مونوفیزیتلردن ( ارمنی ) فرقه سی — بونلرک اعتقادی دخی اوتیشستلره یقیندر واستانبولده وقدس شریفده ایکی پطریقلری واردر

ويوك پطريقلرى (آچيازين) دهر وحلب وشام سريانى پطريقلرى  
دخى استانبول پطريقلكى اداره روحانيه سنه داخلدر وبونرك اورتودوقس  
وقتولك آينلرندن برينه داخل اولماسى تدقيقات امور مذهبيه اچون  
تشكل ايدن جمعيت رهبانيه نك دعوتنه ارمنستاندن اعضا كوندره ماملرندن  
نشأت ايلديكى بعض توارينجده كورلشدر .

(۱۵) مونوفيرتيلردن (مونوته ليسم) فرقهسى — بونرك اعتقادى  
دخى اوتيشدستلر كى اولديغى سندن انلرله برلشمشدر شمدى تفريق  
اولنه مزلر .

(۱۶) اونيتلردن (آريانيسم) فرقهسى — بوفره اصحابنك اعتقادى  
جناب حقا خالقيتنى وحضرت عيسانك صفات آلهيه مظهرتيله برابر  
مخلوقيتنى وروح القدس بشقه بر جوهر اولديغى اعترافدن عبارتدر .  
بو اعتقاد اسكندريه راهبى (آريوس) معرفتيله (۳۰۰ م) تارينجده نشر  
اولنوب اوچيوز التمش سنه صكره ترك اولنديسه ده مؤخرأ (خصوصى  
اونيت) و (سوسى ين) نامريله ينه ميدانه چيتمشدر . (آريوس)  
كله سنه نظر بيوريله .

(۱۷) خصوصى اونيت فرقهسى — بونرك اعتقادى دخى (آريانيسم)  
فرقهسى كيدر لکن برمدت ترك اولنوب (۱۵۰۱ م و ۹۰۷ ه) تارينجده  
ونديك پاپاسلرندن مانطوالى (فرانسوه) معرفتيله و تمش اوچ سنه صكره  
ينه ترك اولنوب مؤخرأ (سوسى ين) ناميله ينه ميدانه چيتمشدر .

(۱۸) اونيتلردن (آئه توس) فرقهسى — بوفره (آريانيسم)  
فرقه سنك بر شعبه سيدر . بوكا داخل اولنلر حضرت عيسانك جناب  
حقه مشابهتنى كلياً رد ايدرلر . مؤسسلى اولان (آئه يوس) انطاكيه لى  
براهب ايدى مرقوم (۳۶۷ م) تارينجده نبي اولنوب ايمپراطورك امريله  
ينه عفو واطلاق ودر سعادتله جلب اولمشدر .

(۱۹) اونيتلردن (سوسى ين) فرقهسى — بوفره ۱۷ نومروده بيان  
اولنديغى اوزره اوچنجى درجه ده (آريانيسم) فرقهسى يرينه ايكى  
سوسى ينلر معرفتيله قائم اولمشدر . بونلر حضرت آدمدن موروث كناه  
اصلى بي تطهير اچون موضوع دنيلان تعميدى ومغفرت ذنوب ومقدراتى انكار

ایدرلر وایتالیاده و پولونیا و اوستریا و انکلترده و امریکای مجتمعه ده پک چوق بولنورلر .

(۲۰) اونیتلردن (اونومیت) فرقه سی — بوفرقه دخی (آریانیسم) فرقه سنک برشعبه سیدر لکن حضرت عیسی سائر انبیای بشر کی دکلدن و روح قدس یالکز حضرت عیسان ظهور ایتشدر دیدکاری و معجزاتی وارواح اعزهدن استمدادی انکار ایتدکار یچون آریلورلر .

(۲۱) پروتستانلردن (لوتریه ن) فرقه سی — بوفرقه نک اصحابی اقایم ثلثه یی و تعمیدی تصدیق ایدرلر ایسه ده قداسده آریلورلر یعنی قتلکر و اورتودوقسلر کی شرابی دم عیسی و اتکی جسد عیسی اولمق اعتقادیه تناول ایتیموب یالکز برحمت مخصوصه اولمق اوزره تناول ایدرلر و پاپاسلرک کناه چیقارمسینی و خفیف کناهرک تطهیر یچون آخرتده جهنمدن بشقه بر مقام عذاب اعتقادینی و پاپاسلرک مراتب رسومیه سنی و مجرد قالمیرینی و اموال و املاکه تصرفله اهل دنیا کی اولمیرینی و اموات اعزهدن استشفاعی و انلرک مجسم و غیر مجسم تصویرلرینک کایسارله تعلیقی قبول ایتزلر . قتلکره قارشو اولان اشبو مذهب (۱۵۲۹ م و ۹۳۶ ه) تاریخنده مشهور (لوتر) معرفتیله احداث اولمشدر . (لوتر) کله سنه نظر بیوریه .

(۲۲) پروتستانلردن (ژوه نکلی ن) فرقه سی — بوفرقه نک اصحابی لوتریه نلر کی اولوب بعض خصوصده اختلافری واردر .

(۲۳) پروتستانلردن (قالوه نیست) فرقه سی — بوفرقه نک اصحابی لوتریه نلر کی پاپاسلرک مراتب رهبانیه سنی و ارواح اعزهدن استشفاعی انکار و تناول قداسده حضرت عیسانک حضورینی و مقدراتی کاملاردایدرلر یعنی حرمت ایچون دخی تناول ایتزلر . اشبو (قالوه نیست) لرک جنوده بریوک کایساسی و اسویچره و فرانسه و انکلتره و فنلک و امریکا و ماززاده پک چوق مذهبداشلی واردر .

(۲۴) پروتستانلردن (لابادی) فرقه سی — اشبو فرقه نک مؤسسینی اولان مرقوم (لابادی) ایکنجی مسیحک ورودینی تبشیره مأمور اولدیرینی و کندوسی تعمیدچی (یوحنا) ایدوکنی ادما ایدرایدی . بونک تأسیس

ایتدیکی اعتقادی قبول ایدن امر یقالینر تعمیدی پک کوچک ایکن بیارلر  
و پک بیوک برعیان وقوعنده ینه تقدیسه احتیاج کوررلر .

(۲۵) پروتستانلردن (سوپرالاپسر) فرقه سی — بوفرقه قالوه نیست  
فرقه سنک برشعبه سی ایسه ده بعض مسائلده مخالقلری وارد ازجمله بونلر  
مقدرات ازلیه صحیحدر وحق تعالینک آدم علیه السلامی خلق وچندن دنیاه  
ارسالی مرحمت وعدالتنی اظهار ایچون ضروریدر دیرلر .

(۲۶) پروتستانلردن (ارمیننی بن) فرقه سی — بونلر (۱۶۰۷ م و  
۱۰۱۶ ه) تاریخنده (سوپرالاپسر) لره قارشو ظهور اتمشله ومقدراتی  
انکار وبالجمله توبه کارلرک مظهر عفو اوله جقربنی ادعا ایدوب بدرجه ینه قدر  
قالوه نیستله یاقلاشمشلردر .

(۲۷) پروتستانلردن (پره سپیتریه ن) فرقه سی — بونلر مراتب  
ورسوم رهبانیه دن هیچ برینی قبول ایتزلر وباش پسقیوس برینه اسقوچیاده کی  
کلیسا اعضالرینی وانلرک مساوات اوزره قونمش اولان عادات مخصوصه لرینی  
طانورلر . بو کلیساجنوده اولان (قالوه نیست) کلیساسنه مشابه اوله رق  
(۱۵۶۰ م و ۹۶۸ ه) تاریخنده (ژان قنوقس) معرفتیه انشا اولنش ایدی .

(۲۸) پروتستانلردن (انکلیقان) فرقه سی — بوفرقه ینه داخل اولنلر  
انکلتره دولتک رسما بیوک طانیدیغی (پسقیوسی) کلیساسنک آیین ورسوم  
رهبانیه سنی طانیانلردر و بونلرک اعتقادی (قالوه نیست) لره مطابق اولوب  
یالکز رسوم رهبانیه یی طانیق خصوصنده آیرلشلردر انکلیقان کلیساسنک  
نظارتی و اصول مذهبه نک محافظه سی و پسقیوسلرینک نصب وتعیینی انکلتره  
قرالرینه مفوضدر اشبو تفویض ماده سی سکزنجی هازی زماننده باشلابوب  
(۱۵۱۲ م و ۹۱۸ ه) تاریخنده یایلان اتحاد دینه مقاله سی اوزرینه تقرر  
ایلدی .

(۲۹) پروتستانلردن (پوری تن) فرقه سی — بونلر انکلیقان  
فرقه سنه قارشو آیین و مراتب رهبانیه یی ورهبانلرک موسیق البسه سی اکتسانی  
تقیح و مسائل دینه ده کندولرنجه قول مختاری الترام و قداس تناولی و پرهیز  
واشارات صلیبیه و دیز چوکک کی شیلری رد ایدرک (۱۵۶۶ م و ۹۷۲ ه)  
تاریخنده انکلیقان کلیساسندن آیرلشلردر .

(۳۰) پروتستانلردن (نون قونفور میست) فرقه‌سی — بونلردخی انکلیقان فرقه‌سنه قارشو و (پوری تن) لرك اعتقادینه مماثل بر اعتقاد ایله انلرك آیرلدیغی زمان آیرلشلردر و بو فرقه‌یه داخل اولنلر ایوم کیدکلری کسوه مخصوصه لر یله بیلنمکده در . و مؤسسسی قاتوربری پاپاسلرندن (مایتو بارکر) در .

(۳۱) پروتستانلردن (ویکله ف) فرقه‌سی — بو فرقه‌یه داخل اولنلر دخی قداس تاولنی و پاپاسره کنه اقرارینی و تعمیدسز وفات ایدن چوجقلرك جهنمه ادخال اولنه جغنی وروم کلیساسنك ریاست مذهبه‌سنی و مراتب و مراسم ره‌بانیه‌یی و پاپاسلرك اموال و املاکه تصرفنی و قضانه مداخله‌سنی تقبیح ایدر لر . بو اعتقادی (۱۶۶۵ م و ۷۶۷ ه) تاریخنده (اوقسفور) مکتبی نظری اولوب اطاعتسز لکنه بناء پاپا طرفندن عزل و علیه‌نه حکم اولنان (ویکله ف) نام فیلسوف ابداع ایلدی .

(۳۲) پروتستانلردن (لولار) فرقه‌سی — بو فرقه‌نك رئیسی اولان مرقوم (لولار) ارواحدن استمداد و استشفاع ماده‌سی و کایسارلرك رسوم و اسراری بتون پاپاسلرك اویدر مه‌سیدر و نکاحك حکمی یوقدر کبی سوزلر سویلیه‌رك یکریمی بیک قدر شاکرد پیدا ایتدی و ایچلرندن اون ایکیسینی حواریونه تقلیداً رئیس مذهب یاپوب اییچه ایشنی صره‌سنه قویدی ایسه‌ده صوکنی کتوره‌مدی و (۱۳۲۲ م و ۷۲۳ ه) تاریخنده (قولونیا) ده یقایی اله و یروب آتشدن احراق اولندی .

(۳۳) پروتستانلردن (ژان هوس) فرقه‌سی — بونلردخی (ویکله ف) لر اعتقادنده اولوب فضله اوله‌رق پاپانك و پاپاسلرك انسانلری دیندن چیقاره بیلك اقتدارینی و کنه‌هلری مغفرت ایتسنی و حضرت مریم‌ایله سائر اعزده‌دن استشفاعی‌رد و تقبیح ایدر لر . اشبو اعتقادی ابداع ایدن (ژان هوس) نام پاپاس فرانسه‌ده تشکل ایدن (قونستانس) جمعیتی قرار یله اعدام اولنمشدر . (طاپوریست) لر دخی بو فرقه‌یه منسوبدر .

(۳۴) پروتستانلردن (ژه‌روم) فرقه‌سی — بو فرقه‌نك مؤسسسی اولان مرقوم (ژه‌روم دو پراغ) بالاده محرر اولان ژان هوسك شاکردی ایدی استادینك اتهام و اعدامی ائنده قور قوسندن مذهبنی کتم و سکوت ایدوب

برسنه صکره یعنی (۱۴۱۶ م و ۸۱۹ هـ) تاریخنده ینه میدانه چیقار مشدر .  
(۳۵) پروستانلردن (انجیلی بن) فرقه سی - بوفرکه نك اصحابی (لوتری بن)  
لرک بر فرقه سیله (قالونیست) لرک بر قسمندن مرکب بر اعتقاد اوزره در بو  
اعتقاد (۱۸۱۷ م و ۱۲۳۳ هـ) تاریخنده المانیاده واقع (ناسو) دوقه لغی  
مالکنندن ظهور ایتشدر .

(۳۶) آتوزیا ستلردن (وودوا) فرقه سی - بوفرکه نك اصحابی  
پاپاسلرک احوالی تقبیح و امور مذهبییه و مراسم سائر نك اسکی حالنه ارجاع  
و اصلاحی و کتب دینییه ساده اوله رق ترجمه اولنوب هر کسک اکامرا جعتله  
حرکت و تطهیر اخلاق ایتسنی ارزو ایدرلر (پیه روودوا) بومذهبی اون  
ایکنجی عصر میلادیده ابداع ایتشدر و (لیون) ده ایوم معتقدلری  
موجود در . تطهر دعواسنده بولندقلر یچون (قاطر) وقعا اعتکار  
اولدقلر یچون (لیون فقراسی) نامرلیه دخی یاد اولنورلر .

(۳۷) آتوزیا ستلردن (قونزره غاسیو نالیست) فرقه سی - بونلر  
بالاده محرر اولان (پوری تن) لرک رافضیلریدر انکلتزده و امر یقاده  
بولنورلر .

(۳۸) آتوزیا ستلردن (انابا یلیست) فرقه سی - بونلر چوجقلرینی  
حد بلوغه وارمدقجه تعمید ایتزلر و حین ولادتده تعمید بیلله اولسه بلوغنده  
ینه تکرار ایدرلر بومذهب شمدی انکلتزده و فلنکنده (پره سیپتریه بن) فرقه سنه  
قارشمشدر .

(۳۹) آتوزیا ستلردن (منونیت) یاخود (باتیست) فرقه سی -  
بونلر تعمید خصوصنده (انابا یلیست) لره تبعیتله برابر هر کسک کتب دینییه نك  
معانی ظاهره سندن استنباط ایده بیلدیکی احکامله حرکت ایتسی لازم  
کله جکنی اساس اعتقاد طوتارلر . اشبو فرقه نك اصحابی انابا یلیستلره  
مصالح بولندقلر یچون (پاسیفیک) یعنی صلحپور نامنی دخی آلمشدر .

(۴۰) آتوزیا ستلردن (قاکره) اخوتی - بو اخوتی (۱۶۷۷ م و ۱۰۵۷ هـ)  
تاریخنده انکلتزده (جورج فوقس) نامنده بر قوندره جی (محب شرکت  
خرستیانیه) نامیله تشکیل ایتشدر . بوفرقه یه داخل اولنلر کایسا عاداتدن  
اولان عبادات رسمیه و مراتب رهبانییه یی قبول ایتزلر و هر انسان روح آلهی



ایله الهام اولنه بیلور دیهرک تزییناتدن عاری عبادتخانه لینه طویلانوب جمعیت خاطر ایله روح القدسک ظهورینه منتظر اولورلر و ایچلرندن بری دتره یهرک کندوسنده بر اثر حس ایتدیکنی یعنی الهام اولندیغنی ایما و در حال قیام ایله بر چوق شیلر سویلر و جماعتک کافه سی اوسوزلری جان قولاغیله دکایوب موجنبجه عمل ایلر . قاکه لرلر محارباته و مسیره لره کتمزلر و صیادلق و قار بارلق ایتمزلر و همین ایتمک ادا تلی اولمادیغیچون محکمه لره یالکز تصدیق و تکذیب لری کافی طوتیلور البسه لری غایت ساده در ارککلر بیوک کنارلی شابقه و دوکمه سز اثواب کیوب قادینلر یشیل یشمال و سیاه اورتی بور پنورلر و بو حالرینه بناء پک چوق تحقیر اولنورلر . بونلر فلنکده و آمر یقاده کثرت اوزره در .

(۴۱) آتوز ییاستلردن (کیه تیست) فرقه سی — بونلر روحک کاله ایرمی هر درلو کار و عملی ترک و استراحت و یالکز تفکر ایله اولور دیرلر و بوتفکری زمان زمان دکیشورلر . اون دردیجی عصرده ظهور ایدن (آینه روز) هزیشاستلری دخی بونلردنلر و بونلر دائما برون و کوبکرینه نظر و تفکرله و اون یدنجی عصرده ظهور ایدن (مولنوس) ک طریقدا شلری نفسلری بتون بتون کار و عملدن تجرید و استراحتله و حتی خیر و حسناته و ابنای جنسنه امداد و اعانه یه بیله یناشماقله و اصل کمال اولورز اعتقادنده بونلورلر .

(۴۲) آتوز ییاستلردن (موراویست) اخوتی — بو اخوت (۱۷۲۱م و ۱۱۳۴هـ) تاریخندن اولجه اسویچره ده واقع بال جمعیتی قرارندن استنکاف ایدنلرک متروک (ژان هوس) اعتقادینی تجدید ایتسیله میدانه چیمشدر و مؤخرأ (هرتهوت) ه کتدکلریچون (هرتهوت) نامنی دخی آلمشدر اشبو موراویستلر قداسده حضرت عیسانک یالکز حضور روحانیسنی تصدیق ایدرلر و برچوق کلمات مرهوزه سویلرلر و کتب دینه نک کافه سنه حرمت ایدرلر و روابط و جدانیه ایله بلا واسطه جناب حقه وصول ممکندر دیرلر و کنهه اصلینک حضرت عیسانک و قایله برابر عفو اولندیغنه ذاهب اولورلر لکن تعمیدیه رد ایتمزلر .

(۴۳) آتوز ییاستلردن (پیه تیست) یاخود (سپه زریه ن) فرقه سی — بونلر

کافه حظوظات نفسانیه بی ترک و مجاهدات و ریاضات مفرطه بی الترام یولنده  
(قا کر) لره مشابه بر مسلك اتخاذا ایدرک (۱۶۸۹ م و ۱۱۰۱ ه) تاریخنده  
برلینده میدانه چیمشدر.

(۴۴) آتوزیاستلردن (مه تودیست) فرقه سی — بونلر هر اقسام  
و صباح بر آچیق میدانه طویلانوب اوراده (قا کر) لر کبی الهام ایچون  
عبادت ایدرلر و برطاقم صحیرایشلر پیارلر و انجیلک قواعدینه تمامیله اعتنا  
ایلرلر و ذوقیات و لعبیاتک هیج برینه التفات ایتمزلر و اعتقادات سائر لربنی  
(ارمینین) فرقه سنه تطبیق ایدرلر. بونلر بو مذهبک ایچ یوزینه وقوف  
ادعاسیله هر عبادته بروقت تعیین ایلدکر ایچون (مه تودیست) نامنی دخی  
آلمشدر و انکلترده ابتدای ظهورلری (۱۷۲۰ م و ۱۱۳۳ ه) تاریخنده در.

(۴۵) آتوزیاستلردن (مورمون) فرقه سی — بونلر کندولربنی اعزه  
قیامت عدایدوب قیامت یقینده قویه جقدر دیرلر و چوجقربنی برنجی  
دفعه ماء جاریده تعمیر ایدرلر و بینلرنده اشتراک اموال و تعدد زوجاته قائل  
اولورلر و میلاددن التی یوز سنه مقدم (سدسیا) نام بهود حکمداری زمانده  
ظهور ایدن (مورمون) نام پیغمبرک یازمش اولدیغی صحیح تورات معجزه  
طریقيله آمریقاده بولندی و بعض علاوله و برملک واسطه سیله بزه ویرلدی  
دیرلر. بو اعتقاد (۱۸۲۸ م و ۱۲۴۴ ه) تاریخنده ژوزف اسمیت (معرفتيله  
آمریقاده نشر اولمش و الیوم خیلی طرفدارلری موجود بولمشدر.

(۴۶) آتوزیاستلردن (سوه دنورژیین) فرقه سی — بونلرک ربیسی  
اولان (سودنورغ) (۱۷۳۴ م و ۱۱۴۷ ه) تاریخنده بن الهاماته مظهر  
و حضرت عیسانک دینی احیایه مأمور اولدم دهرک حکومتده اولان  
مأموریتدن استعفا ایدوب جلب نفوسه باشلادی و شاگردلرینه تحریراً  
و شفاهاً ارواح و ملائکه و شیطانلره سویلشمک اقتدارینی حاز اولدیغنی  
و دنیا ایکی اولوب بری دنیای مادی و دیگر دنیای معنوی اولدیغنی و دنیای  
مادیده بولنان شیلرک کافه سی دنیای معنویه دخی بولدیغنی و کتب دینیه ده  
اوج معنا اولوب برنجیسی معنای طبیعیه ایکنجیسی معنای معنویه اوچنجیسی  
معنای سماویه ایدوکنی و کندوسی زمانه قدر مکتوم اولان معنای معنوی بی  
اظهاره حسب المأموریه تشبث ایتدیکنی بیلدیردی. بونک ابداع ایلدیکی

اعتقاده انکترده و اسوجده و آمریقای جنوبیده و بعض ممالک هندیده  
چوق کسه لر تابع اولمشدر . کلیسارینه (قدس جدید) تعبیر ایدرلر .

(۴۷) آتوزیاستلردن (ایقونوقلاست) فرقهسی — بونلر استانبول  
ایمراطوری (زون) زمانده یعنی (۴۸۵ م) تاریخنده ظهور و کلیسارده  
موجود اولان پتری کسر و پتپرستلکه مشابه اولان افعالدن کلیساری تطهیر  
ایدرك اوچپوز الی یدی سنه پایدار اولدیلر لکن اندن صکره تشکل ایدن  
جمعیات رهبانیه نك اجباریه دیکش طوتدیره مدیلر . بونلرک اعتقادات  
مذهبه لر ی اخیراً (وودوا) و (هوسیت) و پروتستانلره انتقال ایشدر .

(۴۸) آتوزیاستلردن (سن ژان) فرقهسی — بو فرقه نك اصحابی  
(یحیی) علیه السلامی طانیوب حضرت (عیسی) علیه السلام حقنده الوهیت  
تعبیرینی ایتلر و جناب حق جسمدر و (جبرائیل) علیه السلام انك  
اوغلیدر و حق تعالی بو دنیای الی بیک عقول خبیثه معاونتیه یراشمدر  
و ارواح سماك طبقات مختلفه سنده ساکندر دیرلر . اشبو (سن ژان)  
فرقه سنه تابع اولنلر برنجی عصر میلادیدن بر زمانه قدر (اردن) نه ری  
کنارنده بولنورلر ایدی شمدی بصره حوالیسنده پک آزی موجوددر .

(۴۹) آتوزیاستلردن (آیونیت) فرقهسی — بونلرک رئیس اولان  
(آیون) نام یهودی حضرت عیسی حقنده سویلنن الوهیت تعبیرینی رد  
ایدر و یالکزمی انجیلینی تصدیق ایدوب قصورلرینی انکار ایلر و مذهب  
خرستیانیه یی مذهب یهودیه یه قاریشدر مرق غیرتنده بولنور ایدی . (یوحنا)  
انجیلینی بونی و بونك اعتقادینه داخل اولنلری رداچون یازمشدر .

(۵۰) خارجیلردن (سمعی) فرقهسی — بو فرقه نك رئیس اولان  
(سمعون) نام یهودی حواریون زمانده بعض کراماته مقتدر اولمق ایچون  
رئیس حواریون (پتروس) ه اقیچه وعد ایلدیکندن طرد ولعن اولنمشیدی  
مرقوم بو معامله دن دلکیر اوله رق خرستیانلق علیهنه قیام و بعض ممالکه  
و ایتالیه یه عزیمت ایدوب کندوسی الهک اوغلی اولدیغنی ویاننده اولان  
برقاری عقل اولك مجسدی ایدوکنی اعلان و برچوق ساده دللری اضلال ایلدی  
و برکون سحر ایله سمایه عروج ایده جکم دیر ایکن آتلا دیغنی محلدن دوشوب  
ایاغنی قیرلدی .

(۵۱) خار جیلردن ( آپولونیوس دوتان ) فرقه سی — بونلرک رئیس  
اولان مرقوم آپولونیوس حکیم ( فیثاغورس ) لک بعض عقائدینه تابع اوله رق  
( افس ) و ( انطاکیه ) و ( هندستان ) و ( یونانستان ) طرفلرینی طولاشوب  
ابداع ایلدیکی اعتقادی نشر ایلدی و ایتالیا دن طرد او اندیغنه بناء ینه افسه  
عودت و بر مکتب کشادیله عقائد حکیمه سنی تدریس ایدوب ( ۹۷ م ) تاریخنده  
آخرته کندی . بونلر حتمده خوارق العاده شیئر بیان ایدرلر و بعضاً  
غرابدن دخی خبر ویرر ایدی دیرلر .

(۵۲) خار جیلردن ( مه ناندنر ) فرقه سی — بو فرقه سمعایلرک بر  
شعبه سیدر لکن مؤسسسی اولان مرقوم ( مه ناندنر ) نبوت دعواسنه قدر  
حقیقتمش ایدی .

(۵۳) خار جیلردن ( مانه س ) فرقه سی — بو فرقه یه تابع اولنلرک  
اعتقادی مجوسیلردن التمش بر اعتقاد اولدیغندن معهود ( مانی ) یه نسبت  
اولنلشر و بر مدت منقرض اولدققری حالده اون و اون برنجی عصر میلادیده  
( پولیس ین ) نامیله ینه میدانه چیقیمشدردر . ( مانی ) کله سنه نظریوریله .

(۵۴) خار جیلردن ( سپاه لین ) فرقه سی — بونلر اقا نیم ثلشه اوچ  
مبدأدر و بری ( خلق ) دیکری ( تخلص ) اوچنجیسی ( مغفرت ) دردیرلر .

(۵۵) خار جیلردن ( دوناتیس ) فرقه سی — بو فرقه آفریقاده ( ۳۰۵ م )  
تاریخنده ظهور ایتمش و مؤسسسی اولان مرقوم ( دونات ) ظالم ( دیوقلتین )  
زماننده کتب و اشیا ی مقدسه یی پتپرستلره ویرنلرک جاعته قبول اولنملرینه  
دیانتة قرار ویرمشدر .

(۵۶) خار جیلردن ( په لاز ) فرقه سی — بونلر انسان کندو اختیاریله  
کنه ایتماکه مقتدردر و ذاتاً معصوم طوغدیغندن تعمیده لزوم یوقدر  
دیرلر . بو اعتقاد ( ۴۷۱ م ) تاریخنده تونس جمعیت رهبانیه سی طرفندن  
رد اولندیغی حالده طرفدارلرینک ثباتیله التی یوز تاریخنده قدر دوام ایدوب  
صکره منقرض اولمشدر .

(۵۷) خار جیلردن ( ویزیلانس ) فرقه سی — بونلر ارواح اعزیه تعظیمی  
و پرهیزی و پاپاسلرک مجرد قالسنی قبول ایتلرلر .

(۵۸) خار جیلردن ( بوغومیل ) فرقه سی — بو فرقه نك اصحابی اورتو

دوقسلرک رافضیسی دیمکدر بونلر اقایم ثلثه بی وحضرت عیسانک بعده  
دیرلدیکنی وکلیسانک اکثر آیتلرینی ردایدوب یالکز حضرت عیسی بابامزدر  
دعاسنی قبول ایدرلر . رئیسری اولان ( حکیم بازل ) ( ۱۱۱۸ م و ۵۱۲ ه )  
تاریخنده استاتبولده احراق اولمش و اعتقاد مذکور قطعاً یساغ ایدلش  
اولدیغی حالده اوتوز ایکی سنه صکره ( مارتنه ) نامنده برپاپاس معرفتیه  
روسیده ینه میدانه چیتمشدر . اولوقت بو اعتقادی قبول ایدنلر هر  
ایشدن فراغت ایدرلر ایدی .

( ۵۹ ) خارجیلردن ( بازیلیت ) فرقهسی — بازیل کله سنه نظریوریله .

( ۶۰ ) خارجیلردن ( سهرنت ) فرقهسی — بونلرک رئیسری اللی نومروده

محرر اولان سمعونک شاگردی ایدی اعتقادیده آنک اعتقادی کبیر .

( ۶۱ ) خارجیلردن ( دوزیته ) فرقهسی — بوفرقهنگ رئیسری اولان

مرقوم دوزیته حواریون زماننده ظهور ایدوب حضرت عیسی بنم دیهرک  
دعوایه قالمش و برطاق جهلایی باشنه طویلا یوب سنت اولمیرینی و پرهیز  
ایتمیرینی و حال تجررده بولمیرینی امر ایش و نهایت یهودیلردن قاچوب و بر  
مغاریه قبانوب آوراده آجلقدن وفات ایلشدر .

( ۶۲ ) خارجیلردن ( مارسیون ) فرقهسی — بونلرک رئیسری اولان

مرقوم مارسیون ایکی مبدأ اثبات ایدر و برینه خالق خیر تسمیه ایدرک  
ارواحک بوندن ظهورینی و دیگرینه خالق شر تسمیه ایدرک اجسامک  
بوندن ظهورینی ادعا ایلر و شریعت قدیمه بی خالق شردن و شریعت جدیده بی خالق  
خیردن چیقارر و انجیل شریفک و یاولوس رسائیلنک قسم اعظمینی  
چوریدر ایدی . ایرانده و سوریه و مصر و ایالیاده حالا معتقدلری  
موجوددر مرقوم برقرک بکیرینی ازاله ایتدیکنه بناء پاپاسلقدن طرد اولندقدن  
صکره بومذهبی اختراع ایتدی دیرلر .

( ۶۳ ) خارجیلردن ( سهردون ) فرقهسی — بونلردخی ایکی مبدأ اثبات

و انجیل شریفک قسم اعظمینی انکار ایدرلر و حضرت عیسانک یالکز بوجود  
و همیسی وارددیرلر ایدی .

( ۶۴ ) خارجیلردن ( باردزان ) فرقهسی — بونلرک اللی اوچ نومروده

محرر مجوسی ( مانهس ) ک اعتقادینه قریب بر اعتقادی وار ایدی .

(۶۵) خارجیلردن (تاسی بن) فرقه سی — بوفرقه نك رئیس اولان مرقوم (تاسی) (۱۷۲ م) تاریخده ظهور ایش و شرب خمر و ازدواجی شرائط مذهبیهدن اولق اوزره منع ایش ایدی .

(۶۶) خارجیلردن (ولانتن) فرقه سی — بوفرقه نك رئیس اولان مرقوم والانت) قنولکک و باز یلیتر ایله فلاسفه اعتقاداتنی یکدیگرینه مزج و برطاق شیلر علاوه ایدرک میدانه برغریب اعتقاد چیقاردی . بونک اعتقادیجه بری مرئی و دیگری غیر مرئی ایکی دنیا و ارامش و دنیای غیر مرئییه برمسافه غیر متناهیة منوره اولوب بونک خالق اولان حقندن روح و حقانیت و کله و حیات و دین و کایسا کبی اوتوز عدد جوهر لاهوتی ابدی ظهوره ککش و دنیای مرئیة غیر کامله (دمبورژ) نامنده برخالق معرفتیه خلق اولمش ایش . بو اعتقادک مصرده و بعض ممالک شرقیه ده خیلی طرفدارلری واردر و مرقومک وفاتی (۱۶۱ م) تاریخده در .

(۶۷) خارجیلردن (قار پورات) فرقه سی — بونلر حضرت (عیسی) علیه السلامه حاشا سحر بازلق اسناد ایدرلر و عبادات جسمانیه نك کافه سی بیهوده شیلردر انسان ذوقنی اجرا ایتلیدر دیرلر ایدی (۶۸) خارجیلردن (دوسهت) فرقه سی — بونلر حضرت عیسانک نصل که کورینور ایسه هرکس کبی برجسدی اولدیغنی و وفاتی دخی کورندیکی کبی اولوب بشقه اذا وجفا کورمديکنی سويلرلر .

(۶۹) خارجیلردن (دولسی نیست) فرقه سی — بوفرقه نك رئیس روح القدس بيک اوچيوز تاریخ میلادیسندن صکره سلطنته باشلادی بناء علیه پا پا حصرت عیسانک و کالتندن دوشدی دیر ایدی مرقومک بو ادعاسی و اختراع ایتدیکی عقائد سائره سی (۱۳۰۷ م و ۷۰۷ هـ) تاریخده پا پابشنجی (قله مان) طرفندن رد اولوب کندیوسی زوجه سیله برابر آتشدر .

(۷۰) خارجیلردن (مونتانیست) فرقه سی — بوفرقه نك رئیس اولان مرقوم (مونتانوس) (۲۱۲ م) تاریخده ظهور و نبوت دعواسنه قیام ایدوب بن کلیسای یکیدن پیدا ایتکه و بر مکمل شریعت یا پیغه مأمور اولدم دیدی و پک چوق معتقد و طرفدار پیدا ایتدی و اختراع ایلدیکی مذهب خیلی ممالکه منتشر اولدی .

(۷۱) خار جیلردن (ئی اون) فرقه سی — بونلرک رئیسی اولان مرقوم (ئی اون) بن الہک اوغلی یم دیہرک برچوق حقایب باشنه طو پلایوب بیوک بیوک اختلافاته سبب اولدی وعاقبت (۱۱۴۸ م و ۵۴۳ هـ) تار یخنده یقایی الہ و یروب حبس خانہ ده وفات ایلدی .

(۷۲) خار جیلردن (غونوستیق) فرقه سی — بوفرقه ننگ اصحابی وحی والہاماتک صحتنی انکار و کتب دینیه ده مسطور اولان احکامک غیر کافی اولدیغنی والوہیت و حقایق اشیاہہ انجق کاندولری واقف ایدوکنی و بوکالہ منشأ نوع بشرک مافوقنه اطلاع ایلہ واصل اولدقلرینی ادعا ایدرلر و ہرشبیء یرادان بر خالقدن ماعدا اوچ اصل اثبات ایدوب بونلرک برنجیسی (مادہ) ایکنجیسی دنیایی ایجاد ایدن (دمیورژ) اوچنجیسی ازالہ شرورہ مأمور اولان (حضرت عیسی) دردیرلر و بوسوزلرک اراسنہ علوم فلسفہ دن برچوق سوزلر قارشدیرلر ایدی .

یہودیلرک منقسم اولدیغنی فرقلردن بولنہ ییلانلر .

(۱) خاخمی (فرقه سی) — بنی اسرائیل یوشع علیہ السلامدن صکرہ حکومت ایدن (ایہود) ک وفاتی عقیندہ برمدت پتیرستلکہ میل وینہ اصلاح نفس ایدوب حضرت (داود) و (سلیمان) علیہما السلام زمانلرنده کوزل کتدیسه ده حضرت سلیمانک وفاتشدن صکرہ حکومتلری دولت یہودیہ و اسرائیلیہ ناملریلہ ایکی یہ منقسم اولدیغنی کبی مذہبلری دخی بعض کونہ اختلافہ دوشدی و ممالک شرقیہ یہ نفی و تغریبلرینہ قدر مرور ایدن ایامدہ اعتقادلرینہ یہ بوزقلق کلدی ومدت اسارتلری اولان یتش سنہ ظرفندہ تورات شریف و احکامی همان اونودلش برحالہ کیروب فلسطینہ عودتلرنده عزیز علیہ السلام وسائر پیغمبران کرام حضرتاتک ہمتلریلہ یہ تجدد ایلدی لکن یینلرنده کی اختلاف زائل اولیوب بلکہ تعصب سییلہ دہا زیادہ قوت بولدی و برمدت دخی بو حال اوزرہ کیدوب عصر ثانیء میلادیدہ ایچلرندن (آشہراب) و (یوحنان) و (راینو) کبی علما یتیشہرک تلوت یروشلمی و بابلی کتابلرینی یازدقلرینہ بناء دین اسرائیلیہ متانت حاصل ایلدی . اشبو خاخمی فرقه سی تلوت احکامنہ و اسفارخسہ و سائرہ یہ اعتقاد و رعایت و موجبنجہ عمل و حرکت ایدرلر و آخر زماندہ (عیسی) علیہ السلامک

دنیایه کله چکنه اینانورلر و عبادتخانه لرینه عزیمت و عبادتده قصور ایدنلری دیانته تأدیب و ملترینک عاجز و فقراسنی نقود موقوفه لرندن اعاشه ایلرلر. (تورات) کله سنه واسمی محرر اولنلرک اسلملرینه دخی مراجعت بیور یله . (۲) سامری ( یاخود ( کوته یین ) فرقه سی — بونلر بش قسمه منقسم اولان اصل توراتی واحکامنی قبول ایدوب بونلردن ماعدا اوتوز درت یاخود قرق اوچ سفری قبول ایتمزلر . اشبو سامریلر حضرت سلیمان علیه السلامک وفاتی عقبنده آیریلوب شخمیده دولت اسرائیلیه بی تشکیل ایدن اون سبط خلقیدر بونلر بابل اسارتدن صکره فلسطینه کلوب بیت مقدس زیارتدن استغنا حاصل اولمق ایچون ( غار یزیم ) طاغنده بیت مذکوره مشابه بر معبد بنا ایتدیلر ایدی . ایوم یافنده و نابلسده سامری بونلور ایسه ده پک آزدر .

(۳) قرایی ( فرقه سی — بونلر دخی سامریلرک بر شعبه سی کبیدر توراتک ناطق اولدیغی احکامی قبول ایدوب قصور اسفاری و خاхамلرک استنباطنی قبول ایتمزلر . ظهورلری سکزنجی عصر میلادی یه طوغریدر ایوم روسیه ممالکنده ولهستانده پک چوق بونلورلر .

(۴) صدوقی ( فرقه سی — بونلرک رئیس اولان ( صدوق ) وقتیه بر عالمک ( عبادتی امید مکافاة و خوف مجازاة ایچون ایتمالی ) سوزینی تأویل و عباداتی یالکز مقاصد دنیایه تخصیص و بعضی فلاسفه یه تقلیداً بر اعتقاد اعلان ایدوب حشر و نشری و ملائکه کرامی و عنایات آلهیه بی و روحک بقاسی انکار ایلدی . ظهورلری ( ۵۳۴۶ خ ) تاریخنده یعنی میلادک ایکی یوز قرق سکز سنه مقدمنده در مؤخرأ منقرض اولمشلردر .

(۵) فروشیم ( یاخود ( فریسی ) فرقه سی — بونلر خاхамیلرک ضایت الغایه متعصیدر . کندولرینه از چوق مخالفت ایدنلره شدتله معامله ایدرلر و صدوقیلره قارشو قدس شریفده بونلورلر ایدی . ظهورلری ( ۵۴۱۴ خ ) تاریخنده یعنی میلادک یوز سکسان سنه مقدمنده در صکره خاхамیلره قاشمشلردر .

(۶) خیسید ( فرقه سی — بونلر دخی صدوقیلره مخالف ایسه ده توراتک معانی باطنه سیله حامل اولمق طرفنی ترجیح ایدرلر ایدی .



(۷) قبال) فرقه‌سی — بونلر آیات توراتیه‌نک رموزاتیدر دیهرک  
چیقاردقلری برطاق معانی غریبه اوزرینه کیدرلر وروحانیله مخصوص  
برطاق الفاظ و ترکیبات عجیبه‌یه دوام‌ایله طباع التام تنزیل واستخدامنه  
چالیشورلر ایدی .

(۸) ره شاییت) فرقه‌سی — بونلرک رئیس‌سی اولان (یوناداب)  
(۴۷۳۴ خ) تاریخنده یعنی میلادک سکنر یوز التمش سنه مقدمده  
(آنیستن) لرکی بر مذهب ابداع ایدوب معتقدلرینه زراعت وفلاحت  
وتصرف املاک کبی شیلری حرام آتمشیدی .

(۹) آسه‌ئی) فرقه‌سی — بونلر ازدواج ومحاربی حرام اعتقاد  
وصدوقیلره مخالف اوله‌رق روحک بقاسنی اعتراف ایدرلر و بحر لوط  
سواحلنده ساکن اولدقلری اراضی بی مشترکاً زرع وحاصلاتیله کفاف  
ایدوب کندولرینه مخصوص عبادتخانه‌لری دروننده یشارلر وبالجمله  
مالرینی مشترک طوتارلر ایدی . زمان ظهورلری (۵۴۴۴ خ) تاریخنده  
یعنی میلادک یوز اللی سنه مقدمده در

(۱۰) فیلون) فرقه‌سی — فیلون کله‌سنه نظر بیوریه .

(۱۱) تراپوط) فرقه‌سی — بوفرقه‌یه داخل اولنلر چوق یمک  
یمزلر وتأهل ایتزلر ووقت‌لرینی دائماً سکوت و یالک‌لرلق وتفکرله  
چکورلر ایدی بونلرک ظهوری اسکندریه‌دندر لکن تابع اولدقلری  
دین دین موسامیدر یوخسه دین عیسامیدر تحقیق اولنه‌مدی .

(۱۲) شازدیم) یاخود (هازدیم) فرقه‌سی — بونلر عباداتده  
حضرت (موسی) علیه‌السلامک امر ایتدیکی درجه‌دن ده‌ها ایلرویه  
کیدرلر وعبادات متصله اجرا ایدرلر ولهستانده واسلاونیاده بولنورلر .

(۱۳) سبطای) فرقه‌سی — روافض یهوددندر .

(۱۴) مارتی نیست) فرقه‌سی — بونلرک رئیس‌سی (مارتی نس)  
پورتکیرلی بر یهودی ایدی مرقوم (۱۷۵۴ م و ۱۱۶۸ ه) تاریخنده  
قباللرک اعتقادینه مشابه بر اعتقاد ابداع ورفض والحادیینی اعلان ایدوب  
طلوز ومارسلیا و بعض فرانسه ممالکنده خبلی طرفدار بولدی . مارتی  
نیستلر شمعی ماصون لوجه‌لرینه داخلدر .

(مورمون) فرقه‌سی — خرستیانلرک ۴۵ نومروسنده

(آیونیت) فرقه‌سی — خرستیانلرک ۴۹ نومروسنده

(سمعی) فرقه‌سی — خرستیانلرک ۵۰ نومروسنده

مورمونلرک توراتی التزاملرینه و آیونیتلرک اعتقادات یهودیه‌ی البدن  
براقاملرینه و سمعیلرک خرستیانلقدن مطرود بولملرینه نظراً بونلر یهودیلرک  
خارجیلری ظن اولنور ایسه ده اصل اعتقادلری مجهول اولدیغندن  
خرستیانلرک خارجیلری صره‌سنه یازلمش و نمورلری کوسترلمشدر .

§

﴿ اغا ﴾ یاخود (آغو) — ترکیه بیوک و سیدو بیوک قرنداش  
وهیئت و گروه باشی و ضابط معناسنه در . یکچیری اغاسی . قول  
اغاسی . چارشو اغاسی . ایج اغاسی . انخاراغاسی . صقاللی  
اغاسی . قپواغاسی . سرای اغاسی . کبی . دولت عثمانیه ده  
مقدما استخدام اولنان علوفه‌لی عسکرک بیوک ضابطلرینه دخی اوچاق  
اغاسی یاخود اغایان بیرون دیرلر و رکاب همایون اغالرینه اغایان اندرون  
تعبیر ایدرلر ایدی . او قویوب یازدی اولیمان معتبرانه دخی اغا دیرلر .

§

﴿ اغا محمد خان ﴾ — ایران شاهلرندندر . بو ذات پدری محمد  
حسن خان ایله برابر کریم خانک انه اسپر دوشدیکی زمان ایکیسیده  
طواشی ایدیلرک حبس اولمش ایدی . صکره یعنی (۱۷۷۹ م و ۱۱۹۳ هـ)  
تاریخنده محبسدن قورتیلوب تخت موروثی کرجستان خانلری یندن  
قورتاردی . و کیده کیده قوت و شوکتی متر ایداوله رق بتون ممالک ایرانیه  
مالک اولدی . و اونیدی سنه صکره یارین شونی اعدام ایده‌یم دیدیکی  
بر ضابط یدیله او کیجه یئاغنده اعدام اولندی .

§

﴿ اغا ممنون ﴾ — جاهیر یونانیه دن و (آرغوس) و (مسه‌نیا)  
ولایاتی حکمدارلرندن بر غدار آدمسدر . جاهیر مذکور (۴۳۱۴ خ)  
تاریخنده یعنی میلادک یک ایکی یوز سکسان سنه مقدمنده ظهور ایدن  
(ترووا) محاربه‌سنه متفقاً کیدرکن بونی کندولرینه قوماندان انتخاب

آتمشر و شهنشاہ عنوانی و یرمشر ایدی مومی الیه واقعا اون سنه امتداد ایدن محبار به مذکورده خیلی ایش کوردیسه ده مظفراً مملکتنه عودت ایدرکن بر فورتنه یه طوتیلوب (اگر شو فورتنه دن قورتیلوب ساحل سلامته چیقار ایسه م ال سوکیلی زوجته م (آقیچینی) بی دکر آلهنه قربان ایده م) دیو نذر آتمسیله و بالسلامه یونان ساحلنه واصل اوله رق ندرینی برینه کتورمسسیله بد نام اولدی و براز صکره آلدیغی (قالتیستر) نام زوجته سی دخی مر قومی اعدام ایدوب مظلومه مرقومه نک آهنی برده بر اقدی.

§

﴿عبرت﴾ — انکلتره قرالردندیر. بو ذات بریتانیاده واقع (وست ساقس) حکومت صغیره سنک حکمداری ایکن فرانسه یه طرد اولنش و فرانسه قرالی شارلمانک یاننده بر مدت تحصیل علوم ایدرک یشایوب ینه جلب و (۸۲۷ م و ۲۱۲ هـ) تاریخنده تخته اجلاس ایدلش ایدی مومی الیه مقتضای درایت و فطانتی اوله رق عموم بریتانیا اهلینک حسن توجه و محبتنی قزاندقن صکره جله سنک حسن رضا و اختیار یله بریتانیاده کی حکومت سبعة بی (آنکلو ساقسون) نامیله بر اداره متحده البته الدی و ریاستنی درعهده ایلدی. بونامده بشقه قرالردخی واردر.

§

﴿آغره﴾ — (اکبره) کله سنه نظر بیور یله.

§

﴿آغری﴾ — اسناده بر طاغدر (آارات) کله سنه نظر بیور یله.

§

﴿آغریبوز﴾ — یونانستان شرقیده و مالیا قوس کورفرزینک جنوب شرقیسنده بر بیوک و اووزون آطه درکه قره دن بر طار بوغاز ایله ایریلور. (الیوم خالکیس) نامنی المش اولان نفس آغریبوز شهری اوتوز سکز بیک نفوسی جامعدر و اراضیسی غایت محصولدار و هواسی لطیفدر و مرکز لوادر یونانیلر بوکا (اوپه) اطه سی دخی دیرلر بوراسی (۱۴۷۰ م و ۸۷۵ هـ) تاریخنده دولت علیه یه کچوب

( ۱۸۲۹ م و ۱۲۴۵ هـ ) تاریخده تشکل ایدن یونان دولتی اداره سنه انتقال ایلدی .

§

﴿ اغستوس ﴾ — اسکی رومالیر مارت ابتدا سندن اعتباراً سنه نك التجی اغستوس آینه التجی معناسنه اوله رق ( اکتیلس ) دیر لر و ایامنی اوتوز اعتبار ایدر لر ایدی صکره روما قیصری اولان مشهور ( اوکوست ) بو آیک ایچنده بر قاچ بیوک ایشه موفق اولدیغندن بر کون زیاده ایدلسنی و کندو نامه نسبتله ( اوکوستس ) دینلسنی امر ایتدیکنه یا خود بعض خلوصکار لر بویله اولسنی بالا خطر امرینی استحصال ایلد کلرینه بناء اولوقد نبرو نامی ( اوکوستس ) قالمش صکره غلط اوله رق ( اغستوس ) دینلشدر . ( آب ) کله سنه نظر بیور یله .

§

﴿ آغلاسون ﴾ — قونیه ولایتنه تابع بور دور قضاسی داخلنده و بور دورک درت ساعت جنوب شرقیسنده بر ناحیه صغیره در یدییوز یتش بش نفوسی واردر و انجیرلی ناحیه سی و یکرمی بر قریه سیله برابر نفوس موجوده سی اوچبیک بشیوز تخمین اولنمقده در . بورایه وقتیه ( ساغلا سوس ) دیر لر ایدی

§

﴿ اغناد ﴾ — قزاق طائفه سندن طورله نهری بوینده مسکون ( زاپوزاق ) لک نام مخصوصیدر . بونلرک بر طاقی مقدا روسیه محارباتنده دولت علیه جایه سنی قبول وهجرت ایلدیکندن اناطولی یه پکورلمش والیوم اناطولیده ( اغناد قزاقی ) نامیه طائفه بولنمشدر . بونلر وقتیه دولت علیه یه محارباتده دخی معاونت ایدر لر ایدی .

§

﴿ افتاده افندی ﴾ — اعظم مشایخ جلوتیه دنر و مسقط رأسی ( بروسه ) واسمی ( محمد ) در . مشار الیه ابتدا طریقت علیه خلوتیه دن اخذ فیض ایدوب صکره حاجی بیرام ولی حضرتلر نك توجه روحانیلریله واصل سر منزل مقصود اولدی و خلوتیه ایله جلوتیه بونده و خلیفه سی

(هدایای محمود) افندی حضرت ترنده برلشدی . وفاتی (۱۵۸۱ م و ۹۸۹ هـ) تاربخنده و تربه سی بروسه ده در .

§

﴿ افراسیاب ﴾ ترکی — ملوک پینشداد یاندن و افریدون سلاله سندن بر شجیع پادشاهدر . بوذات جهانگیر لکه یقین براقندار ایله ایرانده التمش سنه سلطنت سورن (منوجهر) ک اوزرینه اجدادینک انتقامنی آلق ایچون خروج و مومی الیهی طبرستانه قدر فراره مجبور ایدوب بر مدت صکره جیحون نهرندن اوته طرفی کندو اداره سنده قالمق اوزره عقده صالحه ایلدی و صکره ایرانه دخی مستولی اوله رق خیلی جانلر یاقدی و خانمانلر ییقدی و عاقبت کندوسی دخی (زال بن سام) نامنده بر (خان) ه مغلوب و فراره مجبور اولدیغندن خان مومی الیه منوجهر اولادندن (زاب) نامنده برینی کتوروب تحت ایرانه اجلاس ایلدی . افراسیابک سلطنتی تخمیناً حضرت (موسی) علیه السلام زماننده ایش . یونایلر افراسیابه ( فریاپاتیئوس ) دیر لر . (زاب) کله سنه نظر بیور یله .

§

﴿ افراییم ﴾ یاخود ( افرام ) — یوسف علیه السلامک ایکی اوغلندن بریدر و دیگرینک اسمی ( منسا ) در . بوذات پدری وفات ایتدکن صکره کندویه منسوب اولان و مؤخرأ ( سبط افراییم ) نامیله شهرت بولان قبیله یه رئیس اولدی . بوقبیله بعد زمان ارض فلسطینده ( شریعه ) نهرینک جهت شرقیسنده واق دکرک جانب شمالیسنده توطن ایش و اولوقت اوراره وادی افراییم دینلش ایدی . یعقوب علیه السلامک وفاتنه قریب کونلرده حضرت یوسف علیه السلام اشبو ایکی چوجغنی پدری مشار الیهک مصرده ساکن اولدیغنی بلده یه کوتوروب اللرینی او پدور دکده پک آشوری ممنون اولدی و اختیار لغی مناسبیله کوزلری کورمدیکنندن مبارک اللرینی چوجقئرک باشلرینه قویوب دعا و ثنا ایلدی . بونام قدس شریف جوارنده بر بیوک طاغه دخی و برلشدر .

§

﴿ آفریقا ﴾ — قطعات خسته ارضک اصیماغیدر و شمالدن

جنوبه طوغری طولی سکز بیک و شرقدن غربه طوغری عرضی یدی بیک بشیوز کیلو مترودر و اهالی موجوده سی یوز ملیوندن زیاده جه تخمین اولمقده در .

بو قطعه وسیعنه منقسم اولدیغی یکرهی عدد ممالک جسمه دن آق دکر سواحلی اوزرنده اولان بشی ( مصر ) و طرابلس غرب و تونس و جزایر وفاس و بحر محیط غربی سواحله ده اولان دردی ( صحرای کبیر ) و ( سنگامبیا ) و ( کینه شمالی ) و ( کینه جنوبی ) . و جهت جنوبیده اولان اوچی ( هوتاتو ) و ( قاب ) و ( کافرستان ) . و بحر محیط هندی جهته ده اولان دردی ( موزانبیک ) و ( زنکبار ) و ( عدل ) ( و صومال ) . و بحر احمر ساحله ده اولان ایکسی ( حبش ) و ( نوبه ) . و وسطده اولان ایکسی ( سودان شمالی ) و ( سودان جنوبی ) در . آفریقا قطعه سنه تابع اولان ال بیوک اطه ( ماداغشقر ) اطه سی اولوب ( قناریه ) و ( یشیل برون ) و ( ماسقارت ) و ( سه شل ) اطه لری انک دونده در . و جهت شمالی و سواحل شرقیه سنه اسلام واورته یرلرنده اکثریا بتپرست ساکن اولمقده در و ال بیوک حکومتی ( آشانتی ) پادشاهلغی و ( داهومه ) وفاس و حبش و زنکبار حکمدارلغی و تونس و مصر و الیلکریدر .

وقتیه رومالیر ایله یونانیر آفریقانک یالکز جهت شمالینسه کیره ییلوب فنیکه لیلر بتون سواحلی طولاشمشلر و دکردن امید برونی طریقله هندستانه یول اولدیغی ابتدا اسپانیولر کشف ایتشلر ایدی . الیوم ممالک معموره ساحلیه سی دولت علیه و انکلتره و آمریکا و دانیمارقه و اسپانیا و فرانسه و فلنک و پورتکیز دولت لری زیر تصرف و تملکنده در . ( حکومت ) کله سنه دخی نظر بیوریله .

§

آفریتس — یمن شاهلرندن ( ابرهه ) ذوالمنارک اوغلی و خلفیدر بو ذاتک تخمیناً حضرت ( داود ) علیه السلام زمانده معلوم اولیان برسبه مبنی زیر تابعیتنده اولان قوم بربری فی فلسطین اراضیندن مصره و اورادن دخی تونس و حوالینسه نقل و اسکان ایتدیکی و او صروده بر شهر یاپدیروب کندو نامه نسبتله ( افریقیه ) تسمیه ایلدیکی بعض تواریخده کورلمشدر .

§

﴿ آفرینش ﴾ — خلقت عالمه یا خود خلقت آدم علیه السلامه تخصیص اولنمش بر اسمدر . کیفیت و زمان خلقت عالمی بو عقل قاصر ایله بیلک ممکن اوله مدیغی حالده بعض ارباب فنون و تواریخ تحقیقه کیریشوب حق تعالی ابتدا بر جوهر بسیط خلق ایتدی و بو جوهرک تمیغندن انجره و انجره دن مواد اصلیه اجرامیه پیدا اولدی کبی سوزلر سویلدیلر و برطاقم کیمسه لر دخی خلقت عالمدن هبوط آدم علیه السلامه دکین ( ۱۷۵۵۴۲ ) سنه یاخود ( ۱۷۷۷۵۷ ) سنه یاخود ( ۱۷۷۵۹۴ ) سنه یاخود ( ۱۷۷۷۸۴ ) سنه کجندی دیدیلر ایسه ده اشبوعو الرینی اثباته کافی بر حجت و برهان کوستره مدیلر . هبوط آدم علیه السلامدن میلاد عیسی علیه السلامه دکین مرور ایدن ایام حقننده دخی حال بو مرکزده در یعنی مقدار صحیحینی هیچ بر مورخ تحقیق و اثباته مقتدر اوله مامشدر بو بابده اولان اختلافلی ( تاریخ ) کلمه سننده بیان اولنمش اولدیغندن اورایه مراجعت بیوریله .

§

﴿ آفس ﴾ — از میر ایله آیدین آره سننده و مقدا ( اسقاله نووه ) دنیلان قوش اطه سی قصبه سنک ایکی ساعت بعدنده بر شهر قدیمدر . بو شهر وقتیه مهمور و دروننده کی ( دیان ) معبدی مناسبتیه پک مشهور اولدیغی حالده مؤخرأ لیمانی صیغلشدیغندن یاخود از میر و قوش اطه سی طرفرینه دهها زیاده رغبت حاصل اولدیغندن اعتباری قالماش ایدی صکره بر آره لق ( ایاسلوغ ) نامیله ینه شهرت بوله رق خسیلی زمان مرورنده سلچوقیلره کجکدیسسه ده لیمان مذکور بتون بتون بتاقلق حالنه کیروب هوایی اخلال ایلدیکندن اهالیسی کاملاً اطرافه طاغلدی شمعی اراضی خالیه حکمنده در و یالکز سلچوقیلرک در سعادتده کی لاله لی جامع شریفی جسامتمده یاپدیردیغی خراب جامع شریف ایله ( شهاب الدین سهروردنیک ) تر به سی و دیان معبدینک سدلی کورلمکده در . آتقه جیلر دائماً حفر ایدوب درلو درلو تصویرلر چیتارلر و بو مناسبتله بر التنده پک چوق ابنیه عتیقه و دیوار کوررلر . ( هراقلید ) نام فیلسوف ایله شاعر مشهور ( هیپوناقس ) بوراده تولد ایتدی و ( ۴۳۱ م ۴۹۶ م ) تاریخلرنده نسطوری و اویش اعتقاداتی تدقیقه مأمور اولان هیئت رهبانیه بوراده اجتماع ایلدی . بر خصوصی تدقیقه حقمزلق وقوعبولدیغی زمان جمعیات مذکورهنک حقمزلغندن کنایه اوله رق ( ایاسلوغ

حیدودلغی ( سوزی بر مدت ضروب امثالدن اولمشیدی . ( دینان )  
کله سنه دخی نظر یوریه .

§

﴿ افسانه ﴾ — دوزمه داستان و حکایاته اطلاق اولنور . داستانلرک  
بر نوعی اسکى یونانیرک ارباب داستانیدرکه بوکا ( افسانه ارباب ) دخی دیرلر  
و دیگر نوعی جزء نامه و بطلال غازی حکایاتی کبی شیلدرکه بوکا ( افسانه  
قهرمانی ) دیرلر . جزء نامه یتش جلددر و قتیله عسا کر عثمانیه بی تشجیع  
ایچون ترتیب اولنش و یکچیریلر زمانده هر اورته ده قیش کیمهری او قونمق  
بیاغی رسم حکمنه کیرمش ایدی .

§

﴿ افسوس ﴾ — مرعش سنجانخی داخلنده البستان قضاسی مضافاتندن  
بر قصبه صغیره در . اصحاب کهنک مغاره سی بو قصبه جوارنده در دیرلر .

§

﴿ آفشار ﴾ — قدیم ترک اولوچلرندن بر اولوچدر خراسان و همدان  
وانقره ده او یماقری بولنور افشار جید سنجاغنده قره اغاج قضا سنده دخی بر ناحیه در

§

﴿ افغانستان ﴾ — هرات و بلخ و کشمیر و بلوچستان و مولتان و ایران  
ممالکی و پنجاب نهری آرهنده مستقلاً اداره اولنور بر حکمدارلقدر و التمش یک  
نفوسی جامع اولان ( کابل ) شهری مرکز اداره سی اولوب ( جلال آباد )  
( غزنه ) و ( قندهار ) و ( لوغان ) یا خود ( علمدار ) و ( سیوی ) و ( فراح )  
ولایاتی ممالک مشهوره سندنر و ( قوندور ) و ( اوزبک ) و ( ترکان )  
قبائندن و بلوچیلردن برچوق طائفه الیوم افغان حکومتک تحت جایه سنده  
و بالعموم نفوسی اون ملیون راده سنده ایسه ده برچوغنک اطاعتی  
اولدیغندن حکومت مذکورنک نفوذی انجق التی ملیون نفوسه جاری  
اوله بیلکده در . افغانیلر ( ۱۰۱۵ م و ۴۰۶ ه ) تاریخنده مسلمان اولغنه  
باشلادی و ( ۱۱۵۹ م و ۵۵۴ ه ) تاریخنده سلطان ( غوری ) پادشاه  
اولوب تیمورلنکک وفاتسندن ( ۱۵۰۶ م و ۹۱۴ ه ) تاریخنه کلنجیه قدر  
یرلی حکمدارلر سلطنت سوردی و ( ۱۷۲۱ م و ۱۱۳۴ ه ) تاریخنده  
حکمدار بولنان ( محمود بن اويس خان ) قندهار و اصفهانی ایرانیلردن



آلوب بوفتوحات و شجاعتی سایه سنده ایران جایه سندن قورتلدیسسه ده (نادر شاه) قندهار و اصفهانی ینه استرداده موفق اولدی و افغانستان یکریمی التی سنه صکره (احمد خان) ک همتیله بتون بتون استقلالنی اعلان ایلدی و (۱۸۱۸ م و ۱۲۳۴ ه) تاریخنده لاهور حکمدارینک عصیان و استیلاسی و (۱۸۴۱ م و ۱۲۵۷ ه) تاریخنده انکلیرنک تسلطی افغان حکومتنی کرکی کبی صارصدی و بونکله برابر افغانیلر برسنه صکره انکلیرنک تسلطنی منعه موفق اولدیسسه ده انکلیرنک ایشک او جنی براقیوب (۱۸۷۸ م و ۱۲۹۵ ه) تاریخنده روسیه لیلرک اورار حقنده کی انترقیقه لرینه قارشوینه حربه قیام ایلدی الیوم اوغراشمقده دیرلر.

§

﴿ افلاطون ﴾ — یاخود (پلاطون) — قدمای حکمائی یونانیه دندر واصل اسمی (اریستوقلیس) و مسقط رأسی (مغاره) در . بوذات (۵۱۶۴ خ) تاریخنده یعنی میلادک درتیوز اوتوز سنه مقدمنده دنیایه کلوب برمدت تحصیلدن صکره مغاره لیلرک آتته یه دخولی ممنوع و متجاهر - لرینک اعدامی مقرر اولدیغی حالده (سقراط) ک (آقادهیا) دنیلان باغچه ده او قوتدیغی درسنده بولمق ایچون قادین قیافتنده آتته یه کیدوب مومی الیهک برنجی شاگردانی زمره سنه داخل اولدی و بعده ایتالیا ده (فیثاغورس) ک درسنه دوام و مصره و یونانستان و سچیلیایه سیاحت ایتدی و شایع اولان شهرتنی چکه میانلرک القا ایتله سچیلیا ده اسیرکبی صاتیلوب صکره فیلسوف (سیره) نک دلالتیله تخلیص کریبان ایلدی و اورادن آتته یه کلوب باقی عمرینی مجرد اوله رق نشر ایله کچوردی .

افلاطون موجوداتک اصلی اوچ شیدن یعنی (آله واحد) و (ماده) و (ادراک) دن عبارتدر دیوب آله واحدی عقل العقول و ماده یی سبب اول کون و فساد و ادراکی ذات الله ایله قائم بر جوهر روحانی دیوتعریف ایدر و هرانسان ایچون جناب حقک اخلاقیله متخلق اولمق و حکمدارلر معاملاتنی اکا توفیق ایتمک یعنی عدالت و حکمت اوزره کتمک لازمدر دیر ایلدی .

روح مسئله سنده اولان اعتقادی دخی انساننده بالذات متحرک اولان روح

اوچدر یاخود روحك اوچ شعبه سی واردر وتعل ایدن برنجی روحك قرار کاهی باش ونفس اماره دنیلان ایکنجی روحك قرار کاهی قره جکر وشهوات نفسانیه نك منبعی اولان وقوه غضبیه دنیلان اوچنجی روحك قرار کاهی قلبدر وروح جسمدن آیرلدیغی زمان دنیاده حسن حال تحصیل ایتش ایسه سعادتیه نائل وسوء حالده بولنش ایسه اولکی موجودیتی تذکر ایده مامك اوزره دیکر بر وجوده دهها داخل اولور دیدیکنه نظراً تناسخ ارواحه قائل اولمقدن عبارت ایدی هله قادیئر مشرک قوللانلیدر واصل اولان چوجقئر بابالرینی بیلیوب کندولرینی حکمداره وقف بیلیدر دیمی غرائب احوالدن ایدی .

وفاتی ( ۵۲۴۷ خ ) تاریخنده یعنی میلادك اوچپوز قرق یدی سنه مقدمنده در .

§

﴿ اقامیم ثلثه ﴾ — اکثر نصارانك اعتقاد ایتدیکی اوچ شیدر . بو بابده قتلکرا ایله اور تودوقسلك اعتقادی ( اعتقاد ) کله سننده ۱ و ۲ نمرورده مقید اولدیغندن اوراره مراجعت ایجاب ایدر . اقامیم ثلثه نامه اولهرق هر سنه پاسقالیه دن الی کون صکره کلان ایلك بازار کونی بر یورطنی طوتلمده در .

§

﴿ اقبابان ﴾ — همدان شهرینك نام یونانیسیدر بوشهر بحر حزرک جنوب غریسنده و ( الوند ) طاغنگ اتکنده ( مدیا ) حکومتنی ثانیاً احیا ایدن مشهور ( کیقباد ) معرفتیه یابیش و ( ۵۰۳۳ خ ) تاریخنده یعنی میلادك بشیوز التمش برسنه مقدمنده کینسروك و مؤخرأ دهها برچوق حکمدارلرک ید استیلاسنه کچوب پای تخت وصیفیه اتخاذاولنش ایسهده ( سلوسید ) لرک انه کچدکنصکره خرابه یوز طوتوب آز زمان ایچنده یری بیلمز درجهده خراب و نابود اولمشر .

اشبو همدان شهری یدی قات سور ایله محاط وهرسوری ایچنه طوغری بر برندن یوکسک والک اورته سنده برسرای عالی وسورلرک هر بری برنکده بو یالی اولدیغندن و اوق مازغالری بر برینک اوستندن ایشلیه ییلور صورتده یابلدیغندن کیروندن منظره سی غایت لطیف ومهییب ایدی . بونک فراغه

مصریه دن بری معرفتیه یابدیغی دخی مرویدر . شمعی نفوسی قرق  
 بیک تخمین اولنقده در . یمن ولایتندہ ( اہما ) قائمقاملغی داخلندہ مسکون  
 قبیلہ لردن برقبیلہ نک اسمی دخی ( ہمدان ) در .

§

﴿ آق بیق ﴾ — حاجی بیرام ولی اصحابندن و کبار اولیاء اللہندن  
 برداتدر . بو ذات اثنای سلوکنندہ آرزوی ثروت و غنایہ مبتلا اولوب  
 کیفیتی شیخی مشارالیہ افادہ و غناسیچون دعا نیاز ایلدکده مشارالیہ صورت  
 انفعال کوستردیکندن شیخیم بکا کوچندی دیہرک کمال حجاب ایله حضورندن  
 چیقارکن باشندہ کی عمامہ یرہ دوشدی و اندن صکرہ بردها باشنہ برشیء  
 کیمیوب وفاتنہ قدر آچیق باش اوله رق کزدی و بسبلی شیخ مشارالیہک  
 دعاسی برکاتیلہ اولمیدر که از وقت ایچندہ پک چوق ثروته نائل  
 اولوب فقط واصل اولدیغی درجات عالیہ کوکلندہ اچہ یه بوغچہ یه آرزو  
 براقدیغندن هر طرفدن هجوم ایدن التونلر و هدیه لر خانه سنک رافلرندہ  
 حجره لرندہ و مندر و یاصدق التلرندہ رغبتسز برحالده قالدی .

فاتح استانبول سلطان ( محمد ثانی ) حضرتلری استانبول فتحنه کلورکن  
 ( آق بیق ) سلطان و امثالی برقاچ ذاتی دخی برابر کتورمش و دعا و نیازلرندن  
 فائده کلیہ حاصل اولمش ایدی . وفاتی ( ۱۴۵۴ م و ۸۵۸ هـ ) تاریخندن  
 صکرجه و قبری بروسده در .

§

﴿ آق پیکار ﴾ — اناطولیده قوجه طاغندن کلور و قزل ایرماغه  
 دو کیلور برنہردر

§

﴿ اچہ ﴾ — بردنک کوش سکه دیمکدر . سلطان ( اورخان )  
 غازی حضرتلری زمانندہ او زان و اکیال و عیاره قرار و یرلیدی صرہده  
 طقسان عیارینه معادل بردرهم کوشک ضرب اولنان درتندہ برجزؤنہ دخی  
 اچہ تسمیه اولندی و صکرہ برمدت اوچ اچہ بردرهم اعتبار اولنوب دها  
 صکرہ وزنی تخفیف ایلدی .

§

﴿ آق حصار ﴾ — ایدین ولایتندہ تابع صاروخان سنجاغی داخلندہ

وازميرك يوز ايكي كيلومتر و شرق شماليسنده بر قضا مركزيدر و بورانك وقتيله شمديدن زياده معمور بر شهر اولديغي برنجي درجه ده يابلاش كاي سالرك موجوديتيله ثابتدر . ( سن پتروس ) لك بورا اهاليسنه مخصوصاً بر رساله كوندرديكي دخي بعض توارينخده كوريله يور .

ازميدك جهت جنوبيسنده و اون بش ساعت بعدنده و كيوه داخلنده بر قصبه نك . و تروانك سنجاخي داخلنده بر قضا مركزينك اسمي دخي ( آق حصار ) در و اوخر يده دخي ( الحقه حصار ) نامنده بر قضا وارددر .

§

﴿ اقسراي ﴾ — نيكده سنجاغنه تابع نوشهر قضا سنك جنوب

غربيسنده و قونيه نك شمال شرقيسنده و التمش ميل بعدنده بر قضا مركزيدر .

بوشهر ك متين بر قلعه سي و كوزل بغيچه لري و بيوك بر طوزله كولي وارددر .

اشبو كولدن حاصل اولان طوزك همان اناطولي بي اداره يه كفايتي تخمين

اولتمقده در . . . بوشهر ي ( ۱۲۰۲ م و ۵۹۹ هـ ) تاريخنده ( عز الدين قليچ

ارسلان بن مسعود سلچوق ) اعمار ايتدي و ( ۱۳۹۰ م و ۷۹۳ هـ ) تاريخنده

سلطان ( يلديرم بايزيد ) خان حضرتلري ضبط ايلدي و ( ۱۴۶۷ م

و ۸۷۲ هـ ) تاريخنده فاتح سلطان ( محمد ثاني ) حضرتلري قرمان ولايتي

اهاليسني تاديب و ولايت مذ كوره يي اميري قرمان اوغلي يدندن نزع

ايلديكي صره ده شهر مذ كوردن دخي بر چوق اصناف كتوردوب

در سعادت اليوم اقسراي دنيلان محله يه اسكان ايلدي .

§

﴿ اقسنغر ﴾ — ( سنغر ) كله سنه نظر بيوريله .

§

﴿ اقسيسوس ﴾ — اسكوب و كوپر يلي جهتلرندن سلايك كور فزينه

اينوب سلايك شهرينك ساحل غربيسنده بحره منصب اولان ( واردار )

نهرينك نام عتيقيدر .

§

﴿ آق شمس الدين ﴾ — حاجي بيرام ولي خلفاسندن و ككبار

اولياء الله بدن بر ذاتدر و اصلي بكپياز اريددر . شينخي مشار اليه وفات

ایتد کدنصکره انقره دن (کونیک) قصبه سنه هجرت بیورمشیدی قصبه مذکوره ده ارشاد عبادله مشغول اولان ینه حاجی بیرام ولی خلفاسندن قطب الزمان (عمرالسکینی) حضرتلرینک مریدلری زیاده وتوجهلری مؤثر اولدیغندن آق شمس الدین حضرتلری عمرالسکینی حضرتلرینه ارشاددن ممنوعدر واکرواز یکمزومریدلرینی طاغتمز ایسه کلوب تاج وخرقه سی آئنه جقدر دیهرک خبر کوندردیکنندن عمرالسکینی حضرتلری بزآنک آله جنی تاج وخرقه بی کندو الیزله یاقه رز دیهرک چیقاروب آتسه آتدی یاخود ارشاددن ممنوع اولدیغنی اثبات ایچون برآتش یاقدریوب وتاج خرقره سیله برابر ایچنه کیروب برقاچ ساعت اوتوردی مشارالیه وایکی طرفک مریدلری بوحوالی کورمکله اختلاف برطرف اولدی .

طریقت ملامیه بیرامیه ده تاج وخرقه کبی البسه مخصوصه اکتسایسنک ممنوعیتی بووقعه دن طولاییدر . واقعا حاجی بیرام ولی حضرتلری وفات ایتد کدنصکره آق شمس الدین حضرتلری انقره ده پوست نشین اولمشیدی لکن قطیبت عمرالسکینی حضرتلرنده ایدی .

فاتح حضرتلری استانبولک فتحنه قیام ایتدیکی ائنده حاجی بیرام ولی حضرتلرندن دعارجا و طرفلرنین ایکی ذاتک برابر بولمسنی نیاز ایلدیکنندن مشارالیه حضرتلری دخی (آق بیق) سلطان ایله اشبو آق شمس الدین حضرتلرینی کوندرمشدر و اثر دعای سنیه لریله فتح میسر اولدقدنصکره (ایوب الانصاری) حضرتلرینک اولوقته قدر زیر زمینده مستور ومجهول اولان قبر عالیلرینی کشفله بولوب خبر ویرن (آق شمس الدین) حضرتلریدر ووفاتی (۱۴۵۹ م و ۸۶۴ ه) تاریخنده و تربه عالیلری طوبره لی قصبه سنده در عالم وفاصل برذات ایدی علم طبه وقوفی دخی مرویدر .

§

﴿آقشهر﴾ — قونیه ولایتی داخلنده وقونیه شهرینک شمال غریبسنده ویکرمی درت ساعت بعدنده بر قضا مرکزیدر . جوارندن وایچندن مرور ایدن کوچک نهرلر اوج ساعت ایلرو اووه ده شهر کولنه منصب اولمقده ونفوسی التی یدی بیک تخمین اولنمقده در . تیمورلنک سلطان

(یلدیرم بازید) خان حضرتلرینی اسیر ایتدیکی زمان اقشهره کوندردی  
واوراده وفات ایدوب نعشی بروسه یه نقل اولندی . مشار الیهک اقشهره  
برکوزل جامعی و برمکتبی واردر و (سید پیرام) و (سید محمودحیران)  
وصاحب تفسیر شیخ (بابا نعمه الله ننجوانی) و (خواجه نصرالدین)  
حضراتی بوراده مدفوندر .

§

﴿آق صو﴾ — بخارای صغیر قطعہ سننده یعنی ترکستان چینیده  
و کاشغرک شرق شمالیسنده و تخمیناً سکسان ساعت بعدنده برشهردر و قطعہ  
مذکورہ اکثر زمانده چین حکومتی جایه سنده و شهر مزبور قطعہ مزبورہ نک  
مرکز اداره عسکریه سی حکمنده در . بوقطعه مقدا برمدت (قالموق)  
قبیله سی جایه سنه پکوب ( ۱۷۶۰ م و ۱۱۷۴ هـ ) تاریخنده چینلور طرفندن  
ینه استرداد اولمش و برآره لق اهالیسی استقلال داعیه سنه دوشمش ایدی .  
چینلور بوقطعه یه (تیانشان) ولایتی دیرلر . بروسه سنجاغی داخلنده دخی  
(آق صو) قصبه سی واردر

§

﴿آق عنبر﴾ — (عروسه البحر) کله سنه نظر بیور یله .

§

﴿آق قیونلی﴾ — (بایندریه) کله سنه نظر بیور یله .

§

﴿آق کرماز﴾ — هوجه بکک جنوب غریسنده و قرق سکز کیلو  
مترو بعدنده و ساحل بجردن اون یدی کیلو مترو کیروده برشهردر .  
بوشهر برقی اوزرنده و قلعه و لیانی کوزل و نفوسی اون بشیک راده سنده در  
و برچوق طوزله لری واردر . ( ۱۸۲۶ م و ۱۲۴۲ هـ ) تاریخنده بکرش  
معاهده سنی تقویه ایچون امضا اولنان معاهده نامه بوراده یاپلیدی ایسه ده  
روسیه دولتی ایکی سنه صکره آق کرمان معاهده سی اجرا اولندی دیهرک  
بهانه بولوب نقض عهد ایلشدر . (آنکیرمان) بشقه در .

§

﴿آقایدیس﴾ — قدمای ریاضیوندندر . بوذات ( ۵۲۷۴ خ )  
تاریخنده یعنی میلادک اوچویوز یکر می سنه مقدمنده اسکندر یه ده ریاضیات

خواجہ لکی ایتدی ومصر حکمداری (لاکوس) درسندہ بولندی .  
 موحی الہک علوم ریاضیہ دہ دائر اون بش مقالہ یی جامع قلمہ آلدیغی  
 کتابدہ محرر اولان (ہندسہ) بحشی الیوم اساس فن اولہرق اوروپادہ  
 تدریس اولتقدہ در وموسیقی بختدہ اصواتک آہنکنی تعریف یولندہ  
 بر مقدمہ سی واردر اشکال ذو کثیرہ الاضلاعک تقسیماتی مبین دیگر  
 بر تالیفی دخی ایشیدلمشدر ومجموع تالیفاتی (۱۸۱۴ م و ۱۲۳۰ م) تاریخلرنده  
 ودہا صکرہ لری فرانسزجہ یہ ترجمہ واوچ جلد اولہرق طبع اولنمشدر .

§

﴿ آق مسجد ﴾ — قریمدہ (سبالغیر) نہری اوزرنده وایکی طاغ  
 آرہسندہ اون بیک نفوسی جامع بر کوزل شہردر . جوارندہ مؤخرأ تأسیس اولنان  
 شہر دخی منتظم اولوب بوندہ برقرال سرابی ووالی قوناغی وکلیسا واردر  
 (آق مسجد) (۱۷۹۱ م و ۱۲۰۶ هـ) تاریخندہ سائر قریم ممالکیلہ برابر دولت  
 علیہ دن روسیہ یہ انتقال ایلدی . بر آق مسجد دخی ترکستان روسیہ وار .

§

﴿ آقنوم ﴾ — قونہ نك نام عتیقیدر .

§

﴿ اکبرہ ﴾ — یاخود (اکرہ) — ہندستاندہ انکلترہ دولتی  
 مستملکاتندن بریالتک اسمیدر . بوراسی (جلال الدین اکبر) زمانندہ  
 یاپلیدیغندن اولوقت بونامی آلوب صکرہ مغولرہ کچدکدہ (اکرہ)  
 وانکلیرزہ انتقالندہ (آغرہ) دینلشدر . (جلال الدین) کلمہ سنہ نظر  
 بیوریلہ .

§

﴿ اکردير ﴾ — حید سنجاغی داخلدہ واسپارتہ شہرینک التی ساعت  
 بعدندہ بر قضا مرکزیدر وجنوبدن شمالہ طوغری طولی درت بچق  
 وعرضی اوچ مرحلہ دن عبارت اولان اکردير کولی پک کوزل ومشهوردر  
 ودرونندہ ایکی عدد کوچک اطہ وسواخلندہ باغلر وکویلر واردر  
 وقصبہ نك نفوسی ایکی یک درتیوز تخمین اولتقدہ در . کولک درینلکی  
 اون ذراعہ بالغ اولور دیرلر وصوینی وبالغنی ثنا ایدرلر . اکردير

براطه اوزرنده مبنی وسور ایله محاط اولدیغندن تیمورلنک ضبط ایده ماهش  
ایدی .

§

﴿ اگری ﴾ — اوستریا بمالکندن بر قضا مرکزیدر وقلعه سی غایت  
متین و مستحکمدر . بوراسنی ( ۱۵۹۶ م و ۱۰۰۵ ه ) تاریخنده سلطان  
( محمد ثالث ) حضرتلری فتح ایتدی و اوستریا لولرک ایلروده کی  
( خطوان ) قلعه سنی استرداد و دروونده اولان اهالی و عسا کر اسلامیه یه  
ابتدا رخصت و یروب صکره کاملاً اعدام ایتسنه بناءً سلطان مشار الیه  
دخی اشبواگری قلعه سنده بولنان اوستریا لولری کافهً اعدام ایتدیردی .  
اگری دولت عثمانیه ده ایکن بر ایالت مرکزی و ( سکدین ) و ( صوتلق )  
و ( خطوان ) و ( فلک ) قلعه لری ملحق سنجاقلری ایدی .

§

﴿ اگری قپولی ﴾ — محمد افندی نامنده بر خطاطک شهرتیدر . بو  
ذات استانبولده منلا عشقی محله سی امامی یوسف افدینک اوغلی اولوب  
( ۱۷۵۵ م و ۱۱۶۹ ه ) تاریخنده وفات ایتش و اگری قپو خارجنه دفن  
اولمشدر . براز شعری دخی وار ایدی .

§

﴿ اکسانتریق ﴾ — بری دیکری داخنده اولدیغی حالده مرکزی  
بر برینه منطبق اولیان ایکی دائرة ویا ایکی کره یه تعبیر اولنور بو ترتیب  
فن ماکنده بر حرکت مستدیره یی حرکت مستقیمه متناوبه یه تحویل ایچون  
قوللانیلور وکاه دائرة وکاه یورک منحنیسی وکاه مثلث شکلنده یاپیلور .

§

﴿ اکسیر ﴾ — مقدا غایت اعتنا ایله بر ویا برقاج اجسام دوایئه  
منتخبه دن اخراج اولنان ادویه یه اطلاق ایدر لر ایدی مؤخر اجمع مستحضرات  
طبییه یه اطلاق اولندی . کیمیا کرلر کوش و باقر اوزرینه آتدیغی  
حالده آلتونه تحویل ایدر زعم ایتدکلی برده نه اکسیر دیرلر و بو اکسیری  
یایمق ایچون درلو عملرله اوغراشورلر بو اکسیرک اجزای اصلیه سی کویا  
حجر الفلاسفه دیدکاری بر معدن ایش .

§



﴿ اکیلل ﴾ — بونام مقدما ملوئک مجوهرله مزین صارقرینه و بعضاً قادیئرک مزین خوتوسلرینه ودها اول یونان آلهرلرینک تزیناتنه مخصوص ایکن مؤخرأ پادشاهلرک باشلرینه کیدکلری مرصع تاجلره تخصیص اولمشدر الیوم خرسیتیان پاپاسلرینک عقدنکاح ایدرکن کلین ایله کوکینک باشنه قویدکلری چیچکللی یالدرلی زینت دخی ( اکیلل ) دیمکدر .

اهل هیئت اصطلاحنده منازل قردن اون یدنچی ثنائیه وایکنجی یمانیه منزله لرینه وکواکب ثابته صورتده ایکی یلدرزه و علم نباتات اصطلاحندن نباتات بجهریه دن فرانسزلرک ( رومادین ) دیدکلری نباته ولاتینلرک ( ملیلونوس ) دیدکلری اوته دخی ( اکیلل الجبل ) و ( اکیلل الملک ) دیرلر .

§

﴿ آکوم ﴾ — المانیا کیمیا کرلرندن بر معروف ذاتدر . بوذات ( ۱۸۰۳ م و ۱۲۱۷ هـ ) تاریخنده لوندریه کیدوب اوراده حکمت طبیعیه و کیمیا خواجه لکی ایدرکن مولدالماء دنیلان غازک اشتعالنی برنجی دفعه اوله رق کشف ایتشدر .

§

﴿ آکیلله ﴾ — ترسته نك شمال غریبسنده و اوتوز سکز کیلو مترو بعدنده برشهردر . بو شهر مقدما پک جسمیم و معمور اولدیغندن ایکنجی روما نامیله شهرت بولمش ایلی .

§

﴿ آلاریق ﴾ — یاخود ( آلاریس ) — وقتیله اوروپایی زیروزبر ایدن ( وریغوت ) طائفه و حشیه سنک رئیس یاخود قرالیدر . بو قهرمان ابتدا ( تراسیا ) و ( ما کدونیا ) و ( یونانستان ) ممالکنی اوروب خراب و مستوفی عسکر ایله قارشوسنه چیقان روما شرق ایمپراطورینی مغلوب و بی تاب ایتدکدنصکره ( ۴۰۹ م ) تاریخنده اوروپانک غرب طرفنه کچوب درت سنه ظرفنده غوللری دخی پریشان ایتدی و کندوسنه عرض انقیاد ایدن بتون غول ممالکنده برقرالیت تشکیل ایلدی و بو استیلا و تشکیلات غضب ممالک دیمک اولدیغندن روما دولتینک نفوذ و اقتسدارینه کرکی کبی نقیصه کتوردی لکن مرقوم دخی بومظفریتندن صکره برسنه دن زیاده یشامدی .

§

﴿لاستيقیت﴾ — حکمت طبیعیه ده جسمک شکلرینی تعدیل ایدن

بر تضییق قوتک او جسملر اوزرندن رفضده ینه اولکی شکلرینه رجوع ایتلمی خاصه سنه دنیلور و خاصه مزبورہ الزیاده غازلرہ بولندیغندن غازلرہ اجسام الاستیقیه ده تعبیر اولنور صلب و مایع جسملرہ ایسه الاستیقیت پک جزیدر مواد نباتیه دن لاستیق دنیلان شیک (قوه الاستیقیه) سی مشهور اولدیغی کبی مواد معدنیه دن چلیکک (قوه الاستیقیه) سی دخی معروفدر بناء علیه عموم یایلر چلیکدن اعمال اولنور .

§

﴿آلاشهر﴾ — مغنیسا سنجاغی داخلنده و مغنیسانک جهت شرقیسنده

ویکرمی درت ساعت بعدنده بر کوزل شهردر . بوراسی مقدا برغہ قرالی ایکنجی (آتال) معرفتیه انشا اولنوب (فیلادلی) نامیله شهرت بولشیدی صکره (یلدیرم بازید) خان حضرتلری (۱۳۹۱ م و ۷۹۴ هـ) تاریخنده کیدوب استانبول ایمپراطوری طرفندن معاونت ضمنده کلان روم عسکری یدیه فتح و بلاد عثمانیه الحاق ایلدی . بو محاربه ده عساکر اسلامیه کیرودن سیر ایدوب برتفنگ یله آتامشدر . شهر مذکورک نفوسی شمعی طقوز بیک راده سنده ایسه ده مغنیسا شمندوفری اولکی سنه اورایه قدر تمدید اولمش اولدیغندن بوندن صکره ده زیاده معهور اوله جنی شبهه سزدر بوراده آثار و انقاض عتیقه چوقدر و جامع و مدارس و تکایاسی کثیردر .

§

﴿آلاطاغ﴾ — قونیه ده خادم جوارنده برشهردر و موقعی طاغلق

اولدیغندن پک چوق کچی یتشدیرلمکده در بالی دخی اعلادر .

§

﴿آلاغانی﴾ — آمریقای شمالیده و جاهیر متفقہ اراضیسنک جانب

شرقیسنده بر بیوک سلسله جبالدر و بوسلسله دنیاده موجود اولان سلسله لرک اک بیوکیدر . (آلامابه) و (ژورجی) نهرلری حدودندن (سن لورن) نهری منصبنه قدر طولی یوز سکسان میریا مترو تخمین اولنیور .

§

﴿آلاقصر﴾ — (تب) کله سنه نظر بیوریله .

§

﴿الانداطه سی﴾ — بحر بالطقه بونتی کورفری آغزنده بر اطه در  
بوراسی مقدا اسوج دولتی تصرفنده ایکن (۱۸۰۹ م و ۱۲۲۴ ه) تاریخنده  
روسیه اداره سنه کچمش و قرق بش سنه صکره فرانسز لر استیلا ایدوب ینه  
اعاده ایشدر . اهالیسی اون اوچیک تخمین اولنیور .

§

﴿البانی﴾ — طاغلق معناسنه در . اوروپالیر آرنودلغه (البانی)  
دیدکاری کبی مقدا شیروان ایله برابر طاغستانه دخی (البانی) دیرلر ایدی  
(آرنود) و (طاغستان) کله لرینه نظر بیوریه .

§

﴿الب ارسلان﴾ — ملوک سلاچقه دن بر مشهور ذاتدر . بو ذات  
پدری سلطان (طغرل) طرفندن خراسان والیسی ایکن پدرینک (ری) ده وفات  
ایدوب یرینه قرن داشی سلیمان شاه جلوس ایلدیکنی خبر آلدیغی کبی مستوفی  
عسکر ایله کیدوب قرن داشی مومی الیهی خراباً اخذ و احناق ایدرک تخته  
اوتوردی و اناطولیده استقلال داعیه سنه دوشن عمی زاده سی (قتلمش) ک  
غالبه سنی دخی بتورد کدن صکره کر جستانده واقع مشهور (آنی) قلعه سنی  
کیتلو تفتالته آلدی و آسیای وسطاده کی حکومت صغیره ننگ کینی خراباً  
و کینی صلحاً و کینی دخی صهریت پیدا ایدرک ارثاً آلوب پک چوق شهرت  
قرانندی و بغدادده کی خلیفه (قائم بامر الله) ک اختلالات داخله دن  
صیقیلوب استمداد ایلدی اوزرینه آنی دخی جایه ایلدیکندن خلیفه مشارالیه بالجمله  
ممالک عباسیه ننگ اداره مادیه سنی کندیسنه تودیع ایلدی و یونان ایمپراطوری  
(رومن) (۱۰۶۹ م و ۴۶۲ ه) تاریخنده فرانقلردن و کر جیلردن آلدیغی  
عسا کر معاونه ایله برابر ایکیوز بیک کشیلک براردو ایله ارض مردن اوزرینه  
یوریدیکنی مشارالیه پای تختندن بعید بر محله حربله مشغول ایکن خبر آلدیغی  
کبی یاننده کی عسکرک یکر می بیک کشیدن عبارت بولنسی جهتیله عقلی باشندن  
کیدوب ناچار حاضر یله مقابله یه مجبور اولدی و بو حال نومیدی ایله ایتدیکی  
ایلك جمله ده محاربه بی قرانندی و ایمپراطوری طوتوب ینه عفو و اطلاق  
ایلدی . (مشارالیهک بوغو غایه کیررکن طپراقر اوستنه قپانه رق ایتدیکی  
تضرع و نیاز و عسکره و ردیکی دستقور ایله مأیوسانه وفدا کارانه هجوم قومانداسی

تفصیل اولنمش اولسه طاقت کتوریلورشی ءدکدر) مشارالیه محاربه مذکورہ دن  
 اوچ سنہ صکرہ ماوراءالنہرہ بر محلده محاربه ایدرکن اولجه کوجندیرمش  
 اولدیغی بر یوک ضابطک غدیرله شهید اولوب یرینه اوغلی مشهور (ماکشاه)  
 جلوس ایلشدر . الب ارسلان ابدأ نفاق سومز و عبادات و طاعاتی ترک ایتمز  
 جیدالخصال بر صاحب جلال ایدی . تحصیل علوم ایچون مدرسه انشاسنی  
 ابتدا بوذات در خاطر ایتش و نیشا بورده غایت منتظم بر مدرسه یاپدر مشدر  
 مدت سلنتی اون سنہ .

§

﴿الب تکین﴾ — بوذات بر ترکان اسیری ایکن ملوک سامانیہ طرفندن  
 خراسان والیسی اولدی و (۹۶۰ م و ۳۴۹ هـ) تاریخنده عصیان و اون یدی  
 سنہ صکرہ (غزنه) بی ضبط ایدوب بر حکومت مستقله تشکیل ایلدی  
 مؤخرأ (آل سبکتکین) دولتنی تشکیل ایدن (سبکتکین) بونک غلام  
 و دامادیدر . (سبکتکین) کله سنہ نظر بیوریله .

§

﴿البرز﴾ — ایرانک حدود شمالیسی بوینجه شرقدن غربه طوغری  
 امتداد ایدن و شرقده (کوه بابا) و غربده (طوروس) سلسله لیله کسب  
 اتصال ایلان سلسله جسمه نک اسمیدر اک یوکسک محلی زروه سندن آتش  
 صاچان (دماوند) تپه سیدر . قفقاسیه سلسله مشهوره سنک غرب قسمده  
 سطح بچردن بشیک التي یوز التمش مترو ارتفاعی اولان مرتفع بر تپه نک  
 اسمی دخی (البرز) در .

§

﴿الہستان﴾ — حلب ولایتی داخلنده و مرعشک جهت شمالیسنده  
 بر قضا مرکزیدر . بو شهر میلاس یعنی جهان نہری اوزرنده التي یدی  
 بیک نفوسی جامع بر کوزل شهر اولوب فقط اولکی معموریتنه نسبتله شمعی  
 خراب حکمنده در . زیر اوقتیله بوراده اولان بر معبد مشهورده التي بیک کهنه یه  
 حکم ایدن رئیس الکهنه اوتورر و بو رئیس لر قبادوقیا حکمدار لری متعلقاتندن  
 اولور ایدی .

§

﴿الب طاغی﴾ — اوروپانک اک یوک سلسله جبالیدر بو طاغ فرانسه

ایله ایتالیا ممالکی آره سنده واقع اولوب درت بیک سکز یوز اون مترو ارتفاعنده اولان ال مرتفع محلی (آیستین) دنیلان قسمنده در . فرانسرلر مقدا (سن پلو) ایله (ثنی) آره سندن ایتالیا یه بر کوزل یول آچشیر ایدی .

§

﴿التون﴾ — معادنك كاهه سندن عزیز و قیمتلو بر معدنر وثقلت اضافیه سی (۱۹۰۵) در ویک ایکویز درجه حرارتده مذا بندر وقوه تطرقیه و انجراریه سی بالجمله معادنن زیاده اولدیغندن بر (عشر معشار) زراع اعشاری ثخننده ورق حالنه کتور یله ییلور و غایت یومشاق اولدیغندن سکه ضرب چون بر مقدار باقر قارش دیر ییلور . آلتون قطعات خسه ارضك بر چوق یرلنده و خصوصیه آمریقا ده قالیقور نیاده و اوسترالییا قطعده سنده و روسیه ده اورال طاغر ننده و ممالک عثمانیه نك بیغا سنجاغنده واقع سرچیلر نام محله و سلانیک حوالیسنده کوچك دانه و پولار شککنده و یاخود کوش و قورشون و باقر ایله مخلوط اوله رق بولنمده و چوق کسه لر تحریسیله اشتغال و تعیش ایتکده در آلتونی حاوی اولان قوم و تراب دقتله غسل و قوم و ترابک زیاده سی دفع اولندقدن صکره آلتوننک تخمیناً التی مثلی جیوه وضعیله تحریک اولنور ایسه آلتونی آریلور و اکر آلتون کوش و باقر و سائر هنی حاوی اولور ایسه پیلانته دن معمول قابل دروننده کسکین حامض کبریت یعنی (تیراب) ایله تغلیه اولنور و اثنای تغلیه ده اجسام سائر تیراب ایله امتزاج ایدوب فقط آلتون ترسب ایتکله اخذ و استعمال ایدیلور .

ثقلت اضافیه سی اون طقوز دیمک مساوی جمده کی آلتون صودن اون طقوز قات آغر دیمکدر . آلتونک عیاری مقدا یکر می درت ایکن مؤخرأ بیک اعتبار اولنمشدر بوندن نقدر نقصان سویلنور ایسه اون نقصان مواد سائر دیمک اولور . کوشک شمیدیکی عیاری دخی یوزدر .

§

﴿الجزیره﴾ یاخود (عراق عرب) — آسیاده دجله نهریله فرات نهری آره سنده واقع اراضی جسمیه نك اسمیدر که نهرین مذکور نك التقا ایلدیکی محله قدر متمد اولور و (رقه) و (موصل) و (سنجار) و (دیار بکر)

و (بغداد) سنجاقری اراضیء مذکوره داخلند بولنور . بو اراضیده  
 چیقان التون معدنلری و اورمانلر و قتیله غایت مشهور و طپراغی مثبت ایدی .  
 آثوریلرک برنجی و ایکنجی سلالهء حکمرانیسی بوراده پک چوق زمان حکومت  
 سوردی و صکره اسکندر رومی و ایران و سوریه حکمدارلری و روما  
 و پارتیا دولترلی اداره سنه کچوب دها صکره سلطنت اسلامیه جانبدن  
 فتح اولندی و برمدت امویلر و عباسیلر و برآرهلر ق ایرانیلر و مغوللر و (۱۴۰۰م  
 و ۸۰۳ هـ) تاریخنه طوغری تیموریلر و برعصر صکره دور سلطان (سلیمان)  
 خانیده دولت علیه تصرف ایلدی .  
 بو اراضیه (مزوپوتامیا) دخی دیرلر . اندلسده دخی (الجزیره) نامنده  
 بر محل وار ایدی .

§

﴿ الرقوس ﴾ — اندلسده یکی قستلده (فلاتراوه) جووارنده اهمیتلی  
 بر موقعدر . قستل قرالی طقوزنجی (الفونس) (۱۱۹۴ م و ۵۹۱ هـ)  
 تاریخنده اندلس و مغرب پادشاهی مشهور (منصور یعقوب) ایله بوراده  
 محاربه ایدوب فنا حالده مغلوب اولمش و عربلر بو محاربه نه (محاربه الرقوس)  
 نامنی ویرمش ایدی . فرانسلر و اسپانیوللر نام مذکوری تحریف ایدرک  
 الیوم (آلارغوس) یا خود (اراکه) دیمکده درلر .

§

﴿ الساس ﴾ — پروسیا ممالکی داخلند بر سنجاق اسمیدر . بو سنجاق  
 فرانسه قرالردن اون دردنجی (لویی) زماننده فرانسه دولتنه کچوب اشاغی  
 (رن) و یوقاری (رن) ناملریله یاد اولمش و فرانسه قرالی ایکنجی ناپایونک  
 (۱۸۷۱ م و ۱۲۸۷ هـ) تاریخنده پروسیا دولتی علیه آچدیغی محاربه  
 نتیجه سنده کی مغلوبیتی اوزرینه (لورن) سنجاغیله برابر پروسیا دولتنه  
 انتقال ایشدر . لواء مزبورک اهاالیسی برملیون بشیوز بیک تخمین اولنیور  
 اک معمور شهرلری (استراز بورغ) و (مچ) شهرلیدر .

§

﴿ السییاد ﴾ — آننه جنراللرندندر . بو ذات (۱۴۴ خ)  
 تاریخنده یعنی میلادک درتیوز الی سنه مقدمنده دنیا به کلوب ایچمه تحصیل

علوم ایتدکدن و جزاللقده براز شهرت بولدقدنصرکه رئیس جمهور اولان عیسنه خلف اولمق سوداسنه دوشوب (پلوپوئیس) محاربه سی اثاسنده آتته لولری سچیلیایی استیلایه تشویق ایتدی و بو خدمتی ایفایه ارزوسی وجهله کندوسی مأمور اولدیسه ده موفق اوله میوب بالعکس آتته بی تهلکه یه دوشوردیکندن غیاباً دینسز لکنه و خائس لکنه حکم اولنوب املاک و اموالی مصادره اولندی و مرقوم دخی حکم مذکور ی ایشتیکی کبی ابتدا اسپارت جمهوریتنه و اورادن ایران دولتنه التجا ایدوب وطنی علیه تشویقاته باشلادی . اشبو السییاد حال شبانده دنیا یه امشالی کلامش صورته بر محبوب اولدیغندن کورنر حیران اولماق ممکن دکلی ایدی لکن صکره بعض فضائلی و گاه رزائلی جامع چرکین بر حریف اولدی . بوسنیور ایرانه او کوزلک زماننده کتدی ایسه کوزل قبول اولنش ظن اولنور .

§

﴿ الطای ﴾ — روسیه ممالکیله چین ممالکی بیننده برسلسله جبالدر . بوسلسله بی مقدا ایکی یه تقسیم ایدوب بولک الطای و کوچک الطای ناملریله یاد ایدر لر ایدی احاطه ایتدیکی محلاک مساحه سی تربیعاً قرق بیسک میله بالغ اولور .

§

﴿ العَبْک ﴾ — ترکستان و خراسان حکمداری تیمور زاده (شاهرخ) ک اوغلی و خلفیدر . بو ذات پدرینک حیاتنده خیلی زمان خراسان والیلکی ایدوب ( ۱۴۴۶ م و ۸۵۰ هـ ) تاریخنده پدرینک وفاتی جهتیله تحت موروثنه جلوس ایلدیسه ده ایکی سنه صکره خراسان والیسی تعیین ایتدیکی اوغلی عبد اللطیف ایله بوزیشوب وقوعبولان محاربه ده مغلوب اولدی و کال پریشانی ایله سمرقنده عودتنده سمر قند اهاالیسی دخی قبول ایتدیکندن ناچار اوغلی موهی الیه التجا ایلدی و اوغلی خائ دخی بر قاچ کون حرمت و رعایتدن صکره علیه بر دعواجی چیقار دوب کویا حکم شرعی ایله قصاص ایتدیردی لکن بر سنه صکره کندوسی دخی بر فدایی یدیله اعدام اولنوب ایتدیکنی بولدی .

اشبو (الغبک) سمر قندده بر مکمل مدرسه و برر صدخانه یاپدیرمش و معارفندان

عصر دن (غیاث الدین جمشید) و (قاضی زاده) و (مولانا علی قوشچی) کبی ذوات رصد خانہ مذکورہ تعلیم و آرائہ فنون ایتمش و الیوم دستور العمل اولان (الغربک) زیجی مومی الیہک اثر اہمیتلہ تنظیم اولنمشدر .

§

﴿الفرد﴾ — انکلترہ قرالرنندن بیوک (آلفرد) (۸۸۳ م و ۲۷۰ ھ) تاریخندہ بریتانیا جزیرہسنہ صوقلمش اولان (روماند) لری حرباً و تدریجاً طرد ایدرک اولجہ بردر جہیہ قدر جایہ التہ النان بریتانیا حکومات صغیرہ سنی توحیدہ موفق اولدی و خارجدن برچوق علما و ارباب فنون کتوردوب و مکتبلر انشا و قانونلر تنظیم ایتدیروب اہالی بی ایچہ جہالتدن قورتاردی .

§

﴿القیہ﴾ — قواعد علوم عربیہ بی جامع تنظیم اولنان متون شعریہ یہ ویرلمش برنامدر واک مشهوری شیخ جلال الدین محمد بن مالکک فن نحوہ تنظیم ایتدیکی (القیہ ابن مالک) درکہ حاوی اولدیغی بیک عدد بیتدن مقاصد عربیہ تماماً معلوم اولور و اوزرینہ یاییلان شروح کثیرہ مطالعہ اولنشدیغی حالده مومی الیہک درجہ کمال و مہارتی آکلاشیلور (۱۲۳۰ م ۶۲۸ ھ) تاریخندہ وفات ایدن یحیی بن عبد المعطینک اولجہ ینہ فن نحوہ تنظیم ایتدیکی (القیہ ابن معطی) دخی کوزلدرو بیک چوق شرحلری واردر و (۱۴۰۳ م و ۸۰۶ ھ) تاریخندہ وفات ایدن عبد الرحیم بن حسین العراقینک اصول حدیثہ و شیخ ابن الوردینک فن تعبیرہ و بقابقی نک فن معانی و بیانہ و حافظ سیوطینک فنون نحو و تصریف و خطہ و ابن البرماونیک علم فقہہ و ابن شحنے الحلینک فرائضہ دائر تنظیم ایتدیکی القیہ لر ایلہ ابو بکر الاربیلینک بیک لغزی جامع القیہ سی مقبول و معتبر کتابلردر .

§

﴿الف لیلة و لیلۃ﴾ — دنیادہ الک مشهور اولان حکایات عربیہ بی جامع برکتابدر . فرنکر سفاهتہ دائر اولان فقرہ لرینی طی ایدہرک یکیدن ترتیب و (لیال العربیہ) تسمیہ ایلدیلر و عجملر دخی لسان فارسی یہ ترجمہ ایدوب (افسان) دیدیلر .

اشبو کتابک اندلس علماسندن امام العلامہ (ابن مالک) حضرتلزی معرفتیلہ



تألیف اولندیغی بعض تواریخده مسطور ایسه ده قوتلی دکلدیر و هارون الرشید زماندن صکره جه تألیف اولندیغی بعض دلائل ایله اثبات ایتک استیانلرده واردر .

§

﴿ الفونس ﴾ — اسپانیا و پورتیکیر قرالارندن برچوق ذواتک اسمیدر . اسپانیاده ( استوریش ) قرالی برنجی ( الفونس ) ( ۷۳۹ م و ۱۲۲ هـ ) تاریخده جلوس و بربریلره غلبه ایدوب اوتوز قدر شهرلینی آلدی و ایکنجی ( الفونس ) ( ۷۹۱ م و ۱۷۵ هـ ) تاریخده اسپانیا قرالی اولوب اسلامه خیلی خسارو ( لیربون ) ی ضبط ایلدی و ( ۸۳۵ م و ۲۲۰ هـ ) تاریخده مومی الیهک استعفا سی جهتیله برینه یکن بیوک الفونس ( لیون ) مالکنی کندو ملکته علاوه ایلدیسه ده اوغلی ( غارثی ) نک چیقاردیغی اختلاله غلبه ایده میوب سلطنتی ترکه مجبور اولدی و پورتیکیر قرالی برنجی الفونس ابتدا پدری کبی پورتیکیر قونتی ایکن ( ۱۱۳۸ م و ۵۳۳ هـ ) تاریخده اسلامه پک چوق غلبه ایتدیکندن و ( اوریک ) محاربه سنده اسلامک بش حکمدارینی منهزم ایلدیکندن جایه سنده بولندیغی اسپانیا دولتی طرفندن قراللق عنوانی ویرلدی لکن توسیع ممالک طمعیه ایتدیکی بر محاربه ده ( لیون ) قرالنه اسیر دوشوب یته اطلاق اولندی و بشنجی ( الفونس ) دخی ( ۱۲۳۸ م و ۸۴۳ هـ ) تاریخده التی یاشنده تخته جلوس ایدوب بعد البلوغ وصی و عیسی اعدام و افریقه ده برچوق محارباتله اضاعه ایام ایلدی .

پورتیکیر لر ( کینه ) لری بونک زمانده کشف ایشلدر .

§

﴿ الکتریق ﴾ یا خود ( سیاله برقیه ) — ضیا و حرارت مثللو اساساً طبیعیونی بر طاقم فرضیاته دوشورن اشبو سیاله برقیه نک موجودیتی میلاددن التی یوز سنه مقدم صاری کهر باده کوریلان و داک و تماس ایله حصوله کتوریلان جذب فعلیله کشف اولنوب خواص سائرهمی صکره دن یایلان برطاقم تجربه لرله میدانه چیقارلمغه باشلامشدر .

برقاچ نوعدن عبارت اولان الکتریقک برنجی نوعی ثابت و یاموزون دنیلان الکتریقدر و بودخی ایکی قسم اوله رق برینه الکتریق زجاجی و دیگرینه

الکتریک رچنوی دیمشدر والکتریک زجاجیه (مثبت الکتریک) والکتریک رچنوی یه (منفی الکتریک) تعبیر اینشدر در .

الکتریک زجاجی برجامک التنه وبرقاب ایچنه براز (مورور اوزی) قونیلوب جامک اوزرندن برکدی پوستی ایله دلت و تماس ایدلدکده جذب خارجیسندن اوتوری مورور اوزلی صحیرامغه باشلار ورچنوی دخی برپارچه رچنه مذکور پوست ایله دلت ایدیلهرک شاقولا اصلش بر (مورور اوزینه) طوقوندرلدقده دفع خاصه سندن اوتوری مورورک رچنه دن تباعد ایلدیکی کوریلور . وایکنجی نوعی دخی متحرک یاخود سیال دنیلان الکتریک قدر و بودخی سیلانی پک شدید اولان (اسید ازوتیک) ایله (توتیا) وسائر بعض اجسامک امتزاج کیویلرندن حصوله کلور وتلغرافله مخبرات خصوصنده استعمال اولنور .

§

﴿الله آباد﴾ — هندستانده غانج نهریله جناح نهرینک تلاق ایتدیکی محله برشهر شهردر . بونام مقدا اوراده برولایته دخی ویرلشیدی واولوقت بوولایتده یدی ملیون نفوس وار ایدی انکلیرلر (۱۷۷۵ م و ۱۱۸۹ ه) تاریخندن (۱۸۰۳ م و ۱۲۱۸ ه) تاریخنه قدر اورالری استیلاایله درت امارته تقسیم ایتدیلر . الله آباد شهرینک اوچ کیلومتر و ایلروسنده هند حکمدار مشهوری (جلال الدین اکبر) ک (۱۵۸۲ م و ۹۹۰ ه) تاریخنده یاپدیرمش اولدیغی (نور جهان) قلعه سی و مشارالیهک شمال طرفنده اولان تر به سی الیوم موجوددر قلعه مذکور شمعی انکلیرلرک دبویدر و بوشهرده وقیله یوز بیک نفوس بولنور ایکن شمعی یکرهی بیک تخمین اولتمقدهدر .

§

﴿الماس﴾ — اججار ثمیندن وواپور کوری نوعندن برطاشدر . بو طاش (بره زیلیا) ده اون التی فرسخ طول و سکز فرسخ عرضنده (سیرو دومزیو) دنیلان محله و هندستانده (غانی) اوجاقرنده وامید برونی قومصالرنده و (بورنه تئو) اطه سنده وسائر بعض محلرده بولنور . بونک واپور کوری نوعندن اولسی محلیه الهوا فانوسی ایچنده (پرتوسوز)

دنیلان الت واسطه سیله یاقبله بیلسی و یاقلدیغی حالده مائی یه قریب بر  
دومان ظهور ایتسیله ثابتدر \*

الماس چیقار یلان محللرده صره ایله بر چوق حوضلر یاپیلوب ایچنه  
قونان قوملر صو ایله اجرا اولنور و اقرارکن ایچنده کی الماسلر حوضلرک  
مجراسنده موضوع و صفصاف اناچندن مصنوع شیکه لرده قالور \*

§

﴿ آلمانیا ﴾ — ( رین ) نهر یله ( ویستول ) نهری بیننده اولان  
و بحر بالطغه قدر ممتد بولنان ممالک جسمیه نك نام مخصوصیدر . برنجی  
ناپولیون بوناپارطک بر طرف اولان غائله سی عقینده یعنی ( ۱۸۱۵ م و  
۱۲۳۱ هـ ) تاریخنده روسیه و اوستریا و پروسیا دولترینک و یانده  
( معاهده مقدسه ) نامیله عقد ایتد کبری معاهده ایجابجه المانیاده اول  
وقته قدر مستقلاً اداره اولنان دوقه لقر و پرنسلکلرک اوتوز درت عددی  
برلشدریلوب ( متفقۀ المانیایا ) یاخود ( متفقۀ جرمانیایا ) نامی ویرلش  
و پروسیا و اوستریا و فلنک دولتری مستقل بالرأی اولمق اوزره بو اتفاقه  
داخل بولنمش ایدی الی برسنه بو حال اوزره کتدکن صکره اوستریا  
دولتی اتفاق مذکوردن ایرلدیغی کبی پروسیا دخی شمال حکومت صغیره  
و پرنسلک و دوقه لقرینی طوپلایوب ( المانیای شمالی ) نامیله بر حکومت  
اتحادیه تشکیل ایلدی جایه ده اولان ( باویرا ) قرالیتی و ( هس )  
بیوک دوقه لغی و ( ورتمبرغ ) قرالیتی و ( باد ) بیوک دوقه لغی جهت  
جنوبیده در ( ۱۸۷۱ م و ۱۲۸۸ هـ ) تاریخنده پروسیالورک فرانسرله  
غلبه سی مناسبتیله ( الساس ولورن ) ایالتی دخی المانیای شمالی اتحادینه  
یکمشدر . پروسیا کلمه سنه نظر یور یله \*

§

﴿ المریه ﴾ یاخود ( میریه ) — اسپانیاده ( مالقه ) نك جهت  
شرقیسنده و ساحل بحرده بر سنجاق مرکزیدر . بو شهرک وقتیه نفوسی  
یوز یکر می بیك راده سنده و اطرافنده کی باغ و بوستانلرک معموریتی  
و میوه سنک بیوکلی و محصولنک برکتی درجه غایه ده ایدی و دروننده  
کلوب کیدن کار بانلرک و یولجیلرک راحتی ایچون یابلش بیك عدد خان

موجود اولوب بونلرک هيج بر يسندن اجرت النز ایدی . شهر مر بور  
اسپانیا دولتی اداره سنه کچه لی نفوس موجوده سی اون سکز بیک راده سنه  
تنزل آتمشدر .

§

﴿ الموت ﴾ — قزوین ایله رودبار آره سنده بر مستحکم و مشهور  
قلعه در . بوقلعه هجرت نبویه نك بشنجی و التنجی عصر لرنده باطنیه  
وملاحده اسماعیلیه ناملریله ظهور ایدن شرمه زنادقه نك تحضنکاهی  
اولش و بونك ضبیطیله زنادقه مرقومه نك طاغیدلسی ضمنده نیجه یوز بیک  
نفوس مسله جام شهادتی نوش ایتش ایدی . بوقلعه ( ۸۶۸ م و ۲۵۵ هـ )  
تاریخنده یاپیلوب علی روایة ( ۱۱۲۸ م و ۵۲۳ هـ ) ضبط وهدم اولتمشدر .

§

﴿ آلَهَن ﴾ یاخود ( هلن ) — بوذات ( ۴۱۶۰ خ ) تاریخنده  
یعنی میلادک بیک در تیوز اوتوز درت سنه مقدمه تسالیاده ظهور ایدن  
طوفانده یالکز زوجه سنیه قورتلش اولان ( دوقالیون ) ک اوغلی و  
( فوتیودیت ) لک حکمدار یدر .

بونک اوغلی اولان ( کسوتوس ) ک ( اکه اوس ) و ( ایون ) نامنده کی  
اوغلری و دوقالیونک دیگر ایکی اوغلی ممالک یونانیه ده بر بیوک قبیله نك  
رئسی اولدی و بوقبیله لر انلرک ناملریله و بتون اهالی یونانیه ( الهن )  
شهرت بولدی و صکره ( الهن ) نامی ( النینوزه ) تحویل اولندی .

§

﴿ آلَهَمی ﴾ ( شیخ الهمی ) حضرتلری — کبار مشایخ نقشبندیه دندر .  
بوذات مسقط رأسی اولان ( سماو ) ده علوم ظاهره بی تحصیل ایتدکن  
صکره مرشد تحریری ضمنده سمرقنده کیدوب اوراده خواجه ( عبیدالله )  
سمرقندی حضرتلر نك صحبت علیه لریله مشرف اولدی و بعد اكمال  
السلوک وطن اصلیسنه عودت و بر خیلی مدت صکره در سعادت و اندن  
اورانوس زاده اجد بکک تشویقیله یکجه و ارداره عزیمت بیوردی  
واوراده طالب حق اولنلری ارشاده همت آتمکده ایکن ( ۱۴۹۰ م  
و ۸۹۶ هـ ) تاریخنده ارتحال بیوردی . فاتح جوارنده تر به عالیلری

اولان (سیداجد البخاری) حضرتلری مشارلیه ایله برلکده سماوه تشریف  
بیورمش و برقاج سنه برلکده اولمش ایدی .

§

﴿الهیون﴾ — (فلسفه) کله سنه نظر بیوریه .

§

﴿الهه﴾ — اسکی پترستلر هر شینته بر آله وهر آله ایچون بر  
شکل تصور ایدرک خیالی رسملرینی یاپوب آنلره پرستش ایتدکلرندن الهلرک  
عددی برقاج یوزه بالغ اولمش و ایچلرندن اون ایکی عددی بیوک طانمش  
ایدی اشبو بیوک طانیدقری الهلرک کیفیاتی کله لرنده محرر ایسه ده  
جمله سی بردن کورنمک اوزره بورایه دخی درج اولندی . (موز)  
تعبیر ایتدکلری الهلرک بشقه در .

عدد اسامی

سماړك وسائر الهلرک وانسانلرک الهی	ژوبیتر	۱
دکلرک الهی	نبتون	۲
جنک و قتال الهی .	مارس	۳
فصاحت و بلاغت و یغما کران الهی .	مرکور	۴
کونش و صنایع و ادبیات و طب الهی .	آپولون	۵
آتشلرک و ولقانلرک الهی .	وولکن	۶
ارض و حرارت ارض و بیوت الهی .	وستا	۷
نکاحلرک و لحوسه لرک الهه سی .	زونون	۸
عقل و حکمت و صنعت الهه سی .	منه روا	۹
صید و عصمت الهی .	دیان	۱۰
حسن و آن و جمال الهه سی .	وهنوس	۱۱
محصولات الهی .	سرس	۱۲

§

﴿الیاس﴾ علیه السلام — بعلبک اهلینسه مبعوث ابنیای بنی  
اسرائیلندر . بوذات عالیقدر ملوک اسرائیلیه دن (آخاب) ک بعض  
معاملات بارده سی اوزرینه برمدت تنهایه چکیلوب مغاره لرده اختیار انزوا

بیوردی و بومدت ایچنده آرہ صرہ شہرہ اینوب ینہ اوامر الہیہ بی تبلیغ و نصیحتدن کیرو طور مدیسہ دہ قبول ایدر کسہ بولہ مدیغندن بددعا اتمسیلہ اوچ سنہ یغفور کسیلوب صکرہ اہالینک استرحامی و مشار الہیک تضرع و نیازی اوزرینہ جناب حق احسان بیوردی و بردفعہ دخی مرقوم آخاب دوچار اولدیغی خستہ لکدن قورتیلوب قور تلیہ جغنی پرستش ایتدیکی (بعلز بوب) دن خبر المق اوزرہ کوندردیکی آدمہ حضرت الیاس علیہ السلام بر طاع اتکنندہ تصادف و آخازک بوکیدیش ایلہ وفات ایده جکنی افادہ و حریقی اعادہ اتمسی جہتیلہ حریف بالعودہ کیفیتی آخازہ سویلدی آخاز بونصل آدم ایمش دیو سؤال ایلدکدہ حریف اوزون صاحبلی بلندن مشین ایلہ باغلی مہیب بر آدم دیمسیلہ آخاز شمدی یلدم (تسبیتی ایلیسا) یعنی الیاس علیہ السلامدر آنی بکا کتورک دیدی و جلہی ایچون ایکی دفعہ ارسال اولنان عسکر لر صاعقہ اصابتیلہ محترق اولوب اوچنجی دفعہ کوندریلان الہی نفر سوارینک ضابطی رضاسنی تحصیل ایدرک آلدی کتوردی و مشار الیہ آخازک حضورینہ کیردیکی کبی بیحجابا وفات ایده جکنی سویلمسی عقیندہ آخاز وفات ایلدی و مشار الیہ بووقعہ دن صکرہ ینہ طاغہ چیقوب (۴۷۲۵ خ) تاریخندہ یعنی میلادک سکر یوز التمش طقوز سنہ مقدمندہ رفیق حضرت (الیسع) علیہ السلام ایلہ (اردن) نہری کنارینہ اینوب اورادن جناب حقک امر یلہ سماہ رفع بیورلدی و (الیسع) علیہ السلام نبوتلہ بکام و قائم مقام اولدی .

§

﴿الیاسقا﴾ — آمریقای شمالینک جہت غریبسندہ روسیہ آمریقاسی دنیلان مملکتدر اہالیسی (اسکیو) لردر و مرکزی (ارقبانجل) قصبہ سیدر و مملکت مز بورہ روسیہ طرفندن براق زرہلی واپور مقابلی (اتازونی) حکومتنہ ترک اولنمشدر

§

﴿الیاقیم﴾ بن یوسیا — ایکنجی بخت نصر قدس شریفی اوروب یہودی لری بابلہ نفی ایتدیکی زمان قدس شریفہ یہودا ملکی بولنان ذاتدر . فراغندہ مصر یہ دن فرعون اعرج دیدکری (نیخوا) (۴۹۸۵ خ) تاریخندہ

یعنی میلادك التي يوز طقوز سنه مقدمنده آثور یا محار به سندن كلور كن  
 آثور يلرك تحت حايه سننده اولان قدس شريفى حرباً استيلا و حكمدارى  
 بولنان ( ياهو آخاز ) ى خلع و مصره اسرا ايدوب يرينه اشبو ( الياقيم ) ى  
 اجلاس و ممالك يهوديه يي يوز قنطار كموش و برقنطار التون و ير كويه  
 ربط ايشيدى لكن اوچ سنه صكره بخت نصر ينه استرداده موفق اولوب  
 مصر لوره ميال اولان مر قوم الياقيمى و حضرت ( دانيال ) عليه السلامى  
 ودها برچوق معتبرانى بابه كونردى و الياقيم يهودا حكمدار لغى ينه  
 كندوسنه توجيه اولنديغى حالده مرتب اولان و ير كوي اعطا و اطاعت  
 ايده جكنى تعهد ايلديكندن بخت نصر تكرر نصب و ارسال ايلديسه ده  
 برقاچ سنه صكره مصر لوره استناداً بتكرار عصيان ايتديكندن بخت نصر  
 اوچنجى دفعه اوله رق كلوب قدس شريفى فنا حالده اوردى و الياقيمى  
 اخذ و قتل و قرنداشنى نصب ايتدى .

يهوديلرك يمش سنه اسارتى اشبو ( الياقيم ) ك نفيندن يعنى ( ۴۹۸۸ خ )  
 تاريخندن اعتبار اولنور .

الياقيمك اصل اسمى ( يواقيم ) اولديغى حالده مصر حايه سنى قبول ايتدىكى  
 زمان فرعون نيجوا الياقيمه تجويل ايتشيدى .

§

﴿ اليريا ﴾ — ( ايليريا ) كله سنه نظر بيوريه .

§

﴿ اليسع ﴾ عليه السلام — انبياي بنى اسرائيلدندر . ايتدالرى  
 ( الياس ) عليه السلامه رفاقت ايدوب مشار اليهك رفعندن صكره ( ۴۷۲۵ خ )  
 تاريخنده يعنى ميلادك سكر يوز الشمس طقوز سنه مقدمنده رتبه نبوته نائل  
 اولدى و پك چوق زمان بعلبك اها ليسنى اصلاحه سعي و غيرت ايدوب  
 لايعد معجزات كو ستردى حتى بر دفعه فقر حالندن شكايه ايدن برخاتونه  
 خانه كده نه وار ديوسؤال ايدوب برچناق زيتون ياغندن بشقه نسنهم يوقدر  
 ديد كده وار اول ياغى تو كنججه يه قدر بيوك قابله بوشالت ديمسيه خاتون  
 اولوجهسه يايوب برچوق ياغ حاصل ايتدى و جمله سنى پازارده صاتوب  
 كفاف نفس ايلدى بر دفعه دخى برخاتونك وفات ايتش اولان چوجغنه

اغزینی اغزینه و پروب توجه ایتسیله باذن الله حیات تازه کلدی و بردفعه  
دخی آرام یلکنک سوریه یه تسلط ایدیه جکنی و زهدن کله جکنی خبر و یردی  
و ملک موئی الیه مشار الیه اخبارینی خبر الیدیگی کبی اخذ و کرفتیی ایچون  
بعلبکه عسکر کوندر و روب خانه سنی صار دیردی لکن مشار الیه کما سی  
بر کاتیله هیج برینک کوزلری کور میوب جله سی سامریه ده حکومت  
اسرائیلیه یه اسیر دوشدی . و بردفعه دخی اوتهدنبر و آجی اولان چشمه نیک  
صوینی طاتلان دیردی . بو کبی معجزاتی پک چوقدر .

§

﴿ آلیقوزنه ﴾ صحیحی (لی ووزنو) — طوسقانه نیک جهت غریبسنده  
بر کوزل مملکتدر و لیانی ایتالیا لیمانلرینک برنجیسیدر و نفوس  
موجوده سی طقسان پیک تخمین اولتقمده در .

§

﴿ آلیند ﴾ — آیدین ولایتنه تابع منتشا سنجاغ نیک مرکز اداره سی  
اولان (موغله) شهرینک نام عتیقیدر .

§

﴿ الینوز ﴾ — (الهن) کله سنه نظر بیوریه .

§

﴿ ام حبیبه ﴾ — بنی اکرم افندمز حضرتلرینک زوجه محترمه سی  
ورؤسای قریشدن ابوسفیانک کریمه سیدر اوائل عهد اسلامده اسلامه مشرف  
اوله رق حبشه هجرت بیورمش و اوراده زوجی وفات ایتکله دول قالمش ایدی  
هجرتک یدنجی سنه سنده عمر بن امة الصخر حضرتلری دینه دعوتی متضمن  
اولان نامه جناب پیغمبری بی حامله حبش ملکی اضحمة النجاشی به کیدرکن  
مشار الیه نیک نفس نفیسنی حضرت پیغمبری به عقد ایچون دخی توکیل  
بیورلدیغندن نجاشی و مهاجرین اصحاب معرفتیه اوراده عقدی اجرا اولتوب  
ملک مشار الیه طرفندن مخصوصاً تهیه ایدیلان کیلرله نزد حضرت پیغمبری به  
کوندرلمشدر . مشار الیه غایت دیندار و صلابت شعار بر خاتون ایدی حتی  
تجدید عهد ضمنده مدینه منوره یه و خانه حضرت پیغمبری به کلمش اولان  
پدری ابوسفیان فراش سعادت اوزرینه اوتورمق ایستدیکنده اهل ایمانه



مخصوص بر طور ایله پدرینه ( سن مشرکسک رسول اللهک فراش سعادتنه  
نصل اوتوره بیلورسک ) دیهرک منع ایلدیکی کمال خلوص و دیانتنه دلالت  
ایدر برحالت معتبره در .

§

﴿ام روان﴾ -- ابو بکر الصدیق (رضی) حضرتلرینک زوجه محترمه سی  
و حضرت عایشه و عبدالرحمن جنابلرینک والده سیدرکه حضرت فخر المرسل  
افدمزه قاین والده اولوق شرفنه نائل اولدی .

هجرتک التجی سنه سنده وفات ایتکله مرقد مطهره لرینه بالذات حضرت نبی  
دیشان افدمز وضع ایتدی و ( هر کیم جنت حوریلرندن برینه باقوب  
مسرور اولوق استرایسه ام رومانه باقسون ) بیوردی .

§

﴿ام ایمن﴾ -- اصحاب کرامدن اسامه بن زید حضرتلرینک والده سی  
و حضرت پیغمبر افدمزک دایه سی جلیلة القدر بر صحابه در نام علیه لری  
فی الاصل برکه اولوب ایلک مخدوملری ایمنه نسبتله ام ایمن دئیلمشدر . نبی  
محترم افدیمزک والده لری افدمز پک کوچوک ایکن ارتحال ایتکله مشار الیها  
رسول اکرم افدمزی آغوش مادرانه لرده بیوتدی و بناء علیه حقلرنده  
(ام ایمن امی بعدامی) بیورلدی ارتحال حضرت پیغمبر یدن صکره وفات ایتدیکی  
جهتله ارتحال ایدنجیه قدر حضرت پیغمبر افدمز ایچون اغلامشدر در .

§

﴿ام سایم﴾ -- قاتنان صحابیاتدن دیندار و درایتشعار بر خاتوندر  
و اصحابدن مالک ابن انس حضرتلرینک والده سیدر و دول ایکن اسلامک  
ظهورنده شرفیاب ایمان اولمشدر . بونی شجعان عربدن و قبیله سی  
خلقندن ابو طلحة الانصاری هنوز اسلامه کلمکسزین تزوجه طالب اولدوقده  
مشار الیها ( بن سنی ایستمازلک ایتیم . سنک کیسی رد اولنمز لکن سن  
مشرکسک بن ایسه بحمدالله تعالی مسیلمیم . اکر مسلمان اولور ایسهک  
سکا واررم و حتی مهریمی بیله بخش ایدرم . بیلزمیسک که سنک پرستش  
ایتدیکن تکرری یردن بتر و صکره آنی دولکرلر یوننار بو حالده سن برتخته

پارچه سنه طایمغه اوتانزمیسک دیمسی اوزرینه مشار الیه اوتانوب اسلامه کلدی وام سلیمی تزوج بیوردی .

مشار الیه حضرتلری اوغلی انس حضرتلرینی هنوز اون ایکی یاشلرنده ایکن حضور حضرت یغمبری به کتوروب ( یارسول الله بونی سزه خدمتکارلق ایتسون دبه کتوردم ومن غیرحد ارمان ایتدم بنم اوغلم و سنک خادمکدر اکا دما ایله ) دبه رک تقدیم ایتمش وافندمز دخی دما بیورمغله انس حضرتلری هم طول عمر ایله معمر و همده خارج ازحائط تعداد مال و اولاده مالک اولمشدر .

§

﴿ آما تیا ﴾ — ما کیدونیا نیک اسکی اسمیدر .

§

﴿ آما زون ﴾ — آمریقای جنویدیه برنهرک اسمیدر . بونهر کره ارضک اوزرنده اولان نهرلرک ائیوکی اولوب ( آند ) دنیلان سلسلهء جبالدن و اون برعرض جنوبی ایله یتش اوج طول غریده واقع لوریقوشا نام کولدن چیقوب طول غربی به طوغری جریان ایتمکده و خط استوا تحتده بحر محیط اطلسه دو کلمکده در طولی التی بیک بشیوز و عرضی یوقار یلرده اوج ایله بش و اشاغیلرده دهها زیاده و بجره منصب اولدیغی محلهه ایکیوز سکسان سکز کیلو مترو و عمق وسطیسی اوجیوز یکریمی بش مترو در و بجره انصباب ایلدیکی محلهه آجی صوبی یوز اوتوز بش مترو دفع ایتمکده و دروننده یدی مترو طولنده بالقلر بولتمکده در .

آمازون مسلح قادین جمعیتی دیمک اولوب حین کشفنده نهر مزبورک ساحلنده برطاق مسلح قادین جمعیتی کورلمسی مناسبیله نهره دخی بونام ویرلمشدر .

§

﴿ آما زلیس ﴾ — فراغه مصر به دندر . بو آدم فرعون ( ابرئیس ) ک قرناسندن و امرای عسکر به سندن اولدیغی حالده تأدیب و اصلاحنه مأمور اولدیغی ( سوه نی بن ) لرایله برلشوب ( ۵۰۲۴ خ ) تاریخنده یعنی میلادک بشیوز یتش سنه مقدمنده ولی نعمتی خلع و احناق ایدرک تختنه اوتوردی و کندوسنک غاصب و آحادناسدن اولدیغی سرسی رشته ایله فساد چیقارمسی

مأمول اولان اھالی بی ایصندیرمق وایتدیکی خیانتی سیندیرمک ایچون  
 ایاغنی ییقادیغی التون لکنی ارتدیرهرک برصم یاپدیروب چارشونک الٰغلبه لک  
 محلنه قویدردی واهالینک مذکورصنمه حرمت وپرستش ایتدکرینی خبر  
 الدقدن صکره ارکان مملکتی حضورینه جلب ایدوب ( اوپرستش ایتدیکنز  
 صنم بنم ایاغنی ییقادیغم برلکن ایکن شمدی هیئتی تبدل ایتکله شایان احترام  
 اولدی بن دخی فرومایه دن برادم اولدیغم حالده شمدی پادشاهکر بولندیغم  
 ایچون حرمت و رعایتہ سزاوارم ) دیهرک براوزون نطق ایراد ایتسی اوزرینه  
 اھالینک جله سی مع الممنونیه حرمت و رعایت وهر حالده اطاعت ایدہ جک کرینی  
 بیان و تعهد ایلدیلر و موھی الیهک مدت سلطنتی اولان قرق درت سنہ ظرفندہ  
 پک کوزل پکندیلر و راحت ایتدیلر . دیگر روایتہ کوره جلوسی ( ۱۹۲۴ خ )  
 تاریخندہ یعنی میلادک التی یوز یمش سنہ مقدمندہ در . عادل و امور اشنا  
 و معارف پرور برذات ایدی مصر لیمانلرینی یونانیلرہ سربست بر اقدیغندن زمانندہ  
 مصر تجارتی غایت ایلر و کندی . ایران حکمداری ( کیخسرو ) ک مصر  
 اوزرینه جایه سنی بدرجه یه قدر طانیدی ایسه ده کیخسروک خلنی لهراسی  
 طانیدیغندن محاربه تحق ایتدی لکن ( امازیس ) اول آرہ لق وفات  
 ایلدیکندن محاربه نک نتیجه سنی یعنی مصرک مغلوبیتنی کورمدی .

§

﴿ اماستری ﴾ — اماصری شهرینک نام صحیحی ( اماصری )

کله سنہ نظر بیوریلہ .

§

﴿ اماسیه ﴾ — سیواس ولایتی داخلندہ برسنجاق مرکزیدر .

اماسیه شهری صامسون اسکله سنک جنوبه طوغری یوز اوتوز اوج  
 کیلومتر و کیر و سنده و توقاد نہرینک یا خودیشیل ایرماغک کنارندہ وجانینک  
 طاغلرینک اتکنندہ در و تخمیناً اون پیک خانہ سی و متعدد جوامع و مساجد  
 و تکایا و مدارس و مکاتبی و بر خراب قلعه سی واردر و بایزید نامندہ کی  
 جامع شریف پک کوزلدردر و وقتیلہ پتخانه اولان بر بنا شمدی بیمار خانہ در  
 و آتقہ لری و محفوظ برقاچ انسان مومیاسی و مملکتک اورتہ سنندن چکن  
 صوبویندہ قیالک ایچنہ طوغری او یولوش مغارہ لری شایان تماشادر

و بورانك ايک تجارتي و نسوان و الماوهواسی کوزالکله مشهوردر .  
اماسیه ( ۷۳۱ م و ۱۱۳ ه ) تاریخنده فتح اولندی . آیدین سبجاغنده  
دخی ( اماسیه ) نامنده برقصه واردر .

§

﴿ اماصری ﴾ — قره دکزک اناطولی ساحلنده و بولینک یوزیکرمی  
کیلو مترو شمالنده برشهردر و لیمانی قومصال اولدیغندن بحر بیون عندنده  
مقبول دکلدر . اماصرینک اسکی اسمی ( شمسام ) اولدیغنی حالده  
مؤخرأً ( قیراقتر ) نامنده برحاکک ( اماستریس ) نامنده کی زوجه سی اعمار  
ایلدیکندن آنک نامنه نسبتله ( اماستری ) دینلدی . بوراسی ازمنه  
وسطاده برقاچ دفعه یونانیره و ( ۱۳۱۰ م و ۶۰۸ ه ) تاریخنده جنویزله  
کجوب ( ۱۴۵۹ م و ۸۶۲ ه ) تاریخنده سینوب حاکمی اسماعیل بکدن  
دولت عثمانیه یه انتقال ایشدر .

§

﴿ امالی ﴾ — طلبه علوم متجربندن برعالمک حضورنده اول عالمک  
برویا برقاچ فندن سویلدیکی قواعد و مسائل و سائرهبی لسانندن ظهوری  
کبی ثبت و املا ایتدکاری حالده او املا ایتدکاری شیئه ( امالی ) دیرلر .  
( امالیء ابن درید ) ( ۹۳۲ م و ۳۲۱ ه ) تاریخنده وفات ایدن ( محمد بن  
حسن العتاهیه ) نک اثریدر .  
( امالیء ابن حاجب ) مشهور . ( ابن حاجب ) کله سنه نظر بیوریه .  
( امالیء ابو یوسف ) علم فقهدن ( ابو یوسف ) کله سنه نظر بیوریه .  
( امالیء ابن الشجری ) ( ۱۱۷۶ م و ۵۷۲ ه ) تاریخنده وفات ایدن  
( ابو السعاده ) ک بش فنی و سکز جلدی جامع اثریدر .  
( امالیء ابن عساکر ) ( ثقه الدین ) کله سنه نظر بیوریه .  
( امالیء ابو العلاء ) ( ابو العلاء ) کله سنه نظر بیوریه .  
( امالیء جار الله ) ( زمخشری ) کله سنه نظر بیوریه .  
( امالیء قاضی خان ) ( ۱۱۹۵ م و ۵۹۲ ه ) تاریخنده وفات ایدن حسن  
بن منصورک اثریدر .

(امالی فی الحدیث) (۱۰۶۲ م و ۴۵۴ ه) تاریخنده وفات ایدن (ابو عبدالله القضاعی) نك اثر یدر .  
بونزدن بشقه دهاپك چوق امالی واردر و (سراج الدین) ك (يقول العبد فی بداء الامالی . لتوحید بنظم كاللألی) دیو بدأ ایدن قصیده  
امالیسی دخی مشهوردر .

§

﴿ امام البخاری ﴾ — قدمای محدثین کرامدندر واسمی (محمد) وشهرتی (الحافظ ابو عبدالله بن اسماعیل الجعفی) در . مشارالیه تحصیل وتحقیق وتصحیح احادیث ضمننده خراسان و جبال و عراق و حجاز و سوریه و مصر و ممالکنی کشت و کذار ایدر ك کتب سسته نك برنجیسی اولان (جامع الصحیح) نام کتاب مستطابی اون التی سنه ده جمع و ترتیب بیوردی و بغدادده یکر می بیك عالمك اجتماع ایتدیکی بر مجلس عالیده علم حدیثدن امتحان اولوب فضل و کمالنی و کتابنك سائر کتب احادیثه رجحانی تصدیق ایتدیردی .

کتاب مذکوردن بشقه دهاپك چوق آثاری و برتاریخی واردر (۸۶۹ م و ۲۵۶ ه) تاریخنده سنی التمش ایکی به بالغ اولدوقده سمرقندك ایکی فرسخ ایلروسنده واقع (خارتك) قریه سنده وفات ایدوب اورایه دفن اولمشدر و دیگر روایته کوره وفاتی (۲۵۳ ه) تاریخنده در . مشارالیهك حفظنده یوز بیك صحیح وایکییوز بیك موضوع حدیث وار ایدی و تصحیح ایتدیکی احادیث نبویه بی آبدست آلوب ایکی رکعت نماز قیلدقجه کتابنه یازمن ایدی دیرلر .

§

﴿ امام ربانی ﴾ سرهندی — افلخم مشایخ نقشبندیه دندر واسمی (احمد الفاروقی) وشهرتی (مجدد الف ثانی) در . فیض عالیبری شیخ (باقی بالله) دن وانلر ك فیضی دخی (عبید الله احرار) دن ایدی . درجه فضل و کالی بیلمك ایچون (مکتوبات) نی مطالعه کافیدر وفاتلری (۱۶۲۴ م و ۱۰۳۴ ه) تاریخنده در . مخدوم عالیبری (محمد المعصوم) حضرتلریله (یکدست مکی) حضرتلری کبار خلفاسدندر .

§

﴿ امام الحرمین ﴾ — مصنفین کرامدن بر مبارک ذاتدر مسقط رأسی ( نیشابور ) واسمی ( عبد الملك ضیاء الدین ) در . بوذات فرط معلومات و کثرت محفوظات ایله مشهور بر ادیب نادر الاقران و اصول و فروع و کلام و سایر ده امام جلیل الشان ایلدی . بغدادده تحصیل کمال ایتد کدنصکره حرمین الشریفینه کلوب اقرانته تفوق ایلدی و درت سنه دن عبارت اولان مدت اقامتنده مذاهب ار بعده دن سؤال اولنان مسائلک کافه سنه موافق شرع شریف جواب یازدیغیچون امام الحرمین نامنی آلدی و صکره نیشابوره کیدوب نظامیه مدرسنه سنده تدریس و تصنیفه همت و اطرافدن کلان دهر یلرک مشکل سؤالرینه متین جوابلر ویره رک دین مبینه کوزل خدمت ایلدی .

اوزاق و یقین محالردن درسنه کلنر چوغالوب هر بری برفندن اوقومق استدیکندن و کندوسی دخی بشقه بشقه اوقوتمغه میدان بوله مدیغندن کافه سنی بردن بر مجلسده اوقوتمغه مجبور اولدی . ( نهاية المطلب فی درایة المذهب ) و ( کتاب الشامل فی اصول الدین ) و ( البرهان فی اصول الفقه ) و ( تلخیص الفریب و الارشاد ) و ( غیاث الامم فی الامامة ) و ( مغیث الخلق فی اختیار الحق ) و ( غنیة المسترشدين ) نام کتابلر بونکدر وفاتی ( ۱۰۸۵ م و ۴۷۸ هـ ) تاریخنده در .

§

﴿ امام شاطبی ﴾ — شاطبی کله سنه نظر بیور یله .

§

﴿ امام غزالی ﴾ — غزالی کله سنه نظر بیور یله .

§

﴿ امام رازی ﴾ الجصاص — فقه حنفیده امام کبیر الشاندر . علم فقه و زهد و ورعه زماننک فریدی ایلدی . بوذات ( ۹۳۶ م و ۳۲۵ هـ ) تاریخنده بغدادده کلوب شیخ ابوالحسن کرخی دن علم فقهی اکیال ایتدکن و اهوازه کیدوب کلدکن صکره حاکم نیشابوری ایله نیشابوره کتدی و ابوالحسنک وفاتی عقینده ینه بغدادده عودت و تدریس علومه همت ایدوب بغدادک رئیس العلماسی اولدی و سنی التمش بشه بالغ اولدیغنی حالده

( ۹۸۰ م و ۳۷۰ هـ ) تاریخنده وفات ایلدی . ( احکام القرآن ) و ( مختصر اختلاف الروایات ) و ( شرح مختصر الکرخی ) بونکدر و ( ۸۷۳ م و ۲۶۰ هـ ) تاریخنده وفات ایدن ابو بکر احمد بن عمرو الخصاص الحنفینک تألیف ایتدیکی ( ادب القاضی ) نام کتابه دخی بر کوزل شرح یازمشدر . ذکر اولنان اختلاف الروایات ابی جعفر الطحاوینک تألیفاتنددر .

§

﴿ امام ثعلبی ﴾ — ثعلبی کله سنه نظر بیور یله .

§

﴿ امامیه ﴾ — اعتقاد کله سنده قرق برنجی فرقه شیعیه یه نظر بیور یله .

§

﴿ امابیه ﴾ — مصر سفلاده بولاق قارشوسنده برقصه در . فرانسزلر ( ۱۷۹۸ م و ۱۲۱۳ هـ ) تاریخنده مشهور اهرام تپه سی محاربه سنی بوراده قزان دیلر و کولنلری فنا حالده مغلوب ایتدیلر .

§

﴿ آمد ﴾ — دیار بکر کله سنه نظر بیور یله .

§

﴿ ام دریا ﴾ -- جیحون نهرینک نام دیکری . جیحون کله سنه نظر بیور یله .

§

﴿ امرؤ القیس ﴾ — قدمای شعرای عرب دندر و حیره و تهمه یه حکم ایدن بنی اسدملکی مشهور ( ابن حجر الکندی ) نک اوغلیدر . اوکی والده سنی تشبیباً شعر سویلدیکچون پدری طرفندن طرد اولندیغی جهته خیلی زمان بعض قبائل عرب ایچنده طولاشوب پدرینی ظلمنه بناء تبعه سی اعدام ایتدکلرینی خبر آلدیغی کبی رینه اوتورمق یاخود انتقامنی آلمق ایچون طرفداری اولان برقبیله خلقیله بنی اسدولایتنه کلوب بر مقدار محاربه ایتدیسده قبیله مذکوره حر بدن رجوع ایلدیکنه بناء قیصر رومه التجا ایتدی و اوراده هنکام اقامتنده قیصرک قزینه علاقه ایتسی و قزایله وقوعبولان ماجرانک میدانه چیمسی ملاسه سیله قیصر مومی الیهی طاتلیلق ایله دفعه

قرار و یردی و تعظیبات و تکریمات ایله بر محله کوتوریلور ایکن انقره یه وصولنده سلمی بر کوملک کیدیریلوب اعدام اولندی .  
اشبو امرؤالقیس معلقات سبعة اصحابنک برنجیسیدر و چوچققری علیه الصلاة والسلام افندمزک زمان سعادتنه ایرشمشدر و حضرت پیغمبر افندمز بونک حقدنه ( فیه اشعرالشعراء وقائدھم الی النار ) بیورمشدر .  
اصحاب کرامدن ( امرؤالقیس بن عانس ) و بنی منذردن ( امرؤالقیس بن عمرو بن عدی ) بشقه در .

§

﴿ آمریکا ﴾ — قطعات خسنه ارضک در دنجیسی و آسیادن صکره الکیوکیدر . اشبو قطعه ( پانامه ) دلیله بر برینه متصل و شمالی و جنوبی نامرلیله ایکی به منقسم برقطعه جسمیه اولوب شمال قسمنک طولی التی بیک یدیوز و عرضی بشیک ایکوز و جنوب قسمنک طولی بشیک ایکوز و عرضی درت بیک کیلو متروندن عبارت بولنمشدر .  
آمریقاده پک چوق کولر و ینار طاغیر و آلتون و کموش و باقر و جیوه و تیمور معدنلری موجود اولدیغی کبی ( بره زلیا ) و ( پرو ) جهتلرنده الماس و سائر ذیقیت طاشلر دخی بولنور و اراضیسی اکثریله منبت اولوب نفوس موجوده سی بوندن یمش سکسان سنه اول اوتوز سکز ملیون ایکن مؤخرأ اورو پالیرک پی در پی هجرتی مناسبیله طقسان بش ملیونه بالغ اولدیغی و کیدرک دهاز یاده لشه جکی تخمین ایدیلور . آمریکا برنجی دفعه اوله رق ( ۱۴۹۲ م و ۸۹۸ هـ ) تاریخنده سیاحین بحریه دن جنوهلی ( خرستو قولومبو ) معرفتیله و اسپانیولرک معاونتیله کشف اولندیسه ده ( بره زلیا ) جهتلدن اصل کشفی ( ۱۵۰۱ م و ۹۰۷ هـ ) تاریخنده پورتکیزلی ( آمریقو ) ورفیق ( سپوچی ) معرفتلیله وقوعبولمش و عموم قطعه یه اشبو ( آمریقو ) نك نامی ویرلمشدر . آمریقای شمالیده انکلتره دولتی اداره سنده بولنان ممالکدن بشقه جمهوریت و جمله اداره اولنان ممالک ( جواهر منقعه ) و ( مکسیقا ) و ( غواتمالا ) و آمریقای جنوبیده ( قولومبیا ) و ( پرو ) و ( بولونیا ) و ( بلاتینا ) و ( شیلی ) اولوب بولنردن بشقه دهابرچوق حکومات صغیره واردر .

§



﴿امس﴾ — سوریه ولایتی داخلنده اولان (حصص) شهرینک نام عتیقیدر یاخود حصص امسک غلطیدر . حصص کله سنه مراجعت بیور یله .

§

﴿امستردام﴾ — فلنک دولتنگ اسکی پای تختیدر . بوشهر اللی ایکی عرض شمالی ایله ایکی طول شرقیده و پارسسک بشیوز قرق ایکی کیلومتر و بعدنده بر شهر شهیردر و نفوسی ایکیوز التمش بشیک راده سنده در و لیمانی بیک سفینه آلور در جده و واسع و معتبردر و خانه لری کاملاً قازیق اوزرنده اولوب محلاتی بر چوق قنالرله منقسم اولدیغندن طقسان عدد آطه حاصل اولش و بو آطه لردن بر برینه کچمک اوزره ایکیوز طقسان عدد کوپری یاپلشدر . بوراسی اوچنجی عصر میلادیده بر کوچک قصبه اولدیغی حالده تدریجاً بیویوب (۱۴۸۴ م و ۱۸۸۹ هـ) تاریخنده اطرافنه بر سور چکلدی و (۱۵۷۸ م و ۹۸۶ هـ) تاریخنده دکین اسپانیادولتنه تابع ایکن تاریخ مذکورده استقلال بولدی و (۱۷۸۷ م و ۱۲۰۲ هـ) تاریخنده پروسیا دولتنه و طقوز سنه صکره فرانسه دولتنه کچوب (۱۸۰۸ م و ۱۲۲۳ هـ) تاریخنده مجدداً تشکیل اولنان فلنک دولتنه انتقال و دولت مشار ایها پای تخت اتخاذایلدی . پای تخت مذکور ایکی سنه صکره (حایی) شهرینه نقل اولمشدر .

§

﴿امسوس﴾ — طوفاندن اول مصرک برنجی حکمداری بولنان (نقراوس الجبار) ک مصرده بنا و پای تخت اتخاذایتدیکی شهرک اسمیدر . مرقومک بوشهرده بر طاقم عجایبات احداث ایلدیکنی افسانه قیلندن اوله رق یازیورلر . برنجیسی یاپدیردیغی بر قوش رسمی هر کون طلوع و غروب شمسده ایکی دفعه ایصلق چالار و هرکس او ایصلقندن احکام چیقار و عمل ایدر ایمش . ایکنجیسی وسط بلدهده قارشو قارشویه سیاه طاشدن یاپدیردیغی ایکی پت مملکته داخل اولان خرسزلی بسمه حال آرلندن کچورمکه مجبور ایدر و کچرکن صقشدیرر ازر ایمش . اوچنجیسی بر عالی مناره نک اوزرینه باقردن یاپدیردیغی بر تماثک اوزرنده دائماً بر یغمور بلوطی طورر و یغموره لزوم اولدیغی وقت اندن طلب اولنور و در حال

مطلوب حاصل اولور ایش . دردنجیسی بلده مذکورہ نك سوری اوزرینہ وضع اولنان ایچی کبریت طولوپتر مملکتہ سوء قصد ایدنلری احراق ایلر ایش . بشنجیسی پطراس طماعی اوزرینہ پایدیردیغی بر قله دن دائماً صو فوران ایدر واطرافنده اولان مزارع اول صو ایله صولانور ایش . بونلرک کافه سی و شهر مذکور طوفانده محو و نابید اولمش ایش .

§

﴿آنفیولی﴾ — روم ایلنده واقع (یانولی) شهر نك نام عتیقیدر . بوراسی مقدا جاہیر یونانیدن بر جهورک مرکز اداره سی ایدی . بوکا (انفیولیس) دخی دیزلر .

§

﴿آمل﴾ — طبرستان ایالتی داخلنده و جیلان جہتندن سالوس قصبہ سنہ کیدرکن یول اوزرنده و تخمیناً یکرمی فرسخ بعدنده بر مملکت اسمیدر . بورادہ شاه عباسک بنا ایدیردیکی قصر ایله آتش پرستلردن (امت الجیر) ک بناسی اولان اوچ عدد برج ایوم آثار عتیقہ دن اولہرق موجوددر نفوس موجودہ سی اوتوز بش بیک تخمین اولنقده در . طبری نامیلہ شہرت بولان علما و مشایخک اکثریسی بورادن ظهور اتمشیدی .

§

﴿امنوفیس﴾ یاخود (امنوف) — اون سکرنجی سلالہٴ فراعنہٴ مصریہ دن بونامده درت حکمدار کلشدر اوچنجی امنوفیسک سلطنتی حضرت موسی علیہ السلام زمانتہ تصادف ایلیور ایسده (۳۹۴۹ خ) تاریخنده یعنی میلادک بیک اتیوز قرق بش سنہ مقدمندہ و قوعبولان خروج موسی علیہ السلامہ غرق اولان فرعون بومیدر یوخسہ اوغلی (خاروس) یاخود (هوروس) میدر کسدریلہ میور . اشبو اون سکرنجی سلالہٴ فراعنہ (۴۰۹۴ خ) تاریخنده یعنی میلادک بیک بشیوز سنہ مقدمندہ و دردنجی (امنوفیس) زمانتہ ظهور ایدن بر اختلال مذہبیہ نتیجہ سندہ منقرض اولدی . اولوقت مصر فرعونلری مصرده واقع (تب) شہرنده

اوتوردقلى حالدە اشبو امنوفىسلردن برى منقس يعنى منف شھرىنى پايدىروب  
پاى تختى اورايە نقل ايلدى .

§

﴿ آمنه ﴾ بنت و هب بن عبد مناف --- عليه الصلوة والسلام  
افدمزك والده محترمه ليدز . جناب حقك احسان بيورديغى جال و كاله  
بناء قومى بيننده ( حكيمه ) لقبيله مشهور ايدى زوجى عبدالله حضرتلى  
مدينه منوره قربنده وفات ايلديكندن مشار اليها هر سنه زيارته كتمديكى كى  
ولادت جناب نبويك التجبى سنه سنده دى كيدوب عودتده ( ابواء ) نام  
قريبده وفات ايلدى ملجأ اتم افدمزى جدلى ( عبدالمطلب ) حضرتلريله  
حاضنه النبى ( ام ايمن ) حضرتلى بو وقعه مؤلمه اوزرينه قريه مزبورهدن  
مكه مكرمديه كتور مشر ايدى .

§

﴿ امور ﴾ — آسيای وسطاده و مغولستان قطعده سنده بر يوك نهردر .  
بونهر مغولستانده واقع ( كنهان ) طاغرنيك جهت جنوبيسندن شرقه  
وصكره شمالدن ينه شرقه طوغرى اوچ بيك درتوز التمش كيلو مترو محلى  
اسقا ايدرك كيدوب و ايلروده ( سنغارى ) نهريله اجتماع ايدوب ( تراپونيا )  
اطه لردن ( چوقه ) اطه سنك قارشوسنده ( ژاپونيا ) دكزينه دو كيلور .  
بو كا ( خاسالى ين ) نهرى دى ديرلر .

§

﴿ آموز ﴾ — بازار جقدن ادرنه يه و اورادن ( اينوز ) ليمانته جريان  
ايدن ( مريج ) نهرنيك نام عتيقيدر .

§

﴿ اموسيس ﴾ — مصرده بشيوز اون درت ياخود ايكبوز التمش  
سنه حكومت ايدن ( هيقيسوس ) طائفه سنى ( ۳۸۹۲ خ ) تار يخنده يعنى  
ميلادك بيك يديوز سنه مقدمنده مغلوب و مصردن طرد و اون سكرنجى سلاله  
فراعنه يى تشكيل ايدن ذاتدر . بونك ( نوبه ) ده بر معبد قديم ديوارنده نوبه يى  
نصل ضبط ايلديكنه دائر بر چوق يازيلرى و رسملى بولدى . مصر لولر  
بو كا ( اجس ) ديرلر . بر روايته هيقيسوسلرى مصردن بتون بتون طرد  
ايدە مامش و انلر دى مصرك بر جهتنده بر مدت دهها حكومت سورمشدر .

§

﴿امویہ﴾ چہار یارکزیں رضوان اللہ تعالیٰ علیہم اجمعین حضراتنک خلافت سنیہ لرندن صکرہ شام شریفہ تشکل ایدن برنجی حکومت اسلامیہ در . زمان مشار الیہمدہ شام والیسی بولنان ( معاویہ ) حضرت تتری خلیفہٴ رابع جناب علی المرتضیٰ ایلہ صفین محاربہ سنی یاپوب عقد مصالحہ ایتدکن صکرہ سلطنتی قوردیسہدہ اصل سلطنتی یعنی حکومت مذکورہ نک تشکلی درت سنہ صکرہ ( ۶۶۱ م و ۴۱ هـ ) تاریخندہ جناب حسن بن علی المرتضانک حق خلافتی معاویہ یہ ترک و فراغندن اعتبار اولنور . دولت امویہ نک طقسان بر سندن عبارت اولان مدت سلطنتلرنده اون درت پادشاہ کلوب ( ۷۴۹ م و ۱۳۲ هـ ) تاریخندہ عباسیلر یدیلہ منقرض اولدیلر ایسہدہ عبدالرحمن بن معاویہ بن ہشام بن عبدالملک نام قہرمانک اندلسدہ تشکیل ایلدیکی حکومت امویہ ( ۱۰۳۱ م و ۴۲۳ هـ ) تاریخندہ قدر دوام آتمشدر . ( امیہ ) و ( معاویہ ) کلہ لرینہ دخی نظر یوریلہ .

§

﴿امید برونی﴾ — آفریقا قطعہ سنک منہای جنوبندہ و کافرستان قطعہ سنک جنوب غربیسنندہ انکلترہ دولتی مستملکاتندن برولایتدر مقرر حکومتی ( قاب توون ) شہری اولوب عموم ولایتدہ اکثریسی اسلام اولوق اوزرہ یدی یوز بیک نفوس تخمین اولنقمندہ در . امید برونی ( ۱۶۰۰ م و ۱۰۰۹ هـ ) تاریخندہ فلنکلورک والتی سنہ صکرہ انکلیرلرک جایہ سی التہ کیردی . اشبو امید برونی ایلہ برابر بش ولایتی جامع اولان قطعہ یہ ( قاب ) تعبیر ایدرلر بونلرک کیمی انکلیرلرک جایہ سنندہ و کیمی طوغریدن طوغری یہ ادارہ سنندہ در . اشبو امید برونی وحوالیسنندہ مایسندن اغستوسہ قدر شدتلی یغمورلر یاغار وقیشی بو موسمدہ اولور . امید برونی اہالیء اسلامیہ سی بینندہ الی سنہ دنبرو باعث نزاع وقتال اولان اختلافات مذہبیہ نک ازالہ سیچون انکلترہ دولتی ( ۱۸۶۲ م و ۱۲۷۹ هـ ) تاریخندہ دولت علیہ طرفندن بر عالم استدیکنہ بناء مدرسیندن طاغستانی بکر افندی کوندرلشیدی افندی مومی ایلہ بر قاچ سنہ اورادہ اوتوروب اہالیء مرقومہ نک اعتقادینی تصحیح ایتدی و ویردیکی نصایح و مواعظک تأثیریلہ اختلافات مذکورہ کلیاً بر طرف اولدی .

§

﴿ امیر بخاری ﴾ — کبار مشایخ نقشبندیه دندر . (احمد)  
کله سنه نظر بیور یله .

§

﴿ امیر سلطان ﴾ — طریقت علیه خلوتیه شعبه سی اولان (نور  
بخشیه) طریق مشایخ کرآمدن بر بیوک ذاتدر و مسقط رأسی (بخارا)  
اسمی (محمد شمس الدین) در .

مشارالیه بخاراده تحصیل کال ایتد کدن صکره بروسه یه هجرت و بر  
چوق زمان ارشاد عباد و تدریس علومه همت ایدوب سلطان (یلدیرم بایزید  
خان) حضرتلرینه داماد اولدی و سلطان بایزید مشهور نیکبولی مظفریتی  
اوزرینه مصرده اقامت ایدن خلفای عباسیه دن (متوکل) ک کوندر دیکی  
(سلطان اقلیم الروم) عنوانی الدقدن صکره اشبو امیر سلطان دخی مشار  
ایله حضرتلرینه قلیچ قوشادوب مصالح ملتله اقدام نصیحتیه اعمار ملکه  
تشویق ایلدی . وفاتی (۱۴۲۹ م و ۸۳۳ هـ) تاریخنده و تر به سی  
روسه دره .

§

﴿ امیر طغانی ﴾ — قره حصار صاحب سنجاغنده بر قضا مرکزیدر  
پارچینلو و خسرو پاشا ناحیه لریدر . بوراده اعلا تره یاغی و کلیم چیقار .

§

﴿ امیر علی ﴾ — مشایخ کرآمدنر و فیضی (تقی الدین علی دوستی)  
حضرتلرندندر و وفاتی (۱۳۸۴ م و ۷۸۶ هـ) تاریخنده در . فصوص الحکمه  
بر شرح و (اسرار النقطة) نامنده بر کتاب یازدی .

§

﴿ امیر کلال ﴾ — کبار مشایخ صوفیه دندر . (کلال) کله سنه  
نظر بیور یله .

§

﴿ امین ﴾ — خلفای عباسیه نک التجیسی و هارون الرشیدک برنجی  
اوغلیدر . هارون الرشید وفاته یقین مالک عباسیه یی اوچ اوغلنه تقسیم  
ایتدیکی صره ده بوکادخی عراق و الیک یاخود امارتنی و یرمش ایدی بوذات

پدرینک و فاتندن صکره بغداد تختنه قناعت ایتیموب حصه سنه آسیای وسطی  
امارتی دوشمش اولان برادری (مأمون) ک ممالکنی دخی استیلایه قالشدیغندن  
بینلرینه نفاق کیردی و برقاچ دفعه محاربه و قوعبولدی و نهایت (۸۱۳ م  
و ۱۹۸ ه) تاریخنده مأمون غلبه ایدوب عراق ممالکنی دخی قبضه تصرفنه  
آلدی و بغداد تختنه اوتوروب عدم امنیتی جهتیله امینی اعدام ایلدی  
مأمون کله سنه دخی نظر بیوریه .

§

﴿ امیه ﴾ — بن عبد شمس — افخاز قریشدن کندو نامنه نسبت اولنان  
یعنی (بنی امیه) دنیلان قبیله نکر رئیس و دولت امویه بی تأسیس ایدن حضرت  
معاویه بن ابی سفیانک جدیدر . مرقومک پدری اولان عبد شمس جد ثانی  
جناب نبوی هاشمک توأم قرنداشی ایدی . حضرت معاویه شامده حکمدار  
اولدیغی زمان حکومتنه جدینک نامنی ویردیسه ده کندو سلاله سی یکریمی اوچ  
سنه دن زیاده دوام ایده مدی یعنی (۶۸۳ م و ۶۶۴ ه) تاریخنده ایکنجی  
معاویه نکر و فاتیله منقرض اولوب حکومت مذکوره ینه قبیله (بنی امیه) دن  
( مروان بن الحکم ) سلاله سنه انتقال ایلدی . ( امویه ) کله سنه دخی  
مراجعت بیوریه .

§

﴿ انابولی ﴾ — مورهنک ساحل شرقیسنده برشبه جزیره در . بوراسی  
مقدما یونان حکومتک دارالملکی ایدی شمسی ( ارغولیس ) یا خود  
( قورینتوس ) لواسنک مرکزیدر . انابولی برمدت دولت علیه اداره سنده  
ایکن ( ۱۶۸۴ م و ۱۰۹۸ ) تاریخنده ( متون ) و ( قرون ) و ( اوارین )  
قلعه لریه برابر وندی کولر طرفندن ضبط اولنوب اوتوز بر سنه صکره ینه  
استرداد اولنش و یونان دولتک حین تشککنده طوبی بردن انلره انتقال  
ایتلشدر . انابولی یه مقدما ( فافیلیون ) دیرلر ایدی .

§

﴿ آناپه ﴾ — چرکزستان ساحلنده و یکی قلعه بوغازینک جهت  
شرقیسنده و التمش کیلومتر و بعدننه برشهر در . بوشهر ( ۱۷۸۴ م و ۱۱۹۹ ه )  
تاریخنده صغوجق محافظی ( فرح علی پاشا ) معرفتیله یایلوب مرکز ولایت

صغوجندن اورایه نقل اولندی و ( ۱۸۲۹ م و ۱۳۴۵ هـ ) تاریخنده  
( اخسنه ) و ( اخلکک ) سنجاقلیله برابر روسیه دولته انتقال ایلدی  
انابهنگ بر کوزل لیجانی دخی واردی .

§

﴿ اناتولی ﴾ — یکریمی درت ایله اوتوز طقوز طول و اوتوز التی ایله  
قرق ایکی عرض آرهسنده اولان و آسیای صغرانک قسم غربیسندن عبارت  
بولنان قطعهٔ چسیمیته اسمیدر . بو قطعهٔ ننگ اویچ طرفی آق دکز و قره دکز  
و اطهلو و مرمره دکزلی ایله محاط اولوب یالکز شرق جهتی کردستان  
و حلب و لایاتی حدودلرینه کسب اتصال ایتشدی . اناتولی نامی  
بعضاً کردستان و حلب و موصل و سوریه و لایتی داخل اولدیغی حالده  
جمله سنه بردن دخی اطلاق اولنور . اناتولینک غرب جهته اولان  
( خداوندکار ) و ( آیدین ) و شرق جهته اولان ( ارضروم ) و ( خربوت )  
و ( دیاربکر ) و شمال جهته اولان ( قسطونی ) و ( طربزون ) و ( سیواس )  
و ( انقره ) و جنوب جهته اولان ( قونیه ) و ( اطنه ) و لایتلرینک مراکز  
و بعض ملحقاتی محللرنده مذکور اولدیغندن اوراره مراجعت بیوریه .

§

﴿ اناقس ماندر ﴾ — حکمای یونانیه دندر و اصلی ( میله ) شهرنده  
اولوب ( ۴۹۷۴ خ ) تاریخنده یعنی میلادک ۶۳۰ سنه مقدمنده ظهور ایتشدی  
ارضک کروی اولدیغنی و قر نوری شمسن اخذ ایتدیکنی ابتدا بوذات کشف  
ایلدی و کرهٔ مسطحه بی بر بیوک همتله وجوده کتوردی .

§

﴿ اناقساغور ﴾ — حکمای یونانیه دندر و اصلی از میر سنجانغی  
داخلنده واقع ( اورله ) قضااسندندر . بوذات ( ۵۰۹۴ خ ) تاریخنده  
یعنی میلادک بشیوز سنه مقدمنده دنیایه کلوب کائنات بر ذات قادر و قیومک  
اثر صنعی اولدیغنی اعتقاد ایتدی و شمسن ناردن بر کره در و قرک جبال و اودیه  
وسکانی واردی دیدی .

§

﴿ آنام ﴾ — هندچینینک جانب شرقیسنده و ( سیام ) قطعه سی  
اتصالنده بر حکومت مستقله در ( طونکن ) و ( لاٹوسون ) و ( قوشنشین

علیا) ولایتلرینک بررقیمی اشبو انام حکومتی اداره سنده ایسه ده (قوشنشین سفلا) اراضیسیله (پولو قوندور) اطه لری فرانسه دولتی اداره سنده در و انام حکومتک مقراداره سی اولان (هوه) نام دیگر (فوکیریان) شهرنده التمش بیک و کافه سی پتیرست اولق اوزره بتون انام ممالکنده اون ایکی ملیون یوز بیک نفوس تخمین اولتقده در.

§

﴿آنامور﴾ — ایچ ایل سنجاغنده بر قصبه در . خلفای عباسیه دن معتصم زماننده دیار رومده اوغلی اسیر اولان بر خاتونک (وامعتصماه) دیو فریادی اوزرینه معتصمک اوتوز بیک قیر آتلی عسکرایله کیدوب اسیر مرقومی قورتاردیغی اشبو انامور قصبه سیدرکه اولوقت عربلر (معموریه) دیرلر ایدی.

§

﴿انبار﴾ — بغدادک جهت غربیسنده و التمش بش کیلومیترو یوقاروسنده و فرات نهرینک غرب جهتنده بر شهردر . بوراسنی بخت نصر انشا ایتدی و اهل حیره اورایه نقل اولندی دیرلر . انبار شهری (ابوبکر الصدیق) رضی الله عنه زماننده یعنی هجرت نبویه نک اون ایکنجی سنه سنده خالد بن ولید حضرتلری یدیه فتح اولمش و (۷۴۹ م و ۱۳۲ ه) تاریخنده خلفای عباسیه نک برنجیسی اولان (ابی العباس السفاح) حیره دن بورایه کلوب حکومته باشلامش و منصور پای تختنی بورادن هاشمیه و اورادن بغداده نقل ایلشدر . شمعی انبار کوچک بر قصبه در .

§

﴿انبساط﴾ — حکمت طبیعیه ده اجسامک حرارت واسطه سیله جملرینک بیومسنه دنیلور و طولاً انبساطرینه انبساط طولانی و هر طرفه انبساط جمعی اطلاق اولنور . اجسامک صفر درجه حرارتله یوز درجه حرارت اراسنده کی مقدار انبساطلری درجه حرارتلریله متناسب ایسه ده درجه حرارت یوزی تجاوز ایتدیکی حالده اشبو تناسب مختل اولور . معادنک انبساط و انقباضلرینک بیلنمی ارباب صنایعه کوره لازمدر مثلاً چالار ساعترده حرکتی تنظیم ایدن رفاصک انبساطی تعدیل اولتدقجه سعه رقصلری منتظم اوله مز . علی العموم مایعاتک انبساطی اجسام صلیبه دن زیاده



اولدیغی ترمومتر و نیک هر بر درجه سنده مقداری مختلف اولسیله اکلشیلور و بتون مایعاتدن جیوه نیک انبساطی اکی زیاده منتظم بر حالده بولندیغندن ترمومتر و لرده جیوه استعمال اولور.

§

﴿ انتالی ﴾ — ( انطالیه ) شهر نیک نام عتیقیدر . ( انطالیه )

کله سنه نظر بیوریه .

§

﴿ آنتیل ﴾ اطهرلی — آمریکا جوارنده التمش بر ایله سکسان یدی طول غربی بیلنده و ( مکسیقا ) کور فزندن ( مارا قایبو ) کور فزینه قدر بر خط منحنی شککنده واقع اولوب بیوک و کوچک نامر یله ایکی به تقسیم اولنمش و ( کویا ) و ( سن دومتقو ) اطهرلی اکی بیسوی بولنمشدر . بونلرک کافه سی بر دولت اداره سنده اولیوب بر طاقی اذکلیز لرده و بر چوغی فرانسزلر و اسپانیولر ده و سائر بعض دولترده در و جله سنک نفوسی درت ملیون اوچیوز بیک تخمین اولنمده در . ( آنتیل ) اطهر نیک سنه ده بری چوق یغمور لی و دیگری غایت یابس و صیحا ق ایکی فصلی و پک شدید فورته سی و مهلك بر نوع صاری جا علتی واردر لکن اراضی سی اولدقجه منبتدر . آمریقایی کشف ایدن ( خرستوقولومبو ) ابتدا بو اطهر دن ( غنه هان ) اطه سی کشف ایدرک یناشمش ایلدی .

§

﴿ آنتی پاتری ﴾ — ما کیدونیا قرالی فلیک و اوغلی مشهور اسکندر

رومینک اخص و کلا سندندر . اسکندر رومی عجم لره محار به ایتک اوزره آسیایه کتدیکی زمان بونی و کیل دولت اوله رق ما کیدونیا ده بر اقسیدی مومی الیه او ائساده ما کیدونیا به تسلط ایدن آتله لوری دفعده و خصوصات مهمه سائر ده پک چوق همت و غیرت ایتدی و اسکندر بابده وفات ایتدکن صکره بر مدت دخی صبی او غلنه ما کیدونیا ده وصایت ایلدی . ( آنتی پاتری ) آسیای صغری و مصر و ایران و ترکستان ممالکیله هندستان حدود لرینه قدر استیلا اولنان محارک بر مدت نوعما مرکز اداره سی حکمنده طوتیلان ما کیدونیا قرالغی و کالتنی ایجاب حال وزمانه کوره پک کوزل اداره ایتکده ایکن

خسته لنوب کندو اقرانندن یعنی اسکی جزالردن (پولیسپرسون) ی جلب ووصایت مذکورہ بی اکا تودیع ووصیت ایلدکدنصکرہ (۵۲۷۵ خ) تاریخندہ یعنی میلادک اوچیوز اون طقوز سنہ مقدمندہ آخرتہ کیتدی و اوغلی (قساندری) وصایت بنم حقم ایکن پولیسپرسونہ ویرلدی بن حقمی آلورم دیهرک قلقوب و برچوق طرفدارلر پیدا ایدوب وصی مومی الیه ایله برقاچ سنہلر محاربه ایتدی عاقبت (۵۲۹۳ خ) تاریخندہ یعنی میلادک اوچیوز برسنہ مقدمندہ ما کیدونیا و یونانستان قرالیتنی قزانندی لکن چوق خسار و غدرلر وقوعبولدی .

§

آنتی غون یاخود (انتی یوخون) — اسکندر رومینک مشهور جزالرنندیر . اسکندرک وفاتیلہ ممالکی جزالری بیندہ تقسیم اولندیغی صرہدہ بونک حصہ سنہ دخی (لیدیا) و (پافیلی) و (فریکیا) ولایاتی اصابت ایتش ایدی مرقوم ولایات مذکورہنک زمام اداره سنی النہ آلدقدنصکرہ میلادک اوچیوز برسنہ مقدمندہ ارقداشرندن سلوکوسک ممالک مصیبه سنہ دخی کوز دیکهرک تجاوزاتہ باشلادی واسیای صغرآنک یوقاریلرینہ و سوریه یه طوغری ایچہ ی قزاندیسده صوکنی کتوره مدی و عاقبت سلوکوسک طرفدارلری اولان مصر و یونانستان و تراس حکمدارلرینک معاونتیلہ وقوعبولان (ایسوس) محاربه سنده قتل اولنوب غوغای جهانندن قورتلدی .

§

آنتی یوخوس — سلفکیان یاخود (سلوسید) دولتی حکمدارلردن اولان اشبو ایکنجی انتی یوخوس (۵۳۳۲ خ) تاریخندہ یعنی میلادک ایکیوز ایتش ایکی سنہ مقدمندہ تختہ جلوس ایتدی وآرہدن التی سنہ کچرکچمز زیر جایه سنده اولان (طبرستان) ولایتندن (ارشک) نامندہ برصاحب خروج ظهور ایدوب (ارشکانیان) دولتنی تشکیله باشلادی و انتی یوخوس برمدت مرقومک هجمات متوائیه سنہ و برمدت دخی مصرلورک تجاوزاتہ قارشو تدارکات و محاربات ایله اوغراشدیغندن تاب و توانی کسلدی و مصرلوره مغلوب اولدیغی جهتله مصر

حکمدارینک قزینی تزوج ایتمک واندن حاصل اوله جق چوجق (سلوسید) حکومتنه ولی عهد ایدمک کبی نتیجه سی وخیم شرائطی قبول ایله عقد مصالحه یه مجبور اولدی و استر استه مز قزی آلدیسه ده بو مناسبتله تطلیق ایلدیکی اسکی قاریسی ایلروده ظهوری ملحوظ اولان مضرتیه میدان قالماق وقوجه سندن انتقامنی آلمش اولق اوزره بیچاره انتی یوخوسی و متعاقباً مصرلی قزی تسمیم ایدوب کندو صبی اوغلنی تخته اوپورتدی و هرکس بو تدبیر و اجرا آتدن ممنون اولدی.

§

﴿ آنتی یوخوس ﴾ — بودخی سلفکیان یاخود (سلوسید) دولتی حکمدار لر نندیر . بو بیچاره ( ۵۴۰۶ خ ) تاریخنده یعنی میلادک یوزسکسان سکز سنه مقدمنده جلوس ایتدکدن براز صکره رومادولتنه مغلوب اولدیغندن برچوق ممالک ترکیله و کیتلو تضمینات اعطاسیله عقد مصالحه یه مجبور اولدی لکن تضمینات مذکوریه نی تدارک ایچون کلیسانک مجوهرات و سیم وزرینی کاملاً اخذ و تلف ایندیکندن طولای بی الاهالی حاصل اولان انفعال و نفرت عاقبت خلع و اعدامنه سببیت ویردی .

§

﴿ آنتی یوخوس ﴾ — ایقان — بودخی سلفکیان یاخود (سلوسید) دولتی حکمدار لر نندیر . بونک یهودیلره اولان خصومتی و یهودیلرک بوندن توحشه بر اختلال چیقارمغه استعدادی کون بکون قوت بولدیغندن مر قوم ( ۵۴۲۶ خ ) تاریخنده یعنی میلادک یوز التمش سکز سنه مقدمنده کیدوب قدس شریفی اوردی و بیت مقدسی یغما ایتدیردی و مذهب یهودیه یی بتون بتون اورته دن قالدیرمق ایچون یهودیلرک کندو صمنه پرستش ایتلرینی و خنزیر اتی یملرینی امر و ختانی منع ایدوب موجنبجه عمل ایتیانلری اعدامه قالشدی و نقدر تورات نسخیه سی و ارایسه جله سنی کتوروب آتشدیه یاقدی یهودیلر بو درجه ظلم و تعدی و شدته تحمل ایده مدکارندن شواحق جباله چکلدی ایقانک عسکری قدس شریفدن چیقدیغی کبی ( مطاطیه ) نامنده بر خا خام خروج ایدوب ایقانک براقدیغی مأمورلری کاملاً قتل و طرد و ( حشمنای ) نامنده بر حکومت یهودیه تشکیل ایتمش و بو حکومت ( ۵۴۲۹ خ ) تاریخندن

یعنی میلادك یوز الشمس بش سنه مقدمندن اعتباراً ایکسوز اوتوز بش سنه دوام ایشدر.

§

﴿ آنتی یوحیا ﴾ — انطاکیه شهرینک نام عتیقیدر. ( انطاکیه )  
کله سنه نظر بیوریه.

§

﴿ آنتی ستن ﴾ — حکمای یونانیه دندر. بو ذات ( ۵۱۷۰ خ )  
تاریخنده یعنی میلادك در تیوز یکر می درت سنه مقدمنده کسب اشتهار ایدوب  
( اسنیق ) یا خود ( کلبیون ) طریقنی احداث ایلدی. بو طریقك قاعده سی  
عسرت و ضجرته تحمل و احتشام و الایشدن و حسب و نسیله و علوم  
و معارفله تفخر دن اجتناب و قوری طپراق اوستنده یاتوب یالکز اتمک و صویه  
قناعت و اشو صبر و سفالتله جناب حقه تقرب ایمش. مشهور ( دیتوژن )  
دخی بو طریقك اولور ندن ایدی. ( دیتوژن ) کله سنه دخی نظر بیوریه.

§

﴿ انجماد ﴾ — تقطیر اولنش صو صفر درجه ده تصلب ایدرک  
بوز حالنه کیرر یعنی انجماد ایدر و بو حالده کثافتی ازالدیغندن صویك  
اوستنده یوزر. صویك درت درجه ده قدر تبریدنده جمی منقبض اولدیغی  
حالده صفر درجه ده قدر تبریدنده جمی منبسط اولدیغی شایان تعجبدر  
قابل دروننده منجمد اولان صولرک قابلری پاره لمسی ماء منجمد جملرینک  
بیولسندندر و مع مافیه قطری غایت طار بوری دروننه وضع اولنان صو  
صفر دن یکر می درت درجه اشاغی بر درجه ده قدر بیله تبرید اولنسه ینه  
انجماد ایتز حتی اغاجلرک صغوقدن قوریماسیده صولرینک غایت طار قابلر  
دروننده بولنسی حکمتنه مبنیدر.

§

﴿ انجیل ﴾ — الیوم موجود اولان اناجیل اربعه ( متی ) و ( مرقس )  
و ( لوقه ) و ( یوحنا ) معرفتلیله یازیلاندر و بونلردن بشقه نشر دین  
نصارایه مأمور اولان ذواتک قلم آلدقلمی رسائل متعدده دخی اناجیل  
مذکوره زیرنده محرر اولوب اکثر مندرجاتی قصص و تشبیهات و موعظه

تاریخچه دن عبارتدر . اناجیل اربعه مذکور دن بشقه دها بر چوق  
 انجیل یازلمش ایسه ده جله سی متروک و موقوفدر حتی بونلردن لوندره  
 کتبخانه عمومیسنده محفوظ اولان بر انجیلده قرآن کریم ناطق اولدیغی  
 اوزره حضرت (عینی) علیه السلام سمایه رفع بیورلدیغی ومصلوبک  
 مشارالیه شبیه بر دیگر کسه اولدیغی مذکوردر .

	باب	کتاب
اناجیل		
حواریون دن متی یاخود ماتیئوسک یازدیغی	۲۸	۱
مرقسک یازدیغی	۱۶	۱
انطاکیه لی طیب لوقه نک یازدیغی	۲۴	۱
حواریون دن یوحنا یاخود یوانیسک یازدیغی	۲۱	۱
		۴
رسائل		
رسوللرک اعمالی	۲۸	۱
بولوسک رومالوره کوندردیگی رساله	۱۶	۱
بولوسک قورینت اهالیسنه کوندردیگی برنجی رساله	۱۶	۱
بولوسک قورینت اهالیسنه کوندردیگی ایکنجی رساله	۱۳	۱
بولوسک غلاطیه لوره کوندردیگی	۰۶	۱
بولوسک افسوس اهالیسنه کوندردیگی	۰۶	۱
بولوسک فیلیپولیره کوندردیگی	۰۴	۱
بولوسک قولوسیلوره کوندردیگی	۰۴	۱
بولوسک سلانیک اهالیسنه کوندردیگی	۰۵	۱
بولوسک سلانیک اهالیسنه ایکنجی دفعه کوندردیگی	۰۳	۱
بولوسک افسوسده تیموتوسه کوندردیگی	۰۶	۱
بولوسک بنه مرقومه کوندردیگی	۰۴	۱
بولوسک کریده یتوسه کوندردیگی	۰۳	۱
بولوسک رومادن فیلونه کوندردیگی	۰۱	۱
بولوسک ایتالادن عبرانیره کوندردیگی	۱۳	۱
حواریون دن ایکنجی یاقووسک رساله نهمی	۰۵	۱
حواریون دن پتروسک برنجی رساله سی	۰۵	۱
مومی الیهک ایکنجی رساله سی	۰۳	۱
حواریون دن یوحنا نک برنجی رساله سی	۰۵	۱
مومی الیهک ایکنجی و اوچنجی رساله سی	۰۲	۲
یهودانک رساله سی	۰۱	۱
یوحنا نک (اپوقالیسیس) ی	۲۲	۱

﴿ آند ﴾ — اسپانیا دولتک آمریقا مستملکاتی داخلنده بر سلسلهٔ جبالدر. بو سلسله آمریقای جنوبیده ساحلاً جنوبدن شماله طوغری متمد اولور و اوزرنده دائماً قار بولنور پک چوق وولقانلری واردر اتکرنده هر اقلیمه مخصوص اولان نباتات و شکر قامشی یتیشور واک یوکسک محلیک ارتفاعی یدی پیک طقوز یوز مترو تخمین ایدیلور .

§

﴿ آندره ﴾ — ( ۱۰۴۶ م و ۴۳۸ هـ ) تاریخندن ( ۱۳۰۱ م و ۷۰۱ هـ ) تاریخنه قدر بحارستانده حکومت ایدن قرالره مخصوص بر عنوان ایدی .

( سنت آندره ) روسیه قرالی پیوک پترونک ( ۱۶۹۸ م و ۱۱۱۰ هـ ) تاریخنده احداث ایلدیکی امتیاز نشانک اسمیدر بو نشان مائی مینا ایله ایشلمش بر خاچ اولوب اورته سنده حواریوندن ( اندریاس ) ک اسمی واوستنده بر تاج ایله ( دین ) و ( صداقت ) کله لری محرردر و بر مائی قوردونی واردر . دولتجه پک پیوک بر خدمت ارئه ایدن کسه لره و یریلور .

( آندره ) دولت عثمانیه ده قپودانلق دریا داخلنده بر سنجاق اسمیدر .

§

﴿ آندره پور ﴾ — صوماره جزیره سنده ینه بو نامده اولان نهرک آغزنده بر شهرک اسمیدر . بو شهر وقتیلله بر قوتلی سلطانک مقر سلطنتی ایدی .

§

﴿ آندریاس ﴾ ( یا خود اندراووس ) — حواریونک ایکنجی سیدر . بو ذات صیدا اهالیسندن و بالتجی اصنافندن ایکن برادری ( پتروس ) ایله ( قانا ) نک دکونده حضرت عیسی علیه السلامک بعض معجزاتی کوره رک ایمان ایدوب داخل بز نگاه سعادت لری اولدی مشار الیهک رفعندن صکره انطولی و ما کیدونیا ممالکنده سیاحت و خلقی دین عیسی علیه السلامه دعوت ایدرک یونانستانه کیدوب اوراده ( پاریس ) نام قصبه ده خاچلنهرق اعدام اولمشدر . نعشی مؤخرأ مارسیلاده واقع

(سنت و یقتوار) کلیسا سینه نقل اولنمش و هر سینه کانون ثانیء فرنکینک  
اوتوزنجی کونی یورطیسی طوتمقده بولمشدر .

§

﴿ آندرین ﴾ — حلب ولایتنه ملحق مرعش سنجاغی داخلنده  
بر قصبه در بو قصبه ده اکثریسی اسلام و ماعداسی ارمنی یعقوبیلرندن  
اولق اوزره ایکیک بشیوز نفوس تخمین اولتمقده در واللی ایکی  
قریه سنده ساکن اولنلرک اکثریسی کرددر .

§

﴿ آندز ﴾ — از میر شهری اتصالنده (قدیفه) قلعه سی بایرنده  
بر محله نك اسمیدر . بوراسی مقدا آلتلرک مسکنی و گروه خذله نك  
جولانکاه فسق و فجوری اولق ملابسه سیله بونامی آلمش ایدیسده شمیدلرده  
اویله دکلددر .

آمریقای جنوبینک ساحل شمال غریبسنده برسلسلهء جبالک اسمی دخی  
(آندز) درکه بو سلسله نك ارتفاع وسطیسی اون ایکی بیک قدمدر .

§

﴿ آندلس ﴾ یاخود (اندلوزی) — الیوم اسپانیا دولتی زیر  
اداره سنده بر قطعهء جسمیده در . بو قطعه (پورتکیز) و (استرامادور) و  
(یکی قستل) اراضیسی بیننده طولاً در تیوز قرق و عرضاً ایکی یوز التمش  
کیلومتر و وسعتنده بر ولایت اولوب مرکز اداره سی (اشبیلیه) شهریدر  
واهللیسی بر میلیون سکز یوز بیک تخمین اولتمقده در هواسی غایت  
لطیف و صیحاق اولدیغندن هر درلو محصول و پورتقال ولیمون و خرما  
و شکر قامشی کبی افریقاصحولاتی یتشمکده در . اندلس ابتدا (فیکه لولر) لک  
و (قارتاچلولرک) و رومالورک زیر اداره سنه کچوب اندن صکره  
(واندال) لره انتقال ایلدی و واندالر مقر اداره لری اولان شهره (واندالیتیا)  
تسمیه ایلد کلرندن بو اسم صکره عموم ولایت ودها صکره بالتحریف قطعهء  
مذکوریه نام مخصوص (اندلس) اولدی . اسلامک اندلسی استیلایه  
باشلامسی (۷۱۰ م و ۹۲ هـ) تاریخنده و کاملاً انقراضی (۱۴۹۲ م و  
۸۹۸ هـ) تاریخنده در مدت استیلا ایکی سنه دن عبارت اولوب اندن

صکره بر طرفدن استحصال اسباب مدنیتہ و دیگر طرفدن مدافعتہ اعدایہ  
 ہمت و فرصت و مناسبت دوشدیکہ فرانسه و پورٹیکیز ممالکندن دخی  
 بعض قلاع و بقاعک ضبط و تسخیرینہ غیرت ایشلردر . اولوقت  
 اندلس دنیلان قطعہ شمدیکندن بر قاق قات بیوک ایدی و (قرطبہ) و  
 (مارده) و (سنترین) و (طلیطلہ) و (سرقسطہ) و (بلنسیہ) و  
 (مرسیہ) و (غرناطہ) کبی الیوک شہرلرده و بونلرک مادوننده کی سکسان قدر  
 قصباتده و رأس قضا حکمنده اولان اوچیوز قدر کوچک قصبہلرده و بر  
 قاق یوز بیک نواحی و قراده ساکن و زراعت و تجارت و صنایع و معارف  
 ایله مشغول اولان ہر صنف اہالینک مقداری تخمیناً قرق بش ملیون  
 رادہ سندہ ایدی .

اندلس دولت اسلامیہ سنک ال وسعتلی زمانلرندہ جمعہ کونلری اوچیوز  
 بیک خطیبک منبرہ چیقوب خطبہ او قودینگی مرویدر بورادن  
 (ابو الفضل عیاض) و (محبی الدین بن العربی) و (ابو بکر العربی)  
 و (ابن بيطار) و (ابوالحیان) کبی نیجہ بیک عالم و فاضل تیشوب نام  
 و شاننی شرق و غربہ ایشدیرمشدر .

لکن سکز یوز تاریخ ہجر یسندن صکرہ اسلامک اورالرجہ شوکت و اقبالی  
 عدم اتحاد و تعدد حکومات سیئہ سہیلہ انحطاطہ یوز طوتوب نہایت باباسی  
 محارباتلہ مشغول ایکن تختنی غصب ایدن خائن (عبدالله الصغیر) زمانندہ  
 یعنی (۱۲۹۲ م و ۸۹۸ هـ) تاریخندہ منقرض اولمشدر . محرر اولان  
 اسامی یہ دخی مراجعت بیوریلہ .

§

﴿ آندور جمہوریتی ﴾ — اسپانیانک (قتالونیا) ایالتیلہ فرانسه نک  
 (آریژ) ایالتی بینندہ و (پیرنہ) سلسلہ سی اوزرندہ کائندر واسپانیا  
 و فرانسه دولتری جایہ لرینہ داخلدر و مرکز ادارہ سی آندور شہریدر .  
 جمہوریت مذکورہ اراضیسی درونندن (ابر) نہرینہ قارشمقدہ اولان  
 (بالیر) ایرماغی آقار و بتون نفوسی (۱۰۰۰۰) تخمین اولنور .

§

﴿ آندور لانس ﴾ — پاپارک و پاپاسلرک یاپدقلری مفغرتہ و یرلش بر



نامدر. بو مغفرت کنه کار لر کناهلرینه کوره دوچار اوله جقلمی عقوبات دنیویه دن بر مقدارینی یا خود کافه سنی عفو ایتک دیمک ایسه ده بعض شرائطی واردر شو یله که یا پاسلمر مغفرت ایسته یان کنه کار لره توبه ایتدیردکن صکره حال واقتدارینه کوره بعضیلرینه پرهیز و دعا و بعضیلرینه اعطای صدقات و عزم زیارات و بعضیلرینه دخی کایسا و خسته خانه و مکتب اعانه سی کبی حسنات امر ایدر لر لکن عمومی مغفرت یالکز پایاره منحصر در. مثلا (۱۰۹۵ م و ۴۹۰ هـ) تاریخنده پایا بولنان ایکنجی (روبن) ک قدس شریفی اسلامک لندن قور تارمق ایچون سلاح طوته جق آدملره عفو عمومی اعلان اتمسی و اون التجی عصرده پایا بولنان (ژول و لیون) ک روما یسوک کایساسی مصارف تعمیریه سنه یاردم ایده جکره عفو عمومی وعد اتمسی کبی (اشته بو حالر پروتستانلنک موجدی اولان (لوتر) ه وسیله اعتراض اولشیدی.

§

﴿ انزروت ﴾ یا خود (غزروت) — لاینجه سی (سار قوقول) عربستان و ایران طرفلرنده چیقار بر نوع اوت تخمیدر رنکی صاری یه و بعضاً قرمزی یه مائل و پارلاق و صغلی و طبیعتی حار و مسکردر صغنی مقدما طببا قوللانور لر ایدی ایوم مصرده طائفه نسا وجود لرینه سمن کلک ایچون جامدن چیققدن صکره قوللانور لر.

§

﴿ انس ﴾ — بن مالک رضی الله عنه — علیه الصلوة والسلام افندمز مدینه منوره یه هجرت بیوردیغی کون اهالی مدینه نک هربری برهدیه تقدیمیه مظهر التفات سنیه لر ای اولدیغی صرده حضرت انس رضی الله عنک والده سی دخی حضور پیغمبری یه چیقوب یار رسول الله بن دخی خاکپایکه برهدیه تقدیم اتمک استرم لکن اقتدارم مفقود اولدیغندن شو یتیم جکر پاره می کتوردم و سکا هدیه ایتدم الی آخر العمر خدمت نبویه کده بولنسون دیدی و حضرت پیغمبر افندمز دخی زیاده سیله ممنون اوله رق قبول و مومی الیه التفات بیوردی. حضرت انس تمام اون سنه خدمت جناب نبویه بولنش و ادعیه سنیه لر بر کاتیله پک چوق

ثروته مالک اولوب یوز سنه دن زیاده عمر سورمشدر . اصحاب کرام رضوان الله تعالی علیهم اجمعین حضراتنک ایچنده اک چوق اولادی اولان و اولاد و اولاد اولادنن یوز نفرینی کورن حضرت انس ایدی .

§

﴿ انسجام ﴾ انواع بدیعدن بر نوعدر ناظم یاخود نائرک کلامی تعقید لفظی و معنویدن خالی و مفهومی غایت بسیط و الفاظی دقیق و جلیل المعانی و تکلف و تعسفدن بری اوله رق طبیعتیله ایراد ایتمسه اطلاق اولنور بوده انجق سلامت ذوق و توقد فکر و براعت انشا ایله میسر اوله بیلور تکلف و تصنع ایله ممکن د کلدرد .

§

﴿ انسیر ﴾ — انقره شهرینک نام عتیقیدرد . انقره کله سنه بیوریه .

§

﴿ آنصار ﴾ — علیه الصلوة والسلام افندمزه مکه مکرمه ده و بعد الهجره مدینه منوره ده معاونت ایدن ( اوس ) و ( خزرج ) قبیله لری اهاالیسی دیمکدر . اشبو ایکی اسم و قتيله قبیلتین مذکور یتنه رئیس اولان ایکی قرداشک اسمی و اهاالیسی اولاد لری ایدی . ( اوس ) لغتده قورد معناسنه در .

§

﴿ انطاکیه ﴾ حلب ولایتی داخلنده و ( اورونت ) نهری کنارنده بر شهر شهردر الیوم اون یدی بیک اهاالیسی واردرد و قتيله اطرافنده دفنه اغاجی چوق اولدیغندن یونانیر ( دفنه ) دیرلر ایدی . بونی سلفکیان یاخود سلوسید دولتی حکمدارلرندن ( انتی یوخون ) نامنده بر ذات یایدیروب حضرت ( عمر ) رضی الله عنه زماننده ید اسلامیانه یکمش و بر مدت مصر لولر اداره سنده قالوب ( ۱۵۱۶ م و ۹۲۲ ه ) تاریخنده دولت علیه ید انتقال ایتمشدر .

انطاکیه یونانیر زماننده ایکیوز بیک نفوسی جامع و حلبدن معمور و خیلی زمان ایمراطور لره پای تحت اولمش بر شهر جسم اولوب ایچنده ( آپولون ) ک بریسوک هیکلی وار ایدی لکن سلوسیدلرک و فرس

حکمداری (شاپور) وسائرهنک هجمات شدیده ومتوالیهسی وبالدفعات  
وقوعبولان حرکت ارض بلیهسی ایله خراب اولمش واولکی حالنه نسبتله  
شمدی قریه حکمنده قالمشدر .

آق شهردن طاغه طوغری التي ساعت کیدلدکده وقتيله اوراده دخی  
(انطاکیه پیسیدیم) نامنده برشهر وار ایدی والیوم نصیبین دینلان  
شهرک اسمی دخی مقدا (انطاکیه مغدونیا) ایدی . انطاکیهده پک  
چوق ایپک وزیتون یاغی وصابون تجارتی اولور .

§

﴿ انطالیه ﴾ — قونیه ولایتنه تابعتکه سنجاغی داخلنده برقصبهدر  
وازمیرک جنوب شرقیسنده وایکی یوز اللی میل بعدنده اولان انطالیه  
لیمانی دروننده واقعدر واون سکز بیک نفوسی واردر . انطالیه بی  
(پرغام) یعنی برغه حکمدارلرندن ایکنجی (رومن) (۵۴۰۱ خ) تاریخنده  
یعنی میلادک یوز طقسان اوچ سنه مقدمنده یاپدیروب پدزی (انتال) ک  
نامی ویردی وروما ایمراطورلرندن (ادریا) نک شرفنه برطاق ظفر  
یاپدیردی . بوشهر طبقه طبقه ایکی قات سور ایله احاطه اولمش وسورلرک  
بربرندن بعدی التمش ذراع بولنمشدر اطرافنده بی بوستان وبعجهلرده  
پک کوزل میوه وسبره واراویسینده پموق وافیون وخرنوب ولیمون  
وطوت وسائره یتشمکده وطوز وقطران وکراسته چیقمهدهدر .

(۷۹۰ م و ۱۷۴ ه) تاریخنده عساکر اسلامیه نک اشبو انطالیه لیمانه  
اینوب استانبول ایمراطورینک موجود اولان دونماسنی کاملاً احراق  
ایلدیکی توارینخده محرر ایسهده بو وقعه نک خلیفه (مهدی) زماننده یعنی  
هجرتک یوز التمش بشنجی سنه سنده اولسی دخی مأمولدر .

اسکی انطالیه دینلان (سیدا) شهر عتیقنک خرابهسی کو پری صوینک  
بحره منصب اولدیغی محلهده حالاً کورلمکدهدر .

§

﴿ انطوان ﴾ یا خود (اتونیوس) — بو ذات روما دولتی  
قونسلارندن ایکن (۵۵۰ خ) تاریخنده یعنی میلادک قرق درت سنه  
مقدمنده وروما ایمراطوری (سزار) ک عقیب قتلنده اخص رفقاسندن

ایکی ذات ایله سوزی پیشروپ روما ممالک جسمه سنی کویا مشترکا اداره اتمک اوزره اوچه تقسیم ایتدی و کندو حصه سنه اصابت ایدن آسیا و ما کیدونیا و سوریه و یونانستان ممالکنه کیدوب حکومتی اعلان ایلدی و سلاله ملوک بطالسه دن مصر حاکمه سی مشهوره (قله ئو پاتر) ایله بالمناصبه ملاقات ایدوب حسن و آن و شیوه و رفتار ینه دلسته اولدیغندن بردهنا بر لرندن آیرلماق و ملکرینی برلکده اداره اتمک اوزره عقد اتفاق و محبت ایلدیلر لکن حریرص اقبال اولان و دیگر شریکی (لییدی) ی قتل و ملکنی غصب ایدن شریک سلطنتی (او قتاو) بونک دخی ازاله سنه فرصتجو اولدیغی حالده مومی ایها ایله ملاقاتنی خبر الدیغی کبی رومالوری بالتشویق اوزرینه عسکر چکوب (آقسیموم) ده محاربه ایتدی و بو محاربه یه معشوقیله برابر کلمش اولان مومی ایها قله ئو پاتر مغلوبیت کندو طرفلر نده واقع اوله جغنی حس ایتدیکی کبی کتوردیکی مصر عسکر یله برابر مصره رجعت ایلدیکندن (انطوان) ضعیلیوب فنا حالده مغلوب و او دخی مصره فراره مجبور اولدی و عارندن کندو کندوسنی اولدوردی .

(آقسیموم) ناره کورفرزی داخلنده در .

غول ممالکنک دخی انطوانه عائد اولدیغی بعض توار یخده کورلدی بو حالده اولوقت یونانستانه و ما کیدنیابه مربوط ممالکک بعضیسنده دخی غول وار ایمش دیمک اولور .

§

﴿ انعکاس ﴾ — حکمت طبیعیه ده انعکاس ضیا و حرارت و صدا خطوط منتشره سنک بر مانعه تصادفیه تبدیل استقامت اتمسنه دیرلر فقط بو خاصه ضیا و حرارت و صدا ایله (الاستیقی) جسملرک مصادمه سنده بر قانونه تابع اوله رق جریان ایدر .

اولا نقطه انعکاسده برلشان خط وارد ایله خط منعکس و خط اصلی بر مستویده بولنورلر ثانیاً خط وارد ایله خط منعکس خط اصلی ایله مساوی زاویه رسم ایدرلر .

§

﴿ انقره ﴾ — یاخود (انکوری) شهری — قونیه نک جهت

شمالیسنده وایکیوز الشمس بش کیلو مترو بعدنده ینه بونامده اولان ولایتک مرکزیدر . و تخمیناً قرق بش بیک نفوسی واردر .

بو ولایتده حاصل اولان کچی وقیون تفتکی غایت اوزون و یومشاق و بیاض و پارلاق اولدیغندن اورو پالولر آلوب نفیس قاشلر پیارلر و اولنان طوشانلرک توکلرینی دخی معتبر طوتارلر . بوراده هر درلو محصولات یتشدیکی کچی میوه سی دخی پک کوزل اولور ایسه ده عصر اخیره بر قاق دفعه قحط ظهور ایلشدر . انقره ده قیصر (اوکوست) ک برهیکلی و مشتری به منسوب دیگر بر جسم هیکل وار ایدی و بر معبد خرابه سی اوزرنده قیصر مشارالیهک وصیتنامه سی محکوک ایدی حتی اورو پالولر وصیتنامه مذکور اوزرنده ایکی کتاب تألیف اتمشدردر انقره اسکندر رومینک و سائر ملوک رومیه نک یدینه دخی کچوب مؤخرأ عجملر طرفندن استرداد اولندی و هارون الرشید و معتصم زمانلرنده یداسلامیانه ودها صکره سلجوقیلره کچوب (۱۳۶۰ م و ۷۶۲ ه) تاریخنده سلطان (مراد اول) حضر تلرینک همیشه قرمان امارتندن استخلاص و ممالک دولت علیه به الحاق ایدلدی . (۱۴۰۱ م و ۸۰۴ ه) تاریخنده سلطان (یلدیرم بایزید) خان ایله تیمورلنکک محاربه مشهوره سی و خان مشارالیهک اسارتی انقره صحراسنده وقوعبولمشیدی

§

﴿ انقلابین نقطه لری ﴾ — شمک حرکت سنویه ظاهر یه سنده

منطقه بروج اوزرنده خط استوادن اک بعید بولندیغی و یاخود میلنک اک زیاده اولدیغی نقطه لره دینور شمک مذکور نقطه لره ورودنده جزئی توقف ایدر کچی اولسی وجه تسمیه اولشدر و مذکور نقطه لردن نصف کره شمالیده بولنانه (انقلاب صیفی) و نصف کره جنوبیده بولنانه دخی (انقلاب شتوی) نقطه سی دنیلور . شمک انقلاب صیفی یه وصولی حزیرانک سکز و یا طقوزنده واک اوزون کونلرده و انقلاب شتوی یه دخولی دخی کانون اولک سکز و یا طقوزنده واک قیصه کونلرده وقوع بولور . اشبو ایکی انقلاب نقطه لردن بشقه ایکیده اعتدالین نقطه لری اولوب محرک سنوی شمسی بی درده تقسیم ایتلریله شمک محرک منقسمی دوری فصول آر بعده حصوله کتورر .

§

﴿ انکروس ﴾ — (هونغوروس) ک غلطیدر . (هون) کله سنه

نظر بیور به .

§

﴿ انکسار ﴾ — ضیانک خطوط منتشره سنک واسطه لطیفه دن

واسطه کثیفه به دخولنده تبدیل استقامت ایتمسنه دنیلور . و برخط شعاع وارد ایله موقع تقاطعدن رسم اولنان خط شعاع اصلی استقامتیه احداث ایلدیکی زاویه به (زاویه انکسار) دیو زاویه بی شامل اولان سطحه دخی (سطح انکسار) اطلاق اولنور .

اگر بر شعاع وارد یالکز بر شعاع منکسر حاصل ایدرسه اکاده (انکسار مضاعف) دینور .

ضیانک آثار انکسار به سی هر وقت و جزئی بر دقتله کور به ییلور مثلا بر دکنک صویه طالدرلمش اولسه صوده کی قسمیه غیر مغطوس قسمی منکسر کور ییلور عموماً صویه طالدریلان شیر صوده دها ییوک رؤیت اولنور بناء علیه صوده بولنان بالقر صوده بولندقری مسافه دن دها یقین بر موقعه دن اولنور . اجرام سماویه ضیاری طوغریدن طوغری به نظره واصل اوله مدیغی حینده افقده مرئی اولور طلوع وغروب شمسن اول و صکره حصوله کلان فجر و شفق دخی انکسار ضیادن حصوله کلور .

§

﴿ انکلتره ﴾ — بحر محیط اطلاسیده واورو یا قطعه سی جوارنده

واقع (بریتانیای کبیر) نام اطه نک جهت جنوبیسنده بر قطعه جسمه در بو قطعه شمالاً (استوچیا) و غرباً (ایرلنده) و شرقاً شمال و جنوب (مانش) دکر لیه محدوددر شمالدن جنوبه طوغری وسعتی بش یوز یتش شرقدن غربه طوغری درتیسوز یکر می کیلو مترو دن عبارتدر و منقسم اولدیغی قرق عدد قوتلقده یکر می بش ملیون درتیوز سکسان بیک و عموم بریتانیا جزیره سیله ملحقاتنده اوتوز درت ملیون بشیوز بیک نفوسی تخمین اولقنده در انکلتره نک شمال جهتیله غال امارتسندن ماعدا اراضیسی طاغلق دکل ایسه ده صفوغی زیادهجه وهواسی دائماً سیسلی ورطو بتلیدر .

روما امپراطورى (سزار) ك (۵۵۴۰ خ) تار يئخنده يعنى ميلادك اللى درت سنه مقدمنده بریتانیا به ایکی دفعه هجموی توار یئخده محرر ایسه ده شایان امنیت اولیوب اندن صکره سی مضبوط و معلوم اولدیغندن تفصیلاتنه کیریشلمدی. انکلیر لساننك اصلی (ساقسون) لسانیدر بتون (بریتانیا) جزیره سنده بولسان قوللانقده ایسه ده اهالی قديمه نك بر طاقی اسکی (سلتیک) و (ارس) لسانلرینی دخی قوللانقمده درلر. بریتانیای کبیر حکمداری بولنان ذات (انکلیقان) کلیساسنك ناظری و بتون ملتک رئیس روحانیسی صاییلور.

انکلتره دولتک اوروپا و آسیا و آفریقا و آمر یقاده متصرف اولدیغی مستملکات و مستعمراتی پک چوقدر و وسعتی بیاغی کره ارضک ثلث مقدارینه و مجموع سکاتی سکان ارضک ربع مقدارینه معادل اولور. (حکومت) کله سنه دخی مراجعت بیور یله.

انکلتره دولتک ابتدای تشککندنبرو حکمدارلق ایدن ذواتک مقدار یله منسوب اولدقلى خاندانلر.

عن	الی	حکمدار	منسوبیتلری	برنجیلری
۸۰۰	۱۰۱۳	۱۴	ساقسون	اغبرت
۱۰۱۳	۱۰۶۶	۰۸	ساقسون دایمیارق	سونه نون
۱۰۶۶	۱۱۵۴	۰۵	نورمان	کیلیوم
۱۱۵۴	۱۴۸۵	۱۴	پلانٹازنت	هانری ۲
۱۴۸۵	۱۶۰۳	۰۵	طودور	هانری ۷
۱۶۰۳	۱۶۸۹	۰۶	ستوارد	ژاق
۱۶۸۹	۱۷۱۴	۰۲	اورانژ	مریم
۱۷۱۴	۰۰۰۰	۰۰	هانور	جورج

§

انکیرمان — قریم شبه جزیره سنده و سیواستپول لیماننك نهایت شرقیسنده و (چرنایه) صوینك آغزینه یقین محله ده بر قصبه در. بوقصبه نك جوارنده بر چوق خرابه لر و قیابرك ایچروسنه طوغری او یولش مغاره لر بولندیغنه نظراً بوراسی وقتیلله (قینه نوس) دنیلان مملکتک یری واسکی کوزلوه نك جواری ظن اولنقمده در. (۱۸۵۴ م و ۱۲۷۴ ه) تار یئخنده دولت علیه نك روسیه علیه نه متفق اولان فرانسه

وانکلتره دولتری عسا کر معاونه سی بوراده روسیه لیلری فنا حالده مغلوب  
و پریشان ایشیدی.

هوجه بك طرفرنده اولان (آق کرمان) بشته در.

§

﴿ انکیزیسیون ﴾ — قتلک مذهبنی محافظه و خلافتده اولنلری  
تأدیب و تریه ایچون (۱۲۳۲ م و ۶۳۰ ه) تاریخنده اسپانیاده (قطالونیا)  
شهرنده تشکل ایدن جمعیت رهبانیه نك اسمیدر. بوجعیت اسپانیانك  
هر طرفنده برر شعبه آچوب مسلمانلره و یهودیلره و بونلرک طرفدار و محبلری  
اولان و محار به لرده مسلمانلره معاونت ایدن قتلکره اتمدکری ظلم و تعدی  
واذا وجفا قالدی. واقعا انکیزیسیونك ابتدای تأسسنده و طیفه سی  
روحانی متهم اولنلری جزالندیرمقدن عبارت ای دیسه ده صکره لری یعنی  
(۱۲۸۱ م و ۸۸۶ ه) تاریخنده اندلس اهالی مسله سنك بتون بتون محو  
و طردینه یوریان قرال (فردیناند) و زوجه سی (الیزابت) دن  
زیاده جه یوز بولملری اوزرینه قامتی آز دیروب ایشی اولدرجه یه  
واردیدیلرکه عندرنده متهملری بودروملره آتوب آجلق و صوسزلقله  
اولدیرمک و آتشدنه یاقق و خاطر و خیاله کلدک اشکنجه لره تلف و یاجروح  
ایتمک طاوق کسمک قدر ییله اهمیتلی دکل ایدی. بوخبات برآره لق  
فرانسه و ایتالیا ممالکنه دخی سرایت ایدوب ایکنجی (فلیب) زماننده  
(پی پا) ده بر یوک اختلاله و اورانك اسپانیادن تفریقنه سبب اولشدر.  
اشبو انکیزیسیون جمعیتلرینک آزغنلغی تاریخندن تاریخ الغاسی اولان  
(۱۸۰۸ م و ۱۲۲۳ ه) تاریخنه قدر ایتدکری ظلم و جفانك درجاتی بیلمک  
ایچون زیرده محرر حسابی مطالعه و تصور کافیدر.

نفوس عدد

شیرلندن دیار آخره فرار ایدن	۵۰۰۰۰۰۰
کورکه وزنده وضع اولنوب اکثریسی تلف اولان	۰۲۹۱۱۵۴
قورقولرندن و اشکنجه دن تلف اولان	۰۰۴۳۰۰۰
دیری دیری احراق اولنان	۰۰۳۳۷۴۶
بعدالاعدام جسملری احراق اولنان	۰۰۱۸۰۲۷



اشکنجه دن مجروح اولان ۰۰۱۸۰۰۰

یکون بش ملیون درتیوز اوچبیک طقوز یوز یکریمی ۰۵۴۰۳۹۲۷

یدی نفوسدر .

§

﴿آنوش﴾ — شیث بن آدم علیه السلامک اوغلی وولی عهد و خلیفه سیدر . پدرینک وفاتندنصکره ( ۱۳۰۲ خ ) تاریخنده یعنی میلادک درت بیک اکیوز طقسان ایکی سنه مقدمنده مقام خلافتنه کچوب اوتوز سکز ییل کال عدل وحقانیتله حکومت سوردی وطقوز یوز اللی ییل معمر اولدی

زماننده کره ارضک ثلث مقدارینی صو باصدیغی بعض توارینخده کورلشدر .

§

﴿آنوشان﴾ — ملوک ارامنه دن مقتول ( کارطوس ) ک اوغلی و خلفیدر . پدری موچی الیه ( ۳۸۶۵ خ ) تاریخنده یعنی میلادک بیک یدی یوز یکریمی طقوز سنه مقدمنده آثور یا محاربه سنده قتل اولندیغی زمان بوذات آثور یلرک مقراداره سی اولان ( نینوه ) حبسخانه سنده محبوس ایدی پدرینک قتل اولندیغی خبر آلدیغی کبی برتقریب قورتیلوب ممالک موروثه سنی استخلاصه موفق اولدی والتش اوچ سنه سلطنت سوروب ( ۳۹۲۸ خ ) تاریخنده بلا ولدوفات ایتمکله ( ارامیان ) سلاله حکمرانیسی منقرض اولوب ممالکی رؤسا و وکلا بیننده تقسیم اولندیغندن ارمستان سکز یوز سنه قدر طوائف ملوک هیئتنه کیردی .

§

﴿آنه﴾ — ( ۴۳۲۴ خ ) تاریخنده یعنی میلادک بیک اکیوز یتش سنه مقدمنده منقرض اولان ( ترووا ) دولتی حکمدارلرندن متوفی ( پریام ) ک دامادیدر . بوذات قاشنی پدرینک مغلوب و مقتولیتندن صکره برچوق مهاجرلر ایله آفریقایه واورادن برسنه صکره ایتالیا یه کچوب توطن ایلدی و براز مدت صکره ( لاتیوم ) دیدکلری اهالی قدیمه نک یعنی ( آبوریز ) لرک ریئسی اولان ( لاتینوس ) ک قزینی آلدی ومؤخرأ ( روتول ) محاربه سننده خیلی قهرمانلق کوستردیکندن اهالی مرقومه نک محظوظیتنی قزانوب قاشنی پدرینک وفاتندن صکره ریاست مذکوزه یه نائل اولدی .

تاریخ مذکور در بشیوز اون یدی سنه صکره روما دولتی تشکیل ایدن  
ذات اشبو (آنه) سلاله سندندر .

§

﴿ آئی ﴾ — قارصک شرق جنوبیسنده و اوتوز کیلو مترو بعدنده  
براسکی شهردر . بوشهر وقتیه ارمنستان حکمدارلرینک پای تختی  
اولدیغندن پک معمور و قلعه سی اولوقته کوره برنجی درجده متاتله مشهور  
و یوز بیک خانه و بیک کلیسایی اولدیغی متواتر ایدی . بوقلعه یی  
( ۱۰۴۵ م و ۴۳۷ هـ ) تاریخنده یونانلر بیک غیرتله ضبط و ( ۱۰۶۳ م  
و ۴۶۶ هـ ) تاریخنده ( الب ارسلان سلجوقی ) خندقلر طلوسی عسکر  
فداسیله استیلا ودها صکره کر جیلر و عجملر وارمنیلر و مغوللر بر برینی  
متعاقب هجوم و سنه لرله محاصره و تضییق ایلدک لرینسه بناء اهاالیسی  
طاغلدی و ( ۱۳۰۹ م و ۷۱۹ هـ ) تاریخنده دخی بر بیک حرکت ارض  
و قوعبولدیغندن خراب اولوب ایلر طوتار یری قالدی .  
شمدی یالکز بعض آثاری کورلمکده و موجود اولان خراب سورینک محیطی  
اون التی میل تخمین اولنقده در .

§

﴿ آنبیل ﴾ — قارتاج دولتی برنجی جزالردن مشهور ( آمیلقار ) ک  
اوغلیدر . هر محاربه ده پدریله برابر بولنوب فنون حربیه یی تحصیل  
ایتدیکندن پدرینک وفاتنده یکرمی بش یاشنده اولدیغی حالده برنجی جزال  
تعین اولمش و قارتاج دولتی اوتهدنبرو ( روما ) دولتیله معارض و اخذ ثاره  
مرصد بولندیغی جهتله ( ۵۳۷۵ خ ) تاریخنده یعنی میلادک ایکبوز  
اون طقوز سنه مقدمنده برنجی ( پونیک ) معاهده سنی نقض و اعلان حرب  
ایدوب اشبو ( آنبیل ) ی روما جایه سنده اولان اسپانیا اوزرینه  
کوندرمشیدی ( آنبیل ) ذاتاً رومالوره خصومت ایتک و بهممه حال  
برانتقام آلق ایچون پدرندن نصیحت آلمش و پدرینک حال احتضارنده  
نصیحت مذکوریه یی ایفا ایده جکنه بیوک یمین ایتمش اولدیغندن ینار  
آتش کبی اسپانیاه کیدرک سبب اختلاف اولان ( صاغونت ) ولایتی  
اوروب بتون اسپانیایی تحت اطاعته آلدی و اورادن اردوسنه برچوق  
عسکر دها علاوه ایدرک و مروری اولوقته قدر محال ظن اولنان ( الب )

طاغرینی آشهرق ایتالیا به کجوب رومالورله اوچ دفعه ایتدیکی محاربه یی قزاندی و ایتالیا نك همان یاریسنی آلدی و (۵۳۷۸ خ) تاریخنده وقوعبولان مشهور (قان) محاربه سنی دخی قزانوب رومالورک برسر عسکرینی و برچوق سیناتو اعضار یله الی بیک قدر زادکاننی و یتش بیک عسکرینی تلف و ایتالیا نك ضبطنی و روما دولتنک محوینی تسهیل ایتدیسه ده (قاپو) نك ذوق و صفاسنه طالدیغندمیدر یاخود دیگر بر مطالعه یه مبنمیدر ایلرو کتمدی و برویاندن رومالور مشهور جنرال (سپیون) ایله افریقا جهته بر مکمل اردو کوندروب قارتاج دولتنک پای تختنی تحت محاصره یه آلدیغندن (آنبال) رجعت و پای تخت مذکور ی محافظه یه مجبور اولدی و هرتقدر یتیشوب براز چارپشیدیسه ده دفعلرینه مقتدر اوله مدیغنه و دولتی نزدنه مسئول و اهالی نظرنده معیوب اوله جغنی اکلا دیغنه بناء سوریه یه و مؤخرأ (پینیا) حکومتنه النجا ایلدی لکن حکومت مذکوره رومالورک امرندن چیقہ میوب کندوسنی تسلیم ایده جکنی اکلا دیغنی کبی (۵۴۱۲ خ) تاریخنده یعنی میلادک یوز سکسان ایکی سنه مقدمه ککبوزده کندو کندوسنی اولدیردی .

§

﴿آوار﴾ یاخود (آبار) - ترکستانک (توپا) نامیله متعارف اهالی قدیمه سندن و (هون) فاملیاسندن بر بیوک قبیله نك اسمیدر . بونلر ابتدا (۵۶۳ م) تاریخنده (دون) اراضیسنک غرب جهته کورندیلر و صکره طونه نك برو یقه سنه کجوب حر با یرلشدیلر و برقاچ یوز سنه صکره جرمانیا و ایتالیا یی تسخیر و استانبولی تهدید ایلدیلر ایسه ده (۷۹۶ م و ۱۸۰ ه) تاریخنده فرانسه ایمپراطوری (شارلمان) ه دیش کچوره میوب تسلیم و اطاعته مجبور اولدیلر و اخیراً اسپر معناسنه اوله رق (اسلاو) نامنی آلان طاقه ایله اختلاط ایتدیلر . (جوجان) یاخود (اویغور) ترکری دخی بونلر ظن اولنیور .

اشبو (آوار) لک بر قسیده اولوقت طاغستان حوالیسنه یرلشوب صکره مسلمان اولشور و الیوم قافقاسیه نك شمال جهته ساکن بولنشور ایسه ده مقدارلی آزالمشدر و شمیدیکی ناملری (اوزمی آوار) در . روسیه یی

( ۱۸۳۴ م و ۱۲۵۰ ه ) تاریخ ندرنبرو یکر می اوتوز سنه تهدید ایدن مشهور شیخ شامل افندی اشبو اوارلردن یاخود ( لزکیلردن ایدی .

§

﴿ آوارین ﴾ یاخود ( آوارون ) -- موره شبه جزیره سنده ( ارقادیا ) سنجاغی داخونده وساحل بجرده مستحکم برشردر . دولت علیه بوشهری ( ۱۴۹۹ م و ۹۰۵ ه ) تاریخنده برأ و بحرأ محاصره ایدرک امداده گلش اولان اوروپا دونماسی روملره اعانه ایتدیکی حالده ضبط ایلدی وعقیب فتحده اهلیدن برطاقی ونیدک عسکر یله برابر قلعه دروننده کیرلندکری محللردن و پوصولردن چیقوب قلعه یی تکرار آلدیلر ایسهده مشهور کال رئیس دونمای همایون ایله ینه کیدوب استرداده موفق اولدی ومقدما کیرلنسان و پوصویه کیرلردن اوچبیک قدر عسکر واهالی یی اعدام ایتدکدنصکره ( انیقه ) و ( اسوصا ) قلعه لرینی دخی ضبط ایلدی وقلعه مزبوره ( ۱۶۸۴ م و ۱۰۹۶ ه ) تاریخنده ینه ونیدیکولوره و اوتوز برسنه صکره ینه دولت علیه یه بکدی و ( ۱۸۲۷ م و ۱۲۴۳ ه ) تاریخنده موره سفری مناسبتیله ( آوارین ) لیمانده یاتمده بولنان اللی طقوز قطعده دولت علیه ومصر دونماسندن اللی قطعده سنی یونانلوره طرفدارلق ایدن و دولت علیه ایله دوست کچینان انکلتزه وفرانسه و روسیه دونماسی بغته کلوب دوستلق ینه باقی اولوق اوزره احراق و بشبیک قدر عساکر بحریه اسلامییه یی اسیر ایلدی . بوکافرنگکر ( ناوارین ) دیرلر وبوخساره جسارت ایدن امیرالی کویا یدنده بویله برامر یوغیدی دیو قباحتلی طوتارلر .

§

﴿ اوانس ﴾ — کلدانیلرک وقتیلله آله اعتقاد ایتدکری شخص موهومک اسمیدر . بونی نصف علیایی انسان ونصف سفلاسی بالقی اولوق اوزره تصویر ایدرلر ونوع بنی آدمه مقتضی نظامات وصنعت زراعتی تعلیم ایچون هند دکزندن چیقدیغنه ذاهب اولورلر ایدی .

§

﴿ اوپا ﴾ — یونانستانده واقع ( اغریبوز ) اطه سنک نام عتیقیدر ( اغریبوز ) کله سنه نظر بیوریه .

§

﴿ اوتیش ﴾ — بر عالم راهبک اسمیدر . بوراهب حضرت مسیح علیه السلامک حین تجسدنده لاهوت ایله ناسوتی اتحاد ایدوب تماماً لاهوت حکمنه کیردیکنی یعنی حضرت عیسانده یالکز بر طبیعت الوهیة اولدیغنی ادعا ونشر ایلدی . وبومسئله اوزرینه ظهور ایدن اختلافی بر طرف ایتک اوزره ( ۴۴۹ م ) تاریخنده ایمپراطور ( تئودوس ) ک امریله تشکل ایدن ( افس ) جمعیت رهبانیه سنده عقیده مذکوره بدرجهیه قدر قبول اولنوب بعض نصاری رد ایلدی . بواعتقاد اولوقت ( اوتیشست ) نامیله شهرت بولوب مؤخرأ ( قبط ) و ( یعقوبی ) و ( ارمنی ) شعبه لرینه انقسام ایتیش وجهه سنه بردن ( مونوفیریت ) دینلشدر . ( اعتقاد ) کله سنه دخی نظر بیوریله .

§

﴿ اوج ﴾ — شمس منیریمزه تابع اولان کواکب سیاره نک شمسک اطرافنده قطع ناقص منخیلری اوزرنده دورلرنده شمسدن الک بعید بولندقلری نقطه لره ( اوج ) تعبیر اولنور . کره ارض انقلاب صیفیده اشبو اوج نقطه سنده بولنور . وبونک عکسی اولان یعنی شمسه الک قریب بولنان نقطه لره ( خضیض ) دیلور . وکره ارض انقلاب شتویده اشبو خضیض نقطه سنده واقع اولور .

§

﴿ اوحدا الدین ﴾ — کبار مشایخ صوفیه دندر . ومسقط رأسی ( بلیان ) اسمی ( عبدالله ) در . شیخ ( ابو علی دقاق ) حضرت تارینک احفاد احفادندن واصحاب کراماتدن بر مبارک ذات ایدی . بوذات عالیقدر ابتدای سلوکننده اون برسنه خلقدن انزوا و طاغرده توطن ایدوب صکره ( ابوبکر زاهد ) حضرت تارندن تکمیل سلوک بیوردی . برکون مریدلرندن بری برحیه طوتار وحیه ادخی مریدی صوقوب وجودینی شیشیرر و شیخ مشار الیه بو حیه یی نیچون طوتندک دیومریده عتاب ایلدکده مرید ( سزخدادن ) غیر یوقدر ( بیورمش ایدیکز ) بناء علیه بنده حیه یی غیر کورمدم و ضرر مأمول ایتدم دیمسی اوزرینه شیخ مشار الیه ( اوغلم نه وقت جناب حق

قهر لباسنده کورر ایسهك اورادن قاچ ( جوانی ویردی و دما ایدوب  
اضطرابنی دفع ایلدی . شیخ مشار الیهك وفاقی ( ۱۲۸۷ م و ۱۲۸۶ ه )  
تاریخیده در .

§

﴿ اوخانس ﴾ — دولت ساسانیه بی تشکیل ایدن اردشیرك قتل ایلدیکی  
ارمنستان حکمدارینك اوغلیدر . پدری مومی الیه حال حیاتنده بونی  
رومایه کوندرمش و اوراده تربیه اوله رق بومش ایدی مومی الیه ( ۲۸۶ م )  
تاریخنده بدرینك قتل اولندیغنی خبر آدیغنی کبی رومالورك ویردیکی عسکر  
ایله ارمنستانه کیدوب تحت موروثنه اوتوردی و پت پرست ایکن خرستیانلغنی  
قبول واسمی ( تیرداد ) ایکن ( اوخانس ) ه تحویل ایلدی و رومالورك  
معاونت معنویه و جایه سیله الی بش سنه سلطنت سوروب نهایت خرستیانلق  
علیهنده بولنان تبعه سی یدیه قتل و کاحده دفن اولندی .

§

﴿ اوخری ﴾ — مناستر ولایتی داخلنده و اوخری کولیه ( قره دیرین )  
نهری کنارنده و سلانیک قضا سنك شمال غریبسنده و قرق ساعت بعدنده  
برقضا مرکزیدر . بوشهر وقتیه برمدت بلغار قرالرینك مرکز اداره سی  
اولمشیدی شمعی انجق التی یدی بیک نفوس واردر .  
اوخری کولنك طولی یدی و عرضی بر ساعتدر .

§

﴿ اوخوس ﴾ یا خود ( اوغوز ) — ملوک کیانیه فرسدن ( اردشیر بابك ) ك  
کوچك اوغلی و خلفیدر . ( اردشیر ثانی ) کلمه سنه نظر بیوریه .

§

﴿ اودواقر ﴾ مقدا آسیادن کلوب ایتالیا یه برلشمش اولان ( هرول )  
طائفه و حشیه سنك رئیس یا خود قرالیدر . بو ذات ظاهرده روما دولتی  
جایه سنده بولنور . و بعض محارباتده عسکر ویره رك اعانه ایدر و حقیقتده  
دولت مشار الیهانك ضعفندن استفاده زماننی بکر ایدی نهایت ( ۴۷۶ م )  
تاریخنده روماده بر اختلال چیقاروب ایمر اطوری خلع و کندوسنك ایتالیا  
قرالغنی اعلان ایلدی .  
بونجه سنه لر دنبرو حکمدارانك کافه سننی کندوسنه سرفرو ایتدیرمش و معموره

دنیانك همان اكثرى محللرينه مالك اولمش اولان قوجه روما دولتى بوصورتله  
محو اولدى كئدى . عسكرى طائفه سنه تملك اراضى اصولى بونك  
زمانده ايجاد اولمشدر .

§

﴿ اودوقس ﴾ — يونانستانك ( ۵۲۲۴ خ ) تاريخى يعنى ميلادك  
اوچيوز تمش سنه مقدمى هيئت علماسندن بر مشهور ذاتدر . سنين شمسيه نك  
اوچيوز التمش بش كون اعتبار اولنسنه بوذات قرار ويردى . وعلم هيئت  
ونجومدن خيلى كتاب يازدى . شمدي هيچ برى ميدانده يوقدر .

§

﴿ اودومترو ﴾ — ماشياً قطع اولنان طريقك امتداد مسافه سنى  
حساب وتعيين ايچون يانلش بر التدر وبوآلت عادات ساعت كى اقسام متساويه  
تقسيم اولنش بردأره اوزرنده بره بى تحريك ايديجى بر طاقم چرخلردن مر كيدر .  
بر نوعى جييده طاشينور وديكر نوعى عربه نك تكرلكنه ربط اولنور .

§

﴿ اوده سا ﴾ — روسيه دولتنك قره دكر ساحلنده تجار تگاه وهر تجاره  
آچيق بر كوزل ملكتيدر . بوراسى مقدا (هوجه بك) ناميله معروف بر كوچك  
قصبه ايكن ( ۱۷۹۵ م و ۱۲۱۰ ه ) تاريخنده ايكنجى ( قترينه ) نك امريله  
توسيع وجوارنده اولان ويونان مهاجر ليله مسكون بولنان اسكى ( اوده سوس )  
قصبه سنك نامى اعطا اولدى . بوشهرده شمدي اكثريسى يونانى اولق  
اوزره يوزيك نفوس تخمين اولنقده در . و بر بولك كليساسى و تياروخانه سى  
وبورسه وبانقه و باروتخانه سى وارذر . وابنيه سى اولدقجه منتظمدر .

§

﴿ اوده مش ﴾ — از مير سنجاغى داخلنده وتيره اووه سنك جهت  
شرقيسنده بر قضا مركزيدر وبركى ناحيه سيدر

§

﴿ اوديسا ﴾ — لادقيه شهرينك نام عتيقيدر . لادقيه كله سنه  
مراجعت بيوريلاه .

§

﴿ اوديب ﴾ — جاهر يونانيه دن ( تب ) حكمدارى ( لاووس ) ك

اوغلیدر . بوچوقق اناسندن طوغدیغی زمان باباسنک قاتلی و اناسنک زوجی اوله جغنی اولوقتک اعتقادینه کوره هاتف غیب خبرور دیکندن باباسی بونی صبی ایکن تلف قصدیه طرد و تبعید ایتش ایدی چوجق ایسه بولندیغی محلهده بیویوب بر قهرمان نادر الاقران اولدی و باباسی کیم اولدیغنی بیلدیکی حالده (تب) شهرینه کیدر ایکن یولده باباسنه راست کلوب خطاء قتل و براز صکره اناسنی تزوج ایتدی و خیلی زمان بر لکده اولدقلمی حالده حقیقت ماده میدانه چیقدیغندن مرقوم (اودیب) بحالته بناء والده سنک یوزینی بردها کورمامک ایچون ایکی کوزینی چیقاردی و والدهسی دخی بو عار و بحالته کسه نک یوزینه باقه مدیغندن کندوسنی تسیم ایلدی . بوکا (ایدیوس) دخی دیرلر .

§

﴿اور﴾ — اورفه نک اسکی اسمیدر . (اورفه) کلمه سنه نظر بیوریله .

§

﴿اورانبرغ﴾ — اورویا ایله آسیانک آیرلدیغی محل جوارنده و (اورال) و (ساقاره) نهرلرینک التقا ایلدیکی محلهده و روسیه دولتنک (اوقا) نام ولایتی داخلمنده بر سنجاق مرکزیدر . روسیه دولتنک ترکستان والیسی بوراده اوتورر و اکثریسی مسلمان اولمق اوزره اهالیسی اون بشیک تخمین اولنور و باقر و شیشه و قطیغه و چوقه کبی شیر اعمال ایدیلور و اراضیسی اولدقجه منبت و محصولدار صاییلور . بو شهر (اورانبرغ) نامنی (۱۷۴۲ م و ۱۱۵۵ هـ) تاریخنده آلدی آندن اول (اورسق) ایدی . ذکر اولسان (اوقا) ولایتنده یدی یوز قرق بیک مسلمان تخمین اولنور .

§

﴿اورال﴾ — یاخود (آرال) — آسیای وسطاده ترکستان الکاسنک بر بیوک کولیدر و طولی درتیوز اللی و عرضی ایکیوز قرق کیلومتر و صوبی طوز لیجه و سواحلی اچلقجه در . مقدا بو کول (امدریا) دن عد اولنور و (خوارزم کولی) تسیمه ایدیلور ایدی ترکستانده و قره قالیاق دیارنده بولناب اوز بکلر بو کولک وام دریانک سواحلمده ساکن



اولدقلمرندن آنلره دخی ( اورالر ) نامی ویرلمشدر اشبو اورالرک کافه سی مسلمان اولدیغی حالده مقدارلری بر بچق ملیون تخمین اولتمده در بو کولک حوالیسندده اولان یوکسک طاغره اورال طاغری دیدکلری کبی بو طاغردن اینوب جنسوبه طوغری درتیک التی یوز کیلومتر و اراضی بی اسقاو بحر حرزده انصباب ایدن نهره دخی اورال نهری دیرلر . اورویایی آسیادن تفریق ایدن اشبو اورال نهرینک نام دیکری ( یایق ) در . روسیه دولتنک اورال نامنده برده سنجاغی واردر .

§

﴿ اورانغوتان ﴾ — عربجه نسناس دنیلان بیوک میونک اسمیدر — بو حیوان براری عتیقه نك الك صیحا ق محملارنده و خصوصاً ( صوفاتره ) و ( نیانغ ) اطه لرنده و مالغه یارم اطه سنده پک چوقدر قویروغی اولیوب اکثری ایاق اوزری بولندیغی جهته له انسانه مشابته اولدیغندن وهله کوچک ایکن پک مشابه ایدوکنندن بورالجه بیان آدمی نامنی دخی آلمشدر برونی یاصی و آغزی بیوک و کوزلری بربرینه یقین و اوست دوداقلری مرتفعجه و چکه سی زیاده چیقیق و بطنی بیوک و قولری اینجه و اوزونجه و قامتی نهایت ایکی مترویه قریب اولور و دائماً کولک و میوه کبی شیرله تعیش ایدرک آرده فوق المأمول برمه ارتله بالق دخی طوتار و انسانه قولایلقله آلیشور و هر کوردیکی شیئی تقلید ایدر و آلیشانی حالنه کوره خدمت دخی کورر لکن صغوق یرلرده علت صدرايله چابک تلف اولور .

§

﴿ اورانوس ﴾ — اسمکی یونانیرک معبود اتخاذا ایتدکلری اشخاص موهومه دن بریدر یاخود ارضک اوغلی یاخود زوجیدر . امرای عثمانیه دن اولوب ( ۱۳۶۲ م و ۷۶۴ ه ) تاریخندن ( ۷۷۵ ه ) تاریخنه قدر روم ایلنده جنوب قولی قوماندانی اولان و کوملجنه و واردار و قره فریه و عورتحصاری و قواله و درامه و زینخنه و سیروز ممالکنی استیلا ایدن ذاتک اسمی دخی ( اورانوس ) در . بو ذات بروسه دولت عثمانیه یه یکمزدن اول اورانک محافظی ایدی بروسه فتح اولندقدنصکره اسلامه کلدی و سلیمان پاشا ایله چناق قلعه سی بوغازینی کچوب کلبولی حوالیسینی اوران مجاهدین

ایله برابر بولندی و چوق ایشلر کوردی . بو ذاته فتح ایتدیکی محلردن پک چوق اراضی تملیک واحسان بیورلمش اولدیغندن جله سنی خیرات و مبرانه وقف ایش و وقف مذکور الیوم مستثنا بولمشدر .

§

﴿ اورتودوقس ﴾ - اعتقاد کلمه سننده یدنجی و سکزنجی نمروره مراجعت بیوریه .

§

﴿ اورخان ﴾ - دولت عثمانیه ده ایکنجی پادشاهدر و سلطان عثمان ( حضرتلرینک بیوک اوغلی و حضرت ( خداوندکار ) لک یعنی سلطان ( مراد خان اولک پدربدر و ولادت ( ۱۲۸۱ م و ۶۸۰ ه ) جلوسی ( ۱۳۲۵ م و ۷۲۶ ه ) وفاتی ( ۱۳۵۹ م و ۷۶۱ ه ) تاریخده در . مشارالیه جلوسی عقینده برادری فضلادن ( علاءالدین ) پاشایی کندو آرزوسی وجهله مقر سلطنتده اوتوروب اداره ملکه باقق اوزره وزیر یعنی صدراعظم تعیین ایتدی و سرکردگان ( اقبجه قوجه ) نام قهرمان یدیه از مید و برسنه صکره هرکه و قره مرسل ضبط و پای تخت بر و سه یه نقل اولندی و صاریجه زور بادیلان باشی بوزق عسکرک یرینه وقت سفرده یومی بر اقبجه علوفه و یرمک اوزره و پیاده نامیله بر نوع موظف عسکر تحریر و اون باشی و یوزباشی و یکباشی نامریله ضابطلر تعیین ایدلدی بولردن بشقه دوشیرمه خرستیان و اسیر چوجقلردن یکچیری نامیله بر نوع عسکر ده پایلدی و روم ایمپراطورینک از نیق امدادینه کلان عسکری مالتپه و طاوشانلی اوه سنده بوزیلوب از نیق و متعاقباً مدرنی و کلیک فتح اولندی و ( ۱۳۳۶ م و ۷۳۷ ه ) تاریخنده مانیاس و بالیکسری و برغمه و قره سی النوب قره سی امیرینک ظلمدن و اختلافات واقعه دن شکایت ایدن اهالی مسرور ایدلدی و ایمپراطور ( ژان قانتا کوژه ) باریشق ایدوب قزی ( طونؤ دوریه ) بی حضرت مشار الیه ازدواجه عرض ایلدیکندن بالقبول ( ۱۳۴۶ م و ۷۴۷ ه ) تاریخنده هیئت خاندانیله اسکداره کلوب ایمپراطور ایله کورشدی و اوچ کون سور و ضیافت یاپلدی و مشارالیهک اوغلی سلیمان پاشا روم ایلنده کلیبولی و تکفور طاعی و معلقره و ابصاله و حوالیسینی فتحندن صکره ایمپراطورک

التماس و استمدادی اوزرینه استانبوله کیدوب بالقانله تسلط و ایمپراطوری  
تعبیر ایدن بلغارلری دفع ایلدی.

سلطان ( اورخان ) حضرتلری باشلرینه دیوانلرده ( بورما ) تعبیر اولنور  
بر نوع امامه و اوقات سائرده مولوی کلاهنه مشابه صرمه لی کلاه کیرلر  
ایدی . ذکر اولنان علوفه لی پیاده مؤخرأ باشلرینه بیاض ( بورك ) کیمش  
و ده صکره بتون لغو اولنوب یرلرینه ( مسلم ) نامیله برطاقم تیمارلو  
سواری تحریر اولنمشدر .

مشار الیهک زماننده یعنی ( ۱۳۲۸ م و ۷۲۹ هـ ) تاریخنده باقر و کوش اوزرینه  
سکه ضرب اولنوب بر یوزینه ( لاله الاالله محمد الرسول الله ) و دیگر یوزینه  
( اورخان خلدالله ملکه ) یازلدیغی بعض تواریخنده کورلشدر .

§

﴿ اورشلیم ﴾ — قدس شریفک بنی اسرائیل نزدنده معروف اولان  
نام عتیقیدر . بوراسی معمور اولمزدن اول دخی بو نامله یاد اولنور ایدی  
حضرت ( یعقوب ) علیه السلام اولاد و انسابیله قونه کوچه حبرون نام  
محلہ کلور ایکن محل مزبوره اوغرایوب بر معبد بنا و براز مدت آرام ایتدیکندن  
خیلی زمان صکره معبد مذکور مناسبتیله اوراری معمور اولدی و حضرت  
سلیمان زماننده بیت مقدس یاپلقدنصکره ( قدس ) نامنی آلدی ( قدس )  
کله سنه نظر بیوریه .

§

﴿ اورفه ﴾ — یاخود ( رها ) یاخود ( رافیا ) — حلب ولایتی  
داخلنده بر سنجاق مرکزیدر . بو شهرک بر کوزل جامع شریفی و نمرو  
سرای نامنده بر خراب قلعه سی و اوتوز بیک نفوسی واردر وزیرتکاهی  
چوقدر ازان جملہ قلعه تحتنده اولان بر مغاره حضرت ( ابراهیم ) علیه  
السلامک طوغدیغی محل و مغاره نک ایچنده موجود اولان بر یشیل صندوق  
مشار الیهک بشیمی اولمق اوزره زیارت اولنور . تاریخلرده حضرت  
ابراهیمک طوغدیغی قریه دنیلان ( کوئا ) محلہ سی دخی ذکر اولنسان  
مغاره نک حذا و اتصالننده اورفه محلاتندن بر محلہ در و حضرت ( ایوب )  
ایله ( جابر الانصاری ) و ( ابو عبیده الحراج ) و ( بدیع الهمدانی ) و ( مسعود

خراسانی) حضرتانک مقامری دخی مشهور زیارتگاهلردر. اسکی زمانده مجوسیلرک اک بیوک آتشکدهسی اورفده ایدی بو آتشکده نك ایچنده پرستش ایتدکری شمس منیری تقدیساً دائمی صورتده آتش یقارلر وقارشوسنده عبادت ایدرلرایدی. اورفه شهری رومانوسلر زماننده برمدت پای تحت اولمش ومیلادک بر عصر اولندن اعتباراً درت عصر مدته (آبغار) نام پرنسلر معرفتیه اداره اولمشدر وابتدا دین عیسی علیه السلامی قبول ایدن شهر مذکوراهالیسیدر. اورفه قلعهسی خارج واتصالندن نبعان ایدن و (عین خلیل الرحمن) نامی ویریلان صو قلعه نك التندن ایچروکیروب تخمیناً یوز آرشون طولنده ویتش آرشون عرضنده اولان وجوانب اربعهسی طاشلره ریختم یانلش بولنان حوض کبیره دوکیلور وبتون بئغچه لری صولار سلطان (سلیمان) حضرتلر نك اشبو صواوزرنده احیا یوردیغی زاویه ده الان قفرا و درویشانه اطعام طعام اولنور.

ذکر اولنان خراب قلعه نك بر بر جنک اوزرنده بر برینه قرق الی ذراع یقین وطاشدن اورمه ایکی عدد اوزون دیرک خرابه سی موجود و بونلر حضرت ابراهیم ایچون یاییلان مانجینق اولق اوزره مشهوردر. محلی اهالیسنک فاعن فم ایشیدوب روایت ایتدکرینه کوره اولوقت اشبو ایکی دیره که رمضانلرده مناره لره ماهیه ایچون کریلدیکی کبی ایکی قات خلاط کریش و اشبو ایکی خلاط بر اغاج ایله بوکیلوب بردن بره براغلمش ایش اورفه دن پک چوق فاضل و ادیب ظهور ایتدی سلطان الشعراء (نابی) مرحوم دخی بورالیدر. فرنکلر اورفه یه (زریسو) دیرلر.

§

﴿اورکوب﴾ — نیکده سنجاغنده بر قضا مرکزیدر (دوه لو) و (یحیالو) و (قره حصار) ناحیه لریدر. نیش سنجاغنده دخی بونامده بر قضا واردر.

§

﴿اورلوف﴾ — روسیه امراسندن بر مشهور ذاتدر. بو آدم ابتدا (استرلیج) اوجاغندن نشئت ایتش بر یاور اولدیغی حالده کوزلاکی سایه سنده (قترینه) یه یار اولدی و (۷۶۲، م و ۱۱۷۶ هـ) تارینخنده

ایمپراطور اوچنجی (پترو) نك علیهنه سرای اختلالنی چیقاروب قترینه نك اجلاسنی و پترونك اعدامنی تسهیل ایتدی قترینه دخی تخته چیققدن صکره مرقومك خدمت مسبوقة سنه مكافاة رتبه سنی ترفیع و بر مدت نفسنه محرم طوته رق فوق الغایه اعتبار ایلدیسده مرقوم کبر و عظمتندمیدر یوخسه بشقه بر مطالعه یه مینمیدر اولکی کبی خدمته یناشمیدیغندن طرد و تبعید مذلتنه دوچار و ینه عفوله نائل اعتبار اولدی لکن حین غیو بتنده (پوتمکین) نام جنرالک کندوسنه بدل نائل اولدیغی اقبالی چکه مدیکندن وقباحت کندوسنده اولدیغی جهتله برشی ده سویله مدیکندن عقلنه خفت کتوروب (۱۷۸۳م و ۱۱۹۸ه) تاریخنده وفات ایلدی (۱۷۷۰م و ۱۱۸۴ه) تاریخنده روسیه دونماسیله آق دکره کلوب انکلین امیرالرنندن (آلفستون)ک تدبیریه چشمده دولت علیه دونماسنی احراق ایدن روسیه امیرالی اشبو اورلوفك قرنداشی ایدی. بودخی قترینه نك سو کیلیرندن و پترونك قاتلرندن بریدر.

§

﴿اورله﴾ — لیدیا ده یعنی شمیدیکی ایدین ولایتنده وازمید شهرینك ساحل غر بیسنده بر کوزل تجارتگاه مملکتدر و تخمیناً یدی سکز بیک نفوسی واردر بونك نام عتیقی (کلیرمان) ایدی حکمای یونایه دن مشهور (اناقساغور) و (هرمونیم) بوراده دنیا به کلشدر اورله ده هر درلو محصولی یتشدیکی کی قوری اوزوم دخی یتیشور و خارجه صاتیلور شمیدی (کلیرمان) نامی شهر مز بورك بر طرفنده بر کوچك قصبه یه و یرلشدر. سفری محصار اورله یه تابع بر ناحیه در.

§

﴿اورتزیب﴾ یا خود (اورنك زیب) — هندستان حکمدارلرندن و مشهور (جلال الدین اکبر) سلاله سنندن بر غدار و طمعکار آدمدر. (۱۶۵۹م و ۱۰۷۰ه) تاریخنده پدربینی و قرنداش لربینی تسمیم ایدرک (دهلی) ده تخته چیقوب مدبرانه حرکتله نائل اولدیغی فتوحات سایه سنده کرکی کبی شوکت بولدی و (پیشاور) و (غولدون) کبی بر قاج حکومتی تحت جایه سنه ادخال ایتدکن و سائر حکومتات متجاوره بی محاربات

متمادیه ایله زبون ایلدکن صکره سکسان سکره یاشنده وفات ایلدی .  
 بونک پولتیقه جه وعسکر یجه مهارتنه بر دیه جک یوغیدی لکن مر ایلدی  
 و خوز یزلیکی دخی امثالسنز ایلدی .

§

﴿ اورنگ آباد ﴾ — هندستانده بومبایک کیروسنده انکلین  
 مستملکاتندن برولاتیک اسمیدر . بوولایتک مقر اداره سی براق دفعه تبیل  
 ایتدیسده اکثر اوقاتده (احد آباد) ایلدی . اشبو (اورنگ آباد) ک هواسی  
 برازوخیم ایسه ده اراضیسی غایت منبت و محصولداردر .

§

﴿ اروپا ﴾ — قطعات خسه ارضک الکجعیلی وزنکین و اعتبار لیسیدر  
 بو قطعه شمالاً بحر منجمد شمالی و غرباً بحر محیط اطلاسی و جنوباً بحرسفید  
 و شرقاً اورال نهری و طاغلری و بحر حزرز و قره دکز و مرمره و اطه لر  
 دکزی ایله محدوددر و وسعتی طولاً اوچبیک بشیوز و عرضاً درتیک کیلو  
 مترودر . بو قطعه ده موجود اولان عثمانلی و روسیه و اسوج و اوستریا  
 و مجارستان و اسویچره و بلجیقا و فرانسه و هولانده و دانیمارقه و بریتانیا و ایرلانده  
 و المانیا و اسپانیا و پورتکیز و یونان و لایاتنده اوچبوز اون التی ملیون نفوس  
 تخمین اولنیور . اوروپاده ابتدا یونانلر مدنیته آلیشوب کوچک کوچک  
 جمهوریتلر منقسم اولدی و میلاددن سکره عصر مقدم روما دولتی تأسس  
 ایدرک یواش یواش ایتالیا و (غول) و (اسپانیا) و (بریتانیای کبیر)  
 و بعض (جرمانیا) و (یونان) و (ایران) و (ارمنستان) ممالکنی استیلا  
 ایلدی و بو دولت (۴۷۶ م) تاریخنده منقرض اولدقن صکره اولجه  
 اوروپایه صوقولمش و بعضاً دولت مشارالیها جایه سنه کیرمش اولان  
 باربارلر برر حکومت تشکیل ایتدی یعنی (ویزیغوت) لر اسپانیاده  
 و (فرانق) لر غول ممالکننده و (لومبارد) لر ایتالیا و جرمانیانک شمال  
 جهتنده استقلال بولدی ودها صکره انکلینر ساقسونلر ایله برلشوب  
 استقلالرینی اعلان ایلدی و میلادک طقوزنجی عصری ایتدالرنده  
 ایمپراطور مشهور (شارلمان) بر حکومت تشکیل ایدرک اوروپای غربینک  
 همان هر طرفنی ید ضبطنه آلدیسده کندوسندن صکره بو ولایات دخی

طوائف ملوک ہیٹنہ کیرہ رک المانیا وایتالیا و فرانسہ و بورغونیا و امثالی حکومتلر ظہورہ کلدی و اوننجی عصر دہ شمال جہتندہ کی حکومت وحشیہ یعنی روسیہ و اسوج و نوروج و دانیار قہ ظلمت جہالت و نادانیدن چیقوب مدنی دولتر صرہ سنہ کیردی و اناطولیدہ تأسس ایدن دولت عثمانیہ اوروپادہ دخی پک چوق ممالکہ مالک اولدی و اسپانیادہ کی حکومت اسلامیہ اتفاقسزلق بلیہ سخیلہ و رطہ انقراضہ دوشدی و (۱۴۵۳ م و ۸۵۸ ھ) تاریخندہ استانبول فتح اولندی و بوتاریخند صکرہ بیوک دولتر تشکل اتمکہ باشلادی و اون سکزنجی عصر دہ پروسیا حکومتی احداث اولندی و (۱۷۸۹ م و ۱۲۰۴ ھ) تاریخندہ میدانہ چیقان حرب عمومی اوروپانک حالی دکشدیروب برقاچ دولتک ظہورینہ و برقاچنک انقراضنہ سبب اولدی و (۱۸۲۸ م و ۱۲۴۴ ھ) تاریخندہ یونانستان دولت علیہ یندن چیقوب مستقل قراللق اولدی و (۱۸۷۸ م و ۱۲۹۵ ھ) تاریخندہ دولت علیہ نک روسیہ لولرہ مغلوبیتی اوزرینہ مملکتین و بوسنہ و صربستان و بلغارستان و یونان ممالک و حدود لرنده خیلی تبدلات وقوعہ کلدی.

§

﴿اورور﴾ — اسکی یونانیرک شفق آلہدسی اعتقاد ایتدکاری شخص موہومک اسمیدرہ کو یاسما الہی بونک جالنه عاشق اولہرق آلوب سمایہ چیقارمش و بتون یلدیزلری دعوت و جعیت ایدرک کندوسنہ نکاح ایش و ہر صباح کونشک عر بہ سنہ سما قیولرینی آچق ایچون مأموریت و یرمش ایش • بونک رسمی درت بیاض آتلی کوش و التون ایلہ مزین بر عر بہ اوزرنده اوتورر و نقاب ایلہ یوزینی اورتر صورتدہ پیارلر و صباحلری یاغان قیراغی بی مرقومہ نک کوز یاشی اولمق اوزرہ اعتقاد ایدرلر ایدی.

§

﴿اورونت﴾ — عمیق اوسندن و جا و حصدن انطاکیہ ایوب بحرسفیدہ دوکیلان (نہر عاصی) نک نام عتیقیدرہ بوکا (اقسیوس) دخی دیرلر.

§

﴿ اوره تو ﴾ — ایتالیا ده بر قصبه نك اسميدر . بو قصبه ده حضرت ( مریم ) نامنه یابلیش بر کلیسا و کلیسانك ایچنده بر کوچك خانه واردر بو خانه حضرت ( عیسی ) علیه السلامك قدس شریف جوارنده واقع ( ناصره ) قریه سنده کی خانه سی ایدی بعد ارفع ملائکه واسطه سیله ایتالیا به کلدی دیو اعتقاد اولمقده در .

§

﴿ اورلیسا ﴾ هندستانده بر قطعه نك اسميدر . یونانلر ( ۵۰۰۰ خ ) تاریخنده یعنی میلادك بشیوز طقسان درت سنه مقدمنده بوراره قدر کلوب وخیلی کفترلله بو قطعه یی آلوب اجرای حکومت ایتدیلر لکن اهالی قدیمه محاربه دن خالی اولمیوب عاقبت ( ۴۶۳ م ) تاریخنده ( یایات قساری ) نامنده بر قوماندانك اقدام و غیرتیه قورتاردیلر و یونانیلری بتون بتون اولحوالیدن طرد ایتدیلر .

§

﴿ اوریمدون ﴾ — تکه سنجاغنده کپری صوی دید کلری نهرک نام عتیقیدر . ( ۵۱۱۷ خ ) تاریخنده یعنی میلادك درتیوز یمش یدی سنه مقدمنده آتته لولر ایله محارب اولان ایرانیلرک دونماسی بو نهرک آغزنده طور مقده ایکن آتته لولرک دونماسی کلوب جمله سنی احراق ایلدی آتته لولرک امیرالنك اسمی سیمون ایدی .

§

﴿ اوزاعی ﴾ — قدمای فقهای عربدن و مجتهدین کرامدن برداندر و کنیه سی ( ابو عمرو ) اسمی ( عبدالرحمن ) مسقط رأسی شامدر . بونك اهل سنت طریقنده اجتهاد ایتدیکی مذهب مؤخر آمنسی و منقطع اولوب یالکز بر تفسیر شریفی و احادیث نبویه و فقهه دائر بعض ائاری موجود و معتبردر و فاتی ( ۷۷۳ م و ۱۵۷ م ه ) تاریخنده در . ( اوزاع ) دمشق جوارنده بر کویدر بو نام و قتیله یمن جانبندن کلوب توطن ایدن بر قبیله دن قالمشیدی .

§

﴿ اوزان ﴾ — زمان سعادتده جزیره العرب اوزرنده اوج نوع اوزان وار ایدی مؤخرأ حضرت ( عمر ) رضی الله عنه زمانده اوزان ثلثة



مذکوره جمع و بین العرب بر کونه اختلاف اولماق ایچون توحید و مساوی  
بر مقدار اخراج اولنوب بونک واحد قیاسی اعتبار و درهم تسمیه اولنسنه  
قرار ویرلدی لکن مؤخرأ بو قیاس اوزرینه اعتبار اولنسان یوک کوچک  
وزنلر هر یرده بر بشقه مقدارده قبول اولندیغنه بناء اوزان و اکیال تنوع  
و تعدد ایلدی اکثر محللرده زبرده محرر اولدیغی اوزره قبول اولنمشدر .

شعیر	بر آرپه
حبه	ایکی آرپه آغری چکردک
طسوج	ایکی چکردک و ثلث شعیرات
دوانک	درت طسوج معربی دوانقدر
قیراط	بر طسوج و بر آرپه
درهم	اصطلاحده اون عرفده سکز قیراط یعنی اون التی چکردک
دینار	اصطلاحده التی دتک
مثقال	اصطلاحده یکریمی قیراط عرفده بر بچق درهم
استار	درت بچق مثقال یعنی التی بچق درهم
رطل	یکریمی استار
من	قرق استار
اوقه	قرق درهم و بعضیلرینه کوره اون ایکی و درت یوز درهم
لودره	درهم عراقی ایله یوز یتیش بش درهم . یوز لودره بر قنطار ایدر
قنطار	بیک ایک یوز اوقه یعنی قرق سکز بیک درهم
وسق	صاع عراقی ایله التمش صاع
صاع عراقی	سکز رطل یعنی بیک قرق درهم
صاع حجازی	بش و ثلث رطلدر التی یوز و ثلث درهم اولور
مد عراقی	ایکی رطل . من کبی
مد حجازی	یوز یتیش بش و ثلث درهم
ققیز عراقی	سکز مکوک
مد شامی	اون اوچ مکوک
اردب مصر	یکریمی درت صاع
النش	نصف قیه
مکوک	بر بچق صاع

لدره      یوز درهم  
ذراع      ذراع کله سنه نظر بیوریه

§

﴿ اوزبک ﴾ خان — ترکستانده قاپچاق قبیله سی خانلرندن بر مشهور  
ذاتدره . بو ذات ( ۱۳۰۵ م و ۷۰۵ هـ ) تاریخندن ( ۱۳۴۲ م و ۷۴۳ هـ )  
تاریخنه قدر روسیه ممالکنی زیر جایه سنه آلوب حکمدار لرینی دیلدیکی کبی  
عزل و نصب و استخدامه کسب اقتدار ایتدی و اطاعتدن چیمق استه یان  
مملکتلر اهلایسنی قتل عام ایتک عادتی اولدیغندن اطراف ممالک اهلایسنک  
کوزلری ییلدی و کیدرک بتون ترکستان اهلایسی اطاعته مجبور اولدی  
بونک اولوقت تشکیل ایلدیکی دولته ( اوزبکیه ) دیرلر و برنجی دولت  
صره سنده طوتارلر ایدی لکن خان مومی الیهک اخلافی بولدقوری شوکت  
و اقتداری اذامه ایده میوب تدریجاً ضایع ایلدکلرندن ( اوزبکی ) نامنی  
آلان تبعه سی اطرافه طاغیلوب بر چوغنی افغانستان و بخارا جایه لرینی  
قبول و برطاقی جنوبی روسیه ممالکنده واقع ( توبولسق ) ایالتی داخلنده  
و بحر حزرک جهت غریبسنده اختیار توطن ایشلدر .

§

﴿ اوزروان ﴾ — اورفه و مار دین و دیار بکر و حوالیسی روما  
دولتی جایه سنده ایکن بو نامله یاد اولنور و نیم استقلال ایله اداره ایدن  
پرنسره ( آبغار ) دنیلور ایدی بو پرنسیرک مرکز اداره سی ( اورفه )  
شهری ایدی .

§

﴿ اوزلر ﴾ — بر بیوک ترک قبیله سی خلغنک اسمیدر . بونلر بشنجی  
عصر هجری به قریب بر زمانده آسیادن قونه کوچه روسیه ممالکنه کلوب  
بر حکومت تشکیل ایلدیلر ایسه ده ( باجیناق ) ترکلریله و روم امپراطورلریله  
محارباتدن خالی اولدیلر و عاقبت حکومتلرینک یتمشنجی سنه سنده یعنی  
( ۱۲۲۴ م و ۶۲۱ هـ ) تاریخنده مغوللره مغلوب و منقرض اولدیلر . بو قبیله نک  
شرق طرفنده قالان افرادینه الیوم ( شرق اوزلری ) یا خود ( غزترکلری )  
دیرلر . عهد شکن بر طائفه ایدی .

§

﴿ اوژن ﴾ — آلمان دولتی جنرالرندن بر مشهور ذاتدر • بوآدم  
ابتدا فرانسه اردولرنده سردار ایکن بر خصوصدن دولایی کوچندیرلدیکنه  
بناء کیدوب آلمانیدولتی امرای عسکریه سی سلکنه داخل اولدی و (۱۶۹۷ م  
و ۱۱۰۹ هـ) تاریخنده دولت علیه اوزرینه سوق اولنان اردویه قوماندان  
تعیین اولندیغندن کلوب بیوک محاربه لر قزاندی والتی سنه صکره ( وارادین )  
و ( بلغراد ) ی آلدی و ( ۱۷۴۷ م و ۱۱۶۰ هـ ) تاریخنه قدر وقوعبولان  
فرانسه و باویرا و اومباردیا محارباتنده دخی فوق الغایه اراز لیاقت ایتدی •

§

﴿ اوزون حسن ﴾ — ایران و کردستان حکمدار لرندندر اصل  
اسمی ( ابوالنصر مظفرالدین ) در • بو ذات مشهور آق قیونلی قبیله سنه  
منسوب اولدیغی حالده ( ۱۴۵۳ م و ۸۵۷ هـ ) تاریخنده تیمورلنک  
سلاسه سندن قره قیونلی حکمداری ( جهانگیر ) ایله محاربه و عاقبت  
غلبه ایدوب قره قیونلیلرک اکثر شمالکنی ضبط و دیار بکرده سلطنتی اعلان  
ایلدی و دولت علیه دن انتقام آلمق ارزوسنده اولان وندیکیلرک و قرمان  
و علائیه امیرلرینک تشویق و ترغیبیه سلاحنی دولت علیه علیه چویروب  
ارضروم و بابورد و ارزنجان ولایاتی استیلا و بر آره لق سوریه ولایتی  
تهدید و اهایلسنی انقیاده مجبور ایلدیه ده سلطان ( محمدثانی ) حضر تلی  
( ۱۴۷۳ م و ۸۷۸ هـ ) تاریخنده یوز بیک کشیک بر اردو ایله بابورده کیدوب  
اوزون حسنک اردوسنی قیصه بر زمانده تار مار ایلدیکندن امانه دوشدی  
و عقد مصالحه دن صکره کیدوب کر جستانی ضبط و متعاقباً ( ۱۴۷۸ م  
و ۸۸۳ هـ ) تاریخنده وفات ایلدی •

مومی الیهک و فاتندن صکره طربزون حکمداری ( ژان قومن ) ک همشیره سی  
متوفای مومی الیهک زوجه سی اولقی ملبسه سیله اورته یه قونیلان میراث  
سلطنت دعواسی بر چوق قانلر دو کولسنه سبب اولمشدر •

§

﴿ اوژیزه ﴾ — یونانسانده ابتدا ( پیوتی ) و ( ایتاکی ) حکومتلرینی  
تأسیس ایدن ذاتدر • بونک ( سمرین ) نامنده بر ترک سلاسه سندن اولدیغی  
و زمان حکومتنده و ( ۳۷۲۵ خ ) تاریخنده یعنی میلادک بیک سکر یوز التمش

طقوز سنه مقدمنده یونانستانده واقع (قوپایس) کولی طاشوب ممالکنده بولنان اهاالینک کافهسی مغروقاً وفات ایلدیکی مرویدر . یونانلر مووی الیهی آله البحر اعتقاد ایتدکری (نتسون) ک اوغلی ظن ایدرلر و وقعه مذکوریه (اوزیزه طوفانی) دیرلر و اولوقت غرق اولنلرک روحنه حرمة سنه ده برکون یوزطی طوتارلر ایدی .

§

﴿اوستریا﴾ — اوروپادولتترینک برنجیلرندندر . اوستریاممالکنک بر قسمی (هون) لرو (واندال) لر وسائر برطاقم اقوام وحشییه یندنه ایکن (۷۹۱م و ۱۷۵ه) تاریخنده فرانسه ایمراطوری مشهور (شارلمان) ک قبضه تصرفنه چکوب یوزسکسان یدی سنه صکره (بامبورغ) قوتلغی نامیله و (مارکی) عنوانیله (لیئوپول) نام کسنه یه احسان اولمش و اولوقت اشبو مالکانه یه (اوستریش) دوقه لغی دنیلش ایدی لکن مرقوم لیئوپولک سلالهسی مؤخرأ منقرض اولدیغندن ذکر اولنان دوقه لق داخلنده بولنان ممالک (بوهمیا) لولره ودها صکره آلمانلره چکوب (۱۲۸۲م و ۶۸۱ه) تاریخنده آلمانیا ایمراطوری طرفندن اوغلی ایکنجی (آلبر) ه تملیک اولندی و اخلافی (آرشیدوق) عنواننی آلدی و (۱۴۳۸م و ۸۴۲ه) تاریخنده وقوعبولان بوهمیا اختلالی عقیننده مرقوم (آلبر) ک اقرباسندن (فره دربیق) وراثت صورتیله و ایمراطور نامیله تخته چیقوب دولتر صره سنه چکدی بو دولت بر آرهلق اسویچره واسپانیایه دخی حکم ایتدیسه ده بو حکم دوام ایتدی و مؤخرأ (بوهمیا) و (موراویا) و (مجارستان) و (سیلیسیا) حکومتلرینی و (ترانسیلوانیا) و (خرواتستان) ممالکنی و (۱۷۱۳م و ۱۱۲۵ه) معاهدهسی موجبجه (بلچیکا) و (ناپولی) و (میلان) و (ساردنیا) بی اخذ ایدوب برسنه صکره ساردنیایی سچلیا ایله مبادلہ ایلدی و (۱۷۴۵م و ۱۱۵۸ه) تاریخنده برنجی (فرانسوا) تخته چیقوب (۱۸۰۵م و ۱۲۲۰ه) اختلالاتندن المانیا و ایتالیا دن خبلی ممالک ضایع ایتدی و صکره (بورغونیا) دن ماعدا اسکی ولایتلرینه و لومباردیا و ونیدک قطعہ سنه مالک اولدیسه ده (صادوا) مغلوبیتی عقیننده بو ممالکک بر چوغنی ینه ایتالیا یه ترکه مجبور اولدی .

اوستریا ده اکثریسی قتولک و قصوری روم واسلاو و خروات اولق اوزره  
اوتوز سکز ملیون یدی یوز بیک نفوسی تخمین اولتمقده در و مقنادر  
مذکورک التی ملیونی مجار در .  
( اوستریش ) مقدم شرق معاسنه در .

شمدیکی ایمپراطورلر مذکور ( فرانسوا ) سلاله سندن در . اوستریا  
دولتک قوت و اقتداری ایچون ( حکومت ) کله سنه نظر بیور یله .

§

﴿ اوستریا ﴾ — یاخود ( فلنک جدید ) — بحر محیط جنوبیده  
( مازیا ) و ( پولینزیا ) آطه لری آره سنده بر بیوک اطه در و بواطه  
کره ارض اوزرنده اولان اوچ بیوک اطه نک ال بیوکی اولوب بر چوق  
اطه لری شاملدر .

اوستریانک ایچرولری هنوز تماماً کشف اولنماش ایسه ده سییاحین ایچه  
ایلرولمش و ( الی ) دیدکاری طاغرده کلیتلو التون اولدیغنی خبر  
ویرمشدر . اوستریا اهلایسی کاملاً زنجی واسمر و بد چهره اولوب  
آطه نک سواحل شرقیه و شمالیه سنده ساکن اولنلری اولدقجه متمدن ایسه ده  
قصور مجلدرده کیلر حیوانات کبی حال وحشت و سفالنده در و یوزلرینه  
تمغا اورمق و برونلرینه حلقه یاخود میک طاقق وارکک چوجقلرینی  
بالغ اولدقده اولک دیشلرندن برینی چیقارمق عادات مکروهه لرندر و همان  
کافه سنک تعیشی بالق صیدیلهدر .

بعض انگلیزلر اطه مذکورک سواحل شرقیه سنده توطن وزراعت  
ایدرلر . بوراسنی اسپانیا سیاحین بحریه سندن ( واسقو دو غاما ) نامنده  
بر ذات کشف ایتدی و هندستان سفرینی بعدالاکمال امید بروننی دخی  
کشف ایدرک ( ۱۵۰۳ م و ۹۰۹ هـ ) تاریخنده ( لیزبون ) ه عودت ایلدی  
دیرلر .

§

﴿ اوستریلیج ﴾ — اوستریا ممالکی داخلنده واقع ( موراویا )  
قطعه سننده بر شهر اسمیدر . بو شهر ایکبیک نفوسی جامع بر کوچک  
قریه حکمنده ایسه ده ( ۱۸۰۵ م و ۱۲۲۰ هـ ) تاریخنده فرانسه ایمپراطوری

(بوناپارت) بوراده روسیه و اوستریا اردولرینی فنا حالده مغلوب و پریشان ایتدیکنه و مشهور (اوستریا) معاهدهسی بوراده یاپلدیغنه بناء مورخین عندنده شهرتی واردر بومعاهدهیه (براسبورغ) معاهدهسی و محاربهء مذکوریه اوچ ایمپراطور محاربهسی دخی دیرلر.

§

﴿ اوستروغوت ﴾ — آسیانک ایچرولرندن (دینه پر) نهرینک ساحل شرقیسنه کلوب برمدت توطن و کندو جنسلرندن اولوب (ویزیغوت) نامیله شهرت بولان قوم ایله محاربه لر ایدوب برقاچ دفعه و طنلرینی تبدیل و مشهور (آتیللا) نك وفاتندن یعنی میلادك درتیوز سکسان طقوز سنه سندن صکره شرق ایمپراطورینک مساعده سیله و بعض شرائط ایله (پانونی) و (مزی) اراضیسینده توطن ایدن قومک اسمیدر . بونلر (۴۸۹ م.) تار یخنده ایمپراطور طرفندن حرب ایچون مأموراً عزیمت ایتد کبری ایتالیا قطعه سنی بکنوب اوراده یرلشمش و التمش سنه قدر تحت جایه ده حکومت سورمشل ایسه ده صوکنی کتوره مامشدر .

(اوستروغوت) شرق غوتلری و (ویزیغوت) غرب غوتلری دیمکدر .

§

﴿ اوسترغون ﴾ — بدون ولایتی داخلنده برلوا مرکزی ایدی .

§

﴿ اوستیاق ﴾ — سیریانک کیرولرنده ساکن بر طائفه و حشیه در . بو طائفه لسانلری و موقعلری ایجابجه اوچ صنفه منقسم اولورلر و اوق و یایدن بشقه سلاح قولانسنی و کلب دریسندن بشقه البسه کیمسنی بیلزلر منسوجاتدن البسه لری و صید و شکار و تیمور جیلکدن ماعدا صنعتلری یوقدر و ساکن اولدقلری اراضیء بارده نك اخراجاتی صید ایتد کبری حیوانات دریلرندن عبارتدر . روسیه دولتی دخی ویرکولرینه بدل کورک ایچون حیوان دریسی آلور . بو یقینلرده خرستیان اولغه استعدادلری سو یلنیور .

§

﴿ اوغلان شیخ ﴾ — طریقت علیه بیرامیه نك ملاهی قولسندن بر

بيوك ذاتدر . بوكا { چلبی شیخ } و { اسماعیل معشوقی } دخی دیرلر .  
 بوذات خلفای بیرامیه دن { عمر السکینی } حضرتلرینک خلیفه سی { بنیامن  
 ایاشی } دن صکره طریقت مذکورده خلیفه و صاحب الوقت اولان  
 { پیر علی سلطان اقسرای } حضرتلرینک اوغلیدر سلطان { سلیمان }  
 حضرتلری ایران سفرینه کیدرکن مخصوصاً اقسرایه اوغرایوب پیر  
 علی سلطان ایله کورشدی و بعض کراماتی کوروب دماسنی آلدی  
 و اوغلی مومی الیهک درسعاده کلمسی رجا ایتدی پیر علی سلطان دخی  
 بنم اوغلمک اسمی اسماعیلدر حق یولنده قربان اولمقدن کیرو طورمن  
 کوندره یم دیوب اشبو اوغلان شیخی یعنی اسماعیل معشوقی حضرتلرینی  
 اون سکرز یاشنده اولدیغی حالده درسعاده کوندردی مشار الیه التی آی  
 صکره پدری مشار الیهک و فایله مقام قطبیته واصل اولدیغی کبی ظاهر  
 شریعته منافی بعض سوزلر سولکه باشلادیغندن واهالی استانبول دخی  
 فوق الغایه هجومله زیارته رغبت کوستردیکندن اوته ده بروده سویلناتلر  
 چوغالدی و نهایت سلطان سلیمان حضرتلرینک مملکتنه کتسون دیو  
 کوندردیکی خبری بن قدریمه راضیم ونه اوله جغنی ییلورم جوابیله رد  
 ایلدیکنه بناء مشکیلرک اخباریله و شیخ الاسلام کمال پاشا زاده نک فتواسیله  
 سلطان احمدده اوچلر جامعنگ اولدیغی محلده اعدام اولندی ( ۱۵۲۸ م  
 و ۹۳۵ هـ ) بوکا بعضیلر ( اولنلر شیخی ) دخی دیرلرایسه ده صحیح دکلدلر  
 و ( اوغلان شیخ ) دینلسی کنجکلکندن ناشیدر .

§

﴿ اوغوز ﴾ — آسیانک غرب جهنده مسکون ترک طائفه سندن  
 برقبیله نک اسمیدر بو اسم مؤخرأ بعض ترک پادشاهلرینه عنوان دخی  
 اولشیدی .

( اوغوز ) ترک لساننده صاف و پاک و فتوتلی معناسنه اولدیغی کبی اینمش  
 یعنی خایه لری چیقارلمش معناسنه دخی کلور . اوکوز اوغوزک غلطی  
 اولوب اندیکی ایچون بونامی آلمشدر .

§

﴿ اوغوزخان ﴾ — الک اسکی مغول پادشاهلرندن برذاتدر . بوذات

مدت سلطنتند هند و چین اهاالیسیله مدت مدیده محاربه ایدرک بک چوق ممالک فتح و مغولستانی توسیع و برنجی جهانگیر عنوانی احرارز ایلدی و (یاس) شهرینی مقر سلطنت یاپدی و (۲۹۱۶ خ) تاریخنده یعنی میلادک ایکی ییک التی یوز تمش سکز سنه مقدمده وفات ایلدیکندن یرینه کوچک اوغلی (کوک الب) خان یکدی . اشبو کوک الب برروایتده ملوک عثمانیه نك برنجیسی اولان سلطان (عثمان غازی) حضرتلرینک جد اعلا سیدر .

§

﴿ اوف ﴾ — طربزون سنجاغی داخلنده و طربزون شهرینک جانب شرقیسنده و اون اوج ساعت بعدنده بر قضا مرکزیدر . بوقضانک ایکی یوز طقسان التی عدد جوامع و مساجدی و یوز قرق بش مکتبی و التمش بش مدرسه سی و التی کلیسای و یکرمی التی ییک بش یوز نفوس ذکوری واردر . بوراده قبا کتان بزی و شمشر اغاجندن ساعت و آوانی ییارلر و کیتلوفصولیه یتیشدیرلر .

§

﴿ اوقتاو ﴾ — ( اوکوست ) کله سنه نظر یور یله .

§

﴿ اوقسوس ﴾ — جیحون نهرینک نام عتیقیدر . جیحون کله سنه نظر یور یله .

§

﴿ اوق میدانی ﴾ — در سعادتده قاسم پاشا محله سنک اوست طرفنده اوق تعلیم اولنان صحرائک اسمیدر . فاتح (سلطان محمد الثانی) حضرتلری صحرای مذکورک اورتیه سنه بر جامع شریف و سلطان (بازید ثانی) حضرتلری بر زاویه یاپدیردی و سلطان (محمود ثانی) حضرتلری جامع مذکور ی تجدید و توسیع ایلدی . بوجامع وزاویه نك برچوق و قفی و امام و شیخی واردر سلطان (احد ثالث) حضرتلری دخی اوستریا سفرینه کیدرکن صحرای مذکور ی مشتا اتخاذ بیوردیغندن اوراده جمعه نمازی قلمق ایچون بر منبر یاپدیرمشدر . زاویه مذکورده کآنکشلر اطعام اولتمق ایچون خیلی وقف باغلمش اولدیغندن حالا ایام مخصوصه سننده



اجرا اولنور . كانكشرك پيرى اصحاب كرامدن ( سعد بن ابى وقاص )  
 حضرتلريد و كانكشرك بينده مكتوم طوتيلان سر عليه الصلاة والسلام  
 اقدمزدن مشاراليه تنبيه بيوريلان شعاردر اوق ميدانده فاتح زماندن  
 برويك چوق كانكش مسابقه اجرا ايلدى بونلزدن الك مشهورلرينك قاچ كز  
 اوق آته بيلدكلى بروجه زير بيان اولندى .

كز

عدد	
بلكى قره كوز	۱۱۶۱
دوه كال	۱۲۰۵
چوللى فرح	۱۲۲۳
سلطان محمود ثانى	۱۲۲۵
هاون دلى	۱۲۳۹
شجاع	۱۲۷۱
توز قوپاران	۱۲۸۱

§

﴿ اوقيانوس ﴾ قطعدهسى — قطععات خسة ارضك بشنجيسى و الك  
 كوچكيدر . بو قطعده بجر محيط كبيرده برچوق اطه لردن عبارت اولوب  
 حدودينك نهايت عرض شماليسى اوتوز درت درجه ايسده نهايت عرض  
 جنوبيسى هنوز معلوم اوله ماشدر . اوقيانوس قطعدهسى ( مالزيا )  
 و ( ملازيا ) و ( ميقرونيا ) و ( پولينزيا ) و ( اراضى جنويه ) نامريله  
 بش جزاير مجتمعه يه منقسم اولوب مشهور ( سونده ) و ( ملاقه ) و ( صوماتره )  
 و ( جاوه ) و ( بورنه او ) و ( اوستراليا ) و ( سليمان ) و ( زلاند جديد )  
 و امثالى جزاير دخی جزاير خسة مذكوره نك باشلى اطه لردندر و بو اطه لرك  
 كافه سنده اكثريسى عبده اصنام و يالكز ( مالزيا ) ليلرك چوغى اسلام  
 اولقى اوزره اوتوز بش مليون نفوس تخمين اولتمده در .

اشبو اوقيانوس ممالكى ميلادك بيك سكر يوز تاريخلرينه كانجه يه قدر آسيا  
 ممالكندن معدود اولديغى حالده تاريخ مذكوردن صكره بشنجى قطعده  
 اوله رق تفريق و تحديد اولمشدر . ( اوقيانوس ) بجر محيط معنا سنده در .

§

﴿ اوكتای ﴾ — جنکیز خانک اوچنجی اوغلی و خلیدر . ( ۱۲۲۶ م  
 و ۶۲۴ ه ) تاریخده پدری مومی الیه وفات ایتد کدنصکره مغولستان شهنشاهی  
 اولوب برادر لرینی چین و خوارزمه و اوغوردن سمرقنده قدر ممالکه حکمدار  
 تعیین و جله سنک جایه سنی در عهده ایدوب مدت سلطنتی اولان اون اوچ  
 سنه ظرفنده چینک شمالی طرفنی وارمنستانی و مسقوه دن لهستان و مجارستانه  
 قدر ممالکی و هندستاندن بعض محلاری استیلا و شرق و خطای تاتار لرینک  
 حکومتنی محو و بریاد ایلدی و وقت حضر و سفرده برابر بولندیردیغی  
 علما و امرای اسلامیه نك همت و دلالتیله خطای خلقنک اکثریسی مسلمان  
 اولدی . مومی الیهک وفاتی ( ۱۲۳۹ م و ۶۳۷ ه ) تاریخده در . اوکتای  
 سخنی و کریم الطبع بر ذات اولدیغندن پك چوق فضلا دأره سنه انتساب  
 ایتمش و جله سی مرتبه و اقتدارینه کوره اکرام کورمشدر . مأموریتلرده  
 و از جله مقام وزارتده استخدام ایچون د کرلی و اهل آدم انتخابی بوذاته  
 مخصوص بر خصلت ایدی .

§

﴿ اوکوست ﴾ — رومادولتی قونسلارندن ایکن بالاستقلال حکمدار  
 اولان ( اوقتاو ) ک عنوانیدر . ( ۵۵۵۱ خ ) تاریخده یعنی میلادک قرق  
 اوچ سنه مقدمنده روما ایمپراطوری ( سزار ) ک اعدامیله ممالکی اوچ  
 حکومت مشترک یه انقسام ایتدیکی زمان اشبو ( اوقتاو ) ک حصه سنه دخی  
 اسپانیا و ساردونیا ممالکی دوشمش ایدی لکن مومی الیه حصه مذ کوره یه  
 قناعت ایتیبو شرکاسیله محاربه لر ایدرک آز مدت ایچنده جله سنی مغلوب  
 و ممالکنی استیلا و روماده بالاستقلال حکمدار لغنی اعلان آتمسی اوزرینه  
 اشبو ( اوکوست ) یعنی ( مظفر ) عنوانه نائل اولمشدر . بو ذات مدت  
 سلطنتی اولان قرق درت سنه ظرفنده پك چوق یر لر فتح ایدوب نفوذینی  
 تاجبشستان و هندستانه قدر یورتدی . وفاتی ( عیسی ) علیه السلامک  
 ولادتی سنه سنده در .

اشبو ( اوقتاو ) غایت قورناز و ایشنه مقدم و غایت حریص بر ذات ایدی  
 حتی شریک سلطنتی و انشته سی اولان ( انطوان ) ک علیهنه قیام ایتدکه  
 بیچاره انطوان بر مدت مدافعه یه چالیشوب نهایت آقسیومده مغلوب و محبوبه سی

و مصر حاکمه سی مشهوره ( قله ٹوپاٹر ) ایله مصره فراره مجبور اولدی و عارندن کندو کندوسنی اوردی مؤخرأً قله ٹوپاٹر دخی کرک عاشقنک بو صورتله هلاکندن و کرک اوقتاودن یوز بولمه مامسندن ناشی مسوماً آخرته کتدی و بومناسبتله قوجه ملوک بطالسئ مصریه منقرض و ممالکی روما دولتنه منتقل اولدی . بوکا ( اوکوست ) ک غلطی اوله رق ( اغستوس ) دخی دیرلر . اشبو ( اوکوست ) عنواننی مؤخرأً روما حکمدار لرینک اکثریسی قبول ایتشدر . اوقتاوک انقره ده بر معبد خرابه سنده و التي عدد طاش دیرک اوستنده بر وصیتنامه سی محکو کدر اوروپا لیلر بو وصیتنامه اوزرینه ایکی کتاب تألیف ایلدیلر .

§

﴿ اولبر ﴾ — علمای هیئتدن المانیالی بر مشهور ذاتدر . ( ۱۸۰۲ م و ۱۲۱۷ هـ ) تاریخنده ( وستا ) نام سیاره یی ( پرم ) شهری رصد خانه سندن کشف و ترصد ایتدی و برقاج قویرقلی یلدیزک دور و حرکاتنی ضبط ایلدی وفاتی ( ۱۸۴۰ م و ۱۲۵۶ هـ ) تاریخنده در .

§

﴿ اولر ﴾ — ریاضیوندن بر مشهور ذاتدر و مسقط رأسی ( بال ) شهریدر . بو ذات روسیه ایمپراطور یچه سی ایکنجی ( قترینه ) طرفندن پترسبورغه دعوت اولنوب اوراده و ( برلین ) و ( پارس ) ده خیلی زمان علوم ریاضیه خواجه لکی ایتدی و پترسبورغه و برلینده معارف اعضالغنه قبول اولندی . علوم ریاضیه یه و تدقیقات و قواعد حسابیه و سفینه انشأته و تحلیلاته متعلق خیلی تألیفاتنی واردر .

§

﴿ اولک ﴾ — برشنیک یا خود بر اوچلک تخم استیعاب ایدن یعنی ربع کیله تخم اکیله ییلان ترلانک جرمنه مخصوص بر اسمدر .

§

﴿ اولکر ﴾ — ( ثریا ) دیدکاری یدی عدد طوپ یلدیزک ترکیه اسمیدر . ( توک ) و ( حاوه ) و ( عقد پروین ) دخی دیرلر . بو یلدیز ( معظم ثریا ) دنیلان بر جده واقع اولوب ( دبران ) دیدکاری یلدیزه قریب بر محله کور نمکده در . اسکی یونانلر بونلر یدی عدد قز ایدی التیمی

آهله عاشق اولوب بریسی نوع بنی آدمدن بریله ازدواج ایتدی و وفاتلرندن  
صکره جله سی یلدیزه تحویل اولندی دیر ایدی .

§

﴿ اولگون ﴾ — نام دیگر ( دولچینو ) اشقودره جوارنده وساحل  
بحرده بر کوچك قصبه در و لیمانی کوزل و ایشك ایسه ده ایکوز طونیلاته دن  
زیاده سفینه کیره مز . ( ۱۸۱۸ م و ۱۲۳۴ ه ) تاریخنده یونان قور سانلری  
بوراسنی خراب ایتدیه ده صکره ینه معمور اولدی و ( ۱۸۸۱ م و ۱۲۹۸ ه )  
تاریخنده قرار دول موجنبجه قره طاغه ترك اولندی .

§

﴿ اولوبورلی ﴾ — اسپارته سنجانغی داخلنده و اسپارته شهرینک  
جهت شمالیسنده و اون ساعت بعدنده بر قضا مرکزیدر . و قرق جامع  
و مسجدی و اون بر مدرسه سی و درت زاویه سی و بر کتبخانه سی و یکرمی  
مکتبی و تخمیناً التی بیک نفوسی واردر بوراده کوزل افیون و بادم و سائر  
هر نوع محصولات تیشور . اها لیسنگ چوغی کوزل صدالیدر و حافظی  
چوقدر و ( پچی بورلی ) و ( کونان ) ناحیه لیدر .

§

﴿ اولوج ﴾ یا خود ( اووج ) — ممالک دولت سلچوقیه ده ساکن  
ترکان قبیله لری رؤسائنه مخصوص بر عنواندر . بورئیسر دولت مشار  
الیهانک و یردیکی بعض امتیازاتی محافظه ایله برابر حین اقتضاده عسکرو یرمک  
و بولندیغی حدود و مواضعی اعدادن محافظه و لدی الایجاب محاربه ایتمک  
و آله جغی غنائمدن حصه کوندرمک کبی شرائطی اجرایه مجبور ایدیلر  
دولت علیه نک جد اعلاسی اولان سلطان ( عثمان ) غازی حضرتلری کبی  
الک بیوکلرینه دنخ ( ملک الامرا ) دیرلر ایدی .

§

﴿ اولوج ﴾ — دولت عثمانیه ده قبودان اولان مشهور ( قلیچ علی  
پاشانک ) نک عنوانیدر و قلیچ اولوجک غلطیدر . بو ذات اوللری  
جزایر بکلر بکیسی مشهور خیرالدین پاشا منسوباتندن ایکن علی التدریج  
قطع مراتب ایدرک نهایت جزایر ده انتخاب اهالی ایله بکلربکی اولدی و ( تونس )  
ولایتی حرباً آلوب جزایره الحاق ایلدی و ( ۱۵۷۱ م و ۹۷۹ ه ) تاریخنده دولت

عليه نك (قورفو) و (كفالونيا) يى و نديكلوردن اخذى مأمور يتيله كيدن دونمى  
 همايونه معاونت ايتك اوزره جزاير دونماسيله كلوب خيلى ايش كورد كدن  
 صكره (پرموزه) آچيقلرنده و قوعبولان مشهور محاربه ده قپودان على پاشا  
 مغلوب و شهيد و دونمى همايونك اكثر يسي محترق اولديغى صره ده  
 موخى اليه (اولوج على پاشا) برتقريب كيسي قورتاروب درسعادتته  
 كلدكده عهدسنة قپودانلق رتبه رفيعه سى توجيه يسورلدى و اندن  
 صكره اون التى سنه دها دولت عليه به خدمت ايدوب (۱۵۸۶ م و  
 ۹۹۵ هـ) تاريخنده وفات ايلدى.

مشار اليه زماننده مآذن زاده ديمكده مشهور ايدى . طوپخانه ده بر كوزل  
 و متين جامع شريفى واردرد .

§

﴿اولونيا﴾ — روم ايلينده برات سنجاغى داخلىنده و ونديك دكزى  
 ساحلىنده و يانيه نك شمال غربيسنده يوز قرق ايكي كيلومترو بعدنده بر شهردر  
 بوشهرك اولديغى موقع بطاقلق و هواسى و خيم اولديغندن شمدي به قدر توسع  
 ايدمىوب مقدار نفوسى التى يدى بيك راده سنده قالمش ايسده موقع مزبور  
 دولتجه و عسكر بجه غايت مهمدر و ليمانى معتبردر . بوراده اعسلا  
 زيتون ياغى چيقار . ايكنجى دفعه فتحى (۱۶۹۱ م و ۱۱۰۳ هـ)  
 تاريخنده ايدى .

§

﴿اوليس﴾ — جاهر يونانيه دن (ايتاكي) جهور ينك رئيس  
 يا خود حكمدارى و مشهور (تلاق) ك پديردر . بوذات (۴۳۱۴ خ)  
 تاريخنده يعنى ميلادك بيك ايكي يوز سكرسان سنه مقدمنده جاهر سار  
 حكمدار ليله متفقاً (ترووا) محاربه سنه كيدوب اون سنه اوغراشدقندن  
 و ترووا حكومتنى محو و برباد و ممالكنى خراب و يباب ايتد كدن صكره  
 ايتاكي به عودت ايدر كن مخالف هواله تصادف ايدر ك و اون بش يكره  
 سنه دكزلرده و ايسسز اطه لرده و بيلديكى مملكترلده سورينهرك فنا حالده  
 پریشان و نهايت مملكتنه و اصل اولديسه ده زمان غيبوبنده تختنى و زوجه سنى  
 بنمسه مش اولان طمعكارلرك القات و افساداتى سبيله اهالى بيننده اولان

اولکی اعتبار و اقبالنی بوله مدی و بر خیلی زمان اعاده اقباله اوغراشوب ایچمه موفق اولدیسده کندو اغورینه نیجه فلاکتر کچورن اوغلی حقیقلی (تلاق) ی هاتف غیبک یعنی یلانجی پاپاسلرک (اوغلاک سنی بر کون اولدیره جک) سوزی اوزرینه دیار آخره طرد و تبعید ایلسیله نامنی بر باد ایتدی (تلاق) کلمه سنه نظر بیور یله .

§

﴿اولیمبوس﴾ یاخود (اوله مپ) — ما کیدونیا ایله تسالیا آره سنده واقع سلسله جبالک اسمیدر . اسکی یونانیلر بو طاعلاک ایکی بیک طقوز یوز یمش ایکی مترو ارتقاعنده اولان الک یوکسک محلی حاشا الهلرک مسکنی اعتقاد ایدرلر و بروسه نک ارقه سنده اولان کشیش طاغنه و بولی ایله انقره آره سنده اولان (آلاطاغه) دخی بو نامی ویررلر و او اعتقادی محکم طوتارلر ایدی .

اشبو (آلاطاغ) ده (۵۵۰۵ خ) تاریخنده یعنی میلادک سکسان طقوز سنه مقدمنده رومالورلرک بر شدید محاربه سی وقوعبولمش و توار یخده بیوک شهرت آلمشدر .

§

﴿اولیمپیق﴾ یاخود (اولیمپ) — اسکی یونانیلرک یونانستانده (اولیمپیا) صحراسنده (آله) اعتقاد ایتدکلری (زه فس) ک نامنه اوله رق درت سنده بر کره یاپدقلری جمعیتک اسمیدر . بوجعیتلرده درلو درلو او یونلر و کولشدر و مسابقه و مبارزهلر ییارلر و حاصل اولان اجر و مثنوباتی و زواردن آلتان پاره لری (زه فس) معبدینک پاپاسلرینه ویررلر ایدی . ۴۸۱۸ خ) تاریخنده یعنی میلادک دیدیوز یمش التی سنه مقدمنده (قورموس) نامنده بر پهلوان جمعیت مذکوره ده فوق الامثال مهارت ابراز ایلدیکندن اوسنه (ایلد) حکمداری (ایفیتوس) ک امر یله مبداء تاریخ اعتبار اولنوب خیلی زمان دوام ایلدی و (۵۱۹۸ خ) تاریخنده یعنی میلادک اوچیوز طقسان التی سنه مقدمنده ایمپراطور (تئودوس) ک امر یله ترک اولندی . صحرای مذکور مورده شبه جزیره سنک جهت غریبسنده و (الفه اوس) نهرینک جانب یمینده واقعدر .

§

﴿اولینت﴾ — ما کیدونیا ده ایوم (حاجی ماما) دید کیری قصبه ننگ

نام عتیقیدر .

§

﴿اولیوس﴾ — ایرانده (شستر) قصبه سی جوارنده بر نهر

مشهورک اسمیدر . بوکا ایرانیلر (آب زلال) دیرلر . (آب) کله سنه

نظر بیوریه .

§

﴿اومماجی﴾ — چوجقلری قورقوتیق ایچون سویلنیلور بر شخص

موهوم و خیالیدر . بو شخص اسکی یونانیرک (لامی) دید کیری شخص

اولقی کرک یونانیرک زعمنجه اشبو لامی چالی چرپی آره سنده کیزلنوب

چوجقلری اکل آتمک اوزره قاپار کوتورر ایمش بونی اولوقت برخرچین

قاری صورتنده تصویر ایندرلر ایدی .

(اوجاق اناسی) (قویو اناسی) (حمام اناسی) (غول یبانی) (رکش)

(جازو) دخی اشبو (اومماجی) قبیلندن اصلسز شیردر .

§

﴿اومیروس﴾ یاخود (هومر) — یونان قدمای شعراسندندر .

بو آدم از میرده دنیایه کلوب (۴۶۸۶ خ) تاریخندن یعنی میلادک طقوز یوز

سکز سنه مقدمندن اولجه شهرت بولدی .

بونک بر شخص موهوم اولدیغنه و (اودیسه) و (ایلیاد) کبی منظومه لرینک

دیگر کسه لر معرفتیه طویلا نمش شیرلر ای دوکنه ذاهب اولنرده واردر .

اشبو (اومیروس) علی روایه از میردن ساقز جزیره سنه هجرت ایندرک

اوراده بر مکتب کشاد ایتدی و آخر عمرنده ایکی کوزی علیل و غایت

الغایه فقیر اولدیغندن مملکتلری طولاشوب انشاد ایتدیکی ایاتی کلیسا

قبولرنده اوقویه رق تعیشه مجبور اولدی . ذکر اولنان آثارنده (ترووا)

محارباتک بعض احوالی و (ایتاک) حکمداری (اولیس) ک سرگذشتی

یالان کرچک محرردر و برچوق صاچه صپان هجویه لر واردر .

§

﴿اون﴾ — بنی اسرائیل (یوسف) علیه السلامک وفرعون مصرک

مساعده سنيه ارض كنعان دن مصره هجرت ايتديكي زمان كندولرينه تمليك اولنان (جاسان) اراضيسي داخلنده بر جسيم شهردر . بوشهری اولوقت بنی اسرائیل اعمار وتوسیع ایدوب حوالیسنه دها بر چوق قصابات وقرا یابدردی وحضرت مشارالیه مرکز حکومت آنخاذ بیوردی . وفاتی دخی بوراده وقوعبولشدر . شهر مذکورک نام اخیری (عین الشمس) در .

§

﴿اویتر﴾ — عقائد خرسیتیانیه دن بر اعتقادك اسمیدر .  
(اعتقاد) کلهسنده فرق خرسیتیانیه دن اون التنجی نومروه الی ۲۰ نظر بیوریه .

§

﴿اویسن﴾ (ابن عامر القرنی) — سادات تابعیندندر . بوذات عالیقدر یمنده (قرن) قریهسنده ساکن اولور ودوه چوبانلغیله اشتغال وتعیش بیورر ودائماً علیه الصلاة والسلام افندمزك اثنای عالیارنده بولنور ایدی . امام علی کرم الله وجهه ورضی الله عنه حضرتلری مخصوصاً زیارتلرینه کیدوب مصاحبت بیورمشلدر . اصحاب کرامدن (هرم بن حیان) حضرتلری دخی کورشمسنی آرزو وقریه مذکوره یه عزیمت ایدوب بصره یه تشریف بیوردقلرینی خبر آلدیغندن اولطرفه توجه وفرات نهری کنارنده آبدست آلور ایکن تصادف ایلدکده حضرت (اویس) اولدن هیچ طانیدیغی حالده کوردیکی کبی یلوب وبرمقدار مصاحبت ایدوب (علیک بحفظ قلبك یاهرم) بیوردی .  
حضرت (اویس) (۶۵۷ م و ۳۷ ه) تاریخنده وقوعبولان صفین محاربهسنده جناب (علی المرتضی) طرفته کلمش و اثنای محاربهده شهید اولمشدر (عاش جیداً ومات شهیداً) .

دین محمدینک ظهورندن اول بلا واسطه ودلیل تحصیل کمال وتنویر بال ایدن صلحایه (برخیان) دیدکلری کبی علیه الصلاة والسلام افندمزى تصدیق وشریعت مطهره یه تمسک وتوجه و امداد روحانیت نبویه ومرشدین ایله واصل الی الله اولان ذوات کرامه دخی (اویسی) دیرلر زیرا حضرت (اویس) دخی بوضورته یعنی علیه الصلاة والسلام افندمزى کورمکسزین



و بر واسطه ظاهره به مراجعت ایتکسزین امداد روحانیت جناب نبویه ایله  
 واصل سر منزل مقصود اولشرا ایدی .

§

﴿ او یغور ﴾ — ترکستان شرقی قبائلندن بر جسم قبیله نك اسمیدر .  
 ( آوار ) کله سنه مراجعت بیور یله .

§

﴿ اهرام ﴾ -- قاعده سی اشکال ذو کثیره الاضلاع دن بری اوله رق  
 و جوهر لی مثلثلردن عبارت اولان و مثلثلرک رأسلری خارجه بر نقطه ده  
 برلشان شکل هندسی به دینور و اشبور رأسلرک برلشدیکی نقطه به اهرامک  
 رأسی و رأسدن اهرامک قاعده سی اوزرینه نازل اولان عموده اهرامک ارتفاعی  
 و مثلثلردن برینک قاعده سی اوزرینه نازل اولان عموده دخی اهرامک ضلع  
 قائمی تسمیه اولنور و ارتفاعی قاعده سنه عمود اولان اهرامه ( اهرام قائم )  
 و ارتفاعی قاعده سنه عمود اولیان اهرامه ( اهرام مائل ) و قاعده سی شکل  
 ذو کثیره الاضلاع دن مثلث اولان اهرامه ( اهرام مثلثی ) و مربع اولانه  
 ( اهرام مربعی ) و منحنس اولانه ( منحنسی الی آخره ) و قاعده سی موازی  
 بر سطح مستوی ایله قطع اولنورق قسم علیاسی ترک اولنان اهرامه ( اهرام  
 ناقص ) تعبیر اولنور .

هرقنغی بر اهرامک جمعی یعنی مساحه جسمیه سی قاعده سی سطحنک ارتفاعنه  
 ضربنک ثلثی اخذ اولنورق تعیین اولنور مثلا بر اهرامک قاعده سی سطحی  
 ۲۵ زراع مربعی اولسه و ارتفاعی دخی ۶ زراع اولسه (  $50 = \frac{6 \times 25}{2}$  )  
 اولور یعنی اهرام مزبور جمنک الی ارشون مکعبی اولدیغی اکلاشیلور  
 فقط اهرام ناقصک جمعی قاعده لری سطحلری مجموعی ینه قاعده لری حاصل  
 ضربنک جذریله جمع اولنوب اشبو مجموع دخی ارتفاعنک ثلثنه ضرب ایله  
 استحصال اولنق لازمدر مثلا بر اهرام ناقصک قاعده فوقانیسنک سطحی  
 ۲۵ زراع مربعی و قاعده تحتانیسنک سطحی ۶۴ زراع مربعی اولسه  
 و ارتفاعی دخی ۱۲ زراع (  $12 = \sqrt{\frac{1}{3} \times 64 \times 25}$  ) اولور یعنی  
 اهرام ناقص مزبور جمنک ۵۱۶ زراع مکعبی اولدیغی تین ایدر .

مصرده فراغنه دن بعضیلرینک کندولرینه مزار اولق اوزره پایدیرمش

اولدقلىرى ظن اولنان وجزه ايله فسطاق نام محل بيشنده و تمش ميل مسافده  
 وغير منتظم براستقامتمده منفرداً واقع اولان مبانيء جسيمه مشهوره نك اسمى  
 دخی ( اهرام ) در وبونرك الك جسيمى جزه او كنده بولنانلردر و ايجلرندن  
 بعضيلرنك اوزرنده ( هير و غليف ) دنيلان خط قديم ايله برطاقم وقايع محرر  
 اولوب خط مزبور ايسه سلطان اجد ميدانده كى ديكيلى طاشك اوزرنده  
 كورلديكى كى برطاقم نقوش وتصاويردن عبارتدر . در دنجى سلالهء  
 فراغنه دن ( خياپوش ) نام ديكر ( سوفس ) ك ياپديرمش اولديغى هرمك  
 قاعده سنك بر ضلعى ايكوز يكرمى درت و ارتفاعى يوز قرق ايكى مترو  
 اولوب زروه سنده اوتوز قدم تر يعنده بر سطح اوزرنده بر قاچ او طه ايله  
 مكلف بر مزار موجود در و اون سكرنجى سلاله دن ( قوڭ ) نام فرعونك  
 ياپديرمش اولديغى هرمك قاعده سى ضلعى ايكوز اوتوز اوج و ارتفاعى  
 يوز اللى ايكى و ( شفرام ) نام فرعونك هرمك قاعده سى ضلعى ايكوز  
 اون بش و ارتفاعى يوز اوتوز اوج مترودر و كافه سنك شكل هندسيلى  
 اهرام مربعى اولديغى كى جلاه سنك وجوه اربعه سى يوصله نك ارا نه ايلديكى  
 جهات اربعه يه مطابق اوله رق واقعدر و الك بيوك هرمك مصنوع  
 اولديغى طاشك مجموع ثقلتى التى مليون طونولاته يعنى يوز سكر مليون  
 قنطار اعشارى اولق اوزره حساب و تخمين اولمشدر .

( خياپوش ) نام فرعون اهلين اوج ماهده بر تبديل اولنقى اوزره يوز بيك  
 عمله ترتيب و اول امرده جزيره العرب دن كتوريله جك طاشلرك نقلنده  
 سهولت اولق ايچون شوسه قلقى و فقط اوزرى اهرامه قونيلان ايرى  
 طاشلردن قالديرم دوشه لى بريول انشاسنه مباشرت ايدوب يالكز يولنى  
 اون سنده و هرمنى يكرمى سنده تكميل ايدو بيلديكى و هرمك اوزرنده  
 عمله يه و يريلان تورپ و صوغان كى تعييناتك حيرت افزاى عقول اولان  
 مصارفى منقوش و محرر ايدوكنى ابو المورخين ( هردوت ) بيان المشدرد .

خلفاى عباسيه دن مأمون خليفه مصره كلديكنده اهرام دن برينك هدمنى  
 امر ايتكله طول مدت چاليشيله رق بر كوچور كنك يكرمى آرشون ثخننده  
 اولان ديوارى دليوب ايجروسنه كيرلده كده براو طه جق ايچنده ( زبرجد ) دن  
 مصنوع بر مطهره ايله قرق درهم وزننده بيك عدد مسكوك التون بولنش

وغرائب اتفاقه دن اوله رق مذکور المقدار التونك قيمتي دليكي آچق ايجون  
 صرف اولنان مبالغه تقابل ائشدر .

ملوك ابو بيه دن ( عبد العزيز عثمان بن صلاح الدين ) زمانده طاشلى  
 بعض ابيه مير يه يه صرف اولئق اوزره ينه بر كوچور كنك تپه سندن  
 هدمنه باشلانيلوب سكر آي چاليشلديغى حالده كونده انجق سكر آرشون  
 مكعبى جسامتمنده طاشردن برر ايكيشر دانه سى سو كيله بيلدى وبونلر اشاغى  
 براغلدقه زلزله كبي رى صار صه رق قومه كوميلوب هر طاش هزار مشتمله  
 قومدن اخراج و پارچه لنه رق صرف اولدى و بر طرفدن دخى فضله سى  
 بر كناره استيف ايدلى و ييغيلان طاشلى كورنلر اهرامك كافه سى ييغيش  
 و هر مه بقانلر هيچ بر طاش بيله قوپارلماش ظننده و حيرتده قالدى .  
 آمر يقاده مكسيقا قطعه سنده دخى طاش و طوغله دن مصنوع و مصر  
 اهرامنه شبيه مباني متعدد عتيقه واردر و اورالجه اسملى ( نه اوقاليس ) در  
 اهالى بونلر بيت الله اعتقاد ايدرك قبولرى او كارنده قربانلر كسرلر .

§

﴿ اهرمن ﴾ — مجوسيلرك اعتقادنجه موجودات عالمك مبدئى  
 اولان ايكي اصلك بريدر و ديكرى ( يزدان ) در و يزدان قديم وازلى  
 و اهرمن محدث و مخلوقدر . بوخيشلر كويا يزدان بكا برمنزاع ظهور  
 ايدر ايسه عجباً حال نيجه اولور ديوتفكر اتمسيله و بوتفكر طبيعت  
 نور ايه سنه مابين كلهرك متكدر اولمسيله ( اهرمن ) يعنى ظلمت حاصل اولدى  
 و اهرمن شر و فساد و ضرر و كساد اوزرينه مطبوع اولديغى چون حسب  
 الطبيعه يزدانك يعنى نورك اوستنه چيقدى و يزدانك عسكريله اهرمنك  
 عسكرى بر بر ليله محاربه ايدوب نهايت ملائكه نك توسطيله و اهرمن  
 يدى بيك ييل عالم سفلاده تصرف ايتك شرطيله مصالحه و قوعبولدى  
 ايسه ده اهرمن او ائتاده دنيا اهلى كاملاً هلاك ايلديكندن ميدان كندوسنه  
 قالدى و صكره نوع بنى آدم ( كيومرث ) دن بدأ و تكثر ايلدى ديرلر .  
 مجوسيلرك ( زردشتى ) فرقه سى يزدانى و اهرمنى خالق و احدك مخلوقيدر  
 ديدير و ( تنويه ) و ( مانويه ) فرقه لرى ايكيسنك دخى قديم وازلى  
 اولديغنه ذاهب اولديلر .

§

﴿ اهل صلیب ﴾ - ( ۱۰۴۱ م و ۱۳۳ هـ ) تاریخنده پایا بولنان  
 طقوزنجی ( بنوا ) اسلامک آن بان ترقی آتمکده اولدیغی بویله برزمانده  
 اوروپا دولترینک بربرلیله مقابله و منازعه اتمسی لایق دکلد  
 اولا بر مصالحه عمومیه عقد اولنسون صکره ایجابی اوزره ایشه مباشرتله  
 قدس شریف اسلامک الیرندن قورتارلسون دیهرک اوروپا دولترینه  
 و بتون خرسیتیانلره اعلانمه لر کوندروب ( متارکه آلهیه ) نامیله بر معاهده  
 تنظیم ایتدیرمش و ( ۱۰۹۶ م و ۴۹۰ هـ ) تاریخنده پایا بولنان ایکنجی  
 ( اوربن ) دخی اولکی ملاحظه یی تازه لیوب و فرانسه و شرق ایمپراطور لریله  
 ( پولونیا ) و ( نورماندیا ) ککی بیوک دو قه لقری تشویق و برچوق  
 اجر و مشوبات و جمیع کناهلردن عفو عمومی و عهد ایدوب اورته لغی  
 ایقلندیرمش اولدیغندن هر طرفدن فرانسه یه کو کلو عسکر کلکه باشلادی  
 و طوپلنان اشبو ساده دل فداییرک کو کسیرینه قرمز ی چوقه دن بر رخاچ  
 رسمی دیکیلوب اهل صلیب یا خود ( قرووزاد ) نامی و یرلدی و تاریخ  
 مذکور دن اعتباراً بش سنه ظرفنده انکلتره قرالیله سوق اولنان اهل صلیب  
 قدس شریف و عکا و انطاکیه و اورفه و بیروت و حوالیسینی آلدی  
 لکن کنسیرک انجق اوچده بری صاغ قالدی و ( ۱۱۲۶ م و ۵۴۱ هـ )  
 تاریخندن اعتباراً یدی سنه ظرفنده آلمانیا و فرانسه قرالریله کلان اهل صلیب  
 فرقه لرندن انجق یوزده یکریمی صاغ اوله رق قدس شریفه و اصل  
 اوله یلوب ذکر اولنان قرالرق قدس شریفی یالکز بر زیارتله اکتفا و عودت  
 ایلدی و جنرال ( جورج ) قومانداسنده بولنان فرقه طرابلس غربی آلوب  
 تونس و قیروان حدود لرینی تهدید ایتدی و ( ۱۱۸۷ م و ۵۸۳ هـ ) تاریخنده  
 برآ و بحرأ هجوم ایدن اهل صلیب فرقه لرندن المانیا قرالی ( فره دریق )  
 قومانداسنده اولان فرقه اناطولی ایچنده مغلوب و مومی الیه بر نهرده مغروق  
 اولدی و فرانسه و انکلتره قرالرینک قومانداسنده اولنر یالکز عکایی  
 تکرار ضبط ایدوب ده ایلروسنه واره مدی و ( ۱۲۰۲ م و ۵۹۹ هـ ) تاریخنده  
 پایا بولنان اوچنجی ( اینوسانس ) اورو پالیری تکرار تشویق ایلدیسده  
 خلقک کوزی ییلش و ثوابدن بیغمش اولدیغندن چوقلق تأثیر ی اوله مدی  
 و طوپلنانلر دخی استانبوله قدر کلوب روم ایمپراطورینک تختنی ضبط

و برلانتین حکومتی تشکیلیده اکتفا ایلدی و بونلرک برکوچک فرقه سی  
اکرچه استانبولدن قدس شریف امدادینه کتمک اوزره یوله چیقدیسه ده  
اوکرینه دوشن دلیل قره دن طوغری مصره کتوروب جله سنی اسپردر  
دیو صاندی و (۱۲۲۹ م و ۱۲۲۷ هـ) تاریخنده المانیا ایمپراطوری ایکنچی  
(فره دریق) برچوق عسکر ایله کلوب (دمیاط) ی استیلادن صکره  
(عکا) و (صور) قلعه لری یکی تشکل ایدن قدس قرالغی یدنده قالمق  
و خرستیانلر قدس شریف زیارتدن محروم اولماق و بیت مقدسه تعرض  
ایدلامک اوزره (ملک کامل) ایله برمصالحه یایدی و (۱۲۵۰ م و ۱۲۴۸ هـ)  
تاریخنده فرانسه قرالی طقوزنجی (سنت لویی) ایتدیکی بر ندر اوزرینه  
مکمل اردو ترتیب ایدرک قدس شریفی قورتارمغه کلدی و (دمیاط) ی  
استرداد و (منصوره) بی استیلا ایلدیسه ده بومحاربه ده نیلک طغیان زمانه  
تصادف ایتدیکندن برمرکه ده عسکرینک اکثریسی غرق و کندوسی اسپر اولمقدن  
بشقه ایش کوره مدی و صکره اجه قوتیله و بریمین ایله یقایی قورتاروب  
برتقریب مملکتنه دوشدی و (۱۲۶۱ م و ۱۲۶۰ هـ) تاریخنده فرانسه قرالی  
(لویی) دخی اسپانیولردن و پورتکیزلردن طویلادیغی برطاقم سبکمزان  
و انکلیر قرالک اوغلی (ادوارس) ایله کلدیسه ده بودخی محجوبیتدن  
بشقه برایش بجره مدی واردوسنه مستولی اولان و باعلتندن عسکرینک  
برچوغی و کندوسی وفات ایلدی.

§

﴿آهو﴾ — (ظبی) دنیلان حیوانکه بوکا نوعنه کوره (غزال)  
و (کیک) و (جیلان) و (قره جه) دخی دیرلر. فتاوی صاحبی  
برفقیه حنفینک اسمی دخی (آهو) در فتاوی تاتار خانیه صاحبی بونک  
کتابندن پک چوق مسئله اخذ و نقل ایلشدر. تاتارخانینک نقلندن  
اکلاشلدیغنه کوره اشبو (آهو) قاضی خاندن مؤخر ایدی.

§

﴿اهواز﴾ یاخود (سوق الاهواز) — بوراسی وقتیه مجره دن  
بصره کورفزینه آقان (کارون) نهری جوارنده (رامهرمز) و (ایذج)  
(و عسکر مکرم) و (شدستر) و (جندی شاپور) و (سوس) و (سرق)

و (نهرتیرا) و (منادر) شهرلرینک مرکزی ایدی و بوشهرلرک مجتمع اولدیغی ولایتہ (سوزیان) یاخود (خوزستان) دیرلر ایدی . بورلری اسلام یدینه کچدکن صکره فوق الغایه اهمیت کسب ایلشدر . شسترنهری بورادن آقار . (خوزستان) کله سنه دخی نظر بیوریلہ .

§

﴿ آیات ﴾ — فروع علم تفسیردن (علم الآيات المتشابهات) بر بیوک علمدر بو علمده ابتدا کتاب تصنیف ایدن امام (کسائی) اولوب انی مؤخرأ (سخاوی) نظم آتشدی اندن صکره بو علمده دها یک چوق کتاب تألیف اولندی و (ملاک التأویل) جمله سنه ترجیح ایلدی . (۱۳۰۹ م و ۶۰۶ هـ) تاریخنده وفات ایدن امام (فخرالدین عمرالازینک تألیف ایتدیکی (ایات البينات) و امام (محمد بن عمر بن دمیہ) نک تألیف ایتدیکی (ایات البينات) و (۱۴۴۸ م و ۸۵۲ هـ) تاریخنده وفات ایدن حافظ (شهاب الدین) بن حجر العسقلانیک تألیف ایتدیکی (الایات النیرات للخوارق والمعجزات) و (۱۵۴۵ م و ۹۵۲ هـ) تاریخنده وفات ایدن شیخ (محمد بن یوسف بن علی دمشقی) نک تألیف ایتدیکی (الایات العظيمة الباهرة فی معراج سید اهل دنیا والاخرة) نام کتابی شایان مطالعه در .

§

﴿ آياس ﴾ — بروسه علماسندن بر مبارک ذاتدر . بو ذات عالیقدر ابتدا تحصیل و تدریس علومه اشتغال ایدوب مؤخرأ سلطان (محمد ثانی) حضرتلرینه خواجدهک ایتش و دها صکره علوم باطنه دن لذتیاب اوله رق اختیار انزوا ایلشدر . زمانک قطبی اولسی دخی مظنوندر و اثارندن بعض حواشیسی موجود در .

§

﴿ آياس پاشا ﴾ — سلطان سلیم و سلیمان زمانلرنده ایکی سنه صدارت ایتش بر ذاتدر واصلی ارنود اولوب (۱۵۳۷ م و ۹۴۴ هـ) تاریخنده وفات آتشدر .

§

﴿ قاضی آياس ﴾ — قاضی کله سنه نظر بیوریلہ .

§

﴿ آياش ﴾ مع كودك — انقره ولايتنه تابع بر قضا مركزيدر .  
 بورادن شرق جابنه طوغرى بش ساعت كيدلديكى حالده انقره يه واريلور  
 اياشده پك چوق ذوات كرام مدفوندر . ملحقانندن بكيپازارنده اولان  
 بايه نك صويي پك شفاليذر . قاوونى مشهوردر .

§

﴿ آيا سلوغ ﴾ — ( افس ) كلسنه نظر بيوريله .

§

﴿ ايا صوفيه ﴾ — در سعادتده اثار عتيقه دن معدود بر جامع شريفدر  
 بونى استانبول امپراطورى ( ژوستنين ) محترق اولان بر كليسا عرصه سى  
 اوزرينه ياپدوروب ( ۵۳۷ م ) تاريخنده رسم كشاديني اجرا ايلدى وقبه سى  
 يكرمى سنه صكره حركت ارضدن منهدم اولديغى جهته تله تكرار ياپلدى  
 استانبول فتح اولنديغى زمان سلطان ( محمد ثانى ) حضرتلر نك امريله  
 جامعه تحويل و تعمير ايديلوب ايلك جمعه نمازى اوراده ادا اولندى  
 ايا صوفيه نك دروننده اولان ستونلر شام شريفده بعلبك شهر قديمنده شمس  
 پرسترك شمس نامنه ياپدقلى عبادتخانه نك ستونلرى ايدى صكره بوستونلر  
 قيصر ( اورليانوس ) ك امريله رومايه جلب و ينه شمس نامنه ياپيلان بر  
 معبده وضع اولندى ومبعد مذكور خراب اولدقدن صكره اصلزادكاندن  
 برينك زوجه سنه ميراث قالوب ايا صوفيه نك انشاسى اتناسنده بو قادين طرفندن  
 ( ژوستنين ) ه اهدا ايلدى . ايا صوفيه نك صاغ طرفنده اولان مناره يى  
 سلطان مشارليه وصول طرفنده كنى سلطان ( بايزيد ) و ديكر ايكي مناره يى  
 سلطان ( سليم ثانى ) و دروننده اولان مرمر بيوك كوپلرى سلطان ( مراد  
 ثالث ) و طاش كرسى يى سلطان ( مراد رابع ) حضراتى ياپديرمشدر .  
 ايا صوفيه نك محرابدن قارشوسنده كى بيوك قپويه قدر وسعتى ايكيوز التمش  
 طقوز و عرضى ايكيوز قرق اوچ وزميندن قبه نك وسطنه قدر ارتفاعى يوز  
 سكسان سكر قدمدر و دروننده يدى عدد قپو واردر و بيوك شمعدانلر  
 اموال غنايمنددر .

سلطان ( سليم ثانى ) و سلطان ( مراد ثالث ) و فاتح اكرى سلطان ( محمد )  
 و سلطان ( ابراهيم ) و شهزادكان حضراتنك تربهلرى جامع شريف مزبورك

خارجنده در و بو تر به لرك اڭ يوڭى اولان و جامع شريفه متصل بولنان  
تر به جامع شريف ايله برابر ياپلش اسڭى بنالردندر.

كوچك اياصوفيه دخى ذكر اولنان ايمپراطور (ژوستنين) كڭ امريله  
اعزه خرسپتيايه دن (سركيوس) و (واقهوس) نامنه ياپلش و سلطان  
(بايزيد ثانى) حضرتلى زماننده دارالسعادة الشريفه اغاسى (حسين)  
اغا معرفتيله جامعه تحويل اولمشدر.

§

﴿ايريا﴾ ياخود (هيريا) — اسپانيا شبه جزيره سنك رومالور  
يدينه كچمزدن اولكى ناميدر. اولوقت اسپانيايه يوڭ هيريا و ايتاليايه  
كوچك هيريا ديرل ايدى .

اسپانيايه اولوقت (هيسپانيه) دینلديكى دخى بعض توارينخده كورلمشدر.  
روسيه ممالكندن اولان (ايمره لى) ولايتنك نام عتيقى دخى (ايريا) در .

§

﴿ايسامتيس﴾ — (پيسامه تيك) مصرك غرب شماليسنده  
مشتركا حكومت ايتش اون ايكي حكمدارك بريدر . اشبو حكمدارلر  
اون بش سنه مشتركا حكومت ايتدكن صكره (۴۹۴۴ خ) تارينخنده  
يعنى ميلادك التى يوز اللى سنه مقدمنده ايجلرندن بوئى بر سبب غرييه  
مبنى چيقاروب طرد ايتدكلرندن بودخى اناطولى طرفنه كچدى و او ائاده  
يونانستاندن از مير و آيدين و موغله طرفلر ينه هجرت ايتكده اولان حشرانك  
و يونان قورصانلر ينك اعانه سيله كيدوب مصرى ضبط و يكرمى التجبى  
سلاله فراغنه يى تشكيل ايتدى و (منفيس) و (تب) شهرلر ينى تزوين  
و (توقراتى) شهر ينى يونان تجار يته كشاد ايلدى .

(ايسامتيس) كڭ سبب طردى شو و جهله در كه اشبو اون ايكي حكمدار  
اشراك حكومت معاهده سنى ياپدقن صكره عجباً بو معاهده يى اچمزدن  
كيم بوزه يلور و بزه كيم غلبه ايده يلور ديو هاتف غيبه سؤال  
وهاتف غيبك (اچيكردن هر كيم تيمور طاس ايله شراب اچر ايسه او كسه  
بو معاهده يى بوزار) جوابى اوزر ينه بونلر دخى تيمور طاس ايله شراب  
اچلما سنى بر لر ينه قوياً تنبيه ايدرلر و بو صورتله اداره ايدوب



کیدر لر ایکن بر کون (ایپسامتیس) باشنده کی شابقه ایله بر شراب ایچر  
 و صکره شابقه نك ایچنده تیمور اولدیغنی اکلایوب پاپاسلره اخبار ایتمسایله  
 ایش اکلایشیلور و درحال طرد و تبعید اولنور.  
 بووقه هاتف غیب دید کوری پاپاسلر معرفتیه صکره دن اویدیرلش برشی  
 دکده ندر. (لابرنت) کله سنه نظر دنخی بیور یله .

§

﴿ ایپسوس ﴾ — آسیای صغرا ده (فریکیا) داخلنده بر قصبه در.  
 اسکندر یونانی وفات ایلوب ممالکی امراسی بیننده تقسیم اولندیغنی صره ده  
 جنرال (سلوکوس) ک حصه سنه دوشن ممالکه تسلط ایدن (لیدیا)  
 و فریکیا حکمداری (انتی غون) علیه نه وقوعبولان متفقین محاربه  
 جسمیه سی اشبو (ایپسوس) قصبه سی جوارنده اولمش ایدی.  
 شمیدیکی اسمی (بولوادین) در قره حصارک جانب شرقیسنده و یکر می  
 سکز میل بعدنده در .

§

﴿ ایپک ﴾ — روم ایلنده قوصوه ولایتنه ملحق (پرزین) سنجاغی  
 داخلنده بر قضا مرکز یدر . بو شهر یکی بازارک اون سکز ساعت بعدنده  
 و (بستریجه) نهری اوزرنده واقع اولوب دروننده اون برجامع شریف  
 و ایکی مدرسه و اون ایکی مکتب و قضا سنده یکر می بیک نفوس واردر  
 و نام عتیقی (بتشیوم) در . ایپک شهرینک اوچ درت ساعت خارچنده  
 (دجان) نامیله معروف اولان مناسترده موجود اولان راهب لر کلان کچن  
 یولجیلره و زواره اکرام ایدرلر .

§

﴿ ایپک بوجکی ﴾ — صنف هوامدن بر بوجکدر بو قیتملو بوجک  
 فی الاصل بلاد شرقیه و باخصوص چین و ژاپون ممالکنه مخصوص  
 ایکن شمیدیکی بلاد معتدله نك همان کافه سنده تدارک اولندی .  
 بو بوجک تخمی خشخاش تخمی قدر اوفق میورطه لردن عبارت اولوب  
 سنجاغی کوردیکی کبی اشبو میورطه لردن کوچک طرطل شکنده چیقهرق  
 آق توت پیراغیله بسله نیلور و بر بچق ماه ظرفنده تدر یجا بیور ایسه ده  
 بر مدت معلومه ظرفنده او یوشوب بیومکدن قالور و بعده مذکور طرطلر

ینه بیومکه باشلا یوب نهایت کالنی بولدیغی کبی میسه دالری اوزرنده جو فندن چیقاردیغی ایپک تلی ایله (ارهشید) دنیلان عربستان فندیغی شککنده بوغلیجه برمحفظه یاپوب کندوسنی دروننده حفظ ایدر ومد کور محفظه یه قوزه دنیلور مؤخرأ قوزه دروننده شککنه تبدلات عارض اوله رق اسمرجه بر یولک سیکک قیافتنه کیرمسایله برابرینه اویوشور قالور ویدی سکرز کون صکره قیافت وهیئتینه دکیشه رک قوزه بی دلوب بیوجک بیاض کلبک صورتنده دیشاری چیقار و اولوقت چفتلمرلیله دیشیسی بالاده ذکر اولنان تخملری یورطلغه باشلار و یورطلسنی متعاقب ارکک و دیشیسی هلاک اولور فقط ایپکی استحصالی اولنه جق قوزه لرک بوجکلرینه قوزه بی دلوب چیمغه میدان و یرلیسوب قوزه لر فرونه قونه رق یاخود قزغین کونشه سر یله رک هلاک ایدیلور چونکه دلیک قوزه لر منسوجانده استعمال اولنه مز و مع مافیله (صیداق) تعبیر اولنان بوکبی دلیک قوزه لر صیحا ق صوده قینالدقندن صکره ال ایله دیدیلیر رک (کوکول) تعبیر اولنان ایپک یوکی یایلق و بونکله ایپک اعمال اولنق ممکن اولور . بر درهم اعشاری اعلا بوجک تخمندن ۱۳۵۰ درهم اعشاری قوزه و بو مقدار قوزه دن ۱۳۳ درهم اعشاری ایپک استحصالی بحر بدر .

§

﴿ایمالح﴾ — دولت اسرائیلیه حکمدارلرندن بر غدار آدمدر . (۴۲۸۵ خ) تاریخنده یعنی میلادک بیک اوچیوز طقوز سنه مقدمنده پدری (کدعون) ک وفاتی اوزرینه کندویه طرفدار اولان قبیله خلقنک معاونتیه التمش طقوز نفر قرنداشلینی بر کونده کاملاً اعدام ایدرک تخته چیقدیسه ده اوچ سنه دن زیاده سلطنت سوره مدی و بر کون سواقندن کچر ایکن بر جانی یا تمش قارینک آتدیغی طاش ایله مجروح اولوب حیاتندن امیددی کسدکده بر قادینک آتدیغی طاش ایله هلاک اولدی دیدیر تمامک ایچون قرناسندن برینه قفاسنک کسلستی امر ایتدی و وقوعبولان ابرام والاحی اوزرینه حریف قفاسنی کسوب یقایی قورتاردی .

§

﴿ ایلیس ﴾ — مصرده صوده تعیش ایدر بر نوع قره بطاق  
 قوشیدر . بوقوش صوده اولان حیواناتی تلف ایتدیکچسون مصریلرک  
 زندنه فوق الغایه تقدیس اولان حیواناتدن اولوب کندوسنه برده قدرت  
 الوهیه ویرلمشیدی . مصریلرک اولوقت پرستش ایتدکلری ( اوژیریس )  
 نام الهه نك قاریسنك اسمی دخی ( ایلیس ) واوغلنك اسمی ( اور ) یاخود  
 ( اوروس ) ایمش .

§

﴿ ایتالیا ﴾ — اروپا قطعسنك جهت جنوبیسنده شمالاً فرانسه  
 واوستریا واسویچره وشرقاً ونديك کورفری و یونان دکزی وجنوباً بحر  
 سفید و غرباً سچلیا دکزی وجنوه کورفریله محدود بر قطعهُ جسمه در .  
 ایتالیا شمالدن جنوبه طوغری اوزامش بر شبه جزیره اولوب اراضیسنك  
 مساحهُ سطحیه سی تربیعاً ایکی یوز طقسان التی بیک کیلومتر و نفوسی  
 یکر می یدی ملیوندر . هواسی معتدل ایسده و وسطنده کی بطاقلقر خیلی  
 امراض تولیدینه سبب اولمقده در . بوراسی روما دولتی منقرض اولدقن  
 صکره پك چوق الله پکدیکی کبی ( ۵۷۰ م ) تاریخنده دخی شرق  
 ایمپراطور لغیسه لومباردیا قرالغی بینده تقسیم و بر چوق زمان دوقهلق  
 وقوتلق وجهله اداره اولندی واون ایکنجی واون اوچنجی عصرلرده  
 سواحلنده ونديك وجنوه وناپولی کبی جمهوریتلر تشکل ایتدی وپاپا  
 حکومتلرینك کسب وسعت ایتسی ونورماندلرک ایتالیای جنوبیده کی فتوحاتی  
 ومانلرک لومباردرلی تحت اطاعته المسی کبی حادثات جسمه ایتالیانك نوع  
 نوع انقلابنه سبب اولدی و ( ۱۸۵۹ م و ۱۲۷۶ هـ ) تاریخنه قدر ( ساردینیا  
 و ( موناکو ) و ( لومباردیا ) و ( طوسقانه ) و ( سچلیاتین ) کبی مستقلاً  
 اداره اولنان طقوز عدد ولایات تاریخ مذکورده وقوعبولان محاربات  
 عقبنده برلشدریلوب ابتدا ساردینیا ومؤخرأ ایتالیا نامی ویرلدی ودها  
 صکره ذکر اولنان ( لومباردیا ) و ( ونديك ) ممالکی فرانسزلرک قوت  
 وعاتیله اوستریادن آنوب ایتالیایه ویرلدی وایتالیادخی فرانسزلرک  
 اشبو معاونت وهمتنه مقابله ( ساوه ) و ( نیس ) ایلترینی فرانسزلره اعطا  
 واحسان ایلدی .

ایتالیا دولتسک قوت و مکتی ایچون (حکومت) کله سنه نظر یور یله .  
§

﴿ آی چیچکی ﴾ — معروف بر چیچکدر اناتولی وروم ایلی اهاالیسی  
کون چیچکی دخی دیرلر . بو چیچک اورو پاده کلیت اوزره ترلا ترلا  
اکیلور و چیچکندن و تخمندن و صاپندن و الحاصل هر شینندن بشقه بشقه  
استفاده اولنور و اکیلان محک هواسنی تصحیح و بطاقلقک علل متنوعه  
ظهورینی مستلزم اولان و خامتنی نحو ایدر .

چیچکندن آریلر کلیتی و غایت لذیذ بال آور و تخمندن ییمک و یا قق  
و صابون یا قق ایچون اعلا یاغ چیقار یلور وینه تخمیله طاق و امثالی  
کوچک حیوانات و یاش و قوری پیرا قریله بیوک حیوانات بسله نیلور  
و دانه لری نیک قبوغی چیقار یله رق بلغور و پرنج کبی پیشیر یلور و دانه لری  
قاور یلوب بعض بهارات ایله قاریشدر یلور ایسه چقولاته یه معادل برشیء  
حاصل اولور و چیچکی آچلزدن اول غنجه سی سائر سیره مثللو طبخ و اکل  
ایدیلور ایسه انکنار لذتی و یرر . و چیچککله تخمی الندقدن صکره  
قالان طبانی صوده حشلا نوبده اینکره و یرلدیکی حالده سو دینی آرتیرر .  
چینلور صاپنده اولان لیفردن غایت اینجه و لطیف بر نوع قاش طوقو یوب  
ایک منسوجاتدن بهالی صتارلر و دانه لری نیک قبوغندن قبا کاغد و صاپنک  
اوزندن یازی کاغدی اعمال ایدرلر . آی چیچکی زراعتی روسیه ده اول درجه  
ایلر و لمشدر که ( ۱۸۶۵ م و ۱۲۸۲ هـ ) تاریخنده روسیه ممالکنه ( ۵۰ )  
ملیون قبه آی چیچکی تخمی ادخال اولمش و بهاسی ۳۸ ملیون غروشه  
بالغ اولمشدر چونکه ییدی کمز سیر یاغنک ایچنده یوزده اون بش یکرهی  
آی چیچکی یاغی واردر . واه ( زراعمر ) واه ( تشویق ) واه ( طریق )  
§

﴿ ایدومنه ﴾ — اسکی کرید حکمدار لرندن بر غدار حر یفدر .

بو آدم ( ۴۳۱۴ خ ) تاریخنده یعنی میلادک ییک ایکیوز سکسان سنه مقدمنده  
جاهیر یونانیه ایله متفقاً ( ترووا ) محار به سنه کیدوب اوراده اون سنه  
اوغراشدقدن و ( ترووا ) حکومتی محو و برباد و ممالکنی خراب و بیاب  
ایتد کدن صکره عودت ایدر کن بر فورتنه یه طوتلد یغندن سلامتله کریده وصول  
میسر اولدیغی حالده ایلك کوردیکی شخصی آله البحر اعتقاد ایتدیکی ( نبتون )

یاخود (پوسیدون) ه قربان ایده جکنی نذر ایلشیدی مجنون حریف فورته دن قور تیلوب کریده واصل اولدوقده انواع مسرتله هر کسدن اول استقبالنه چیقان اون سکر یاشنده کی کوزل اوغلنی یاتوروب قور ییاسی الیه قربان ایلدی و بوغدری سیبیله تبعه سی نزدنده منفور اولوب آز وقت ایچنده کندوسیده حکومتدن خلع و طرد اولندی .

§

﴿ آیدین ﴾ — از میرک جنوب شرقیسنده و یکریمی درت ساعت بعدنده تجارتکاه برشهردر بوشهر مرکز لواء اولدیغی حالده نامی منسوب بولندیغی ولایته دخی ویرلشدر دروننده متعدد جوامع شریفه و مساجد و تکایا و مکاتب و کلیسا واردر بورادن از میره دائماً شمندوفر ایشلمکده و کایتلو حبوبات و قوری انجیر و اوزم و زیتون و افیون و بویا و پلاموط و سائره کوندر یلوب اکثریسی خارجه صائلقده در . نفس ایدینک هواسی بر از آغرحه ایسهده اراضیسی غایت منبت و محصولدار اولدیغندن بین الاهالی اولرینه التون اوهسی تعبیر اولنور ویک چوق قیشی اولدیغندن باغچه لرنده لیمون و پورتقال حاصل اولور .

( ایدین ) بر مدت ملوک سلچوقیه و دولت علیه حایه سنده کچینان ( اولوج ) بکرنندن برینک اسمی اولدیغی جهتله متصرف اولدیغی ممالکه ( ایدین ایلی ) دیمشدر و صکره ( کوزلحصار ایدین ) دنیلوب شمندی کوزلحصار لغتی ده قالدیرمشدر .

بوراسی دولت علیه یه کچمکسزین امیری اولان ذات ( ۱۴۵۱ م و ۸۵۵ هـ ) تاریخنده کرمان و منتشا اوغلر یله دولت علیه علیهنه قرمان اوغلی ابراهیم بک ایله اتفاق ایلدیکندن سلطان ( محمد ثانی ) حضرتلری قونیه یه کیدوب مرقوم ابراهیم بکی تریه ایتدکن صکره ذکر اولنان ذاتلرک ممالکنی و او صرهده ایدینی دخی استیلا ایدرک ممالک دولت علیه الحاق ایلدی .

قره سی سنجاغی داخنده و ( اردک ) قصبه سنه اوچ ساعت مسافه ده دخی ( ایدنجق ) نامنده بر کوچک قصبه واردر .

§

﴿ ایران ﴾ — آسیای غربیده شرقاً افغانستان و بلوچستان و جنوباً

بصره کورفری وهرمز بوغازی و غرباً عراق عرب و کردستان و شمالاً  
ترکستان و بحر حزر ایله محدود ممالکک اسمیر ممالک محدوده مذکوره ننگ  
وسعتی طولاً بیگ ایکویز و عرضاً سکز یوز الی میلدن عبارت اولوب  
نفوسی بش ملیون بشیوز بیگ تخمین اولنمده و بونگ برملیونی مدنی وایکی  
ملیونی بدوی و سیار وایکی بیجق ملیونی اهالی قراظن ایلمکده در .

ایرانلرک اصلی بعض متأخرینک تخمیننه کوره وقتیه سنند طرفندن کلان  
(اریا) لردر و ایران نامی دخی اریادن محر فدر .

ایرانک اسکی تاریخی خرافات قبیلندن اولدیغی جهته شایان اعتماد و تحریر  
دکل ایسه ده تواریخ شرقیه ده محرر اولدیغی اوزره درت طبقه یه منقسم  
اولان ملوک ایرانه ننگ برنجی طبقه سی (پیشدادیان) دنیلان سلاله حکمرانی  
اولدیغنده و بونلرک برنجیسی (کیومرث) نامنده برذات اولوب ایچلرندن  
(چشید) و (یوراسب الضحاک) و (افریدون) و (افراسیاب) کبی  
شدید و شجاع پادشاهلر کلدیکنده شبه یوقدر و (کیانه) دنیلان ایکنجی  
طبقه (۴۸۸۵ خ) تاریخنده یعنی میلادک یدییوز طقوز سنه مقدمنده  
(کیقباد) نامنده برقهرمان یدیه تأسسس ایدوب (۵۲۶۴ خ) تاریخنده  
یعنی میلادک اوچیوز اوتوز سنه مقدمنده مشهور اسکندر رومینک غلبه  
جهانگیرانه سیله منقرض اولمش و اون طقوز سنه صکره مشار الیهک  
جزالرنندن (سلفقوس) یدیه (سلوسید) دولتی تشکل ایتشدر .

اشبو دولت (۵۳۳۸ خ) تاریخنه یعنی میلادک ایکویز الی الی الی سنه  
مقدمنه قدر دوام ایدوب تاریخ مذکورده بودخی منقرض اوله رق (ارشک)  
نامنده برصاحب خروجک اقدامیه اوچنجی طبقه اعتبار اولنان دولت  
(اشکاینه) و (۲۳۰ م) تاریخنده (اردشیر) معرفتیه دردنجی طبقه  
اعتبار اولنان دولت (ساسانیه) ظهوره کادی اشبو ساسانلرک یکرمی  
طقوزنجی پادشاهی اولان اوچنجی (یزدجرد) (۶۵۲ م و ۳۲ ه) تاریخنده  
اسلامک هجومیه مغلوب و دولتی منقرض اولدی و ممالک ایرانه (۸۷۱ م  
و ۲۵۸ ه) تاریخنه قدر خلفای اسلامیه معرفتیه اداره اولندی و اندنصرکه  
سمت سمت (بنی طاهر) و (بنی لیث الصفار) و (آل سامان) و (آل بویه)  
کبی طوائف ملوک اداره لرنده و مؤخرأ ملوک (غزنویه) و (الب تکین)

و (سبکتکین) وسلاجقه ایرانیه تصرف فرنده قالدی و (۱۱۵۴ م و ۵۴۹ هـ) تاریخنده ملوک غوریه یاخود خوارزمیه حکمنه و (۱۲۲۴ م و ۶۲۱ هـ) تاریخنده سلاله جنکیزیه وبعده ایلیخانیه اداره سنه انتقال ایتدی و (۱۴۰۶ م و ۸۰۹ هـ) تاریخنده آق قیونلی و صکره قره قیونلی ترکمانلری و (۱۵۰۰ م و ۹۰۸ هـ) تاریخنده ملوک صفویه تصرف ایدوب (۱۷۴۷ م و ۱۱۶۰ هـ) اختلالنده بعض ولایاتی افغانیلره و بلوچیلره کچوب برطاقم ترکستان خانلری دخی استقلالنی اعلان ایتدی و (۱۸۲۷ م و ۱۲۴۳ هـ) تاریخنده روان و آذر بایجان جهتلرندن خیلی ممالک روسیه انتقال ایلدی . شمعی سلطنت ایرانیه قچار عشیرته منسوب سلاله حکمرانی یدنده در .

ایران ممالکی وقتیه ممالک تمدنه نک مرکزی اولدیغی کبی تقلبات سیاسیته نک دخی میدانی اولدیغندن بالاده خلاصه کوسترلیدیکی وجهله پک چوق الله پکمش و نیجه دفعه خراب و معمور و ینسه خراب اولمش و بیوک شهرلر کوچیلوب کوچک شهرلر بیومشدر .

ایرانلر مبالغه لی سوزی و عظمتی سورلر لکن شدت و ذکا و فطانتلرینه دیه جک یوقدر .

ایران ولایتلری	مرکز ولایات
۱ عراق عجم	طهران
۱ طبرستان	دماوند
۱ مازندران	مازندران
۱ کیلان	رشت
۱ آذربایجان	تبریز
۱ کردستان عجم	کرمانشاه
۱ خوزستان	شستر
۱ فارس	شیراز
۱ کرمان	کرمان
۱ کوهستان	کوه
۱ خراسان غربی	مشهد

﴿ ایرلنده ﴾ — انکلتره دولتی ممالکندن بریتانیا اطه سنک جهت

غریسند و جوارنده بر جسم اطه در . بواطه شمالدن جنوبه طوغری در تیوز الی و شرقدن غربه طوغری ایکوز سکسان کیلو مترو وسعتنده اولوب اهالیسی مقدا دهها زیاده اولدیغی حالده شمعی بش ملیون اوچیوز بیک راده سنده ایسه ده اکثریسی فقیر و حال بدوئیده و همان کافه سی قتولک مذهبنده در و مقر اداره سی ( دویلین ) شهر بدر .

ایرلنده نك اراضی و مرعاسی ایجه ایسه ده بطاقلغی و رطوبتی چوقدر ایرلنده مقدا مستقل بر قرالقی ایکن نیجه سنه ل محارباتدن صکره ( ۱۳۶۱ م و ۷۶۳ هـ ) تاریخنده انکلتره جایه سنی قبوله و ( ۱۸۰۰ م و ۱۲۱۵ هـ ) تاریخنده بتون بتون انقیاده مجبور اولدی .

شمعی ایرلنده جزیره سی درت ایالتسه و اوتوز ایکی قوتلغه منقسمدر قرا اهالیسی کمال فقر و احتیاجلرندن بیانی پاتنه اکیله و قصبات اهالیسنک اکثریسی بزطوقومق کبی عادی صنعتلره کچنمکده در .

§

﴿ ایرن ﴾ — استانبول ایمپراطور یچه سیدر . بوقزک اصلی اتنلی

ونسلی مجهول اولدیغی حالده کمال عقل و ذکا و حسن و آن و ادا ایله کسب اشتهار ایلدیکندن ایمپراطور ( قسطنطین ) در سعادتته کتوردوب نائل وصال اولق ایستدیسده امکان بوله مدیغی جهته ( ۷۶۹ م و ۱۵۲ هـ ) تاریخنده اوغلنه عقد ایتمشیدی بر مدت صکره مومی ایله قسطنطین و متعاقباً ایمپراطور اولان اوغلی یعنی مرقومه نك زوجی وفات ایتمکله ایمپراطورلق مرقومه نك اوکی اوغلنه قالب کندوسی دخی وصی انتخاب اولندی لکن براز صکره مرقومه نك اقبالی ادباره منقلب اوله رق خلقای عباسیه دن ( هارون الرشید ) ک بعض تکالیف مهمه سنی قبول ایتمیکی و وصیسی اولدیغی چوجغنی نعمت بصردن محروم ایلدیکی جهته بدنام اولدی و آرزمان ایچنده باش خزینه داری معرفیه تختدن ایندیریلوب مدلو جزیره سنه دفع ایلدی و اوراده وفات ایدنجیه قدر ایپلک اکیروب عمرینی مذلت و سفالتله کچوردی . مرقومه نك بوقدر غدیری میدانده ایکن روملرک بونی اعزه صره سنه قویوب



هرسنه اغستوسك اون بشنجی كونی یورطیسنی طوتلمری شایان استغرابدر .  
§

﴿ ایزدین ﴾ — یونانستان شمالیده ( فوکیس ) سنجاغنك مقر  
ادارهسی اولان وشمدی ( زیتونی ) دنیلان شهردر . بوکا ( لامیا ) دخی  
دیرلر . محل مذکورده بونامده برده کورفز واردر .  
§

﴿ ایزلاندا ﴾ — یاخود ( ارسلاند ) — بحر محیط شمالیده واوروپا  
ایله امریقا آرهسنده ودانیمارقه دولتی جایهسنده بریوک اطهدر اهالیسی  
اللی بیک ایله یوز بیک آرهسنده اولوب جله سنك حسن حال و صداقت  
ومهمانوازلقلمری مشهوردر .

بو اطه التمش اویچ ایله التمش التی عرض شمالیده واقع اولدیغی حالده  
هواسی غایت معتدلدر بناء علیه اسوج دیارنده باشی صیقیلانلر بورایه  
هجرت وراحت ایدرلر لکن اوزرنده اون عدد ( وولقان ) واوتهسنده  
بروسنده چامور وطاش ایله قاریشق قینار صومنبعلری موجود اولدیغندن  
دائماً تهلکده بولنورلر .

§

﴿ ایزوورنیق ﴾ — بوسنه سراینك اون یدی ساعت شمالنده  
طولانی برشهردر . بو شهرك اوهسی استحکامات طبیعیه ایله محفوظ بر  
صورته اولدیغنه وکوکچك ایزوورنیق بیوک ایزوورنیق محافظی بولدیغنه  
بناءً موقعی غایت مهمدر . بوراسی ( ۱۴۶۲ م و ۸۶۷ هـ ) تاریخنده هرسك  
دوقه لغندن حرباً دولت علیه یه انتقال ایتدی و صکره برمدت اوستریالورك  
ید ضبطنده قالب ( ۱۶۸۸ م و ۱۱۰۰ هـ ) تاریخنده اهالیسنك همتیله  
استرداد اولندی .

§

﴿ ایساغوجی ﴾ — علم منطقدن برکتابدر مؤلفی ( اثیرالدین  
فضل ) یاخود ( اثیرالدین مفضل ) الابهری السمرقندیدر . اشبو  
( ایساغوجی ) نامی ابتدا کلیات خجس ایچون موضوع اولدیغی حالده مؤخرأ  
کتاب مز بورك عمومته اطلاق اولمشدر . قاضمیرك متنی اولان ( هدایه )  
نام کتساب دخی مؤلف مومی الیهکدر و قاضمیر حسین الیبیدینکدر .

( اثيرالدين ) ك وفاتى حقنده اختلاف اولندى بعضيلر ( ۱۲۶۱ م و ۷۶۰ هـ )  
 و بعضيلر ( ۱۳۰۰ م و ۷۰۰ هـ ) تاريخنده ديديلر .

ايساغوجى اوزرينه پك چوق شروح و حواشى يازلدى جمله دن برى  
 ( ۱۴۳۰ م و ۸۳۴ هـ ) تاريخنده وفات ايدن فاضل علامه شمس الدين محمد  
 بن حزة الفناينك شرح لطيف بلاغت رديفيدر مومى اليه بونى بركونده  
 كشيده سلك سطور تأليف ايلدى و بونك اوزرينه دخى ابو بكر بن عبد  
 الوهاب حلبي ( فرائد السنيه فى حل القوائد الفنايه ) ناميله و برهان الدين  
 بن كمال الدين ( فوائد البرهانيه ) ناميله حواشى يازدى .

سيد شريف جرجانى تلاميذندن ( ۱۴۵۷ م و ۸۶۲ هـ ) تاريخنده وفات ايدن  
 شريف نورالدين على بن ابراهيم شيرازى و ( ۱۵۶۱ م و ۹۶۹ هـ ) تاريخنده  
 ارتحال ايدن مصلح الدين مصطفى بن شعبان سرورى و فاضل مشهور عبد  
 اللطيف عجمى مثلوه فضلائك دخى بر چوق شرحلى واردر .

§

﴿ ايساق ﴾ — علمى يهود دندر و مسقط رأسى ( پورتكيز )

ولقى ( دون ابروانل ) در .

بو آدم علوم طبيه و فنون سائرده تحصيل كمال ايدرك اون اويچ جلدى جامع  
 بر كتاب يازدى و پورتكيز قرالى مانولك حسن توجهنى قرانه رق رتبه  
 وزارت و مشورت قرالى يه نائل اولديسه ده آره دن چوق كچمكسز ين قرال  
 مومى اليهك وفاتى و اوغلى ( دون جوانى ) نك جلوسى مناسبيله اولكى  
 اعتباردن دوشدى و بر آره لى اعداسنك تسميم افكارنده اولدقرينى اكلادىغى  
 كى اسپانيايه قاچوب يقاينى قورتاردى .

وفاتى ( ۱۴۶۵ م و ۸۷۰ هـ ) تاريخنده در .

§

﴿ ايكه ﴾ — ( شعيب ) عليه السلامك قومى اولان ( مدين )

اهاليسنك قرآن كريم ناطق اولديغى اوزره اسم مخصوصيدر .  
 ايكه نك اصل معناسى اورمانلق محل ديمكدر . ( ابجد ) و ( مدين ) و ( شعيب )  
 كله رينه دخى مراجعت بيوريله .

§

﴿ ايلبسان ﴾ — روم ايلنده مناستر ولايقنه ملحق ( دبره ) سنجاغى

داخلنده کوزل بر قضا مرکزیدر . بو قصبه ایچنده یکریمی بش جامع و مدرسه و سکر یوز دکان و اون ایکیک نفوس واردر و جوار قصبه ده اولان قابلیحه لر غایت شفالیدر . بوراده هر درلو حبوبات و پرنج و کوزل میوه حاصل اولور و اعلا اسلحه اعمال اولنور و ( اشقومی ) و ( جارنقه ) نهر لری شهرک اورته سندن نبعان و جریان ایلدیکندن کوزل بر منظره پیدا ایدر .

§

﴿ ایخان ﴾ — مغولستان شهنشاهی ( منکو ) قان ایران والیسی بولنان برادری ( هلاکو ) خانه ( ۱۲۵۳ م و ۶۵۱ هـ ) تاریخنده ایخان عنوانیه استقلال اعطا ایلدیکندن مومی الیهک حکومتنه ( دولت ایخانیه ) دنیلدی . دولت مشار الیها جیحون نهرندن مصره و اناتولی یه قدر نفوذینی اجرا اتمش و ( تبریز ) شهرینی مقرر سلطنت اتخاذا ایلمشدر .  
بو عنوان شرق ترکرینک یعنی ( هون ) ممالکنک جهت غربیسنده و ( سو ) حکومتی جایه سنده اولان طائفه نک ریسی ( توموش ) دخی و یرلمش و ( توموش ) بو عنوانه نائل اولدیغی ائنده زوجه سی دخی ( خاتون ) عنوانه نائل اولمشیدی .

ساله ایخانیه ( ۱۳۳۵ م و ۷۳۶ هـ ) تاریخنده ( ابوسعید بهادر ) ک وفاتیه انقراضه یوز طوتوب مؤخرأ ممالکی طوائف ملوک حالنه کیردی و اکثریسی جلا یریره انتقال ایلدی .

§

﴿ ایغازی ﴾ — ماردین و دیار بکر و حوالیسندنه نیم استقلال ایله حکومت ایدن ملوک ( آرتقیه ) دن ( نجم الدین بن آرتق بن اکسب ) ک عنوانیدر . بونک پدری وفات ایتدیکی زمان قرنداشی ( سقمان ) صدر حکومته اوتورمش و کندوسی بیت مقدس والیسی اولمش ایدی ( ۱۱۰۴ م و ۴۹۸ هـ ) تاریخنده برادری دخی وفات ایتدیکی کبی کلوب ماردین تخنه اوتوردی و برقاچ قلعه فتح ایلدیکی جهته سلطنت محمد سلچوقی طرفندن استقلال ویرلدی . اخلافی او چیوز اون برسنه حکومت سورمشدر . مومی الیهک سلطان مشار الیه و پدرینک سلطان ملکشاه سلچوقی یه پک چوق خدمتی واردر و هیچ برحمار به ده مغلوبیتی کورلما مشدر .

بیوک پدری (اکسک) نامیله مشهور ایسه ده صحیحی (اکسب) در .

§

﴿ ایلجه ﴾ — برغه قزاسنه ملحق بر قصبه در دیار بکرده دخی  
بونامده بر ملحه واردر بوملحه ده قرمزی طوز حاصل اولور .

§

﴿ ایلیریا ﴾ یاخود (ایلیریا) — اوستریا ممالکنک جهت غریبسنده  
اوج ایالتک نام عومیسیدر (تریسته) و (تیروول) ایالتلری دخی  
بوعومک داخلنده اولدیغی حالده جله سنه بردن (ایلیریا) سواحلی و  
(کوستلاند) دخی دیرلر .

بوممالک مقدا یونان ایلیریاسی و باربار ایلیریاسی ناملریله ایکی منقسم ایکن  
صکره رومالیره انتقالنده بوناملر برلشیدی و برمدت طونه وروم  
ایلیسک همان نصفه قدر شمولی اولدی لکن مؤخرأ اسلاو و مجارلرک  
حکومتلری میدانه چیققدده نام مذکور اونودیلوب فقط و ندیکولر  
(دالماسیا) جهتنده قالان نام مذکوری محافظه ایده یلیدی .

§

﴿ ایرالی ﴾ — اردک قزاسنه تابع ناحیه حکمنده بر جزیره  
صغیره نک اسمی اولوب صحیحی (امیرعلی) در بوناحیه قیشه الویریشلی  
خیلی صوغان یتشدرلر .

§

﴿ ایمه ره لی ﴾ یاخود (ایمه ره تی) — روسیه دولتک ممالک  
جنوبیه سندن معدود بر ولایتک مرکزیدر . بو ولایت شمالاً چرکزستانی  
تفریق ایدن قفقاس طاغلری و شرقاً کرجستان و جنوباً قارص و (منقریلیا)  
ایله محدود اولوب نفس ایمه ره لینک اهلایسی ارمنی و یهودی و (ایمه ریت)  
لردن عبارت اولق اوزره سکسان بیک تخمین اولنمده در و اراضیسی  
منبت و محصولداردر . بو ولایت بر آرهلق مستقلاً اداره اولنوب  
(۱۸۰۴ م و ۱۲۱۹ ه) تاریخنده دولت علیه جایه سنه پکدیسده  
مؤخرأ اهلایسی روسیه نک تشویقاتیله جایه مذکوره بی ترک ایلوب  
روسیه نک تابعیتی قبول ایلدیلر .

§

﴿ اینا کوس ﴾ — آئنه ده ( ارغوس ) حکومت قدیمه سنک  
مؤسس اولیدر . بو ذات فی الاصل فیکه اها لیسندن اولوب ( ۳۷۰۰ خ )  
تاریخنده یعنی میلادک بیک سکز یوز طقسان درت سنه مقدمده فیکه  
چو بانرندن و مصر سر سر یلرندن طو پلادیغی بر چوق آدم ایله یونانستانک  
اولوقت ( ارغولید ) دنیلان مورده جهتنه هجرت ایتدی و اورمانلر  
ایچنده و وحشی برحالده یشایان اها لی قدیمة یونانیه یی تدریجاً جلب و جمع  
وزراعت و فلاحتی و آتش یاقوب اتمک طبخ اتمکی تعلیم و جله سنک ریاستنی  
درعهده ایلدی التمش سنه صکره وفات ایلدکده اوغلی و اخلافی بر چوق  
زمان حکمدارلق ایدوب مؤخرآ ( بلاشر ) نامنی الان ملت ظهوره کلدی .  
( ارغولیس ) و ( قورینت ) شهرلینی ابتدا تأسیس ایدن ذوات اشبو  
( اینا کوس ) ک احفادیدر .

§

﴿ اینجولی چاوش ﴾ — رجال دولت علیه دن خوشکو و حاضر  
جواب برذاتدر و اسمی مصطفادر . دولت علیه ایله عقد مصالحه ایچون  
ایران شاهی ( عباس خان ) طرفندن در سعادتیه کلان ایلیچی ( ۱۶۱۳ م و  
۱۰۲۰ هـ ) تاریخنده اکمال مأموریتله عودت ایدرکن طرف دولت علیه دن  
دخی لسان فارسیه واقف اولدیغیچون بو ذات ترفیق و اعزاز اولمش  
و حسب الایجاب اوراده بر مدت اقامت اتمش ایدی .

§

﴿ اینجه قره صو ﴾ — روم ایلنده مناستر ولایتنه تابع ( قارستوریا )  
جوارندن چیقوب ابتدا جنوب شرقیه و صکره شمال شرقیه طوغری  
جریان و ایکویز الی کیلو مترو مسافه قطع ایدرک سلانیک کورفرزنده بحره  
منصب اولان نهرک اسمیدر .  
اناطولیده قیصریه نک جهت غریبسندن قزل ایرماغه منصب اولان بر کوچک  
نهره و بونهرک اوزرنده اولان بر شهره دخی ( اینجه صو ) دیرلر .

§

﴿ اینه بولی ﴾ — قسطمونی شهرینک جهت شمالیسنده و اون سکز

ساعت بعدنده وقره دکز ساحلنده بر قضا مرکزیدر بوراسی قسطنیونی  
سنجاغنگ اسکله سی اولدیغندن واپورلرک اوغراغیدر و ملحقایله برابر  
(اینه بولی) ننگ نفوسی یکریمی سکز بیک راده سننده اولوب یوز اون یدی  
جامع و مسجدی و بش مدرسه سی و طقوز تکیه و زاویه سی و یوز قرق مکتبی  
و طقوز جامی و برچوق اورمانی و کوره قصبه سننده بر باقر معدنی واردر .

§

﴿ اینه روز ﴾ یاخود (آیازوس) — سلانیک شهرینک جنوب  
شرقیسنده و کسندره جوارنده بر شبه جزیره در بوجزیره اون درت  
ساعت طولنده و ایکی اویچ ساعت عرضنده بر دیل اولوب اوزرنده یکریمی  
سکز عدد مناستردن بشقه اینه ویدی سکز بیک بیکار پاپاس و خدمه دن ماعدا  
کسبه یوقدر . بو پاپاسلرک کافه سی روسیه ممالکنندن و سائر روم مملکتلرندن  
ثواب ایچون کوندریلان پاره لر ایله و سلانیک سنجاغنی داخلنده بولنان اللی  
سکز عدد چغلیکات و اراضی موقوفه وارداتیله کچینورلر و بعض  
موسلمرده اوتهدن برودن زوار کلوب حال تجرد و ازواده بولنان مذکور  
پاپاسلره امانه ایدرلر . دولت علیه دخی بونلری بر کوچک ویرکوی مقطوعدن  
بشقه کافه تکالیفدن معاف طومتشدر .

اشبو پاپاسلردن بر طاقنگ بوش طور مامق ایچون اغاجدن قاشق و قشاغی  
و متکاکی شیر اعمالیله زوار و سائر یه اهدا و بو صورتله تعیش ایلدکلری  
دخی مسموعدر .

§

﴿ اینه کول ﴾ — خداوندکار ولایتی داخلنده و یکی شهر قصبه سنک  
جهت جنو بیسنده و بروسه یه سکز ساعت مسافه ده بر مرکز قضا در  
بو قضانک یمش التی قریه سی و درت بیک خانه سی و ازدر .  
اورادن کچن بر کوچک نهره دخی اینه کول نهری دیرلر .  
ایدین سنجاغنی داخلنده دخی بونامده بر قصبه واردر (اینه آباد) بشقه .

§

﴿ اینه س ﴾ — کوزلک و بدبختلک ایله مشهوره بر قادیندر . بو قادین  
پورتکیزده اورته حاللی بر فاملیادن اولدیغنی حالدیه پورتکیز قرالی دردنجی

( الفونس ) ك اوغلى ( دون بدور ) عشق ايدرك پدرندن كيرلى اوله رق كندوسنه نكاح ايتشيدى آرهدن براز زمان چكدكن صكره پدرى كيفيتى خبر الوب تظليقى امر ايتكله ( دون بدور ) راضى اولمديغندن پدر ايله اوغل اره سنه صغوقلق كيردى و بروقت فرصته يعنى دون بدورك قوناغنده بولمديغى بر زمانده الفونس خفياً و تبديلاً آدم كوندروب بچاره قزى اعدام ايتديردى ( ۱۳۵۵ م و ۷۰۷ هـ ) تاريخنده مرقوم الفونس وفات ايدوب يرينه اولوقتدنبرو كوزياشى دوكلده اولان مرقوم ( دون بدور ) چكديكى كې مقدا پدربنى اغفال ايدرك معشوقه سنك قاننه كيرن كيسه لرى بولديروب بربر اعدام ايتدير دكن صكره مظلومه مرقومه يى مزاردن چيقارتوب و باشنه بر تاج كيدر وب و كلاسنه تعظيم ايتدير مشدر .

§

﴿ ايوالق ﴾ — خداوندكار ولايته تابع قره سى سنجاغى داخنده وادرميد خليجى درونده بر قضا مر كزيدر . بورادن بر وسه يه اللى طقوز ساعتده واريبور و جله سى خرستيان اولق اوزره اون بشيك نفوسى تخمين ايديلور . بيغا سنجاغنه تابع ( ايواجق ) ناحيه سى يوزدن زياده دكلدر و جامع و مدرسه سى واردر .

§

﴿ ايوان ﴾ — ياخود ( ايوان كسرى ) — اكاسره نك پاي تختى اولان مدين شهرنده و دجله نهرينك جانب شرقيسنده برجسيم بنا ايدى بونك بانيسى حقنده اختلاف واردر بعضيرى ( شاپور ذوالاكتاف ) ك و بعضيرى ( نوشروان ) كدر ديرلر ابن خلدون شاپورك بناسى اولديغنه ذاهب اولمشدر

بونانك وسعتى حقنده دخى مبالغه لى روايتلر چوق ايسه ده صحیحى طولاً و عرضاً طقسان و ارتفاعاً سكسان ذراعدن عبارتدر . خلفاى عباسيه دن ( ابو جعفر المنصور ) بغدادى بنا ايتديرديكى زمان ايوان مذكورى هدم و انقاضنى جلب مراد ايتدكه وزيرى خالد برمكى خلق بونى سرك عجزيكزه و برر بو ايسه شانكزه خلل كتورر ديديكى جهتله ترك ايدوب ( شاپور بن اردشير ) ك ينه مدينه بنا ايتدير يكى ( قصر ابيض ) ك هدمنى امر

ایلدیسه ده هدم ایچون وقوعبوله جق مصرف آله جق انقاضک یکیدن  
اعمالندن زیاده یه واره جغی بالتجربه اکلاشلدیغندن بودخی ترک اولندی .  
علی روایة ( طاق کسری ) نک اوزرنده بعض ملوک و نوشروانک و محاربه  
ایدیلان انطاکیه ملکینک رسملری ودها برچوق تمایل و تصاویر و ارامش .  
( ۶۳۷ م و ۱۶ هـ ) تاریخنده ( سعد بن عبادہ ) حضرتلری مداین شهرینی  
فتح ایتدکده طاق کسراده بلافاصله سکر رکعت صلاة فتح قیلوب غزاة  
مسلمین ایله تکبیر کتوردی لکن تمایل مذکوریه طوقندی .

ایوان مذکور حقنده ابن حاجیک ایدوکی روایت اولنان ایات

یا من بناه بشاهق البیان

انسیت صنع الدهر بالایوان

هندی المصانع والداکر والینا

وقصور کسرانا انوشروان

کتب الیالی فی زارها اسطرا

یدالبلی وانا مل الحدان

ان الحوادث والخطوب اذا سطت

اودت بكل موثوق الارکان

جلال الوله ابن بویه نک ایاتی

یا ایها المغرور بالدنیا اعتبر

بديار کسری فهی معتبر الوری

غنیت زماناً بالملوک واصبحت

من بعد حادثة الزمان کما ترى

§

﴿ ایوب ﴾ علیه السلام — بن ( موصی ) بن ( راعویل ) —

سوریه ده ( عوص ) ولایتده تولد ایدوب حوران و پاشنه اها لیسنه بعث  
وارسال یورلمش بریغمبر ذیشاندر و ( لوط ) علیه السلام ککریمه  
زاده سیدر . بعضیلری جبل عیسوده ( جزه ) نام محلده تولد ایتدی دیدیلر  
و بعض مورخلر غورالاردن دیارینه حکم ایدن ( یواب بن زراخ ) ایوب  
علیه السلامدر ظن ایلدیلر .



هر نه حال ایسه بولندیغی مملکتک اذ زنگینی و معتبری و خاندانی ایدی کندوسنک اون نفر اوغلی ویدی بیک قیونی و اویج بیک دوهسی و بشیوز چفت او کوزی و مواشی سائرهسی و بونلری اداره و زراعت ایچون بر چوق خدمهسی اولدیغی حالده من طرف الله امتحان ضمنده اولاد و اموال و مواشی و سائرهسی از وقت ایچنده کاملاً فوت و تلف اولدی او یغونسز علتیه مبتلا اولهرق بر قایچ سنه دوام ایتدیکندن احبا و اصدقا سی سمتیه اوغرامقدن کسلمدی لکن مشار الیه مبتلا اولدیغی اشبو بلایانک کافه سنه صبر و یا کلش نصیحت ایدنلرک نصیحتلرینی حکیمانیه رد ایدرک (رب انی مسنی الضر وانت ارحم الراحمین) دعاسیله جناب حقّه مناجاتدن آیرلمدیغیچون جناب حق کمال لطف و عنایتیله صحت و اولکینک ایکی مثلی اولاد و اموال احسان بیوردی و یوز قرق سنه دهها عمر سوردکن و درت بطن اولاد و احفادینی کوردکن صکره (۳۷۸۷ خ) تاریخنده یعنی میلادک بیک سکز یوزیدی سنه مقدمنده وفات ایلدی.

§

﴿ ایوب ﴾ الانصاری — اصحاب کرامدندر . ( خالد ) کله سنه

نظر بیوریه .

§

﴿ ایوبیه ﴾ — شام و موصل اتابکی ( نوزالدین ) ک برادر زادهسی سلطان ( صلاح الدین ایوبی ) ( ۱۱۷۳ م و ۵۶۹ ه ) تاریخنده مضرده تشکیل ایلدیکی حکومتک اسمیدر . مشار الیهک اخلافی مضرده و شام و موصل و بلاد سائرده سکسان سنه حکومت سورمش و برآرهلوق ارمنستانه دخی مالک اولمشدر .

بونلرک مصر و شام جهتلرنده اولان سلطنتی ( ۱۲۵۱ م و ۶۴۹ ه ) تاریخندن صکره ملوک اتراک یدینه کچدیسهده حلب و حجا و ارمنستان و یمنده کی حکومتلری بر از مدت دهها امتداد اولمشدر . ( صلاح الدین ) کله سنه نظر بیوریه .

§

﴿ آینه ﴾ — ( مرایا ) کله سنه نظر بیوریه .



طوغریدن طوغری به اداره اولنان ممالک دولت علیه

( در حرف الف )

در ولایت	در لواء	در قضا	اسم و اعتباری
يمن	تعز		آب قضا
قسطمونی	سینوت		ابانه ( کینولی ) ناحیه
بغداد	حله		ابدیسر ناحیه
قونیه	تکه	اقسقی	ارادی ناحیه
شهر امانتی	ازمید		آب صاقی ناحیه
کرید	أسفاکیا		آقرون ناحیه
دیار بکر	دیار بکر		آبکور و پیرامکی ناحیه
بغداد	بصره		ابوالحصب ناحیه
طر بزون	طر بزون	کره سون	ابوالخیر ناحیه
موصل	موصل		ابو سلیمان عشرت
معموره العزیز	معموره العزیز		ابوظاهر ناحیه
يمن	حدیده		ابوعریش قضا
بغداد	بغداد		ابوغریب ناحیه
بغداد	بغداد		ابو کلثک ناحیه
حلب	زور		ابو کمال قضا
يمن	عسیر		ابها ناحیه
دیار بکر	دیار بکر		آناق ناحیه
ایدین	ایدین		آنجیه ناحیه
طر بزون	لازستان		آتنه قضا
بغداد	نجد		احسا ( احسا ) قضا
ادرنه	قرق کلیسا		اخته بولی قضا
بتلیس	بتلیس		اخلاط قضا
ادرنه	کو ملجنه		اخچ چلی قضا
قره سی	قره سی		ادرمید قضا
ادرنه	ادرنه		ادرنه مرکز ولایت
حلب	حلب		ادلپ قضا
پایزید	پایزید		ادمانلو ناحیه
حلب	اورفه		ادیم اغاج ناحیه
قسطمونی	قسطمونی		آراج قضا
ایدین	ایدین		آریاز ناحیه
سوریه	حوران	عجلون	ازید ناحیه
سیواس	توقاد		اربعه ( صونیس ) قضا
وان	وان		ازبلی ناحیه

در ولایت	در لواء	در قضاء	اسم و اعتباری	
موصل	کركوك		قضا	ازبیل
سیواس	توقاد		ناحیه	آرتق آباد
وان	وان		قضا	ارجیش
طربزون	لازستان		ناحیه	ارخوی
قره‌سی	قره‌سی		قضا	اردک
طربزون	طربزون		قضا	اردو
حلب	حلب		ناحیه	اردو
ارضروم	ارزنجان		مرکز لواء	ارزنجان
ارضروم	ارضروم		مرکز ولایت	ارضروم
وان	موش		ناحیه	ارطوی علیا سفلا
اطنه	ایچ ایل	قره طاش	ناحیه	ارغادی
معموره العزیز	ارغنی		مرکز لواء	ارضی معدنی
معموره العزیز	معموره العزیز		ناحیه	ارغوان
قونیه	قونیه	ایلیغین	ناحیه	ارغید خانی
یانیه	ارگری		مرکز لواء	ارگری
ادرنه	تکفور طاعی	تکفور طاعی	قضا	ارکلی
قسطنونی	بولی		قضا	ارکلی
قونیه	قونیه		قضا	ارکلی
موصل	سلیمانیه		ناحیه	ارماوه (حرم آباد)
اطنه	ایچ ایل		ناحیه	ارمناک
خداوند کار	کوتاهیه		ناحیه	ارمودلی
قره‌سی	بیغا		ناحیه	ارن کوی
سوریه	طرابلس شام	جزیره	ناحیه	ارواد
بتلیس	سعد		قضا	آروا
حلب	حلب	ادلپ	ناحیه	اریحا
قسطنونی	قسطنونی		ناحیه	ازطوای
شهر امانتی	ازمید		مرکز لواء	ازمید
ایدین	ازمیر		مرکز لواء	ازمیر
قوصوه	اسکوب	کیلان	ناحیه	ازمیر نیک
دیار بکر	ماردین		ناحیه	ازناور
خداوند کار	بروسه	یکیشهر	ناحیه	ازنبق
ایدین	ازمیر		ناحیه	ازینه ایاسلوغ
قره‌سی	بیغا		قضا	ازینه تازطاعی (بازار)
ایدین	ایدین	ایدین	ناحیه	ازینه لادقیه (سرای)
قونیه	اسپارته		مرکز لواء	اسپارته (حمید)
مناستر	دبره		ناحیه	اسباط

در ولایت	در لواء	در قضاء	اسم و اعتباری	
ارضروم	بایورد		قضا	اسپر مع طورطوم
کرید	لاشید		ناحیه	اسپر لائقه
قونیه	قونیه		قضا	اسپکشان (آت چکن)
مناستر	کوریمه		قضا	استاروه
استانبول			مرکز سلطنت	استانبول
کرید	اسفاکیا		ناحیه	استانبول
جزایر بحر سفید	ساقز		قضا	استانکوی
انقره	انقره	چبق اباد	ناحیه	استانوز
قونیه	تکه		ناحیه	استانوس
جزایر بحر سفید	ساقز	استانیکوی	ناحیه	استر پالیلا (اوستر بالیه)
سلانیک	سلانیک		قضا	استرومجه
سلانیک	سلانیک	وودینه	ناحیه	استروه
سرفیجه	سرفیجه		ناحیه	استروه (استروه)
قسطنونی	سینوب		قضا	استفان (ساحل)
کرید	لاشید		قضا	استیه
خداوندکار	قره حصار	بولو ادین	ناحیه	اسحاقلو
کرید	اسفاکیا		مرکز لواء	اسفاکیا
سیواس	قره حصار		ناحیه	اسفکسر
یاچه	برات	برات	قضا	اسقراپار
ادرنه	کوملجینه		قضا	اسکیجه (اسکیجه)
قسطنونی	قسطنونی		قضا	اسکلیب
بغداد	حله	سماوه	ناحیه	اسکندریه
بغداد	بغداد		ناحیه	اسکندریه
حلب	حلب		قضا	اسکندرون
قوصوه	اسکوب		مرکز لواء	اسکوب
قسطنونی	بولی		ناحیه	اسکوبی
قونیه	قونیه		ناحیه	اسکی ایل
ادرنه	کوهلجینه		قضا	اسکیجه
ایدین	منتشا		ناحیه	اسکی حصار
خداوندکار	کوناهیه		قضا	اسکی شهر
موصل	سنجانیه		عشیرت	اسماعیل
قوصوه	اسکوب		قضا	اشتب
اشقودره			مرکز ولایت	اشقودره (اسکندریه)
ایدین	صارو خان		قضا	اشمه
ایدین	منتشا		ناحیه	اشن
سیواس	سیواس		ناحیه	اشودی

در ولایت	در لواء	در قضاء	اسم و اعتباری	
طرابلس غرب	جبل غریبه		ناحیه	اصابع کر به
اطنه	جبل برکت		قضا	اصلاحیه
خداوندکار	کوتاهیه		ناحیه	اطراف شهر
خداوندکار	بروسه		قضا	اطرانوس
ایدین	صاروخان		قضا	اطله
حلب	مرعش		ناحیه	اطهالی
انقره	انقره		ناحیه	اطهلی
اطنه			مرکز ولایت	آطنه
شهر امانتی		قامقاملق		اطهر
شهر امانتی	ازمید		قضا	اطه یازاری
حلب	حلب		ناحیه	اعزاز ترکان
حلب	حلب		ناحیه	اعزاز فلاح
بغداد	بغداد		ناحیه	اعظیه
شهر امانتی	ازمید		ناحیه	اغالو
وان	وان		ناحیه	اگاکس
اطنه	جبل برکت		ناحیه	آغجار
موصل	سلیانیه		ناحیه	آغچهلر
قونیه	اسپارته	اکردیر	ناحیه	آغروس
ادرنه	کلیدولی		ناحیه	اغریجان
ایدین	منتشا		ناحیه	اغریدوس
سلانیک	سلانیک	سلانیک	ناحیه	اغستوس
قونیه	بوردور	بوردور	ناحیه	اغلاسون
معموره العزیز	معموره العزیز		ناحیه	اغین
طر بزون	جانیک		ناحیه	افراز
حلب	مرعش	البستان	ناحیه	افسوس
قونیه	اسپارته	قره اغاج	ناحیه	افشار
انقره	پوزغاد		عشیرت	افشار
قسطمونی	قسطمونی		ناحیه	افشاره
قسطمونی	قسطمونی		ناحیه	افلانی
قسطمونی	بولی	کوش اباد	ناحیه	آفنی
شهر امانتی	ازمید	طاشکبری	بازی	آق اووه
اشقودره	اشقودره	بو قه	ناحیه	اقباله
طر بزون	جانیک		ناحیه	آق چای
قره سی	پیغا		ناحیه	اقچه اباد
طر بزون	طر بزون		ناحیه	اقچه آباد
اطنه	ایح ایل		ناحیه	اقچه آباد

در ولایت	در لواء	در قضاء	اسم و اعتباری	
اشقودره	اواخری	تیران	ناحیه	اقبجه حصار
ایدین	از میر		ناحیه	اقبجه شهر (سوکه)
قسطمونی	بولی		ناحیه	اقبجه شهر
قونیه	قونیه	اسکی ایل	ناحیه	اقبجه شهر
دیار بکر	ملاطیه	ملاطیه	قضا	اقبجه طاغ
اظنه	اظنه		عشیرت	اقبجه قیونلی
ایدین	صاروخان		قضا	آق حصار
شهر امانتی	از مید		ناحیه	آق حصار کیوه
اشقودره	اشقودره		قضا	آق حصار (اقبجه حصار)
قونیه	نیکده		قضا	اقسرای
قونیه	تکه		قضا	آفسکی (نواحی)
قونیه	قونیه		قضا	آق شهر
سیواس	قره حصار		ناحیه	آق شهر اباد
قسطمونی	کنگری		عشیرت	آق صاجلی
خداوندکار	خداوندکار		ناحیه	آق صو
سیواس	اماسید		ناحیه	آق طاغ
انقره	یوزغاد		قضا	آق طاغ
انقره	یوزغاد		ناحیه	آق طاغ (معدن)
قسطمونی	قسطمونی	زغفرانبولی	ناحیه	آق طاش
قسطمونی	قسطمونی		ناحیه	آق قیا
قسطمونی	سینوب		ناحیه	اق قیا
بتلیس	سعد		ناحیه	اق قیس
قسطمونی	بولی		ناحیه	اق کوپری
انقره	انقره		ناحیه	آق کوپری (قوی همایون)
طر بزون	طر بزون	کره سون	ناحیه	اق کوی
سوریه	شام	وادرا تعجم	ناحیه	اقلیجه
سوریه	شام		ناحیه	اقلیم البلان
سوریه	بیروت	صیدا	ناحیه	اقلیم الشوم
اشقودره	اشقودره		ناحیه	اقوه
قوصوه	یکی بازار		قضا	اقوه
شهر امانتی	از مید	حنیق	ناحیه	اقیازی
قسطمونی	قسطمونی		ناحیه	اق یورک
قسطمونی	قسطمونی		ناحیه	اکدیر
قونیه	تکه	المالو	ناحیه	اکدیر
قونیه	اسپارته		قضا	اکردیر
مناستر	مناستر		قضا	اکری بوجاق

در ولايت	درلواء	در قضاء	اسم و اعتباری
قوصوه	اسكوب		ناحيه
خداوندكار	كوتاهيه	سماو	ناحيه
موصل	كركوك		عشيرت
معموره العزيز	معدن ارغني		ناحيه
معموره العزيز	معموره العزيز		قضاء
قسطنوفی	بولی		ناحيه
ايدین	ازمير		ناحيه
طربزون	چاتيك	اوينه	ناحيه
طربزون	چاتيك	باقره	ناحيه
ايدین	صاروخان		قضا
	سرفيجه		قضا
قونيه	قونيه	خادم	ناحيه
سوريه	حاجا		ناحيه
يانيه	پرهوزه	پرهوزه	ناحيه
موصل	سليمانيه		ناحيه
حكاري	الباق		مرکز لوا
جزایر بھر سفید	ردوس	سومبكي	اطه
بغداد	حله		ناحيه
حلب	مرعش		قضا
شهر امانتي	ازمید		ناحيه
بغداد	حله		ناحيه
موصل	كركوك		ناحيه
خداوندكار	كوتاهيه	كوتاهيه	ناحيه
حلب	حلب	انطاكيه	ناحيه
يمن	صنعا		ناحيه
ارضروم	بايزيد		قضا
بغداد	بغداد		ناحيه
قونيه	تسكه		قضا
اطنه	ايح ايل		ناحيه
حلب	حلب		ناحيه
موصل	موصل		ناحيه
اطنه	اطنه		ناحيه
سيواس	قره حصار		ناحيه
معموره العزيز	ارغني	سيورك	عشيرت
كريد	حانيه		ناحيه
سوريه	عكا		ناحيه
			اكري دره
			اكري كوز
			اكو
			اكيل
			اكين
			الايلى
			الاجاطى (اينه اباد)
			الاجام
			الاجام
			الاشهر
			الاصونيه
			الاطاخ
			الاکراد
			الامرئ
			الان
			الباق
			اكباكي
			البدير
			البستان
			الب صوفي
			البوجوادير
			التون كوپري
			التون طاش
			التون اوزي
			الحدا
			الشكر د (طهراق قلعه)
			القائم
			المالو
			الماطاخي
			المصرين
			الموس
			الوانلي
			الوجره
			الياطلو
			اليكان
			ام الم

در ولایت	در لواء	در قضاء	اسم و اعتباری	
کرید	رسمو		قضا	اماری (اماریه)
سیواس	اماسیه		مرکز لوا	اماسیه
ایدین	ایدین		ناحیه	اماسیه
قسطنونی	بونو		ناحیه	اماصری
بغداد	سامرا		ناحیه	امام دور
قره سی	قره سی	ادرهید	ناحیه	امرو د اباد
سیواس	سیواس		ناحیه	املاک
انقره	یوزغاد		ناحیه	املاک
خداوندکار	کو تاهیه		ناحیه	امو
خداوندکار	قره حصار		ناحیه	امیرطاعی
انقره	انقره		ناحیه	امیرل
اطنه	ایچ ایل		قضا	انامور (معموریه)
بغداد	بغداد		ناحیه	انبار
قونیه	بور دور		ناحیه	انجیری پازاری
جزایر بحر سفید	ساقز		ناحیه	انجیری
حلب	مرعش		ناحیه	اندرون
حلب	مرعش		قضا	اندرین
قونیه	نیکده	بور	ناحیه	اندوغی (اورته قیا)
مین	صنعا		قضا	انس (انس)
حلب	حلب		قضا	انطاکیه
قونیه	تکه		قضا	انطالیه
انقره			مرکز ولایت	انقره
انقره	قیر شهری		ناحیه	اوانوس
مناستر	کور یجه		ناحیه	اویار
بنغازی	بنغازی		قضا	اوجله
مناستر	مناستر		قضا	اوخی
ایدین	از میر		قضا	اوده مش
ادرنه	کامیولی		ناحیه	اوراشه (اورشه)
قسطنونی	قسطنونی		ناحیه	اورانیه
سیواس	قره حصار		ناحیه	اورته (نایلو)
سیواس	سیواس		عشیرت	اورته یاره
ادرنه	دیجوقه		قضا	اورته کوی
ایدین	صاروخان		ناحیه	اورغانلو (ایلجه)
سلانیک	درامه	قواله	ناحیه	اورفانو
طرابلس غرب	خنس		قضا	اورفله
حلب	اورقه		مرکز لوا	اورفه (رها)



در ولایت	در لواء	در قضاء	اسم و اعتباری
قونیه	نیکده		اورکوب
حلب	حلب		اورمانلق (زور)
حکازی	کواز		اورمان دوسکی چلدی
حلب	حلب	عیتاب	اورل
ایدین	ازمیر		اورله
حلب	حلب		اورو
طر بزون	طر بزون	اردو	اوزغره
ایدین	منتشا	مکری	اوزملو
قونیه	تکه	قرل قیا	اوزملیلی
ادرنه	ادرنه		اوزون کوپری
قسطمونی	قسطمونی		اوغلاق دره
طر بزون	لازستان		اوف
حلب	مرعش		اوفرحقلی
اطنه	ایچ ایلی		اوقاف
حلب	مرعش		اوجقی (عزالدینلی)
حلب	حلب		اوجقی
طر بزون	جانیک		اوکسه
قسطمونی	کنغری		اوکرمع (قارغی)
قسطمونی	زغفرانبولی	طوسیه	اوکوز
سوریه	بلقا	جماعین	اول
طرا بلس غرب	جبل غریبه		اولاد احمد
طرا بلس غرب	جبل غریبه		اولاد تبران
طرا بلس غرب	جبل غریبه		اولاد شبل
طرا بلس غرب	جبل غریبه		اولاد محمود
طرا بلس غرب	جبل غریبه		اولاد یوسف
اطنه	جبل برکت		اولاش
قسطمونی	قسطمونی		اولاق دره
طر بزون	طر بزون	اردو	اولوبک
قونیه	اسپارته		اوبوزلی
سیواس	قره حصار		اولوجره
قسطمونی	قسطمونی		اولوس
خداوندکار	قره حصار		اولوس
قسطمونی	بولی		اولوصو
قونیه	قونیه	اقشهر	اولوقشله (شجاع الدین)
خداوندکار	کوتاهیه		اولوکوبک
یانیه	برات		اولونیا

در ولایت	در لوا	در قضا	اسم و اعتباری	
ایدین	متشا		ناحیه	اوله
طر بزون	جانیک		قضا	اونیه
قره سی	قره سی	ادرمید	ناحیه	اونیه
ارضروم	ارضروم		قضا	اووه
درسم	خوزات		قضا	اووه جق
قسطنونی	کنگری		ناحیه	اووه جق
قسطنونی	بولی	بارطین	ناحیه	اووه یوزی
قره سی	قره سی		ناحیه	اوروندی
کرید	لاشید		قضا	اویانو
ایدین	ازمیر	برغه	ناحیه	ایازمند
اطنه	ایچ ایل		ناحیه	ایاس
ایدین	ازمیر	ازمیر	ناحیه	ایاسفید (کلرمان)
ایدین	ایدین	تیره	ناحیه	ایاسلوغ
انقره	انقره		قضا	ایاش
قسطنونی	سینوب		ناحیه	ایاندون
طر بزون	طر بزون		قضا	ایاصدی
جزایر بحر سفید	ساقز		قضا	ایصداره
ادرنه	کایدولی		ناحیه	ایصداله
قوصوه	ایپک		مرکز لوا	ایپک
اطنه	ایچ ایل		مرکز لوا	ایچ ایل
قره سی	قره سی	یاندرمه	ناحیه	ایدنچک
یانیه	یانیه		قضا	آیدونات (برامتیا)
ایدین	ایدین		مرکز لوا	ایدین
سیواس	سیواس		ناحیه	ایراک
قونیه	بوردور	قره اغاج	ناحیه	ایرله مع باو میجه
معموره العزیز	معموره العزیز		عشیرت	ایزولی
خداوندکار	قره حصار		ناحیه	ایشیقلی (شخیر)
جزایر بحر سفید	ردوس		ناحیه	ایفشاریونی (احم کریمه)
سوریه	حما		ناحیه	ایکی قبولی (حسیه)
مناستر	دبره		قضا	ایلیانسان
سیواس	سیواس	سیواس	ناحیه	ایلیکلوه
حلب	حلب		ناحیه	ایل بکلی
قونیه	قونیه		قضا	ایلقین
جزایر بحر سفید	ردوس		اطنه	ایلیاچی
ایدین	صاروخان	صاروخان	ناحیه	ایلیجه
ایدین	ازمیر	برغه	ناحیه	ایلیجه


در ولایت	در لواء	در قضاء	اسم و اعتباری
قره‌سی	قره‌سی	اردک	ناحیه ایمرالی (امیر علی)
جزایر بحر سفید	لمنی		اطه ناحیه ایمروز (امروز)
قسطمونی	کنغری		ناحیه ایناللو (بالو)
خداوندکار	کو تاهیه	اسکیشهر	ناحیه این اوکی
ایدین	صاروخان		ناحیه اینای
شهر امانتی	چتالجه		ناحیه اینجک
ایدین	ایدین		ناحیه اینجه
انقره	قیصریه		قضا اینجه صو
قونیه	قونیه	قره پیکار	ناحیه این صویه
ادرنه	کلیولی		قضا اینوس (ایتوز)
ایدین	ایدین		ناحیه اینه اباد
قسطمونی	قسطمونی		قضا اینه بولی
ادرنه	تکفورطاغی	تکفورطاغی	ناحیه اینه جک
سلانیک	سلانیک		قضا اینه روز
ایدین	صاروخان	الاشهر	ناحیه اینه کول
خداوندکار	پروسه		قضا اینه کول
قره‌سی	پتیغا		قضا ایواجق (قرلجه طوزله)
طر بزون	جانیک		ناحیه ایواجق
قره‌سی	قره‌سی		قضا ایوانق
معموره العزیز	معدن ارغنی		ناحیه ایوالو دره
قونیه	نیکده	اقسرای	ناحیه ایوب ایلی
قره‌سی	قره‌سی		ناحیه ایورندی
کرید	اسفاکیه		قضا ایو واسیل
طر بزون	طر بزون	کیره‌سون	ناحیه ایو واسیل
قونیه	نیکده	ارکوب	ناحیه ایه جک











A  
805

